

**DE PERFECTO
PRINCIPE AD
CLEMENTEM 8.
APOPHTEGMATA
CARD. P...**

Pietro Aldobrandini, Enrico Farnese





1229.

M

14-1. g. 29.

~~A VII C 82~~



De Perfecto Principe
A D
CLEMENTEM
VIII.

APOPHTHEGMATA
CARD. P. ALDOBRANDINI
IN QVIBVS ARS IMPERANDI
TENETVR INCLVSA

A B
HENRICO FARNESIO EBVRONE I.C.

*& Artis Oratoriae in Ticinensi Gymnasio, Regio
Interprete, in librum vnum congesta,*

ATQVE REGVM, IMPERATORVM,
ac sapientissimorum Heroum exemplis,

Ex omni antiquitate aucta, & locupletata.



TICINI, Ex Typographia Andreae Viani. MDC.

De Consensu Superiorum.



CLEMENS VIII. PONT. MAX.



CLEMENTI VIII.

APOPHTHEGMATA CARD.

P. ALDOBRANDINI

DE

PERFECTO PRINCIPE

PLENA AD BENE BEATEQ.

IMPERANDVM

DOCTRINÆ MVLTQVE

VRBANITATIS SALE

ASPERSA

HENRICVS FARNESIVS EBVRO


PVBLICÆ VTILITATIS

ERGO

EX PRISCÆ ANTIQVITATIS

MONIMENTIS RECOGNITA

NVNCVPAT DICATQVE.





PETRVS ALDOBRANDINVS S.R.E.
CARD.

• BIBLIOTHECA RAE
ROMA
• VITTORIO EMANUELE •

Quodd semper cum
ANTIQUISSIMA
ALDOBRANDINORVM
D O M O

CREVERIT RELIGIO, IN QVA ARS,
arxq; omnis fundata est Imperij,

AD PRAESTANTISSIMVM
Religione, & Pietate Cardinalem
P. ALDOBRANDINVM
Henricus Farnesius Eburo.



ARVM est, fateor, Cardinalis
Genere, ac virtute Amplissime P.
ALDOBRANDINE, in re-
bus operosis, vacare negligentia.
Habet enim cura etiam solers, &
diligens suos reprehensionis morsus,
& aculeos. Nam qui audet, quod
supra vires est, attendere: non tam videtur notam vitare
negligentia, quam in reprehensionem temeritatis in curre-
re. Quare ne error potius exeat, quam officium: mo-
dus adsit oportet. Statueram autem de te, hoc est, de opti-
mi Principis fabrica, & structura scribere: sed partim
orationis inopia, & ieiunitati diffusus: partim rerum à te

gestarum magnitudine territus, consilium abieci. Nam
exemplo instructus Charilli, cuius scripta, in laudatio-
ne, probri plus Alexandro Macedoni attulerunt, quàm
laudis: nihil ausus sum, quod impar est meis humeris,
in tanta rerum à te gestarum amplitudine, suscipere.
Cum igitur penderem animi, nec mihi viderer posse, sine
quasi iustitiæ vulnere, tuas laudes præterire: quia alteri,
quod debet, qui non reddit, sit iniustus: tum forte Papiæ
Reuerendiss. Generalis Carmelitarum HENRICVS
Sylvius summa tuæ in se beneficentiæ memor: vir acri in-
genio, pariq; virtute, & doctrina, qui summa te colit,
& observat benevolentia, ne animum abicerem monuit,
atq; ita me confirmavit, ut eo, qui me pungebat, omnino
quasi liberarit scrupulo. Res est, ait, neq; artis ad inue-
stigandum: neq; doctrinæ ad indicandum: sed tantum
consilij, & deliberationis ad suscipiendum. Nam AL-
DOBRANDINORVM virtus attrectatur, non
auditur: in manus sumitur, non procul apparet, eorumq;
gloria plena sunt uniuersa dicendi genera. Nec ipsa in-
anima mundi fabrica, de eorum laudibus muta est, &
elinguis, sed eius vocibus, præclara ALDOBRAN-
DINORVM facinora resonant omnia. Nam quem-
admodum olim Crotoniata, & Metapontini ex Pytha-
goræ domo, qui de vita migrarat, Dei templum fecerunt,
ut Pythagoram, quasi numen quoddam sempiterna co-
lerent memoria: ita ALDOBRANDINORVM
domus, cuius virtus, & gloria nullis, neq; Italia, neq;
Hispania, neq; Gallie sinibus clausa potest teneri, quasi
diuinitus

diuinitus facta est Gentium omnium schola, ac totius mundi arx munitissima, ne deinceps ante quam mundus, ALDOBRANDINORVM intereat memoria. Habes inquit sapientissimus ille Carmelitarum Antistes HENRICVS Syluius, non rerum testimonia: sed res ipsas loquentes. Ex ijs quippè virtutibus, pro camentis, erecta est ALDOBRANDINORVM domus, quæ non parum nostræ ætati: multum etiam æternitate quadam gloria, consulunt posteritati. placuit mihi eius iudicium. Nam id nemo, non ratum debet habere, quod ab eo, qui probatur ab omnibus, iudicatum est. Neque rem, sine culpa mihi videbar posse non suscipere. Nam cum Laus, merces sit virtutis, qui summas in ALDOBRANDINORVM genere virtutes, non laudat, alienum videtur retinere, non quod laudandum est, tacere. Urgebat tamen expostulans, quod Achilles non propter res ab eo gestas: sed propter rerum ab eo gestarum præconium, magna etiamnum floreret gloria: quod contra incredibiles ALDOBRANDINORVM virtutes, quibus continenter illuxit imperij gloria, obscurarit superior ætas quasi quadam muta, & tacita temporum iniuria. Quid multa? auctoritate commotus sapientissimi, ac integerrimi viri: non ingenij viribus fretus, hoc quicquid est oneris suscepi. is enim ille est HENRICVS Syluius Carmelitarum Antistes, tanta prudentia, pietate, & religione, tamq̃ singulari sapientia, ut nemo ab eius voluntate, & consilio possit, sine culpa recedere. At cum res ab ALDOBRANDINIS gesta, maxi-

ma sint historia: prudenter verò dicta, & responsa Cardinalis P. ALDOBRANDINI, summae artis, & ingenij: Historiam, illius Apophthegmate oblectatus, & doctrina, in aliud tempus reieci. Nihil enim latet, in priscae virtutis arcanis, quorum ille est peritissimus, quod non liceat plurima cum eruditionis suavitatem, & ingenij condimento, in hoc eius laconismo regustare. Nec mirum id quidem. Nam quanta quisque praestat sapientia, tanta eius ex oratione, instructio efflorescit, & doctrina, quando, ut quisque virtute sit praeclatus, ita loquatur. Cyrus itaque Xenophonticus, iam morti vicinus liberis suis optimam ex sapientum dictis, ac responsis doctrinae suppellectilem esse petendam, quasi thesaurum, testamentum reliquit. Non enim magis, aut Leo ex rugitu, aut pecus ex balatu, aut denique ex Barritu Elephas cognoscitur, quam mens Principis, & natura, ex vocis eius sonitu percipitur. Quare omnis fere Antiquitas, Agesilai: Epaminundae: Pyrrhi, aliorumque summorum Principum Apophthegmata: ideo commendavit memoriae, ut nullo unquam tempore, non viderentur esse superstitites, quasiq; adessent absentes, in omni rerum deliberatione audirentur loquentes. Sed quid ego haec? Quemadmodum Xenophon Socraticus, qui Platonis fuit amulus, Cyri iunioris Persarum Regis padium cum scriberet, patrem Cambysen inducit praeceptorem, cò, quòd non magis ars medendi ex medico, quam regendi disciplina, ex Rege sit haurienda: ita ego Amplissimum virtute, & sanctimonia Principem lubens delegi Cardinalem ALDOBRAN-

imperij instruitur. Ha autem omnes virtutes cum Aldobrandinorum generi quasi diuinitus desponsae sint, et destinatae, non potest ars imperandi, non quasi nexu, & mancipio illis fieri singularis, & propria. Hac autem ars & doctrina Aldobrandinorum, si ab ullo Apelle posset suo colore figurari, cerneretur in picta tabula; non solum ijs virtutum lineamentis expressa, quarum olim, & Solon apud Athenienses, & Lycurgus apud Lacedamonios, & Numa Pompilius apud Romanos, floruit gloria: sed etiam ijs sapientiae pigmentis colorata, quae aciem fugit ingenij; nedum oculorum. Quare felix, & perenne sit oportet Aldobrandinorum imperium. Nam quae sedes imperij nescit cadere, est religio. olim igitur mundi Imperium cum affectarent Romani, non ferro ad eius gloriam; sed religione sibi iter aperuerunt. Nec inconsulte id quidem. Nam quandiu, apud eos, tanti fuit inanis etiam cultus religionis, ut mulieres Romanae non vererentur, in deprecandis hostium periculis, templorum pavimenta, solutis crinibus verrere, semper creuit aduersus hostes Romanum imperium: ubi contra in eo cepit contra ius, fasque violari pietas, statim vis, ac robur omne cum religione cecidit imperij. Atque quoniam vexillum virtutum omnium, quibus sustentatur imperium, est religio, ideo, & Persae Regem suum, quasi numen adorabant, et Romani Pompilius Numam à numinibus colendis vocarunt, ut docerent, puto, neque Regnum sine Rege: neque Regem sine religione posse consistere. id omne certe quidem gloriosius Graci. ut ipsa vox ALDOBRANDINVS satis videtur

videtur docere. Nam eam, si ad vinum velimus refecare
^{ad dionem} cresco: ^{Apollonius} victoria: ^{novus} mens, quæ sedes est
sapientiae, & religionis interpretatur, quasi nihil sit AL-
DOBRANDINVS, nisi contra hostes crescens, ex
religione victoria. Gloriosum igitur est Aldobrandinorum
nomen: Gens verò cælestis, & propè diuina, ut quæ vi-
uens in terris, semper in cælo, cum Deo immortali visa sit
habitare. vetus est, in HORLANDO Aldobrandino
testimonium. Nam quadringentis iam antè annis, hic si-
bi non solum pietatem, sanctimoniam, ac religionem com-
parauit, sed etiam publicos pictatis, sanctimonia, ac reli-
gionis faustus omnes intra domesticos parietes aduexit.
Nec id, sine magna nominis sui, & famæ gloria. Nam
si laudatur Lycurgus, qui paruarum rerum sacrificia in-
stituit, ne ullus in sacrificijs peragendis, relinqueretur ex-
cusationi locus: quanta laude, & gloria debet in cælum
efferrî HORLANDVS Aldobrandinus, qui ut sa-
crificia passim fierent, multos religione institui iussit,
nec minimas opes erogauit? Hic ut facultates eius paupe-
ribus erogatas præteream: Florentia habet tanquam per-
enne sue clementia monumentum: Seruitarum Cano-
bium, quod vulgo Annunciata Virginis nuncupatur no-
mine. Nam cum in squalore, & inopia iacentibus,
nunquam dextram, ut aiunt, porrigeret, digitis clausis:
tum Seruitarum Patribus templi, & fundum, & fun-
damentum donauit, in quo augustimum Diuæ Virginis
MARIE Fanum, quod urbis Florentiæ decus est, &
ornamentum, etiamnum cernitur in cælum erectum. Is

autem

autem nunc iuris, nunc earum rerum opifex fuit, & architectus, quibus fides, quibus religio, quibus ius denique humanum, diuinumque sustentatur. Tot tantaque res gessit, ut non ciuis, sed hominis nomen videretur virtute, & gloria superare. Hoc semen, haec stirps est ALDOBRANDINÆ Gentis, cuius fructibus imperij vis, religio, atque Reip. virtus alitur, & confirmatur. docent id prisca ab HORLANDO Aldobrandino rerum gestarum monimenta. Nec enim patriae solum tutor solers fuit, & diligens: sed etiam publicae salutis tam acer, & acerbus propugnator, ut in eius fide, & tutela, tota ciuitas angores omnes, et molestias soleat deponere. Quare ab ea, honoris ergo, pacis, & otij parens: felicitatis auctor & dominus saepe est vocatus, semper autem habitus. Haec virtus in Aldobrandinorum genere, semper creuit cum aetate, & ita creuit, ut quando iustitiae statera fuerint eorum merita librata, solo potuerint papatu compensari. Quid aliter repetam? confirmauit id à teneris, ut aiunt, unguiculis HIPPOLYTUS Aldobrandinus, qui vix adultus ita iura tenuit, ut ea non ab alijs accepisse, sed ad alios ipse de caelo attulisse videretur. Mox igitur à PIO V. Auditor Rotae factus, tanto ingenij, & doctrinae illuxit splendore, ut in obscurissima rerum caligine, nullae propè quaestiones, & controuersiae, ullas, contra ancipitem, & dubiam mortalium opinionem, haberent inducias, nisi in HIPPOLYTI Aldobrandini voluntate, & iudicio. virtutis igitur ergo à SIXTO V. Cardinalis Creatus, tanta repente, in eo creuit, cum digni-

tate sanctimoniae vis, ut nullo in loco pedem imponeret, in quo non plurima relinqueret pietatis, obseruantiae, & religionis vestigia. Testis est, non modo Italia, sed etiam vniuersa Sarmatia. Nam in ea Legatus, vniuersam statim regionem tanta opinione imbuit suae virtutis, et doctrinae, ut nullum imperij consilium aut oppugnarit, quod non euerit, aut defenderit, quod non sustinuit: nihilq; et ab Imperatore, & a Rege orarit, quod non exorauit. Quare illi cum nefarium esse putarent, ab eius voluntate recedere, grauissimas similitudines, quibus inter se erant abalienati, deposuerunt. quid? multa sunt, nec muta summa eius sapientiae testimonia. quid dicerem sanctimonia? in primo sui pontificatus vestibulo, & ingressu à Claritate mentis, CLEMENS VIII. nominatus, religionis claritatem eam traxit de caelo, qua procul etiam occacati illuminantur Haeticorum animi. Ita quippe continenter exarsit communis salutis amore, ut statim in Pontificatum ascitus sana, ac delubra omnia sigillatim perlustrans, non solum in ijs plurima pietatis, & clementiae monimenta reliquerit, sed etiam quasi diuinitus, ex ijs religionem, & pietatem ad remotas, et longinquas gentes propagarit. Nec enim res latens est, & obscura, quae Gens, quae regio, qui populi, per eum recuperati sunt perdit. Atq; quoniam nihil est Episcopatus, nisi veluti quidam religionis magistratus: nihil Episcopus, nisi pius, sanctaq; viuendi magister, & dominus: futuris Episcopis virtutis examen praescripsit, in quo magnum est certamen, ac discrimen ingenij, & doctrinae: ansa verò, non
exigua

exigua publici commodi, & communis utilitatis. Pa-
storis enim industria par est, & aequalis gregis utilitas.
Nec minus CLEMENS VIII. in Ecclesia Ro-
mana periculis habet animi, quàm in obscurissimarum
caligine, consilij. Bis igitur firmissimum virtute, & vi-
ribus constatum exercitum, Imperatori grauer periculi-
tanti, in Pannoniam misit subsidio. Quod enim ab hoste
non potest iure, & legibus impetrare, id nunquam est ve-
ritus armatorum militum neruis, & viribus extorquere.
Atq; quoniam imperium facile ijs artibus retinetur, qui-
bus initio partum est: quid fecit, aut non fecit potius, ut
viuendi normam de via deflectentem, intra pristinos reli-
gionis cancellos reuocaret? Res est illa admirabilis, refor-
mationis congregatio, qua Religiosorum patrum familiae
sic ad antiquam illam vitae sanctimoniam excitantur,
ut à CLEMENTE VIII. parte videantur, non
restituta. Testis est opt. ille Carmelitarum Antistes
qui priscam familiae consuetudinem collapsam, non so-
lum Deo immortalis, omni sanctimonia restituit: sed etiam
tanta pietate honestauit, ut illius familiae virtute, & do-
ctrina iam compleatur quasi urbes uniuersae. Facit autem
adrem mirum in modum, graue in Summo Pontifice vi-
tae testimonium, qui opere magis, quam lingua: nec adeò
verbis, quàm exemplis loquitur, qui pauperes quotidie
sibi asciscit commensales, & ita ut ijs prater cibum, & po-
tum, diligentem suam nauet operam. Quo fit, ut eo ni-
hil sit, aut in summa dignitate humiliter, aut in humilitate,
maiori gloria dignius. Non arte, sed virtute: non prescri-
pto,

pto, sed vita exemplo urbem non modo absterfit ab omnibus vitiorum sordibus, sed etiam ita instruxit, ut nihil iam videatur esse Roma, nisi religionis domus, atq; pietatis, & sanctimoniae schola. Hoc autem faustissimo Iubilei Anno, aduentantibus in urbem peregrinis, eam pietatis tundit incudem, ut ijs quae sunt vsui, prumpta sint, & expedita. Clericis verò Ultramontanis Xenodochium omni sanctimonia refertum, est expositum: in quo non solum quae ad victum pertinent, praestò sunt omnia: sed etiam summus ipse Pontifex, qui vim, & numen obtinet Dei Immortalis, ijs saepe ministrat, atq; eorum pedes non minus humiliter, quàm diligenter sacrosanctis lauat manibus. eo quippe charitatis flagrat ardore, ut non solum continenter, ad charitatem profeminandam excubet animo: sed etiam in eo, nulla quasi relanguescat defatigatione, finisq; vnius operae, principium sit futurae. Nec tot, tantis, tam grauibz unquam negotijs distrahitur, quin, ubi respirare potest, eò contendat ingenij, et industriae vires, ut aut in D. Petri templo confessarij fungatur munere, omnes ad se sine ullo admittens discrimine: aut ansam rapiat de nobilibus praesertim benemerendis, qui clam, pra pudore, iacent in aliqua calamitate. Nec ullus unquam dies abit, quo, nisi infirma prohibeatur valetudine, res sacra, pro publica omnium salute, ab eo non celebretur. Sed quid ego trita, & vulgata hac? eam semper vitam egit, ut viuens nihil unquam uisus sit appetere, quod morienti non sit appetendum: illa plena sunt pietatis, & sanctimoniae: hac plurima etiam utilitate,

Et iucunditate referta, quod maximè nefarios hostes religionis represserit: quod omnes Ecclesiae regiones plurimis latrocinij obnoxias, ab omni latronum incurfione liberarit: quod urbem oppressam, multo leuauit vectigalium onere: quod Ecclesiam Romanam eorum Cardinalium corroborauit praesidio, quorum sapientia, spes omnis publicae salutis est depascenda: quod Rutenos Gracos Ecclesiae Romanae, Et summo subiecit Pontifici: quod deniq; supplicem HENRICVM IIII. Galliae Regem tam pie in sacrosanctae Ecclesiae gremium receperit, eiq; ad regiam Maiestatem, qui clausi erant, ipsos aperuerit aditus: atq; duos simul Reges potentissimos, qui à se abalienati erant, mutuo inter se amoris foedere, Et arctissimo pietatis obstrinxerit vinculo. qua ex re non solum plaudit, Et Gallia, Et Hispania: sed etiam uniuersa Europa. Quare omnes eius amant industriam: nemo non admiratur iustitiam. Quod si igitur reuiuiscat iam HORLANDVS ille Aldobrandinus, videatq; domum, quam reliquit, veluti quoddam mundi esse theatrum, in quo non solum omnes congestae teneantur imperij virtutes, sed etiam procù pellantur omnia vitia, non hoc modo loquatur? Ego vitam uixi non unius hominis, sed omnium hominum, quos uniuersos suscepta ex me soboles prudentia, uirtute, sapientia, atq; rerum gestarum exaequauit gloria: praecleara est, fateor, viri sapientis vita, quae in contemplatione est posita: armati autem militis minimè contemnenda: HORLANDI verò Aldobrandini multò fuit praestantissima, quae utranque

que plurima rerum simul humanarum, & diuinarum
 auxit gloria. Feracissimus est, in hac Amplissima AL-
 DOBRANDINORVM familia, virtutum om-
 nium campus: ex qua quid Marti cum Musis: quid To-
 gae, cum sago: quid calamo, cum ferro: quid deniq; pa-
 ginis commune sit cum armis, nullo propè negotio fas est
 intelligere: in quibus omnibus, quid affectandum sit
 docet religio: quod iter ad felicitatem imperij sit insisten-
 dum, precipit ius, & ratio. Quare in Imperio nullum
 vallum, aduersus iniuriarum procellas, & tempestates,
 est firmitus iure, & aequitate, cuius in finibus nihil potest
 quis timere mali, quia ex ijs omnis exulat iniuria. Te-
 stis est grauiissimus, ut ab aliorum infinitate recedam,
 SILVESTER ALDOBRANDINVS CLE-
 MENTIS VIII. pater, qui Principes optimos quosq;
 beneuolentiae federe, tanquam Herculeo nodo, ita sibi ob-
 strinxit, ut nulla in re, consueuerint facilius, quàm in
 eius opinione, & voluntate acquiescere. Nihil enim in
 omni dissidio prater ius: nihil in iure ardentius, quàm pu-
 blicae societatis incolumitatem anhelabat. quid dicerem
 concordiam, & amorem? ut Medicus non est amicus
 aegroti, qui eius aegritudinem non habeat in odio: ita is
 patriam minimè amat, qui patriae non odit incommoda.
 itaq; haud quicquàm potius habebat, quàm ut eius aus-
 inopiae pecunia, aut imbecillitati auxilio, aut impruden-
 tia consilio occurreret: quod cùm fecit, nihil, nisi quod
 regium sapit Diadema fecit. Quare nunquàm de SIL-
 VESTRI ALDOBRANDINI fide, pietate,

Et sapientia cogito, quin mihi veniat in mentem Agas-
clis Regis Lacedaemoniorum: qui non alijs praesse, sed
prodesse studebat: quiq; sui praesidia, non in populi arma-
tura: sed in benevolentia collocabat. Nam in firmamen-
tis Imperij, nullum neq; valentius beneficio viget Diade-
ma, neq; gestatur amore gloriosius. Atqui SILVE-
STER Aldobrandinus tanto erga Patriam semper
exarsit amoris incendio, ut pro patriae salute, nunquam
veritus sit suum iugulum ostentare. Itaq; cum posse plus
non videatur princeps, quam quod iubet virtus; Et do-
ctrina, nulla est principis potentia, quae non videatur SIL-
VESTRO Aldobrandino semper fuisse singularis, Et
propria. Quocirca ille cum apud omnes exterarum gen-
tium Principes, tum in Italia, apud Et Urbini, Et Feriae
Duces, tanti est habitus, ut illi in consilij sui deliberatione
SILVESTRVM non solum vellent interesse, sed etiam
praesse: nec eum comitem habere, sed Ducem gestirent, in
rebus arduis sequi. Norat enim hic plebis temeritatem
frenare prudentia: rabularum lites Et iurgia iure sedare:
perditorum libidinem arcere continentiae exemplo: furo-
rem iratorum fortitudine restinguere: ac demum impio-
rum facinora aequitate superare, Et iniustitia. Quare à
PAVLO IIII. Aduocatus, Et consistorialis, Et
Fiscalis creatus, cum se praestitit in tractandis imperij
habenis, ut non tam videretur regere, quam quomodo es-
set regendum alijs ostendere. Hic enim quasi de caelo fu-
cem Promethei cum haberet accensam, homines ex caeno-
ritiorum concretos, sapientiae flamma, omnes ad virtuta-

tem

tem informabat: Nec ferro, ut olim Romulus, Romanis: sed sanctimonia, & religione posteris, ad imperium iter aperuit. Etenim nihil erat SILVESTRI I. C. sapientia, nisi ars imperandi, & scientia. Hac quippe instructus norat ex aliorum & erroribus, quod rectum est sequi, & periculis, quod tutum est amplecti, ac deniq; erudiri ad gloriam ex aliorum infamia. Ius autem omne summa definivit religione: religionem tot artium dotibus locupletavit: tanta virtutum omnium dignitate honestavit, atq; ea facultate dicendi illuminavit, ut in religione non solum iuris, & iustitiae, sed etiam sanctimoniae videretur magister, & dominus. Quare in florentissimis Italiae Gymnasijs iuris interpres, non tam lingua, quam manibus ius docebat. Nam cum firmitus inculcatur morum disciplina, exemplis: quam verbis, ita vivebat, ut illius vita multorum esset instructio, & disciplina. Quanquam gloriosius ducebat hominum oculos, quam aures erudire, tamen non solum voce, sed etiam stylo, veluti quodam sole, quae in iure, & legibus occulta sunt, & retrusa, illuminavit. Nec ad fidem opus est verbis. Nam cum esset splendor sui ordinis, eximium patriae decus, atq; exemplar verae, germanaeq; iustitiae, non modo, non potuit virtus eius oculi: sed etiam eo illuxit splendore, ut SILVESTER ALDOBRANDINUS non solum Italorum, verum etiam gentium omnium clarissimum lumen haberetur. Magna, fatcor, fuit viri, ex virtute felicitas: summa ex liberis quatuor ab eo in lucem susceptis, THOMA: JOANNE,

HIPPOLITO, & PETRO, qui omnes opti-
ma reip. summi fuerunt Architecti, & opifices. Ea quip-
pe illorum omnium erat aequitas, qua populorum pax nu-
trit, et concordia: ea sapientia, qua cessant maleuolo-
rum quarelae, odia, inimicitiae, bella, seditiones: ea de-
niq; industria, qua tantum in tractando imperij clauo
valebant, ut illi prater ceteros viderentur totius orbis, &
bona conseruare, & mala euertere posse. In eo enim
quem colebant iustitia campo, neq; violentiae, neq; fraudi,
nec audaciae, nec temeritati, nec deniq; iniuriæ ullus est
in quo consistat locus. Quare in ALDOBRAN-
DINIS Ars ea imperandi potissimum laudatur, quae
imperantem sic afficit, ut non malit alijs imperare, quam
rationi obedire. Iustitia quippe Magistra, volebant Prin-
cipis officium, non priuata, sed publica utilitate esse de-
finitum: officij eius esse, legibus parere: ius, & liberta-
tem populi seruare: Senatus auctoritatem defendere,
reuereri, & obseruare. Imperium enim propter viro-
rum bonorum praesidium, contra sceleratos, & impro-
bos homines, est institutum: huicq; summa potestas
concessa, ut vindex iniuriarum, custos libertatis, &
iudex vitiorum existeret. Quorsum hac? nihil est in
iure, & legibus: nihil in praeceptis de officio, & vir-
tute Principis, quibus non solum instituitur, sed
etiam seruatur, atq; omni gloria augetur imperium,
quod non habemus in Praclarissima ALDOBRAN-
DINORVM familia, exemplorum testimonijs
corroboratum: nedum promptum, & expeditum.

Nec

Nec enim CLEMENS VIII. quenquam, præter sapientem, ad tractandas imperij habenas admittit. Nam Imperanti duplici virtute cum opus sit, una externa, politica nimirum, quam qui habet non se, sed alios magis bonos viros facit: altera insita quam qui possidet, vir bonus dicitur, nouitq; spem, timorem, cupiditatem, ac iram deniq; in rationis finibus arcere. Vtrinq; enim Summus Pontifex à puero ita traxit de cælo, ut non tam Imperij administratores, quam cum ijs, virtutem administrandi videatur humana societati suggerere. in quo vix satis dici potest, quanta ipse Pontifex dignus sit gloria. Nam ubi deest politica virtus: ibi in Imperio, ex beatis infæusta, & misera fiunt omnia. Etenim quorsum, quòd Romanitoties Triumphus Pompeius auctor, & opifex, sola inuidiæ causa, ad opprimendum C. Cesarem impulsus, auctor sui interitus fuit, et magister publicæ calamitatis? Ea est politice virtutis ratio, ut nulli ne minima quidem scintilla odij sit inter Principes admittenda, nisi qui uelit grande incendium accendere. Atq; ne de THOMA Al-dobrandino taceam, quid uel à natura, uel ab arte desiderari potest, quo non cultum, ornatumq; extitit eius ingenium? tam subtilis fuit Philosophus, & orator vehemens, ut magis artes ingenio: quam ingenium artibus honestare uideretur. Huius singularem doctrinam cum omnes suspicerent pari eloquentia coniunctam: tum PIVS V. propter admirabilem uim eius ingenij, mirifice oblectatus est eius consuetudine. Quare illum, penes se, ut haberet, constituit à secretis orationis latine.

qua ex re summo Pontifici ad voluptatem, non exigua etiam accessit dignitas. Nam quid est tam horridum, et incultum, quod eius non spendesceret oratione? quid tam incredibile, quod dicendo non redderet probabile? Haec, & multo maiora loquuntur, quae ab eo profectae sunt Diogenis Laertij translationes. Si maximum urbis decus, est virtus: quanti ab urbe is debebat fieri Philosophus, qui summus erat architectus virtutis? Non, si maiores sunt ingenij, & doctrinae: quam corporis, & fortunae vires, pluris fuit in urbe THOMAS Aldobrandinus omni Regia Gaſſa, qui in philosophia Isocratis retinebat eloquentiam, & in eloquentia Aristotelis Philosophiam, cuius disciplina inuentrix est legum: morum magistra: ingenij lumen: cos deniq; veritatis? Nec is adeo virtutes omnes laudabat, quam unam in caelum attollebat observantiam. Quidenim aut in scholis prosit veritatis disciplina, nisi veritati obtemperent artes omnes, et scientiae, aut in moribus valeat iuris imperium, nisi populi adsit obsequium? non una est, sed omnis uirtus observantia, qua detracta, & lex, & ratio omnis relanguescat oportet. quid? Nemo est in tam eminenti dignitatis gradu constitutus, qui recte ante possit imperare alijs, quam caeperit Deo Opt. Maximo, atq; summae rationi parere. nec exitus potest, non miser esse imperij: nisi ex animo obediatur Principi populus. Quare nihil est obedientia civium, nisi urbis felicitas, & Principis gloria. Nam quorsum duplex ius, diuinum unum, alterum positivum? Ut huic populus, alteri Princeps cum subijciatur, intelligamus.

mus virtutes omnes, in obedientiae pradio nasci, & pos-
 sessione. Hac una virtute THOMAS Aldobran-
 dinus sic oblectabatur, ut mallet rationi parere, quàm vi-
 ris imperare. qua in re, non tam fuit Philosophus: quàm
 philosophorum omnium lumen, atq; sapientiae decus: nec
 adeò virtutibus omnibus fuit instructus: quàm ipse virtu-
 tum omnium minister simul, & magister. Quare tanta
 apud PIVM V. fuit auctoritatis, ut vix quicquam
 summus Pontifex ratum haberet, nisi quod ante THO-
 MAS Aldobrandinus probasset. Sed quid ego hac de
 summa doctrina THOMÆ Aldobrandini? Quem-
 admodum ab uno Hippocrate vniuersa medicinae adiu-
 menta, sic ab eo ALDOBRANDINO omnia poli-
 ticae virtutis, ad bene beateq; regendum, praecepta fas erat
 optimo cuiq; Principi haurire. Quas igitur Cardinalis
 P. ALDOBRANDINVS, THOMAM Pa-
 truum imitatus cœlesti spiritus afflatu, continenter arcen-
 do populum in rationis gyro, sudit animi sui sententias, eas
 volui, non minori fide, & integritate, quàm studio, &
 solertia longè lateq; perquirere, atq; tanquā veros rectè, &
 feliciter imperandi aphorismos in vnum locum congerere.
 Nec solum probauit hoc meum consilium IO. BAPTI-
 STA Costa primarius iuris Canonici in Ticinensi Gy-
 mnasio, interpres: sed etiam veluti quodam studij ardo-
 re inflammauit. Nemo enim potest non prudenter agere
 qui prudentissimi viri stat. iudicio. ita autem ille iuristu-
 dentia seruat momenta omnia, ut totus videatur ex iure
 pendere, & iustitia. ab eo enim lex non modo publicè do-

cendo, aut funditur aperta, aut latens explicatur diuident-
do: aut incognita demonstratur definiendo: aut incerta
probat argumentando: aut anceps & dubia illustratur
interpretando: sed etiam ita colitur, & obseruatur, ut ille
nunquam videatur sine iure publicae utilitatis, & com-
munis commodi respirare. Nam quid de Aldobrandi-
norum iustitia dicerem? quemadmodum non vir ab uxore,
sed uxor à viro nobilitatem capit: ita apud Aldobran-
dinos, non iustitia ex officij dignitate: sed officij dignitas
ex iustitia, monimenta sumit laudis, & gloriae. Hac au-
tem in CLEMENTE VIII. tanta est, ut iusti-
tiam, neq; virtutum omnium optimam, sicuti Plato: neq;
admirabilem, ut Aristoteles: nec praestantissimam veluti
Cicero: nec fundamentum perpetuae commendationis, &
famae quemadmodum ceteri, modo gestiam nominare:
sed una cum Demosthene velim, aut cogar potius eam
Reip. felicitatem, atque mundi animam appellare. Nam
quid est summi eius Pontificis iustitia, nisi rerum huma-
narum, & diuinarum vinculum: nisi Terrae, et Caeli
veluti quaedam amicitia? nisi interioris, & exterioris ho-
minis Tranquillitas? nisi quasi pabulum religionis: nisi
decus communis vitae, & publicae salutis firmamen-
tum? Nihil maiorem in modum Antiquitas anhelauit,
quam Principem diuina ferri, duciq; virtute. Nam cur
Achillem à Thetide: Memnonem ab Aurora: Theseum
à Neptuno: Romulum à Mare genitum esse volebat? res
fictae, & commentitiae, in fabulis magnam ansam mor-
talibus porrigunt veritatis. Non est Principis virtus ex
scholis

scholis accensita, sed de caelo profecta: non vigilijs, & laboribus comparata, sed veluti quadam ex hereditate nata. Testis est in Praclarissimo Heroum genere. IOANNES Aldobrandinus summi Pontificis Frater, sapientiae exemplar, & Hetruriae decus. Nam illa primum Auditor Rotae, iura omnia veluti quadam diuinitate recreauit debilitata: deinde Cardinalis, ita vitae sanctissima Ecclesiae Romanae dignitatem honestauit, ut non solum splendor fuerit sui ordinis: sed etiam, teste PLOV. à quo in Collegium Purpuratorum patrum cooptatus fuerat, animi casta, verecunda, & incorrupta integritate, sapientiae nomen visus sit superare. Quare consuevit CLEMENS VIII. dicere Pontificatum ex eius morte orbem ad se peruenisse: in Pontificatu, ideò tibi locum esse datum, quia non esset superstes IOANNES. Cardinalis Aldobrandinus. At qui longius Superstes is, qui tantam imperij molem sustinebat, esse potuisset? nesci pietas, quod graue, & acerbum est, si honestum sit modo, timere: mori pro patria, pro religione, pro imperij libertate gloriosum esse ducit, & suauē. Hec est, ut suo docuit IOANNES. Cardinalis instituto, virtus Aldobrandinorum: Hac eius Antiquissimae familiae industria: hac laus, & gloria, quae in pietate, nihil videtur Antiquitati concedere. Nam laudatur apud Romanos, Metellus Pontifex, qui Vestali Aede fortuito flagrante, per medias flammās, Palladium, ex incendio substraxit, & iure quidem laudatur, quippe qui malebat pietatem sine vita, quam vitam sine pietate. Laudatur, tot ante seculis Aeneas pietas, quod.

quod Capto Ilio, Achiui miserati captiuorum erumnas,
cum per praeconem denunciarent, ut singuli ex liberis ci-
uibus, quod uellent, unum aliquod secum auferrent, ille
ceteris neglectis, Deos Penates exportarit: At fuit ad-
umbrata illa, & adulterina utriusq; pietas: vera autem
germanaq; pietatis laus est, in ALDOBRANDI-
NORVM stirpe, et semine: & ita vera, ut si hoc ge-
nus, erga Deum immortalem tollatur pietatis, statim &
fides, & iustitia, & societas humani generis intereat ne-
cesse sit. Non longè ab eo, IOANNES ille Aldobran-
dinus summus I. C. summus Rota Auditor, summus
Cardinalis natura fuit adeò Clemens & pietate insignis,
ut semper, & in egestate abundaret, & in opulentia ege-
ret. Nam, quod dictu est admirabile, in summa opum,
erga pauperes erogatione, diues: in procacitate perditio-
rum hominum, gloriosus: in periculis, qua nunquam pro
patria, recusauit, ultro etiam saepe est aggressus, incolu-
mis semper remansit. Quemadmodum enim Myro pi-
sci si oculus eruat, fronti q; hominis, aiunt, appendatur
ex ophtalmia laborantis, solet pisci oculus renasci: homi-
ni verò ophtalmia sanari: ita nihil ex pietate optimi An-
tistitis unquam potuit detrahi, quod non visum est, ad eum
cum admiratione reuerti. Hæc quippè eius erat Pietas,
quæ fidem constantia: officij dignitatem iustitia: pietatis
nomen admirabili superaret sanctimonia, quæ eò ma-
gnitudinis processit, ut ei ad glariam nihil amplius addi
posset. Quanquam tamen pietas non est eius Cardinalis:
sed virtus Aldobrandini generis. Nec in rebus apertis.

uti volo exemplis non necessarijs. Nam cum ea omnis familia, ex sua pietate Religioni plurimum attulerit ornamenti: tum CLEMENS VIII. tam pius, erga Deum immortalem, se præbet, ut CLEMENTIS VIII. nomine recreari videatur ipse in Fanis, & delubris parietes. Etenim cum multa sacrae Aedes per eum sunt restituta: tum Fanum ipsum D. IOANNIS Lateranensis: tanto sumptu, tam artificiosè est restitutum, ut à CLEMENTE VIII. non renouatum: sed erectum esse videatur. Quid? in Rebus bello ardentibus, nulla unquam tam plena horroris fuerunt pericula, quae non consuevit pro religione, & pietate, contemnere: in otio autem, & pace, tanta semper fuit erga populum liberalitate, ut cum continenter in caritate annonae recreatus fuerit summa eius beneficentia: tum urbem ipsam multis liberarit oneribus, quae à XISTO V. & alijs summis Pontificibus urbi erant imposita. Hac autem sapientiae semita, ut ij omnes, ad Pietatem contenderent, in quibus cardo vertitur imperij; nullos unquam ante creauit Cardinales, quàm norit eos esse, qui in Puppi sedentes possint gubernacula tractare communis salutis, & vitæ: ad quos omnes excitandos non minori munificentia, quàm prudentia ad deligendos, semper fuit propensus. Quantum enim in eo ad res grandes sit animi, testis est purpuratorum patrum confessus: Testis est Regina MARGARITA. Testis Archidux Austrius: quorum altera Ferrariae incredibilem Apparatum: alter in apparatu, sapientiam magnanimitatis Regie plenam non suspiciebat sine admiratione.

tionem. Decorabat omnia gloriae monimenta, in Matrimonij nexu constringendo, singularis erga PHILIPPVM III. & MARGARITAM Reginam Summi Pontificis benignitas, plena magnificentiae simul, & diuinitatis. Nec enim cuiquam in apparatus elegantia, & copia rem ullam commendauit, nisi ei, qui esset Religiosus, doctrinae singularis: ingenij admirabilis: modestus: grauis, & temperans: consilio prudens: iudicio constans: fortis denique in periculis, atque in omnes facilis, & benignus. Qui autem Antistites potissimum Regina aduentum honestabant, eorum à Summo Pontifice is habitus est delectus, ut nullus inter eos conspiceretur, qui aut Soloni in sapientia, aut Isocrati in suauitate dicendi, videretur concedere. Fit igitur, quoniam, aut proprijs, aut sapientum tantum, in tractando imperij clauo, vitur adminiculis, ut res uniuersae obsecundare videantur caelesti illius, ac diuinæ uoluntati. Quare si liberorum uirtus, patris est felicitas, non potest SILVESTER Al-dobrandinus ex tam caelesti, & diuina liberorum uirtute, & gloria, non esse etiamnum inter mortales ter felix, & beatus, qui orbi uniuerso terrarum, tantum peperit felicitatis. Etenim cum nihil ab eo non equum: nihil non salutare: non utile: non plenum denique felicitatis manaret, factum est, ut eum omnes quasi quoddam terrestre, oraculum humanæ sapientiæ intuerentur, atque ueluti diuinum hominem è cælo, ad sedandas Principum discordias, et ad propagandam imperij incolumitatem, missum contemplarentur. Hic quippe nihil unquam ardentius curauit,

curauit, quàm ut hominum generi, & animi bona infereret, & extirparet contraria. constat enim homo ex animo, & corpore, quorum alter, altero longè est præstantior. Quare legumlatores absurdum esse putabant externa bona, quae corpori tribuuntur, curare: animi verò bona negligere, quorum gratia potissimum censebant homines viuere. itaq; nemo unquam Philosophus de Rep. scripsit: nemo aliquando sapiens Remp. formauit: nemo usquam gentium Magistratus ciuitatem rexit, qui non ciues suos bonos efficere conatus sit. Hùc Charondæ: Zaleuci: Minois: Lycurgi: Solonis, ac Priscorum omnes leges pertinent: Nec horum temporum extat ullus legislator, qui non supplicia improbis, & pramia bonis viris statuerit: quiq; non quasi pestem ciuilem perhorrescat fœdifragos: periuros: ambitiosos: mendaces: libidinosos, ac omnes deniq; nefario pastos scelere. Hac omnia cum præclarius ex Aldobrandinorum rebus gestis possint spectari, quàm ex veterum libris de Rep. legi, existimaui plurimum me humana societati profuturum, si minus facta possem: at dicta eorum sapienter, & responsa commendarem posteritati. quid inquit me profuturum? non est boni viri spes, sed officium sequi. illa quippè est ALDOBRANDINORVM virtus, quae depascenda est omni mortalium gloria. Nec enim unquam post homines natos, cuncti populi, vniuersæ gentes, atq; nationes omnes quicquam habuerunt antiquius, quàm ut ijs, qui aut fines auxissent imperij, aut imperium ex hostium clade, & periculi faucibus eripuissent, summi honores decernerentur.

nerentur. Neq; enim alia de causa, Creta Iouem: Athe-
na Thescum: Osyrim Ægyptus in cælum laudibus sustu-
lit, nisi quia, superatis hostibus, in iure, & legibus fir-
mamenta fixerunt imperij. Ex quo quantum omnis hæc
nostra ætas debeat Aldobrandinorum generi, non diffici-
le est odorari. Nam PETRVS ALDOBRAN-
DINVS, CLEMENTIS VIII. frater, ita pu-
blica continenter excubabat utilitati, vt in iure dicendo,
cuius magister erat, & dominus, vix vnquam hominum,
semper Dei duceretur consilio: nec adeò virtutibus huma-
nis sua firmaret iudicia, quàm ipsas humanas virtutes,
veluti quadam iudicij diuinitate. Hic autem in toga sic
erat animatus, vt quæ religioni, & pietati vulnera iniu-
ria, per vim essent illata, summa vi, et impetu molire-
tur repellere: atq; afflicta Ecclesiæ ita succurrere, vt ibi,
vbi non esset consilio locus, non metueret, quodius, quod
ratio non impetrarat, ferro extorquere. Hic inter omnes
fratres, post CLEMENTEM VIII. maximè
profuit humana societati: Non quoniam vera germanaq;
exemplar fuit sapientiæ: sed quia Card. PETRVM
ALDOBRANDINVM suscepit filium. Huius
enim sapientissimi Antistitis Ecclesiæ armata cùm sit
virtute, potest nunc demum ex rerum asperitatibus caput
attollere. Nam is ille est, cui & animus crescit cum re-
rum difficultate, & consilij lumen, cum earum obscuri-
tate, quiq; tantum iudicio valet, vt nihil lateat in artis, et
doctrina nomine, quod non uideatur usu, & experientia
tenere. Huc accedit quòd nihil est Cardinalis PETRI
ALDO-

ALDOBRANDINI fortitudo, nisi quasi quidam virtutum omnium circuitus. Grandia quippe quae sunt, & sublimia insè appetit: appetita sidenter suscipit: suscepta fortiter tolerat: tolerata deniq; strenuè ad exitum perducit. Quae autem duae res, in armis, plurimum valent, robur, & consilium: illae ambae in eo non minus vigent, quàm fas est in inuictissimo Principe desiderare. Itaq; consuevit, ut olim Anthistenes, omnia bona Hostibus, praeter fortitudinem à Deo precari: quòd ea non sint possidentium, sed eorum, qui possidentes virtute superant. In Bello igitur Hostes: in otio voluptates rationi inimicas sic contemnit, ut turpius putet voluptati, quàm hosti succumbere. Virtutis bellicae, in Ferrariensi expeditione grauereliquit monimentum, quod quia neq; huius est otij, neq; instituti, facile praetereo: hoc autem tacere nequeo. quod ea floret dicendi facultate, qua possit milites animare metuentes: fugientes retinere: omnes hortari publicè: priuatim salutem omnium consulere: arma expedire: milites conscribere: phalanges, ac turmas ad signa vocare: tormenta disponere: hostem ferocia exultantem arcere, ac deniq; boni ducis, & Imperatoris fungimunere. Sed quid ego hac ex tanto Heroum numero in **ALDOBRANDINORVM** Domo? est haec eorum domus non sedes, sed officina virtutis, & gloriae. Nec, ut Gracia unum tantum: sed plurimos habuit Solones. quid enim dicerem **HERCVLES**? ea virtus est **JO. FRANCISCI** Aldobrandini, cuius splendorem hostes Ecclesiae non possunt sustinere: nedum vim, & impetum retundere

tundere semper hic ea arte, intelligentia, industria, & doctrina praeceperunt: quae portenta scelerum: libidinum gurgites: flagitiorum sentinae, atque lerna malorum omnium facile ex mortalium sinibus, potest eijci, & exterminari. Atque ita continenter in praclarissimorum Heroum ordine vixit, ut vel stupidissimum quemque sua laude commoueret, exemplo doceret, atque quod iter, quae via virtutis ad Imperij gloriam sit affectanda, aperte palamque demonstraret. Atque cum versetur Res bellica partim in viris, partim in armorum genere, partim in bellandi disciplina: hac omnia belle in vno IO. FRANCISCO Aldobrandino strenuissimo Armatorum exercituum, in Pannonia Duce, nuper summo gloriae splendore illuxerunt. Nam cum virorum, in bello, hac est conditio, ut alij Imperent, alij imperata faciant, eum se Imperatorem praestitit, ut difficile sit dicere, utrum fortior in agendo, an prudentior in deliberando fuerit. Nec enim minus unquam habuit in periculis, animi, quam in rebus obscuris, & dubijs consilij. Quos autem habebat milites suae disciplinae alumnos, & rei bellicae ministros, ita instruxerat, ut aduersus Turcarum vim, & impetum, animo essent grandi, & elato: in machinandis insidijs, vafri, & veteratores: in conflictu, ira et audacia ita precipites, ut signo dato salutis, & vitae prodigi magis viderentur, quam liberales. Armorum autem varia, et multiplex est ratio: quorum omnium, in IO ANNE FRANCISCO Aldobrandino tanta est peritia, & quicquid legiones, cohortes, Turmae: Phalanges: Hastati: Antesignani:

gnani: Rorarij: ac deniq; Triarij milites armis praestarent, id omne nunc Pedes, nunc eques sic exerceret, ut ad omnia armorum genera, non factus, sed natus esse videretur. Virtus demum Militaris, quae ars est imperij, & regia disciplina, ei ita est familiaris, & cognata, ut nihil fuerit, aut in Cyri Regis exercitu tam elaboratum, aut in Astu Annibalis tam recunditum, quod apud eum Imperatorem non continenter frequens fuerit, & usitatum. Belli enim tempore, nihil committebat fortunae temeritati, sed omnia virtuti. Norat enim Geometriae praesidio, quibus in locis, lignari: aquari: pabulari possent milites: qui recessus quae flexiones, quae diuerticula ab hostibus essent cauenda: quidue de com meatu esset aut sperandum, aut timendum. Atq; artem militarem tanta prudentia, tolerantia, iustitia, fortitudine, & solertia commendauit, ut ingens saepe Turcarum exercitus parua manu ab eo restinctus sit, & deletus. Quem enim non poterat armis, & viribus, norat stratagemate superare: atq; si res ferebat, malebat ex hoste, consilio, incruentam: quam aliena clade emptam, victoriam reportare. Verum inter summas eius aduersus Scytharum vim, & impetum, victorias, ea in primis laudatur, qua Strigoniam non sine plurimo discrimine, recuperauit perditam. Confligebat enim non cum Auaritia timidorum: sed cum face, & furia armatorum, qui non opes, sed sanguinem videbantur sitire. At quoniam boni Imperatoris ducebat esse, milites maiori amore, quam hostes odio prosequi: malleq; mori in acie, quam hosti terga dare:

eas in periculis norat vias, ex quibus miles, hoste profligato, incolumis euaderet. Scythae enim ferociter magis quam prudenter Pannoniam inuadentes cum omnia non solum suo polluerent scelere, sed etiam barbara, & immani crudelitate omnes ad defectionem ab Imperatore, & obsequio Romanae Ecclesiae compellerent, ingenti celeritate semel atque iterum IO. FRANCISCVS Aldobrandinus cum exercitu ex Italia Pannoniae labenti praesto fuit: eiusque opera, et studio urbes omnes, in earegione, quae partim peste, partim fame, partim cladibus erant exinanitae, priscae virtuti sunt restitutae. Nec minus, quam in bello, fortitudo: eius laudatur, in pace summa iustitia, cuius duae sunt, quibus reguntur vniuersa habentiae: seueritas in puniendo, & premium in remunerando. Nam illius praesidio viae clauduntur ad peccandum: Huius spe contra iter aperitur, ad bene beatę agendum. Urbes enim molitur decorare non magnificis aedificijs, sed ciuium virtutibus: non opulentia, sed ingenio augere, & doctrina. in bello igitur Hostes vincit: in pace ciues non tolerat improbos. Nam qui Princeps tolerare improbos non grauatur, improbitatis fit socius, legesque omnes, sine ciuium bonis moribus, etiam sanctissimae, redduntur inutiles. Quare in eo tota est ALDOBRANDINORVM Domus, vt legum inuiolata sit auctoritas: Magistratuum in munere obeundo, prudentia, diligentia, & alacritas: populi solers obsequium: & Principis erga populum, acre & intentum studium. Nihil est itaque in arte imperandi, quod in rebus, ab ea praeclarissima

rissima familia gestis, non videatur, inclusum contineri.
 Nam si ad arma animum intendimus, facile ex ea intel-
 ligimus, bellum sine religione, sine iure, non solum belli
 nomen amittere: sed etiam sacrilegij turpitudinem, & la-
 trocinij dedecus induere. Quare Hostes omnes Roma-
 nae Ecclesiae, non adeò videntur bellum conflare, quàm
 belli iura, atroci, & nefaria iniuria lacerare. Non enim
 virtus bellica in furore, sed in prudentia consistit: non in
 crudelitate, sed in pietate: non in scelere, sed in aequitate:
 non deniq; in iustitiae offensione, sed de iensione versatur.
 Siquidem alia est rapina, alia Militia: aliud bellum,
 aliud latrocinium: alius Imperator, alius Tyrannus: a-
 lius deniq; miles, alius Latro. Ille enim virtute honesta:
 hic scelere molitur turpia: ille iure, hic iniuria ducitur: il-
 le iustitiam, hic anhelat pecuniam. Est igitur, & Belli,
 & pacis magistra, atq; domina **ALDOBRANDI-**
NORVM domus, quae ius & scriptum, & non scri-
 ptum tuetur summa religione auctum, & cumulatam.
 Quid à viris gloriae eius monimenta requiram, cum elu-
 cescant etiam in foeminis? Testis est una instar omnium
MARGARITA IOANNIS FRANCISCI
Aldobrandini filia Inuictissimi Ducis RANVTII
 coniunx integerrima. Nec quisquam est tam tardi, &
 hebetis ingenij, qui ex oris eius figura, non possit omnia
 regiae virtutis pigmenta recognoscere. Quemadmodum
 enim Socrates, à Diotima fatidica instructus norat sta-
 tim, ex cuiusq; indole, qui essent mores animi, & sen-
 sus intimi: ita nemo est, in quomica modo sit salis, qui

MARGARITAM cum intueatur, non sentiat continentiae, modestiae, ac summae virtutis exemplar se intueri. Virtus enim omnis in eius indole, tanquam in picta tabula, suis lineamentis ita est expressa, ut eos omnes a quibus cernitur, ad gloriam videatur virtutis amore accendere. Quare sicuti quod honestum est, corpore simul fit, & animo: ita in oris eius figura spectanda, non solum adhibendi sunt oculi, sed etiam iudicium. Quocirca non possunt Amplissimo Principi RANVTTIO FARNESIO, non felices, & beata esse eius nuptiae, quae non magis sunt Matrimonij sedere, quam virtutum omnium societate coniunctae. Nam sicuti in uxore, forma venustas, omni virtutum comitatu tenetur stipata: ita in viro summa prudentia, cum pari corporis dignitate spectatur coniuncta: quid enim aliè repetam? animaduerto ex eo sacrosancto Matrimonio, non solum Italiam: Sed etiam Europam omnem gestire latitia. Etenim Principum matrimonia non solum affinitates, in coniunctione: sed etiam in imperio, pacis, & concordiae artissima quaeque habent vincula. Atque si Matrimonij interuentu inter mortales, non solum inueterata intermoriuntur inimicitiae: sed etiam iura amicitiae concitantur ea, quae vix vlla dirimi possunt iniuria: quenam ex faustissimo hoc Matrimonio perpetuo futura est, & Hispaniae, & Germaniae, & Italiae seges, & materia concordiae? MARGARITA AVSTRIA RANVTII Auiua Germaniae obses est: Rex PHILIPPVS II. Auunculus ALEXANDRI FARNESII, Hispaniarum artissi-

arctissimum nunc etiam fœdus cum Italia constringit
benevolentiae: Rex Gallorum HENRICVS II.
HORATII FARNESII Castri Ducis Socer, fir-
mamenta affinitatis reliquit. Nihil est igitur hoc ma-
trimonium, nisi veluti quoddam plurimarum regionum
vinculum summo amoris fadere constrictum. Res est An-
tiquis exemplorum testimonijs aperta. Etenim nisi Ra-
ptæ virgines Sabinae coniugio fuissent placatae, connubijq;
iura, parentum animos reddidissent tranquillos, & quie-
tos, actum omnino erat de re Romana. ex quo intelli-
mus odij flammam non solum restringui matrimonio: Sed
etiam accendi mutui amoris ardore, & benevolentiae.
Quare nemo est qui, si pacis publicae, & concordiae gu-
stum, sensumq; modo habet, non totus iam, pro auspica-
tissimis his nuptijs, gestiat letitia. Atq; ut illa omit-
tam: is est RANVTIVS FARNESIVS, qui re-
ligione: gratia: veritate: obseruantia: pietate, atq; vsu,
& experientia rerum tractandarum tantum valet, ut
nihil unquam fuerit in sapientissimo Principe, tam glo-
riosum, et admirabile, cuius per omnes gentes, non effe-
ratur gloria, & laudibus. Nam sicuti res est admirabilis
Salamandra, quae non solum, non vritur in igne, sed
etiam ignis restringit incendium: ita ille demum verè tem-
perans est, & integer, qui in ardore iuuentutis, nulla fla-
grat cupiditate, qui in ipso aestu atatis, faces omnes reslin-
quit voluptatis: qui appetitus domat ratione: qui sensum,
qui impetus omnes frenat consilio: qui deniq; ita sui habet
imperium, ut rerum omnium simul videatur habere ob-

sequium: quod omne, eò præclarum est magis, quò glorio-
sius est voluptate abstinere, quàm frui. Sed quò me mea
ab ALDOBRANDINIS abducit oratio? aggre-
diuntur illi omnes summis vigilijs, et laboribus, quæ in om-
ni imperij fastigio sunt difficillima. Nec id. inconsulto.
Nam si quis, aut ex scientiarum tenebris, aut ex hostium
copijs aliquid studeat commodi extorquere, sine labore,
& tolerantia: nihilo plus proficiat, quàm si quis det ope-
ram, ut vir bonus, sine virtute euadat. Itaq; Cardina-
lis PETRVS ALDOBRANDINVS suis
quasi humeris tantam imperij molem sustentat, atq; eam
urbem, quæ urbium cunctarum, orbisq; terræ est do-
micihum, sic in officio continet, ut non solum toleranti, sed
etiam hilari animo omnes videatur absorbere difficulta-
tes. Nam quid antè quàm in purpuratorum patrum nu-
merum à Patruo CLEMENTE VIII. est ascit-
tus, fecit, aut non fecit potius? qua arte, & industria Ar-
ci D. Angeli præfectus rem omnem administravit? eum
non solum Populus Romanus, propter res ab eobenè ge-
stas, sed etiam tota Italia ita observabat, ut eius gloria in
ore, et sermone omnium videretur habitare. Habet quip-
pe in tractandis Imperij habenis, Aristidis iustitiam:
Scipionis sedulitatem, atq; Mithridatis Regis constan-
tiam. Quo fit ut consueverit, ad felicitatem imperij, aut
nova documenta inuenire, aut inueterata renouare, aut
deniq; renouata meliora semper reddere. Hic Pontificiæ
virtutis, & dignitatis obses, leges eas non solum in tra-
ctando imperij clauo ministravit, sed etiam illustravit,
quarum

quarum adminiculis in cœlum tollitur Ecclesia Romanæ felicitas. Atq; ut pacis, & otij iura omittam, nullum, in armorum periculis est tam tetrum, & horridum monstrum, cuius ille crudelitatem non quasi novus aliquis Theseus vincat, ac superet. Nam quo Marte in bello Ferrariensi, periculi flammam statim restinxit? qua arte Ferrariam urbem munitissimam in deditionem venire coegit? Quemadmodum ibi apertum Argumentum est inclinantis imperij, ubi virtus languet Principis: ita ibi omen summae est felicitatis, ubi Princeps amicos superat consilio: hostes virtute. Hæc quippè eius est Antistitis sapientia, quæ capi vix potest hoc elementari globo. Etenim quæ fluxa sunt, & caduca despiciens, nihil præter id, quod divinum est, & immortale suspicit: opes tanquam Ludibria fortunæ aut non admittit sibi traditas: aut admissas partim in pauperibus recreandis, partim in extruendis, & reparandis religionum aedificijs erogat. Hæc cum omnes de eo prædicant, tum unus Melchion Alciatus Iuris publicus interpret, ea prædicandi finem nullum facit: cuius laudo voluntatem: amo magis iudicium. in eo enim viro omnia sunt, quæ inveniri ingenio, quæ ornari arte, quæq; singulari possunt fieri virtute. At laudes omnes Card. P. ALDOBRANDINVS vincit magnitudine virtutis: quid dicerem pietatis? Templum D. MARIÆ in via. ut dicitur, fratrum Servitarum non vulgare urbis Romæ ornamentum, in quo, monumentum est P. ALDOBRANDINI Patris, non modo plurimis, ac magnificis muneribus hone-

stavit ::

stauit : Sed etiam praclaro auxit edificio : Ædem pariter
diui Nicolai, cuius in Cardinalatus dignitate, decoratur
titulo, ea magnificentia restituit demolitam, ut non ab eo
restituta, sed erecta videatur. Nam quid de Fano trium
ut vocant, fortium dicerem? nihil est tam reclusum in ar-
te, nihil tam ingens in re numaria, quod non videatur
pietatis causa, in urbem aduexisse. His igitur virtutibus,
quibus ille floret, summam laudem definiti Principis.
Nam cur apud Virgilium Æneas, qui veri Prin-
cipis induit figuram, & faciem, fingitur ex matre Dea
Venere, & Patre homine Anchise esse natus? non ut hoc
sentiamus, sed ut fateamur Principem non esse, nisi qui
norit, & diuina intelligere, & humana operari, malitq;
Deo obedire, quàm hominibus imperare, quibus ille sem-
per studuit non præesse, sed prodesse. Sunt præterea in hoc
vno Card. ALDOBRANDINO omnia rei bellicæ
documenta, atq; vniuersa virtutum omnium ne procul,
vel à Græcis, vel à Romanis petantur, exempla: sum-
maq; gloriæ testimonia, vitæ probitate expressa. Nam
quæ in pace eius est iustitia: quæ in bello virtus: quæ in
omni fortuna moderatio? virtus in eius vita gloriosius
cernitur, quàm in Herorum Historijs legitur: nec adeo
verborum luce, quàm rerum ab eo gestarum gloria illu-
stratur. Sed quo ad laudes ALDOBRANDI-
NORVM rapior? ne videar, tanquam alter Icarus,
nimium sublimia petere, ingentes eorum virtutes, quæ
sua in cælum feruntur gloria, malo deferere, quàm eas
persequendo, ruere cum discrimine, & dedecore. Non

est igitur cur quis mecum exposculet, quòd iam de rebus
à Card. P. ALDOBRANDINO gestis commen-
tarios non scripserim: hac eius tantum Apophthegmata
ad scribendum delegerim. Nam cum sapienter eius fa-
cta, non possunt cognosci nisi à sapiente viro: quæ res com-
mentarios eos scribendi causam multis præbet: fa-
cultatem tollit quasi omnibus, summa
atq; admirabilis eius
magnitudo.

HENRI-

HENRICVS FARNESIUS

Eburo Lectori beneuolo. S.




ITA est, ut a ingenij, & doctrinæ decus, Atq; Academiæ Intentorum auctor & opifex Don CAROLVS Bosfius, omnia turbulentissimis his temporibus, collucere summi huius Pontificatus splendore. Atq; ea demum vera est in Card. P. ALDOBRANDINO virtutis, & doctrinæ gloria, in qua, neq; res verborum nebulis obscurari, neq; verba rebus augustissimis non consonare videntur. Nam ut ipse ALDOBRANDINVS obscura & retrusa omnia consilio: ita difficillima quæq; vincit virtute: nemoq; est eius disciplinæ, in tractando imperij clauo, alumnus, qui non videatur quasi nouus aliquis Orpheus. At quis, inquiet aliquis, Orpheus? non qui Lyram ab Apolline, sed qui sapientium accepit ab ipso rerum omnium Imperatore Deo: non qui aurium, sed qui corporis sensus temperat vniuersos: non qui cantus suauitate montes moueat de sua sede, sed qui, quò ius, quò ratio vocat, vrbes, atq; summas regiones, post terga trahat consilio: non qui cursus fluuiorum conuersis reuocet fluctibus, sed qui populum voluptate diffluentem, cursu retorto rapiat ad virtutem: non deniq; qui syluas permulceat vocis iucunditate, sed qui hominum genus Syluestre, & agreste norit placatum, & mansuetum reddere: quiq; eam & rerum, & sententiarum Syluam, in consilij capiendi trahat deliberationem, ut eius in ore, & sermone Reges, Imperatores, summiq; Principes curas omnes gestiant deponere. Qua-

re Card. P. ALDOBRANDINI de arte imperandi dicta, & responsa, cùm mihi videantur imperij habenas tractantibus digna, quia crescit, & decrescit imperium, cum imperantis disciplina: tùm illa, & philosophis ad intelligendum, & oratoribus ad dicendum, & Principibus ad strenuè agendum censeo maximè esse accommodata. Nam cùm nihil sit ars imperandi nisi Dei, qui rebus imperat vniuersis, disciplina, illa omnis in ea virtute est fundata: quæ vt mare suo ambitu terræ globum: ita scientiarum regiones omnes, & lambit, & ambit veluti quodam sapientiæ circuitu. Quocirca nihil meo quidem iudicio, in Musarum hortis, potest aut nasci, aut legi fructuosius hoc, de perfecto Principe, Card. P. ALDOBRANDINI laconismo: nullum germen defringi doctrinæ suauius: nulla stirps ingenij propagari feracior, quem si amabis, nihil te mordebunt, quæ in hoc libro imprimendo, obrepserunt menda: quæ, quoniam erroris sunt, non culpæ, tu, puto, feres sine stomacho. Vale.



Q V I
CONTINENTVR
IN HOC LIBRO
TITVLI, HI SVNT.



D E Principe.	1	D E Clementia.	204
D E Virtute.	22	D E Vindicta.	221
De Religione	38	D E Fortitudine.	132
De Prudentia.	55	D E Magnanimitate,	
De Consilio.	73	<i>sic et Honore.</i>	243
De Intelligentia.	92	D E Fidentia.	253
De Memoria.	110	D E Patientia.	262
De Iustitia.	114	D E Solertia.	273
De Amicitia.	133	D E Perseuerantia si-	
De Liberalitate.	153	<i>ue Constantia.</i>	279
De Magnificentia.	169	D E Temperantia.	284
De Grati animi Vo-		D E Modestia.	302
luntate.	176	D E Felicitate.	315
De Veritate.	191		

DE PERFECTO PRINCIPE
APOPHTEGMATA
P. ALDOBRANDINI
CARDINALIS

In quibus Ars imperandi
tenetur inclusa.

A B

HENRICO FARNESIO EBVRONE I. C.

& Artis Oratoriæ, in Ticinensi Gymnasio, Regio
Interprete, in librum vnum congesta.

ATQ. REGVM, IMPERATORVM,
ac Sapientissimorum Heroum exemplis,

EX OMNI ANTIQVITATE
Aucta, & locupletata.

DE PRINCIPE TITVLVS PRIMVS.



ES est operosa & difficilis, ars imperandi.
nec eam benè beateq; tractare potest Prin-
ceps, sine sapientiæ lumine, aut numine
potius. Non retrusa, veletiam aperta sunt
prisæ vetustatis testimonia. Nam apud
Romanos, nullus olim propè Cæsar extitit,
qui non, quasi victus Cæsaris nomine, deterior factus est.
Solut enim Vespasianus, vt Cornelius Tacitus refert, Principi-
pis dignitatem nulla dedecoris contaminauit macula. Qua-

re quidá olim, ex íntimis familiaribus Claudij Neronis, nihil est veritus dicere, bonorum Principum imagines omnes in vnus annuli pala effingi potuisse. id autem lubens recenséo, non vt antiquitati detrahám, sed vt omnes ex admirabili ALDOBRANDINORVM religione, pietate, ac sapientia fœlicitatem recognoscant horú temporum. Vt enim Lychni lumen aperto sole, sic bonorum laus omnis cœlesti, ac diuina CLEMENTIS VIII. obscuratur virtute: gloriosiusq; omnes de eó sentiunt, quàm loqui possunt. Nec enim formica Taurum: nec vlla nox mortalium incredibiles eius laudes potest absorbere. Nam quid attinet hoc loco dicere quanta Præstantissimus Cardinalis P. ALDOBRANDINVS, summas, quas continenter gessit, dignitates auxerit & ornarit sapientia? virtus eius singularis vno omnium ore, & sermone sic percrebruit, vt nullus sit tam desertus in Italia angulus, qui non eius resonet nomine & fama: rumorq; apud exteras, & longinquas gentes ipse iam raucus sit. Quamquam tamen Reuerendis. Carmelitarum Antistes, religionis ornamentum, & doctrinæ Decus, HENRICVS Syluius de summis, ac propè diuinis eius meritis semper aliquid habet, in quo Sol & sal sit recunditæ eius virtutis & gloriæ. is autem cum vbiq; locorum semper summæ illius prudentiæ, iustitiæ, ac pietatis sit buccinator: tum mihi Papiæ sepè inculcauit, eum esse P. ALDOBRANDINVM Cardinalem, cui nunc summus Pontifex onus credat Atlanticum: nunc Rex Catholicus PHILIPPVS III. in cæca & obscura consilij capiendi deliberatione, nodum, vt est in prouerbio, Gordium proponat soluendum, eumq; nullo in loco pedem imponere, in quo non optimi Principis vestigia relinquat: Huius oratio apud me, non solum vim habuit ad fidem auctoritatis: sed etiam, ad scribendum tanti Principis Apophthegmata

thegmata necessitatis. Nihil enim Religiosissimus hic Antistes neq; perhorrescit, nisi quod turpe est: neq; minus cognoscit, quàm aut consilio labi, aut errare iudicio. Quoniam igitur non solum sacer habetur sapientissimus ille Princeps: sed etiam veluti quoddam iuris Sacratium, eius consilium: placuit ex eo hæc, tanquam sapientiæ furculos, excerpere de Principe Apophtegmata, quorum series hæc est.

- 1 Quòd ruentis Imperij res omnis fulcienda sit Principis solertia.
- 2 Quòd ingense est, sibi imperantis imperium.
- 3 Quòd Princeps hominum probetur suffragijs: fiat vero Deo consilio.
- 4 Quòd Principi virtus imperandi, patientia sit depascenda.
- 5 Quòd ars imperandi, una potissimum commendetur prudentia.
- 6 Quòd in principe oris figura minimè orba sit sua laude, & gloria.
- 7 Quòd Principi oris deformitas etiam ornamento sit in virtute.
- 8 Quòd Principis disciplina ex Chirone magistro sit haurienda.
- 9 Quòd Princeps nulla propius semita ad Deum immortalem accedat, quàm liberalitatis.
- 10 Quòd Principis auro æque pareat inimicus, atq; amicus.
- 11 Quòd clementia cum Principe summo constringatur societatis vinculo.
- 12 Quòd Religio Principis Athenæus murus sit imperij.
- 13 Quòd Princeps civilem omnem societatem uno constringat iustitiæ vinculo.
- 14 Quòd Principis virtuti, nulla par sit, & equalis.
- 15 Quòd natura ius violet, qui Principem non summa colat benevolentia.
- 16 Quòd præsentia Principis in rebus arduis, pro auxilio habeatur.
- 17 Quòd Principi tegenda sint simulatione, & dissimulatione sua consilia.

- 18 Quòd neq; virtus sine eruditione : neq; eruditio sine virtute facta sit Principi.
- 19 Quòd & Princeps, & lex mutuo gaudeant obsequio.
- 20 Quòd ferendi sunt, non culpandi Principes.
- 21 Quòd Princeps cura, & industria unus instar sit omnium.
- 22 Quòd ex Principis virtute petenda sit imperij felicitas.
- 23 Quòd Principi praelarius sit amari, quàm timeri.
- 24 Quòd Disciplina Principis nullo vacua sit doctrina genere.
- 25 Quòd neq; plures soles mundus : neq; plures Principes idem imperium possit pati.
- 26 Quòd Principis sit, non tam regere, quàm quomodo sit regendum alijs ostendere.
- 27 Quòd omnes Principis : non Princeps aliorum egere debeat consilio.

QVOD RVVENTIS IMPERII
res omnis fulcienda sit Principis solertia. I.



VM cresceret rerum difficultas, vna cum imperij dignitate, & magnitudine, Summo Antistiti ALDOBRANDINO itq; imperium, tanquam onus Atlanticum cum omnium admirationi sustineret, cuidam ex domesticis eius, atq; intimis familiaribus ab eo interroganti, cuius praesidio fretus, tam graue imperij onus, tantamq; publicæ salutis molem auderet sustentare : solertiae respondit. Nihil maiore compendio aut grandius, aut dignius Principe dici potuerat. Nam solertia Principis, non solum difficultatis in imperio, sed etiam deficientis temporis est medicina. Huc pertinet Maronis fides, & auctoritas. Cur enim apud eum, Aeneas comes est Achates,

Achates, qui primus excitat ignem? ignis, quia nescit quiescere, nec ullis contaminari sordibus, non habet ibi elementi significationem: sed solertiæ, quæ imperium non solum peperit, sed etiam alit, ac summa quæq; ei incrementa tribuit. Nec aliam ob rem, puto, Achates dictus est Græcè ab a, privandi particula, & *χαλκω* indigeo, quasi nullius rei indigens, nisi quia ibi, ubi adsit Principis solertiæ, omnia exulant, in imperio incommoda.

QVOD INGENS EST SIBI IMPERANTIS Imperium. II.



QVONIAM in doctrinæ sole mentis oculos non perstringunt; sed illuminant rerum exempla: multa ad triumphalem Reginæ MARGARITÆ Austriæ ingressum, expressa Mediolani spectabantur Persarum, & Assyriorum Regum simulacra. Hæc suspiciens Regina, interrogavit ab ipso legato, P. ALDOBRANDINO, quem non comitem, sed ducem sequebatur: qui Regum omnium esset maximus: qui sibi libentius dixit, quàm alijs imperat. Sapienter ille quidem, ut solet omnia. Non enim ingens & admirabile est imperium, quod vel Africæ, vel Asiæ, vel Europæ finibus terminatur: sed quod usq; cò protenditur, quousq; sol ipse potest suo lumine peragrarè. Hoc imperium solus is possidet, qui numquàm in alia fortuna, est alius: sed semper idem: Hunc Græci *Μικροκοσμου* vocant quasi, per antiphrasim, magnū mundi dominum. potuit enim Cyrus Asiæ: potuit Anibal Africæ: potuit C. Cæsar Europæ Imperare: non potuit non turpiter huic mundo succumbere.

QVOD PRINCEPS HOMINVM

*probetur suffragijs : fiat verò
Dei consilio. III.*



REATO CLEMENTE VIII. cùm vniuersus gestiret lætitiâ populus, rogareturq; à quibusdam P. ALDOBRANDINVS quorum suffragijs summus factus esset Pontifex : Non sit, respondit, summus Princeps : sed factus de cœlo recipitur. Nam maius imperium à minore creari ius non est. Cœlestis verò, & diuina responsio. Idipsum enim puto, vt doceret, & Homerus apud Græcos, & Virgilius apud Latinos, alter Herculem ex Deo Ioue patre, & fœmina Alcmena matre : alter Æneam ex matre Dea Venere, & Patre Anchise voluit esse natum. ex quo fas est odorari Principem non tam ex humano, quàm ex diuino fieri consilio. Nec enim par est, & consentaneū rationi, vt quis fiat ab hominibus, qui potest plus, quàm hominum vis simul potest, & natura. Non igitur quod multi : sed quod sapiens loquitur est probandum.

QVOD PRINCIPI VIRTVS

imperandi patientia sit depascenda. IIII.



VM aliquando neq; P. ALDOBRANDINVS piacula populi : neq; Populus P. ALDOBRANDINI iustitiam sine stomacho videretur pati : dixit sapientissimus ille Antistes Principi multò plus cum populo, quàm olim fuit Herculi cum tauro esse negotij : nec quicquam esse difficilius, quàm populum, qui bellua est multorum capitum, vno rationis freno arcere, atq; in officij gyro retinere. Sapienter ille quidem : Nihil enim est, vt
asseue-

asseuerabat Diocletianus Cæsar, Imperij domus, nisi Arca Noes. Nec enim in ea tot, tantæ, tamq; variæ bestiæ tenebantur inclusæ: quot, quanto, quàmq; inter se dissidentes resident in ciuitate perturbationum varietates, & vesanę hominum opiniones. Quare optimè ille demum nouit gubernacula tractare imperij, cui consuetudo diuturna quasi callum quoddam obduxit labori: quiq; aduersus omnia mala, obduruuit patientia.

QVOD ARS IMPERANDI

una potissimum commendetur prudentia. V.



DISCEPTANTIBVS nonnullis de arte imperandi, inter quos fortè inciderat, subrisit, quòd multa sine argumento, sine sale & condimento essutirent. Eorumq; ineptias vt regeret potius, quàm vt nodum solueret quæstionis: dixit, & artem & arcem Principis vnã esse prudentiam. Hoc ceteri principes omnes, ex oraculo Apollinis Pythij, sibi editum putent: nihil potest esse verius. habet enim prudentia in consilij deliberatione, futuri temporis prospicientiam: in iudicij æquitate, præteriti Memoriam: atq; in præsentis, rerum agendarum, & vitandarum scientiam. Nec alia de causa Persę opinor, Regem Cyrum inquebant à Cane fuisse nutritum, nisi vt eum gnarum imperandi esse ostenderent. Non enim canis habet animi plus, ad mala oppugnanda, quàm sagacitatis ad bona inuestiganda. Ex hoc commento, quod nihil sonat, aut olet nisi artem regiam, intelligimus, eum etiã in periculis fortitudine destitui, qui in otio, & pace vacat prudentia. Nam fortitudo prudentia expers, fortitudinis nomen amittit: induit temeritatis.

QVOD IN PRINCIPE ORIS


figura, minimè orba sit sua laude,

& gloria. VI.



VIA non solum frons, sed etiam vniuersa totius corporis figura, tacita est animi oratio: illa in ijs præsertim, qui personam induunt publicæ societatibus, minimè est contemnenda. vbi igitur de forma ageretur Principis: etsi, dixit, non est faciendum de Principe iudicium ex oris figura, sed ex moribus: habet tamen Principis forma, & species liberalis non minimum ad dignitatem ponderis. Cæci enim est, & amentis quærere, cur si amentur quæ pulchra sunt, gratus sit & iucundus is, in Imperio, cuius forma grauis sit & elegans. Barbari ferè omnes nullos putabant magnorum operum esse opifices, nisi illos, quos ipsa corporis species, ad opinionem laudis publicæ euexerat. Itaq; Macrobij, qui, vt cæteras Gentes præteream, Meroen Nili Insulam incolebant; Principem, cui parerent à formæ pulchritudine eligebāt: nec vnquam deformi viro obedire dignabantur. quæ res ad Africani maioris laudem, non paruus accedit cumulus. Nam ea is fuit formæ dignitate, vt inter quoscunq; viros esset, solus præter cæteros, videretur imperio dignus. Quare Principi non solum est occultanda animi, sed etiam corporis deformitas. illa enim laudem comminuit: auget hæc contumeliam. Quocirca Periclem, cuius præclara gesta omnis Græcia admittata est, sculptores eius imaginem, Casside velabant, ne deformitas appareret, quia oblongo erat capite.

*QVOD PRINCIPI CORPORIS
deformitas in virtute sit ornamenti loco. VII.*



NONNULLIS obicientibus Galbæ Imperatori, & Annibali corporis deformitatem: præclaram dixit eam esse, in principe, oris turpitudinem, quam non fucus gloriosam redderet, sed animi decus. Non enim in administrando imperio de forma, sed de sapientia sit contentio. Nec Princeps requiritur robustus, sed fortis: nec elegans, sed sapiens. Itaq; etsi inter Medicos Hippocrates strabo erat, Imbecillis, parvus, & deformis: quia tamen neminem curauit, quem ad pristinam sanitatem non restituit: nihilq; alteri prædixit, quod ei non contigerit: Hippocratem omnes Medici, post Æsculapium, maximè colunt, & obseruant. duplex quippè in eo fuit gloria: vna quòd norit naturæ non cedere impedimentis: altera, quòd non ignorarit ipsa, in cæteris hominibus, formæ superare commoda. Sic & Agesilaus Lacedæmoniorum Rex laudatur, qui cum toruus esset aspectu, & altero pede claudus: nomen tamen regis superauit magnitudine virtutis. Nec ei probro fuit imbecillitas corporis. Fortis enim multo robustior est Cyclope Vlyssæo. Hic quippe poterat tantum saxum, quod duo, & viginti iuga bouum non valebant amouere, parua manu huc, illuc versare: ille non saxum, sed Imperium potuit, & depræssum attollere, & elatum deprimere. Etsi enim non habebat vires Atlantis, qui mundi globum suis sustentabat humeris: eos tamen habebat animi neruos, quibus mundus ipse cogitur cedere, atq; obtemperare.

*QVOD PRINCIPIS DISCIPLINA
ex Chirone magistro sit haurienda. VIII.*



VM pluris sit Principem benè institui, quàm bene nasci, est eorum mens graui opinionis errore oppressa, atq; impedita, qui autumant neq; rem literariam armorum: neq; arma, literarum præsidio magnoperè egere. Itaq; Musarum ille Mecenâs, non solum plerumq; ingemuit educationem Principum alterutro destitui: Sed etiam dixit iccirco nullum inclinato iam imperio præsto adesse Achillem: quia nemo Chirone vteretur præceptore. latet in ipso verborum lepore acer, & acerbus reprehensionis aculeus. Chiron enim Centaurus, apud Homerum, ex altera parte hominis: ex altera equi speciè præferens: ideò Achilli est datus, vt cum equus rei bellicæ, homo virtutis literariæ sit minister, ostenderetur æque disciplina literarum, atq; arte militari. vt felix sit imperium, instructum oportere esse Principem. Non minus quippè est Principis gloriosum, populum in prosperis fortunæ ventis, legibus arcere, ne labatur in luxuriâ: quàm in aduersis casibus, inclinatam erigere, & restituere perditum. qui veròvtrumq; potest, dicitur Princeps fortunatus, hoc est vtriusq; fortunæ, aduersæ scilicet, & secundæ magister, & dominus.

*QVOD PRINCEPS NULLA PROPIVS
semita ad Deum Immortalem accedat, quàm
liberalitatis. IX.*



TSI beneficio homines, vt hamo pisces, trito sermone prouerbio, non modo capiuntur, sed etiam conseruatur: capere tamen ab infimis hominibus, quæ

quæ sunt exigua, nunquam recusatur ALDOBRANDINVS nec summa ijs sæpe dare. Quare cuidam interroganti quodnam in tanta multitudine, & varietate munerum gratissimum putaret collocatum apud amicos, beneficium: quod respondit, non fuit peritum. gratum enim est prodesse: gratius humaniter. illud quippe est vtile tantum: hoc etiam iucundum: vtrumque simul præstare est magnæ virtutis, nec exiguæ gloriæ. Nam quò quis impensius benefacit, eò magis vim & naturam Dei immortalis attingit. Æthiopes igitur, qui vltiorem Nili regionem incolebant, vt strabo Geographus scribit, duos colebant Deos, vnum immortalem: alterum mortalem. Illum dicebant qui rerum omnium est causa: hunc à quo plurimi afficiuntur beneficio. ex quo intelligimus nihil esse Principi laudabilius ea liberalitate, & beneficentia, quæ censetur ad plurimos proficisci.

*QVOD PRINCIPIS AVRO AEQVE
pareat inimicus, atq; amicus. X.*



VM in sermonem de bello incidisset, interrogareturque quomodo contra hostes superiores esset pugnandum: non ferro, dixit, sed auro. Salsè id quidem. Nam Philippus Macedonum Rex, hostium vrbes dando expilauit magis, quàm rapiendo. Quocirca Græcorum sermone percrebruit, non à Philippo, sed à Philippi auro direptam fuisse Græciam. Nihil est non modo apud amicos, sed etiam apud inimicos omnes, auro valentius. Itaque Alexander Philippi filius, vt beneficentia, sic rebus gestis reges omnes superauit.

QVOD CLEMENTIA CVM PRINCIPE
summo constringatur societatis vinculo. XI.



V M nihil sit neq; gratius populo, neq; iuri renitentius impunitate: difficile est Principi, in animaduertendo, vtriq; satisfacere. Sciscitāti igitur quæ vindicta contra improbos esset sumenda. Ea dixit, quæ corrigit, non destruit. Non est obscurum, in Apum Rege, qui solus inter omnes apes aculeo destituitur, naturæ testimonium. quid enim ab Antiquitate, quod paucis perstrinxit tantus, tamq; sapiens Antistes, altius reperam? Non alia de causa ex Iouis semine, vt est apud Orpheum, natæ sunt preces, nisi vt admoneantur Principes omnes, apud se miserorum preces ponderis plus sæpè debere, quàm iura ipsa, & leges habere.

QVOD RELIGIO PRINCIPIS,
Athenæus murus sit Imperij. XII.



V M multa vario, & ancipiti Marte conflctantur regna, afflictumq; passim, & iacēs sit imperium: interroganti fortè qua in re firmamenta posita essent, imperij: in religione, respondit, Principis. Nihil hac vna voce neq; sanctius, neq; verius audiri potuit. Nam si antiquos consulimus, cur apud Homerum, ea ciuitas, in qua erat Palladium, nulla vi hostium expugnari poterat? nihil est Palladium, si benè attendimus, nisi præsidium religionis, qua cum semper crescit, & decrescit imperium. Ab hac, Princeps rerum agendarum omnia primordia debet capere.

capere, Nam religione magistra, & Deo duce non potest errare. Nec quicquàm est, quod Principem magis commendat populo, quàm religio. fieri enim non potest, ut quis sit religiosus, qui non item sit pius, clemens, & iustus. Quare Cyro Religionem in primis commendauit Cambyfes pater.

QVOD PRINCEPS CIVILEM

*omnem societatem vno constringat iustitiæ
vinculo. XIII.*



VONIAM facile, ait Salustius, ijs artibus Imperium retineretur, quibus ab initio partum est, interrogatus à quodam, cuius rei gratia Princeps primum esset creatus, iustitiæ respondit. Nec falso id quidem. Nam ut scribit Herodotus, nulla est arctior humani generis societas, quàm quæ iustitiæ vinculo constringitur: nec magis resp. potest consistere sine iustitiâ: quàm hominis vita, sine anima. Quod omne ex nomine patere videtur Principis. Non enim alia de causa Princeps à capite est dictus, nisi ut, sicuti ex capitis partibus, per vniuersum corpus, nerui omnes, & sensus distribuuntur, ita intelligamus ex principe, per vniuersum imperium iustitiâ manare, oportere.

QVOD PRINCIPIS VIRTUTI

nulla sit par, & equalis. XIV.



RECTA & astricta dubitationi semper ferè est veritas. Itaq; cùm vis potentia, & robur à quibusd. m. laudaretur principis: atq; iccirco inter se quærerent quidnam esset id, quo princeps potissimum cæteros mortales deberet antecire: virtus respondit.

ita

ita quippè natura comparatum est, vt optimus quisq; Imperet deteriori. Quoniam igitur Princeps imperat omnibus, par est rationi, vt omnium sit optimus. Ideo autem antiquitas Iouem Principem fecit deorum: vt mortales sibi persuasum haberent, eum demum esse Principem, qui quantum cæteris præstat dignitate: tantum ijs antecellat Virtute.

QVOD NATURÆ IVS VIOLET,
qui Principem non summa colat
beneuolentia. XV.



BI de bono publico incidisset quæstio: dixit nihil in terris, post Deum immortalem, nec melius esse, nec amabilius Principe. Personam enim induit publici commodi, & communis salutis, cuius ex finibus & terminis, quod exulat, statim nomen amittit bonitatis. Nam detracto, aiunt Dialectici, vniuersali, detrahuntur singularia. Eò igitur pluris à nobis debet fieri princeps, quò pluris est totum qualibet sua parte, idq; non ex Philosophorum modo opinione, sed etiam ex naturæ, quæ nescit mentiri, disciplina. Nam cur natura duce, minus cibo, & potu animans oblectatur, quo sustentatur, quàm re venera, qua ipsa destruitur? quia cerè quidem ille ad bonum priuatum: hæc ad commune bonum; quod est propagandum, magis pertinet. ex quò intelligimus, nihil magis esse contra naturæ ius, quàm priuatum commodum publico anteponi, atq; Principem non proxime, ac secundum Deum, coli & obseruari. Nam qui amat Principem: amat publicum bonum, in cuius fide, & tutela, quæ diuina sunt simul, & humana posita sunt omnia.

QVOD

QVOD PRÆSENTIA PRINCIPIS:
in rebus arduis, pro auxilio habeatur. XVI.



MAGNA est in otio dignitas principis: auctoritatis vis multò, in bello maxima. Cum quæreretur igitur, quod in conflictu ægrè renitentibus summum esset præsidium, conspectus, dixit, Principis. Nam sicuti Aquila vna sexcentas fugat aues: ita solus sæpe Imperator vniuersum territat exercitum hostium. hùc accedit, quòd sine duce, eneruantur militum animi. Nec solum Principis: sed etià dignitatis oportet adsit præsentia. hoc sentiens Agabrias aiebat pluris esse pecudum exercitù, Leone duce, quàm Leonum imperante pecude: quocirca nemini debet mirum videri, quòd vbi, in pugna Pharsalica, animo concidit Pompeius, atq; aciem reliquit, ibi statim summa strages à Cæsare non renitentibus, sed fugientibus hostibus sit illata. Nam sicuti in alto nauigantes quò ducit Gubernator, qui sedet in puppi, clauumq; tenet: sic milites in bello, Imperatorem omnes sequuntur.

QVOD PRINCIPI TEGENDA SINT
simulatione, & dissimulatione sua consilia. XVII.



QVONIAM semper, in principe, latens sit oportet animi sui voluntas: nunquàm apertum consilium: cuidam sciscitanti quis maximè esset ad benè imperandum accommodatus: qui naturam respondit habet Polypi: nouitq; in populo morum colores omnes induere: atq; , vt dicam apertius, qui ita artificio simulandi, & dissimulandi est eruditus, vt frons ipsa, quæ tacita est animi oratio, longe alia, quàm animus loqui videatur.

videatur. Nihil hoc vno prudentius dici poterat. Testis est vnus instar omnium Alcibiades. Nam tanta fuit ad id, ingenij facilitate, vt ad hoc vnum natus esse videretur, quod ipse vltero suscepit. Itaq; pro diuersis populorum moribus, ita mutabatur, vt apud eos non instructus, sed natus: non inquilinus, sed habitandi dominus videretur.

QUOD NEQUE VIRTUS SINE
eruditione: neq; Eruditio sine virtute satis
sit Principi. XVIII.



M res sit plena admirationis persona Principis, qui non intelligit Principem vim habere numinis, nulla excusatione vri potest, nisi stuporis. Sciscitanti amico igitur, qualis debeat esse Princeps, doctus ne, an vir bonus: neuter illorum dixit. Nam alter alijs magis quàm sibi: alter sibi potius quàm alijs prodest. sed sapiens, ait, sit oportet, vt non solum norit alijs imperata dare, sed etiam ipse facere. Quare neq; Sylla, neq; Lysander vacat reprehensione. Ille enim cum esset dissolutus & perditus, ciues ad frugalitatem legibus compellebat: Hic contrà ciuib; flagitiorum lenotinia permittebat, à quibus ipse abstinebat. Laudatur igitur ex ALDOBRANDINI sententia, princeps Lycurgo simillimus, quippe qui nihil vnquàm in alios statuit, quod ipse non ante seruauit. quæ res plurimi interest Reip. Nam qualis est Princeps, vt refert Plato, talis solet esse ipse populus. Testis est ipsa temporum verustas. Nam cùm Ptolemaici Reges Mathematicas disciplinas calle-
 rent, eorum temporibus, complures egregij mathematici clauerunt: cumq; contra Xerxes voluptati esset deditus, regiones ornatas, quibus ille imperabat, omni turpitudinum genere

contaminauit. Nihil enim est principum vita, nisi aliorum omnium instructio, & disciplina.

*QVOD ET PRINCEPS, ET LEX
mutuo gaudeant obsequio. XIX.*



LATO vix quicquàm inter legem, & Principem, facit discriminis: eò quòd hic legis vim habeat loquentis: illa principis, qui expers sit mortalitatis. cùm igitur in dubium venisset vter alteri in administratione Reip. deberet obtemperare, dixit par esse superiorem imperare inferiori: legem diuinam præstare principi: Principem ciuili. Ideo virum ab illius virtute: hanc autem virtutem à viro esse nominatam. Quare vt lex scripta pater principi, corrigiturq; eius æquitare, ita Princeps subiicitur rationi, hoc est legi non scriptæ, cui nisi obtemperet, nomen amittit Principis, induit Tyranni. In iure igitur scripto satius est per Principem administrari Remp. quàm per legem. Nam vbi est Princeps, ibi, vt ait Euripides, Deus est in humano corpore hōspes. quod cùm olim sentirent Persæ, Reges omnes suos adorabant: omnisq; fere antiquitas eos fecit ex loue natos.

*QVOD FERENDI SVNT, NON
culpandi Principes. XX.*



INIMA culpa in Principe fit maxima. Nam vt detestabilior est inscitia in magistro, quàm in discipulo: ita turpius est vitium in Principe, quam in populo: it q; cùm concitaretur hic dubitandi scrupulus, num Princeps prauus esset tolerandus. dixit

B Principem

Principem à populo magis ferendum esse, quàm culpandum, Siquidem nemo, post homines natos, vnquam est iuuentus, cui nihil deesset. Notatur igitur Cæsar ambitionis: Alexander temulentia: Pyrrhus inconsiderati furoris: Annibal ambiguae fidei: Fabius tarditatis: Marcellus præproperæ festinationis. Quæ ex re intelligimus, neminem omnibus horis sapere, nec omnes omnia posse.

*QVOD PRINCEPS CVRA, ET
Industria vnus instar sit omnium. XXI.*



V M nihil intentatum, quod ad felicitatem reip. pertineat, relinquunt Principes: interroganti cuidam ex amicis, quid in bonis potissimum curare deberet Princeps, non bonum dixit corporis, vt medicus: non animi, vt Theologus: non fortunæ, vt iurisperitus: sed hæc solus vniuersa. grauis cerre, & tali Antistite digna responsio, cui multis ante sæculis suffragatus est Demosthenes. Sed tamen cum morsu aliquo in imperium, & aculeo. Nam in exilium proficiscens, vbi Arcem Atheniensium suspexit, altiore voce exclamasse dicitur, ò Pallas vrbium custos, cur tribus truculentissimis belluis delectaris: Noctua, Dracone, & Populo? insignia hæc tria quæ Palladi tribuuntur, docent vniuersa bonorum genera consistere in principis tutela. Corporis enim, & virium nervos sapit populus: fortunæ bona olet Draco, qui vt elementis fruatur omnibus, volat cum alitibus, natat cum piscibus, & grassatur cum quadrupedibus: animi vero lumen noctua, quæ in tenebris videt plus, quàm alites cætera apertio Sole.

QVOD EX PRINCIPIS VIRTUTE

Petenda sit Imperij felicitas. XXII.



QVIA Acrius videntur turpia, quàm recta: hebesuntq; sæpè in rectis percipiendis hominum oculi, quærenti aliquando vnde felicitas proficiscatur reip. non ex lege, non ex populo dixit, sed ex Principe. Nam vt itineris duces, qui recta antecedunt via, hoc præstant sequentibus, vt nunquam aberrrent: sic qui bonus est princeps, nec à rationis semita deflectit, nec alios finit deflectere. Hinc Plato solitus est dicere, tum fore beatam remp. cum aut sapiens inciperet regere, aut Rex sapere. Nam vt. vetus est Xenophontis sententia, omnes ciuiles societates, eorum. ruunt vitio, qui illis præsunt. Quare si resp. rectè administraretur: perpetua euaderet, & cum virtute immortalis.

QVOD PRINCIPI PRÆCLARIUS

sit amari, quàm timeri. XXIII.



RERVM in dubijs suspicio multos non solum amariores, sed etiam mordaciores facit. cum igitur multi, dentes in sui rectores exacuant, quod vt caueretur, sciscitanti cuidam quomodo amaretur Principis imperium, si talis respondit princeps fuerit in subditos: qualis pater est in liberos. Nec alia de causa, puto, Homerus Iouem, quem deorum, hominumq; regem facit, patrem appellat, nisi vt demonstret regnum paternum esse imperium. Itaq; ius, neq; ab imperando, neq; à præcipiendo est dictum, quorum alterum est domini: alterum magistri: sed dictum est à iubendo, quasi iussum:

B 2 quòd

quòd iubere patris est proprium, vt in iure nihil sit non plenum amoris, & beneuolentiæ.

QVOD DISCIPLINA PRINCIPIS
nullo vacua sit doctrina genere. XXIV.



VIA imperium Principis, multa adiumenta doctrinæ desiderat, interrogatus ab amico qualis disciplina deberet esse Principis, in bello, respondit, qualis Achilli: in pace, & otio qualis Vlyssi tribuitur ab Homero. illi enim animi fortitudo, corporis robur, disciplinaq; ascribitur militaris: huic omnes ingenij tribuuntur dotes, consilium, eloquentia: prudentia quidem tanta, vt omnia etiam videat in tenebris, & audiat in silentio.

QVOD NEC SOLES PLVRES
mundus: nec plures Principes idem imperium
poteſt pati. XXV.



VIA sapientis oratio auctoritatem habet rationis, & veritatis testimonium, nemo sine culpa non potest in sententia ALDOBRANDINI acquiescere. Est autem in eius ore, & sermone hoc peruagatum, quòd longè melius à Principe, quàm à Rep. administretur populus. Virtus coniuncta enim roboris plus habet, quàm diuisa. itaq; Romani in magnis periculis, dictatorem vnum creabant, cuius imperio omnia permittebant: Dictatoremq; iccirco appellari Varro existimauit, quòd illius dicto omnes auscultare, atq; obtemperare cogerentur. Nec Romanorum solum, sed etiam naturæ patet testimonio, vnus imperium, plurimum Imperio esse anteponen-

ponendum. Vnitas enim, quæ ^{Morde} à Grecis dicitur, mas est simul & scœmina: par & impar, nec per se numerus, sed fons, & caput numerorum, Principij & finis expers: principium tamen, & finis rerum omnium. Ex quo non solum amicitia, sed etiam Dei constituitur Symbolum.

QVOD PRINCIPIS SIT NON TAM

regere: quàm quomodo sit regendum alijs ostendere. XXVI.



ARVM est Principi, vitæ splendorem nullis maculis aspergere. Nam dignitatem muneris augere debet virtute. Quare ex ALDOBRANDINI percrebruit oratione, gloriosum Principem esse eum, non qui sciret imperare, sed qui multos ad imperandum, ex imperitis redderet peritos. huc pertinet Iphicratis gloria, qui iactitabat se neq; equitem, neq; sagittarium, neq; leutatum, neq; peditem esse, sed eum, qui hos omnes posset instruere.

QVOD OMNES PRINCIPIS: NON

Princeps aliorum egere debeat consilio. XXVII.



VM res sit morosa, administratio Principis, quia ut ait Chrisippus, si benè regit populo: sin malè Deo displicet: interrogatus cuius consilio uti potissimum deberet Princeps, proprio respondit. Magna enim est imperij infirmitas, cum Princeps aliorum magis, quàm alij Principis cogantur uti consilio. hoc sentiens Anacharsis felicitatem Reip. ex eo definiebat Principe, qui solus saperet. Nam populus debet ab ore principis pendere, tanquàm ab aliquo Delphico oraculo.

TITVLVS SECVNDVS DE VIRTUTE.



QVONIAM vt Rationi corpus: sic Principi obedire debet populus, faciliusq; mundus sole, quàm populus Principe potest carere: qui Principem contemplatur, verum sapientiæ exemplar, qua reguntur vniuersa, contemplari videtur. cùm igitur in sermonem Don CAROLI Bossij incidissem, quem de summa atq; admirabili virtute P. ALDOBRANDINI Cardinalis habebat, multa retulit cur summus ille Religionis, ac pietatis Antistes viuens in terris, habitare in cœlo, cum Deo immortalis, continenter videatur. ille igitur cùm multos, tum me vnum in primis vehementer mouit. Nam tanta præstat sapientia, vt sicuti Sylla consuevit dicere in C. Cæsare multos esse Marios, ita ausim iam fateri, in vno Don CARLO Bossio plurimos esse Solones. cùm igitur nullus vrbis sinus sit apud nos tam recunditus, qui tanti Cardinalis non resonet laudibus, & gloria; tum vnice amo eius de virtute Principis sapienter dicta, & responsa. Nihil enim est virtus, nisi Demon Socratis, quò ille duce fertur nunquam errasse. Sola quippe virtus vna cum Deo nescit errare. Quare non falso qui habenas tractant imperij, ad virtutem omnia referunt: optimatesq; cò quasi optimi, sunt dicti, quod præmium virtutis sit ipse Deus. de ea autem Apophthegmatum series hæc est.

- 1 Quòd Virtus sola pariat viros.
- 2 Quòd nunquam sit miser, qui possessionem habeat virtutis.
- 3 Quòd vir bonus nunquam in alia fortuna sit alius.

Quòd

- 4 Quòd viri bonis non sit scripta lex: quia vltro honesta sequitur.
- 5 Quòd summa sit virtutis, cum doctrina affinitas.
- 6 Quòd virtutis sit vincere, non vinci.
- 7 Quòd ex virtute efflorescit imperij felicitas.
- 8 Quòd virtus neq; crescat, neq; decrescat.
- 9 Quòd bono viro nihil sit similis Deo.
- 10 Quòd vir doctus alijs: vir bonus sibi magis consulat.
- 11 Quòd artium omnium procreatrix & magistra sit virtus.
- 12 Quòd mira bonorum virorum sit paucitas.
- 13 Quòd nullus virtute vberior sit thesaurus.
- 14 Quòd res operosa, & difficilis sit virtus.
- 15 Quòd virtus medicina sit senij.
- 16 Quòd virtus armatura sit qua nec ferro penetrari: nec dolo pos-
sit surripi.
- 17 Quòd virtus lorica sit aduersus timorem.
- 18 Quòd nihil sit virtute clementius.
- 19 Quòd viro bono nihil sit grauius iactura opera & studij.
- 20 Quòd boni viri aduersus impios mite sit iudicium.
- 21 Quòd ex virtute, omnis exulet calamitas.
- 22 Quòd sola virtus sibi honorem vendicet.
- 23 Quòd res sit admirabilis virtus.

*QVOD VIRTVS SOLA
pariat viros. I.*



TSI virtus non solum est honesta, sed etiam honestos reddit eos, à quibus tenetur complexa difficile est tamen dicere, vtrum plures virtutem laudent: an pauciores sequantur. cò quòd semper virtus est in bonorum morsu aliquo, & aculeo. cuidam igitur sciscitanti quodnam in terris maximum ex virtute mor-

tales referant præmium, quam qui habet nullum vitæ suæ tempus videt cruciatu vacuum. quòd, respondit, viri fiunt. præclara verò vox, & tali tantoq; Principe digna. Non enim magis Musici ex Musica, quàm viri ex virtute, & fiunt, & dicuntur. Nam si Antiquitatem consulimus, cur veteres virtutem, non viri imagine effingebant, sed fœminæ? quia certè quidem, nisi plane hebescimur, sola virtus viros parit. Quam igitur Plato dixit virtutem, officium ab efficiendo, quòd viros efficiat, nominavit ingenij & eloquentiæ Princeps Cicero.

QUOD NVNQVAM SIT MISER,
qui possessionem habeat virtutis. II.



SOLET sapientissimus ille Antistes, in recreandis Religiosorum familijs, virtutem prædium Plutonis vocare. Salsè quidem. Non enim quis magis propter virtutis honestatem, dicitur vir bonus, quàm propter vtilitatem, felix & beatus. Nam quorsum apud Homerum, cornu Amaltheæ? significationem habet virtutis dona omni tempore ferentis, quam qui habet, nihil frustra cupit, sibiq; solus ad bene beateq; viuendum sufficit. Bias igitur, cùm in direptione patriæ admonerentur omnes, vt aliquid ex suis bonis asportarent, nudus exijt, quod admirantibus alijs, omnia, dixit, bona mea mecum porto. virtutem enim, non pecuniam, bonam esse putabat: suam solam probitatem, non fortunam. Nam si Euripidi credimus, non numisma splens, argentum solum est, & aurum: sed etiam virtus hominibus moneta recondita est omnibus, quam qui habet, non solum fit diues, sed etiam diuinus.

QUOD

QVOD VIR BONVS NVMOVAM
in alia fortuna, sit alius. III.



CVM haberetur aliquando de virtutis laudibus oratio: tùm cuidam fortè quærenti, cuius præmij fiducia olim fretus miles Romanus, qui omnia definiebat lucis huius vsura, mortem in armis non refugeret, constantiæ respondit. magna verò, & proluxa oratione digna, in solo verbo sententia. Sola enim constans, & perpetua est virtutis possessio: sola experts vicissitudinis: quam qui habet, non periculum timet, sed dedecus. In externis contra bonis, nihil est non fluxum & caducum. id Æsopus vt ostenderet, asseuerabat à Ioue nullam aliam, in hoc elementari globo tundi incudem, nisi vt continenter excelsa deprimeret, & depressa attolleret; nec quicquàm in terris pateretur stabile esse, & permanens, præter virtutem. Quare nunquàm verè fuit vir bonus, qui semel abduci à virtute potuit.

QVOD VIRIS BONIS NON SINT
scriptæ leges, quia vltro honestum sequuntur. IIII.



ETSI apud Lacones, qui breui genere dicendi oblectantur, Rex Agesilaus in primis laudatur: quia ex tempore, multa fundebat faceret, & acutè dicta, quibus solet audientium animos in quemcumq; volebat affectum trahere: hūc tamen vicissim virtutis, & gloriæ Antistes ALDOBRANDINVS, cui ita breuitas dicendi suffragata est ad promerendum omnium

nium gratiam, vt boni viri omnes non modo eius dicto obtemperare videantur, sed etiam ex eius præscripto viuere. Sciscitanti igitur cuidam cur leges scriptæ in bello impunè non seruarentur à Militè: quia respondit, censetur esse vir bonus, qui pro æquo, & bono pugnat: virò autem bono non scriptæ sunt leges. Nam vltro quæ honesta sunt facit: nec vi aut metu cogi potest. Sicuti enim Arbor louis, Quercus nec ope mortalium, nec cultura eget ad fructus pariendo: ita vir bonus sanctimonia, ad benè beateq; viuendum pastus, nec spe, nec metu legissatorum opus habet, ad virtutis, & gloriæ præsidium. apud eum enim, qui neq; lucrum appetit; neq; mortem perhorrescit, nulla est aut metus, aut præmij auctoritas.

QVOD SVMMMA SIT VIRTVTIS

cum doctrina affinitas. V.



VM de lociorum inter finitimos populos fœdere ageretur, inter quos suspecta erat nonnullorum fides, interrogatus fortè quam societatem maximè probarer, virtutis respondit, cum intelligentia: quo responso, perfidorum simul momordit insciam, & fidem scitè laudauit bonorum. Nihil enim est aut virtus, in consilij capiendi deliberatione, sine intelligentia, nisi ingenij dedecus: aut intelligentia, sine virtute, nisi animi infamia. Itaq; Seneca probitatem, & intelligentiam tanta affinitate constrinxit, vt vtramq; vno virtutis appellarit nomine. Atq; Socrates ad vtramq; cum Principem instituit, sic eum hortatur, vt caueat ne, aut deterior melioribus: aut ineruditior peritioribus imperet. Hæc quippè est naturæ lex, sicuti Dionysius Halicarnassæus asserit, omnibus communis, vt semper deterioribus imperent meliores.

QVOD

QVOD VIRTUTIS SIT

Vincere non vinci. VI.

CVM in tot rerum asperitatibus sit posita hominum vita, vt ne vnus quidem horæ vsura, ei ad viuendum sine angore, & studio sit concessa: interroganti cuidam quisnam inter mortales omnium esset potentissimus, is dixit, qui habet virtutem. Nam virtuti omnia cedunt. graue quidem responsum: quod non sententiæ modo, sed etiam oraculi habet auctoritatem. Solus enim vir bonus sibi sufficit, & quamquam ei possunt prodesse homines, non possunt tamen obesse. Siquidem ea est virtutis vis, vt vir bonus omnia bona possit à summo rerum opifice capere: nulla mala possit accipere ab hominibus. non vulgaris est apud Homerum auctoritas. Nam quorsum quòd Bellerophon, vt est in fabulis, Pegasus insidens occidit Chimeram? certissimus est, si modo sapimus, in virtutis imperio, malorum omnium interitus. pluris igitur est vir vnus bonus, quàm vniuersi simul improbi. Nec opus est ad hanc rem sapiente interprete. Nam quid est Bellerophon, qui alio nomine dicitur vir bonus, nisi monstrorum domitor, atq; malorum omnium profligator?

QVOD EX VIRTUTE, IPSA

efflorescat Imperij felicitas. VII.

VASCVMQ. in oras, regionesq; controuersiarum res delata est, ille vias omnes ingenij, artis, & doctrinæ ita tenet, vt disceptationes non solum dirimat, sed etiam disceptantium animos constringat pari, & mutuò opinionis fædere. cùm igitur populus

pulus motu turbulento continenter agitaretur, nec solum Principi, sed etiam ipse sibi grauis esset & infestus, multaq; à multis rectoribus afferrentur remedia, Dixit sine virtute, præsidia iacere omnia: nihil in populo à rectoribus præter virtutem esse affectandum. eò quòd eorum est, vt ait Socràtes àpud Platonem, ciues suos ad fœlicitatem perducere, ad quam nullus patet, nisi qui virtute aperitur, aditus.

*QVOD VIRTUS NEQUE
crescat, neq; decreseat. VIII.*



VM nulla sit tam adulta Reip. pestis, quam CLEMENTIS VIII. studio, non ita sustulerint iustitię adminstratores, vt stirps, & semen malorũ omnium radicitus videatur relictũ, & deletum, sciscitanti Pontifici cuius facta, inter eos maximè probaret: illius dixit, quibus nec addi, nec detrahi quicquàm sine culpa potest. Vetus est Pythagoreorum ratio, qui dicebant malum infinitum esse, bonum verò finitum: in altero, errare esse facile, & expeditum: in altero arduum, & difficile metam attingere. Hoc ipsum sentiens Bion, dixit tam apertam, & spatiosam esse ad inferos viam, vt etiam clausis oculis, difficile esset de via aberrare.

*QVOD BONO VIRO NIHIL SIT
Similius Deo. IX.*



ISI officiorum dignitas, virtutis corroboratur auctoritate, quædam est honorum inanitas: proinde sciscitanti aliquando CLEMENTI VIII. quod in ad-

in administratione publici muneris, & officij maximè probaret, quæ Dei respondit, viua sunt simulacra: non factu, sed virtute illustres viros esse ostendens. Hac ratione Antisthenes asseuerabat virum bonum, pluris esse faciendum, quàm genere propinquum. Nam arctiora sunt virtutis, quàm sanguinis vincula.

QVOD VIR DOCTVS ALIIS:

vir bonus sibi magis consulit. X.



VM fortè in disceptantes incidisset, qui virum vir doctus probo viro, an probus viro docto esset anteponendus, argumentis conflictabant: facietatem aurium vt inter eos, qui sibi inter se rem acrem, & acerbam constituerant, vitaret, dixit hoc inter vtrumq; interesse, quod interest inter marem, & sceminam. Nam vir doctus alijs imperat: probus aliorum facit imperata, quorum alterum est viri, alterum sceminæ. Idipsum significare, opinor, volentes Poetæ Apollinem Deum doctrinæ: Dianam deam fecerunt virtutis. accedit ad auctoritatem ratio. Nam qui malè intelligit non potest bene appetere: nec esse vir bonus, qui male appetit. huc pertinet, quod vir probus sibi tantum, doctus alijs etiam in administranda Republica consulit.

QVOD ARTIVM OMNIVM

procreatrix, & magistra sit virtus. XI.



VM fortè de iuuentutis institutione, & disciplina ageretur, atq; ob id à quodam quæreretur. quodnam inter Italix Gymnasia maximè probaret: non quod

quod ornamentum habet marmoris, dixit, sed virtutis. iacet enim in ijs regium etiam ædificium, nisi & probitatis, & ingenij adsit fabrica. Itaq; Plato, in Academiæ suæ primo ingressu, & vestibulo inscripserat *ἀγνοειν τὸς οὐδὲς ἵσται*. hoc est, nullus Geometriæ ignarus huc ingrediatur. virtutem appellavit Geometriæ nomine, quia in æqua affectuū consistit mensura: Hæc in discipulis comparandis potissimum requiritur. Nemo enim nisi magistra virtute, nouit doctrinam affectare. errat quippè ēt in bene factis, quicunq; modum, & mensuram negligit. Non est igitur tarditas ingenij, in discipulo, doctrinæ impedimentum, sed magis morum vitium. Nam obtusum, & hebes ingenium arte, veluti quadam core potest exacui: acris vero, & subtilis ingenij acies non potest non vitio obtundi.

QVOD MIRA SIT BONORVM

Virorum paucitas.

XII.



VONIAM si virtus vt ait Cic. sua expressa cer-
neretur facie, mirabiles sui amores concitaret,
sciscitantibus, in amicorum conuentu, nonnul-
lis, quæ forma esset virtutis, & structura: ea,
respondit, quæ Geryonis tricornis est simillima. Corpus
enim vnum habet doctrinæ, ad mala ea cauenda, quæ abdi-
ta sunt & reclusa: alterum vero persuasionis, ad ea etiam ho-
stibus suadendum, quod ferrum nescit exorare: vltimum ob-
sequij, ad obtemperandum rationi. Hac sententia non so-
lum demonstrauit, qui sint, sed etiam quàm pauci sint viri bo-
ni. Recrudescit doloris hic morsus ex Romanorum auctori-
tate. Nam Bonorum discrimen, apud eos non ex vario, &
multiplici hominum: sed ex Deorum constituebatur gene-

re. Itaq; Augustus propter sapientiam, Apollinis: Romulus, propter fortitudinem Martis: Hercules propter iustitiam, Iouis censebatur esse filius.

*QVOD NVLLVS VIRTUTE
uberior sit Thesaurus. XIII.*



HOC P. ALDOBRANDINI virtus affixit, hoc sapientiæ eius gloria conflauit, vt ab eius dicto nefarium omnes esse putent, recedere. cum autem in turba populari, videret à multis inopiam, à paucis vitium timeri: dixit virtutem armaturam esse aduersus egestatem: non pecuniam. eò quòd virtuti fortuna: non fortunæ virtus succumbat. nec falsò. Nam cur, apud Poetas, Hercules & Plutonem, & Iunonem, quorum altera honorum, alter diuitiarum Deus habebatur, vulnerauit? quia nihil est in bouis tam ingens, & magnum, quod non multò minus sit virtute, cuius hoc loco personam induit Hercules.

*QVOD RES OPEROSA, ET
difficilis sit virtus. XIV.*



AFINIS est culpæ, qui virtutē non norit, aiunt, de facie: interroganti igitur qualis esset virtus: quæstionem dixit parū habere honestatis, multum verò suspicionis. expresit tamen illam, per imaginem Dianæ, quæ in Chio de sublimi ita spectabatur, vt ingredientibus horrida: egredientibus hilaris esse videretur, & iucunda. sunt enim virtutum radices amaræ, & difficiles: fructus autem gloriosi & suauis. Non mirum est igitur à multis virtutis gloriam: à perpaucis virtutem diligere. Nam illud

illud est consilij tantum : hoc plurimi studij . & difficultatis .
 Nihil enim si Antiquitati fides habetur , pluribus vigilijs , & laboribus , quàm virtus paratur . Nam quorsum quod , Hesperidum mulierum mala aurea , quæ Draco asseruabat , non nisi occiso Dracone , sublata sunt ab Hercule ? nihil conditius hoc cōmento , ad rem afferri potest . intercluditur enim virtus non modo plurimo , sed etiam sæuo , & immani affectu , qui ad virtutem accedentes , tanquàm Draco truculentissimus suis interdum absorbet faucibus . Quoniam igitur non nisi graui certamine paratur virtus , ignauis omnibus ad virtutem clausus est aditus .

QUOD VIRTUS MEDICINA SIT

Senij. XV.



NE Q; gloria vnquàm improbis animum facit : neq; adimit infamia . quare nihil est hominibus improbis desperatius . Siquidem nihil est in eos contumelia , nisi sceleris augendi seges , & materia : nihil laudatio , nisi ansa in flagitiorum sordibus perleuerandi . cum igitur nihil peius diffluat cum ætate , quàm sceleratus , consuevit dicere , aduersus ætatis labentis senium , summum in vna virtute esse remedium . virtus enim non solum non consenescit : sed etiam perennes viros facit . loquuntur id fabulosè Poetæ , doctè tamen . Non enim sine causa , apud eos Medea consuevit è senibus iuuenes reddere . Nam qui ex errore inueterato resipiscit , is demum repuerascit , nec adeò videretur veterem hominem exuere , quàm nouum induere .

QUOD

*QUOD VIRTUS ARMATURA SIT,
qua nec ferro penetrari: nec dolo possit
surripi. XVI.*



CVM fortè timidum in periculis ducem corripere-
ret, ilq; se hoc commento tegeret, quòd non, vt
Achilles, corpus haberet ab offensione immu-
ne. tum ille, tot sunt, dixit, Achilles hac nostra
etiam ætate; quot sunt viri boni. habet hæc sententia, sine vlla
vocis acerbitate, morsus in timidum quenq; acerrimos. Nam
vt virtus non relangescit, sed virescit vulnere: ita viri boni
vis corroboratur, non debilitatur offensione. vetus est apud
Homerum, rationis auctoritas. Nam cur ab Hercule, quò ma-
gis Antæus ad terram erat depressus: eò attollebatur eminens-
tius? non est aspernenda fabula. Nam is demum est vir bo-
nus, qui nouit ex depressione attolli: atq; ex incommotis
commoda capere: malaq; omnia lucro habere.

*QUOD VIRTUS LORICA SIT
aduersus timorem. XVII.*



IRMISSIMA perturbationum omnium cau-
tio, in virtute est fundata. Nam virtutem qui
habet, potest in periculis timeri, non pòt timere.
Cum igitur cuidā timido, in ipso belli incendio,
nullum armorū genus sufficeret: quæsitum est, sedata pugna,
num etiam aduersus timorem, quis posset armari: certè respon-
dit. Nam vmbonem qui habet Palladis, immunis est ab omni
turpitudine timoris. eo armatus Perseus ad Gorgones euo-
lauit, quæ erant tres Sthenio: Euriale, & Medusa: Magna
est, vt patet hoc fabulæ argumento, virtutis commendatio.

C

Etenim

Etenim quæ tria mortalibus terrorem incutiunt malorum genera: contumelia ambitiosis: paupertas auaris, & infirmitas voluptuosis, illa vltro sapè à bono viro virtutis ergo appetuntur, nunquàm refugiantur.

QVOD NIHIL SIT VIRTUTE

Clementius.

XVIII.



NIHIL grauius solet quàm casum, atq; orbitatem virtutis, in afflicto religionis imperio deplorare: nec benignius quicquàm, quàm in viam redeunt, excipere. Huc etsi omne eius spectat consilium: vt tamen cõsiliij sui laudem regeret, consuevit dicere, homini esse facillimum alteri consilium dare: sapere verò difficillimum. Magna verò, & de cœlo vox ea visa est. Nam omnes ferè bene sentiunt: nemo autem rectè agit, nisi sapiens. nihil enim est sapientia, vt videre est apud Euripidem, nisi lampas Dei, qua non solum nox obscurissima fugatur ignorantia: sed etiam improbitatis pelluntur omnes tenebræ. Neq; alia de causa Phæbo, apud veteres Cithara, & plectrum tradebatur, nisi vt ostenderent, sapientis esse rebus omnibus consonare, atq; absona vniuersa in ordinem, & concordiam reducere.

QVOD VIRO BONO NIHIL SIT

Gravius iactura opera, & studij. XIX.

VM nihil fructuosius sit virtute, interrogatus aliquando à CLEMENTE VIII. quid viris bonis maximè displiceret, quod frustra sit respondit. habuit hæc eius responsio non minimum, aduersus sordidorum

rum auaritiā, qui nihil in beneficos rependunt, acrimoniā: plurimum ad commendandā admirabilem summi Pontificis liberalitatem, ingenij, & acuminis. Plus quippe est mali in iactura laboris, quā in ipso labore. annumeratur enim. hęc inter summos, apud inferos cruciatus. Nam cur, vt placet Poetis, aut Sisyphus Æoli filius, propter hospites interemptos, hanc luit pānam, vt relabentem semper scopulum, ad verticem montis cogatur reuoluere: aut Belides, propter viros necatos compelluntur perforatis vrnis, aquas perpetuo haurire? vt certe hoc commento attendatur, quod frustra fit, id non laboris habere asperitatem, sed operis infamiam, & cruciatus atrocitatem.

QVOD BONI VIRI ADVERSVS
Improbos mitte sit iudicium. XX.



CVM ille nihil aut sentiat, aut dicat, quod non summo consensu, atq; aurium comprobatione, ab omnibus hauriatur: tum sciscitanti aliquando Iudici, qualis deberet esse delicti pœna: qualis, respondit, est iustitiæ statera. Graue quidem, & miti ingenio dignum responsum. In Iustitiæ. n. statera ponderis plus habet beneficiū, quā maleficiū. Itaq; Persæ nunquam ante solent quemquam iudicio capitis damnare, quā diligēter eius mores perpenderent, existimantes magis esse contra naturæ ius virtutem præmio, quā peccatum supplicio vacare. illud igitur iustè sumitur de delinquentē supplicium; quod medicina potius videatur delinquentis, quā pœna.

QVOD EX VIRTUTE OMNIS
exulet calamitas. XXI.



ABVIT sæpe id in ore, & sermone, ab vna virtute solum omnia excludi malorum genera: nec miserum eum esse posse, qui aduersus temporum iniuriam, circonfectus stipatusq; teneretur virtute. verus item hæc olim fuit Imperij Romani disciplina. Nam ad quid in nummo Gordiani Imperatoris virtus effingebatur mascula, imagine senis, barbati: nudi: stantis: claræ innixi: exauium Leonis brachio reuolutum tenentis? docet hæc imago, quæ beneficia sunt virtutis, quam qui habet, statim redditur fortis: sapiens: solers: utilis: honestus: atq; aduersus omnes rerum asperitates armatus. Nihil enim est virtus nisi Clypeus Achillis, qui à Vulcano fabricatus, nec ferro penetrari, nec dolo surripi poterat.

QVOD SOLA VIRTVS HONOREM
sibi vendicet. XXII.



VM Animaduertet nescio quem, dignitate elatum, qui magis virtutis gloriam anhelaret, quam virtutem: dixit honorem non dignitatis esse præmium, sed virtutis: atq; gloriam omnem sine virtute, reddi ignominiosam. Id non minus doctè, quam eleganter. Nam extra virtutem nihil est, quod verè potest laudari. Nec enim summa laus est regni, sed virtutis. Hoc Romani, vt ostenderent, virtutem Deam: non Regnum Deum fecerunt. Nec sine consilio. Nam qui virtutem violat, Deum videtur violare: & qui virtuti parer, Deo censetur parere. Nullus igitur est maior, quam virtutis in bono viro, triumphus.

QVOD

QVOD RES SIT ADMIRABILIS
Virtus. XXIII.



SCISCITANTI cuidam quid in terris maximè esset admirabile. virtus ait, quæ facit vt mæreat quis in voluptate, & exuliet in angoribus lætitia. Hoc sentiens Aristippus asseuerabat nihil solem vnquam vidisse admirabilius viro bono. Nemo enim est vir bonus, nisi qui quasi viuat in corpore mortuo. quod cùm animaduerteter Plato, viros bonos non mortales, sed mortiferos vocabat. externa enim mala, quæ sunt aut corporis, aut fortunæ, sic despiciunt, vt videantur in ijs nullum sæpe sensum habere doloris: aliquem semper iucunditatis. Hoc vt docerent Ægyptiorum Sacerdotes, virtutis Hieroglyphicum os amygdali fecerunt. est enim id pluribus veluti stigmaticis notis, & cicatricibus redundans: eiusq; arbor clauo infixâ fertilior redditur: nucleus verò, amarus præsertim, ebrietati maximè resistit: atq; quod maximè est admirabile, arboris eius cortex cùm amarissimus sit: suauissimos tamen fructus edit. ex quo non difficile est colligere eos, qui mala refugiunt aut corporis, aut fortunæ, ita à virtute esse ab alienatos, vt nullum sensum, aut gustum virtutis videantur habere. Nam bona animi, in malis externis potissimum hærent infixæ.



DE RELIGIONE

TITVLVS TERTIVS.



NIL est Religio, nisi imperij vexillum. Nam cum religione crescit, & decrescit imperium. vt enim iurisprudentia publicæ utilitatis: ita religio ars est, & scientia communis vitæ, & vniuersæ salutis. itaq; in imperij insignibus, vt asserit Herodianus, præcipuum fuit religionis. Nam quorsum, etiam apud Romanos ignis ille Regibus, & Imperatoribus, hasta in sartagine prælatus? habet ignis hoc loco non elementi, sed religionis, qua virtus omnis vehitur, interpretationem. Petitum autem est hoc insigne à Chaldæis, qui, vt scibunt Græci, ignem numinis vice coluerunt. Existimabant enim nulla re magis Religionem, quàm igne posse figurari. quia ignis è cœlo missus, continenter in cœlum tendit: atq; elementum cùm sit, non tamen vt cætera Elementa, putrescit, aut vllis contaminari potest sordibus: sed semper viget cum cœli leuitate: nunquàm sine splendore, quo obscurissimæ noctis pelluntur tenebræ. Magna verò olim Romanorum gloria, qui Rei bellicæ multum, non parum Agriculturæ: Religioni omnia tribuebant. Et ita, vt in religionis errore, videretur quasi erroris dedecus, in studij decus, & ornamentum commutaret. At in Amplissimo Cardinali P. ALDOBRANDINO alia est religionis gloria: multo dispar pietatis ratio. Hunc qui intuetur, non adumbrationem intuetur religionis: sed ipsam omni virtutum comitatu stipatam, Ecclesiæ Romanæ religionem. Hic in Amplissima illa legatione, qua Regis Catholici PHILIPPI III. & MARGARITÆ honestauit nuptias,

vbi Senatum Mediolani regustauit, in quo non ignis, vt olim apud vestales virgines, coruscat interpres, & nuncius religionis: sed ipsa omni virtute, aucta & cumulata religio, aperit palamq; cæpit Reginæ de tanto Senatu gratulari. Nec falsò id quidem. Etemim nunquàm Theopompus Spartanorum Rex meliores habuit Senatores: quàm Mediolani habet Rex Regum PHILIPPVS. Nam, vt Gubernatori in alto cursus secundus: medico, salus: Imperatori victoria: ita sacrosancto huic ordini, beata ciuium vita est proposita: nec quicquam molitur, nisi vt ciuitas sit opibus firma: copitij locuples: gloria ampla, & virtute honesta. Harum virtutum adumbratione, Rex Theopompus cùm, in suis Senatoribus, animaduerneret: tantum illis tribuit, vt Ephoros instituens, magnam partem regni illis adiunxerit, cum summa auctoritate imperij: at Regis vxor id ægrè ferens, quòd regnum angustius relinqueret liberis: imò latius, atq; firmitus respondisse relicturum. Consilio enim, sapientia, & auctoritate Senatus: non potentia, & viribus magnitudinem regni definiebat. ad magnam igitur Regis Catholici gloriam spectat Senatus Mediolan. Hic enim ius summa semper definiuit religione: religionem tot virtutum doribus locupletauit: tanta scientiarum omnium dignitate honestauit, vt in religione non solum iuris, sed et iustitiæ obses esse videatur, & pietatis. Hoc animauerens ipse legatus ALDOBRANDINVS, non solum optime sensit, sed eum prædicauit de sapientissimo ordine. Nam Deum, qui sequitur, non potest quod turpe est non refugere: non voluptates non contemnere: non labores non appetere: non deniq; omnia diuinæ voluntati posposita habere. Multa sunt tanti Antistitis de religione sapienter dicta & responsa, ex quibus, pauca excerpti: quorum series, & numerus hic est.

- 1 Quòd Principi norma Imperandi sit religio.
- 2 Quòd felix fluat ex religione rerum omnium euentus.
- 3 Quòd sicuti corpus sine anima: ita contabescat sine religione Imperium.
- 4 Quòd nullo potest populus offensionis timore inclinari, ubi Princeps est religiosus.
- 5 Quòd Maxima sit in Religione, Principis gloria.
- 6 Quòd Religio lampas sit rerum agendarum, & vitandarum.
- 7 Quòd homo sine Religione nomen amittat hominis.
- 8 Quòd nihil sit clementius religione.
- 9 Quòd donum tantum sit Dei rectè imperare.
- 10 Quòd nullum sit belli firmitus, quàm religio praesidium.
- 11 Quòd neq; iners, neq; infructuosus, neq; senio obnoxius sit religiosus.
- 12 Quòd nihil sit renitentius religioni, quàm voluptas.
- 13 Quòd religio requirat, & corporis, & animi simul obsequium.
- 14 Quòd sine religione infelicitè cadant omnia.
- 15 Quòd nec tempus, nec locus ullus vacare debeat religione.
- 16 Quòd religionis causa, nihil homini graue videri debeat.
- 17 Quòd nihil sit in terris, quod non oleat vim numinis.
- 18 Quòd religiosus viuat tanquàm in corpore mortuo.
- 19 Quòd res salutaris magis sit, quàm iucunda religio.
- 20 Quòd Religionis non obseruata, nulla sit excusatio.
- 21 Quòd sine religionis gradibus nullus sit in cælum ascensus.
- 22 Quòd religionem qui deserat, omnia bona deserat.
- 23 Quòd Religiosus bono viro sit melior.
- 24 Quòd Regium sit magis religioni obedire, quàm hostibus imperare.

QVOD PRINCIPIS NORMA
Imperandi sit Religio. I.



V M Princeps ad imperandum in Dei Opt. Max. locum sit suspectus, quem sequi nemo potest, sine religione, consuevit dicere Principem tribus de causis, nihil magis oportere, quam religionem spectare. primum quia homo est: deinde quoniam Dei minister: tum quia rector est reip. & publici consilij auctor. Homo enim particeps est rationis, cuius bonum, quia non est quoddam singulare, sed commune bonum: felicitatem suam non debet, in privato aliquo, sed in publico bono collocare: hoc est in Deo Opt. Max. Est autem Dei minister, quia à solo Deo, non ab ipsis hominibus, rerum bene gestarum mercedem expectat: atq; quoniam solus Deus regit omnia, non potest ante regere, quam videatur Dei immortalis partes sibi asciscere. Rector deniq; cum sit communis vitæ, & procurator publicæ salutis: non satis est principem esse bonum: sed alios etiam debet bonos reddere, quod item vno sit religionis præsidio, quando nemo sit bonus, aut potius non sceleratus, qui desciscat à religione.

QVOD FELIX FLVAT EX
Religione rerum euentus. II.



ESPIRAT in inclinata fortuna, vbi Principem videt religiosum, populus. Nam Religio in principe ars est, non solum orandi: sed etiam exorandi quod vult à Deo. Quocirca pronunciauit aliquando sapientissimus ille Antistes, in religione maximam commendationem esse Principis. Nam princeps vide-

tur

tur populi refugere obsequium, qui Dei negligit imperium. Quare ALDOBRANDINVS ita rebus diuinis animū habet intentum, vt cū aliquid sit commendandum, precatōne: cū exposcendum, voto: cū exoluendum, gratulatione, cū deniq; inquirendum, solenni ritu sacrificium peragat.

QUOD SICVTI CORPUS SINE


Anima: ita sine religione contabescat Imperium. III.



ihil imperium magis lacerat, & laniat, quā quod vulnus religioni infligitur. hac ratione dixit aliquando, neq; pecudes à pecude, sine pastore: neq; homines ab homine, sine Deo duce, regi posse, & custodiri. frustra enim princeps excubare animo videtur, nisi sapiat plus, quā homo: hoc est, nisi in religione vim retineat Numinis. Hoc ipsum vt doceret antiquitas, Herculem, & Æneam, quorum alter apud Græcos, alter apud Latinos fundamenta iecit Imperij, sobolem fecit Deorum, simul & hominum.

QUOD NVLLO POTEST POPVLVS

offensionis timore inclinari: vbi Princeps est religiosus. IV.



X religionis domicilio omnis exulat iniuria: in eaq; non inquilina est iustitia: sed habitandi domina. itaq; cū de iustitia principum ageretur, resq; , vt aiunt inter incudem, & malleum caderet, tum interroganti cuidam quisnam iustus esset princeps, qui,

qui, respondit, religiosus est. Nam Deus, vt scribit Plato lex est vniuersalis, & iustitia diuina, quam qui sequitur ducem, nunquam ab æquo, & bono aberrat.

*QVOD MAXIMA SIT IN RELIGIONE
Principis gloria. V.*

NON solum imperij initium à Religione ordimur: sed etiam omnes eius sensus religioni tribuimus, qua vna detracta, & princeps videtur esse sine imperio, & imperium sine Principe. Quare interrogatus aliquando, quid Principem maximè commendaret & Deo simul, & populo? religio dixit. Bene enim audit, qui Deo pareat: atq; cuncti eius dicto obtemperant, & fidei se committunt. Hæc igitur virtus Numam Pompilium, ex priuato, & quasi rustico homine, Romanum Regem constituit. Hic enim ab Egeria Nympha, credebatur deorum consilia capere: atq; iccirco illi, nefas esse non omnes gentes obtemperare. Nihil autem est in Imperio firmitus religione. Nam vt de natura Deorum scribit Cicero, pietate erga Deum sublata: necesse est fidem, & humani generis locietatem tolli: atq; iustitiam simul virtutum reginam restringui, & deleri. Doctè igitur ille Maro, Æneam cum in cælum suo effert encomio, sola pietatis laude, cæteris præfert ducibus.

Nec magni aliquid illum agere inducit, nisi
propiciatis numinibus, peractisq;
rebus sacris.

QVOD RELIGIO LAMPAS SIT
rerum agendarum, & vitandarum. VI.



VI Religioni derogant, pennas virtutum incidunt, nec eas volunt renasci. Quare quæ in cœlum euolant, cadere omnes virtutes sine religione necesse est. cùm igitur sermo incidisset de multis, & varijs sapientiæ Gymnasijs: tum fortè cuidam interroganti quænam optimæ esset doctrinæ schola. Religio dixit. Est enim hæc lampas veritatis, qua & futura quæ sunt, & præterita, & existentia illuminantur. Quare ex ea olim collegium apud Romanos Augurum constitutum est. Nam Augurio, & coniectura periti, futura multa prædicebant. sine Religione vetustas neq; consilium capiebat: neq; ferebat iudicium. Huc pertinent apud Ægyptios, Sacerdotes: Druidæ apud Gallos: Magi apud Persas, vt de rebus vniuersis, pro religione statuerent. Tanti quippè ad res omnes apud eos fuit Religio, vt neq; in Ægypto fierent Reges, nisi ex Sacerdotibus: neq; apud Persas, diadema ante gestarent quàm Magi fuissent.

QVOD HOMO SINE RELIGIONE
nomen amittat hominis. VII.



VONIAM hominum benignitas, in religione exhausta redundat summis, ac propè diuinis bonis: lege contrariorum, nihil est eo in omnibus bonis miserius, qui aut religionem amittit, aut religioni fucum facit. Id cum sentiret virtutum ille faber, & Architectus, dicebat hominem esse Dei templum. proinde illum qui à Deo recederet, nomen amittere hominis. est enim
 homo

homo ad Deum obseruandum natus, quòd & forma corporis, & animus ipse indicat. illa propter celsitudinem: hic propter quandam, qua alitur diuinitatem. hinc diuinū illud oraculū, quod pro foribus Delphici tēpli, scriptū fuit *γνώθι σε αὐτόν*. hoc est, cognosce te ipsum. præcipitur enim nobis vt diuinitatem, quæ in vobis, cū Deo habitat immortalī, dignoscamus!

*QVOD NIHIL SIT CLEMENTIVS
Religione. VIII.*



VI res est cum homine religioso, nec res, nec fama potest comminui. dicebat itaq; etiam in malis benè esse sperandum à Principe religioso, cū nihil sit religione clementius. id ipsum vetustas, vt doceret, nolebat Deorum simulacra, neq; ex lapidibus, quando duri sunt: neq; ex auro & argento, quando metalla sunt insidiosa, effingi: sed potissimum ex ligno, quod ad cultum, & pactum potissimum mortalium succrescit. hac opinione ductus Plato, in libris de legibus, non licere ait, ex auro, & argento, & lapide spectra deorum effingere. vincit enim vir religiosus non vi, non dolo, sed ferendo. ita Numæ tempore, qui omnium fuit Religiosissimus, Iani templum tres, & quadraginta annos, quibus regnavit, continenter clausum mansit. Summa enim est victoria, disceptationes hominum: non homines de medio tollere.

*QVOD DONVM TANTVM SIT
Dei rectè imperare. IX.*



I quanta sit imperandi vis odorere, & degustes: animaduertes Imperium omne, non ad hominem: sed ad Deum esse referendum. Nam rectè imperans homi-

hominibus, malè Deo displicet: nec difficilius quicquàm est, quàm modum in imperando tenere. interrogatus igitur, quis benè imperaret: qui respondit vim habet numinis. Sic ipse sensit Homerus: docuit enim neminem rectè imperare posse, nisi cui Deus imperium destinaret. itaq; Principes à Deo petendos sacrificijs, litationibusq; esse asseuerabat. Nam vt Samius Ægyptius Philosophus asserit, Principatum inter mortales gerere, diuinum quoddam munus existimandum est.

*QVOD NVLLVM SIT FIRMVS
belli, quàm religio præsidium. X.*



VM quis gestiret scire, qua arte aduersus armatos, hostes pararetur victoria: religionis dixit. præclarum, & tali tantoq; Antistite responsum. Deus enim nō solum iustus est, sed etiam iustitiæ propugnator. Quare Homerus Nemini Coronas: sed belli præsidii Deo tribuit. In sacris quoq; certaminibus apud Romanos, non victor, sed victoris patrij Penates, Genijq; solent coronari: quia & Triumphantibus dabantur coronæ, vt eas in templis, dijs victoribus dicarent.

*QVOD NEQ; INERS, NEQ;
infructuosus, neq; Senio obnoxius sit
homo religiosus. XI.*



VONIAM pietatis cura solers, & diligens viri religionem declarat: non squalor, non pullulatus indumenti color: sed publici commodi amor, & honesta vitæ ratio: solitus est dicere cum, qui religionem tollit, solem è mundo tollere, quod item
in

in factis suis literis, Ægyptiorum Sacerdotes visi sunt sentire. Nam cur apud eos, vir accipitris caput habens, toga talari indutus religionis statuitur hieroglyphicum? quia primum hæc ales acerrimum habet sensum oculorum. Cum enim totus sit oculus Deus, maximè oculata oportet sit religio: est deinde volatus celerrimi: neq; enim Deus, neq; vir religiosus ad benè agendum patiens est moræ: hæc deniq; solet, vt sol quotidie repuerascit, ita senectute deposita, renouari. Neq; enim Deus, neq; religio succumbit ætati. est præterea hæc Ales facundissima. Siquidem sicuti nihil est feracius sole, qui auctor, & opifex est eorum omnium, quæ è terris gignuntur: ita religio magistra est, & domina earum rerum omnium, in quibus humani generis felicitas est posita.

QVOD NIHIL SIT RENITENTIVS

Religioni, quàm voluptas. XII.

CVM nemo obrepere possit, malis artibus ad religionem: sitq; viris bonis integritate, & tolerantia ad pietatem religionis sociam, iter aperiendum: consuevit dicere, nullam Religioni capitaliorem pestem posse infligi voluptate. Nec id falso quidem. Nam cur Æneas, vt est apud Poetam, non potuit videre Deos Troiam euerrentes, cum ipse Troiæ propugnationem suscepisset? quia certè quidem, dum quis voluptatum lenocinia tuctur, is sceleris amentia occæcatus, religionis lumen amittit, quo maximè dij obseruantur: atq; homines simul à Principe iuantur. Huc item pertinet, quod Æneas, vt est pariter apud Poetam, pollicetur & Apollini, & Dianæ templa se erecturum. Nam si bene attendimus, religionis vis in Principe constat ex duplici rerum obseruatione, diuinarum vna, quam Apollo: humanarum, altera quam Diana adumbrat.

QVOD

QVOD RELIGIO REQVIRAT, ET
 corporis, & animi simul obsequium. XIII.



TSI religio in intimis animi sensibus magis habitat: quàm foris in ore, & oculis hominum: suntq; nonnulla religiosa, quæ non videntur, & contra quædam videntur, quæ minimè sunt: dixit tamen Religionem æque corporis, atq; animi obsequio esse depascendam: quæ sententia rationi est tam consentanea, quàm quæ maximè. Nam si antiquitatis auctoritatem consulimus, quorsum duo illa, ex diuino quodam præscripto, altaria, in templo Salomonis: quorum vnum foris ad animantium sacrificium: alterum intus aureum, in quo Thymiamatis offerebatur incensum? religionis id, nisi præ stupore gustum amisimus rationis, sapit perfectionem, quæ in nobis duo constituit Altaria, vnum corporis, alterum animi: quorum alterum foris spectatur expressum, alterum intus teneatur clausum.

QVOD SINE RELIGIONE
 infeliciter cedant omnia. XIV.



BI de calamitate labentis, apud Gallos Imperij, dubium quoddam excitaretur, quod non paucis quæstionibus, multis etiam argumentorum laqueis tenebatur obsessum, id omne vno tulit verbo. dixit quippè Regna, cum religione facillimè cadere. Est enim religionis contemptus, non solum obses improbitatis: sed etiam ærumnarū, & calamitatis. ea igitur neglecta, omnia statim obsolescunt gloriæ, & felicitatis insignia: insurgitq;

insurgitq; contra discordiarum fax, & furia, atq; periculi nunquam antè expectati pestis, & cluuiò. Non vulgate, apud veteres, est testimonium. Nam cur Aper Caldonius Oenei vineam vastauit, ob Dianæ cultum ab Oeneo spre- tum? quia nulla vnquam etiam adulterina religio, neq; cul- la est sine præmio, neq; neglecta, sine dedecore, & detri- mento.

*QVOD NEC TEMPVS, NEC LOCVS**ullus vacare debeat religione. XV.*

QVIA & vbiq;, & semper est Deus: dicebat neq; locum, neq; tempus vllum debere Religione esse vacuum. hoc sentire, aut potius significare, vt viderentur Persæ, non vt cæteræ gentes, crexerunt dijs templa: sed vniuersum mundum, templum volue- runt esse Dei immortalis. est enim globus hic omnis Ele- mentaris religioni Sacer: nec angulus vllus vacuus esse debet sanctimonia, & pietate. Nec aliam ob rem, puto, solem cui vix mundus sufficit, pro Deo colebant: nisi vt ostenderent nullas esse tam remotas oras, nullos esse mundi tam retrusos sinus, qui censerentur religioni, & pietati esse clausi.

*QVOD RELIGIONIS CAUSA NIHIL**homini graue, & acerbum debeat**videri. XVI.*

CVM omnibus iniuriæ telis, maximisq; malis obie- cta sit hominum vita: interroganti quæ mala feren- ti essent, facilia, quæ feruntur dixit, religionis cau- sa. Nihil


sa nihil enim sit grauatè, quod pie, sancteq; sit. id puto, vt mortalibus testatùm Druidæ relinquerent, humanas hostias aris admouebant. Non enim est religiosus, cui vita, quàm religio est carior.

QVOD NIHIL SIT IN TERRIS
quod non oleat vim Numinis. XVII.



VI in omni rerum genere, non animaduertit, vim quandam numinis residere: is nulla alia, nisi stuporis, potest vti excusatione. Solitus est igitur dicere, sicuti non maiora sunt in Tauro, monumenta naturæ, quàm in Culice, ita æquè in rebus paruis, atq; in magnis, numinis vim elucescere. Nec id quidem falso. Nam cur, apud Ægyptios, qui omnium fuerunt sapientissimi, Apis, Ibis, Crocodilus, atq; vt alia mostra animalium sileam, cæpæ, & Allia religiosissimè colebantur: non quia illos ea infatuarat opinio, vt numina illa esse crederent; Sed vt docerent, cum Deus sit rerum omnium vniuersitas, fas esse bono viro, etiam in rebus infimis, quandam diuinitatem numinis regustare.

QVOD RELIGIOSVS VIVAT
quasi in corpore mortuo. XVIII.



ST in verbis malè intelligendis, mendum peruagatum, atq; cum Morbo ingenij, & turpitudine, per omnes quasi sciendarum regiones peruagatum. Sciscitanti igitur quis esset religiosus, qui, respondit, ex voluptate ad virtutum omnium asperi-

asperitates est relegatus. Nam cum nihil sit religio, nisi veluti quædam consociatio cum Deo: qui ad religionem accedit, ab omnibus sensuum lenocinijs, & corporis voluptate recedat oportet. Quocirca Religio, non temerè à relegando est dicta: quæ nihil est nisi veluti quædam ex vitæ huius illecebris relegatio, & emandatio.

*QVOD RES SALVTARIS MAGIS
sit, quàm grata Religio. XIX.*



INTERROGANTI cum nihil sit melius religione, cur religiosi sæpe exitiosa fuerit religio: quia respondit, veritas semper prodest auscultantibus: nunquam fero non nocet liberè dicentibus. sic Ascalaphus, ut est in fabulis, quia quod res erat, dixit, in Bubonem auem funestam, & tristium rerum nunciam à Proserpina iccirco est mulatus, ut intelligamus rem esse honestam: sed cum tristitia coniunctam veritatem. Testis est Religioforum cruciatus, qui semper, quæ vera potius, quàm quæ grata sunt, maluerunt loqui.

*QVOD RELIGIONIS MINIME
observata nulla sit excusatio. XX.*



QUONIAM satius est vitam, quàm religionem deferere, nullam dicebat esse, non observatæ religionis excusationem. Mori enim honestè licet: non licet nisi scelerare à religione recedere. Huiusigitur criminis cautionem, ut afferret Lycurgus.



curgus, paruatum rerum sacrificia instituit, ne excusationi, villus relinqueretur, in quo confisteret locus.

*QVOD SINE RELIGIONIS
gradibus, nullus sit in Cælum
ascensus. XXI.*



QUEMADMODVM Rustici, vt est in fabulis, in Ranas à Diana sunt commutati: ita ij ex Ranis, vel ex coaxantibus hominibus potius religionis ergo, inter viros sunt euecti. dicebat igitur religionem virtuté esse alatum, qua qui esset præditus, nullo negotio, in cælum euolaret. Nec id minus falsè, quàm prudenter. Nam cur Ægyptiorum Sacerdotes altare fecerunt Hieroglyphicum religionis? vt cum dictum sit altare ab altitudine, ostenderent, esse hominis religiosi, quæ cæli domicilia alta sunt petere: non vt cætera animanlia in infimo hoc globo tabelcere.

*QVOD RELIGIONEM QVI
deserat, bona omnia deserat. XXII.*



CVM tanti Antistitis verbis florens, & arre sonans sit omnis sententia: tum hæc in primis plurimum mihi videtur habere ornamentum, & ponderis: qua pronunciauit religionem destitutum, destitui omni, quod à Deo est petendū, suffragio. Nec enim Deum, si ab eo bona roget is, videtur præcari, sed Imprecari. Huc pertinet Miluus ille Æsopicus, is enim morbo, & inedia affectus, atq; afflictus cum esset, eodē spem nullā, apud amicos, videret salutis matrem

matrem rogauit, vt à Ioue vitam, si non optimam, at aliquam imploraret: cui mater ingemissens, dixit Iouem orare licere, at à Ioue aliquid exorare non licere, cuius sacra & aras toties rapinis contaminarit. sic enim cautum est legibus, vt frustra is pietatem implorer, qui iura violarit pietatis: nec par sit clementiæ beneficia cum sentire, qui contra ius falsq; non veritus est clementiam lacerare.

*QVOD RELIGIOSVS BONO VIRO
sit melior. XXIII.*



CONSVEVIT dicere Religiosum viro bono esse anteponendum. Maiorem enim quasi affinitatem habet is cum Deo, quàm hic cum hominibus: quando diuina virtus plus, quàm humana habet ponderis: arctioraq; sint religionis, cum Deo, quàm sanguinis cum hominibus vincula. Cuius rei cum apud antiquos non obscura sint testimonia: tum magnum est, in re parua L. Albini exemplū. is enim obuius factus in itinere Vestalibus, vxorem & liberos viam pedibus peragere iussit, vt vestales curru suo imponeret, nec mirum. multo enim præstat virtuti Religio. Nam virtutis præmium est honor tantum: felicitas verò, ac beatitas religionis.

*QVOD REGIVM SIT RELIGIONI
Magis obedire, quàm hominibus
Imperare. XXIIII.*



CONSILII res est, & pietatis religio; non laboris, non sumptus: sed obseruantia, & amoris. Quoniam autem ruit ius omne, sine religione, sciscitanti, quid

primum curare deberet Princeps, Religionem dixit: quid secundum, ne ea respondit, quæ religioni debetur, deferatur obedientia. Comprobant id vnum Æthiopum Reges, qui vsque ad Prolemæi Regis Ægypti tempora, gestiebant non naturæ, sed religioni vitam reddere. Quare consueuerunt, cùm sibi à Sacerdotibus Iouis denunciatum esset, Deo inuisam esse eorum vitam, non modo non grauate, sed etiam ultro, ac libenter mortem sibi consciscere: nec vllus inter eos est inuentus, apud quem pluris haberetur vita, quàm prompta, & expedita, erga Sacerdotes, obseruantia, qua depascenda est religio.



DE PRUDENTIA

TITVLVS QVARTVS.



VM Agamemnon Mycenarum Rex diceret decem Nestores, ad expugnationem Ilij sufficere, totam Græciam armatam non sufficere: non adeò id visus est dicere, quàm summam ac singularem P. ALDOBRANDINI prudentiam figurare. habet enim eius virtus non solum in pace ornamenta ingenij, & doctrinæ: sed etiam in armis, firmamenta communis vitæ, & publicæ salutis. Itaq; DIDACVS Salazar Magnus Insubriæ Cancellarius, ita consuevit de admirabili eius sapientia prædicare, vt in laudatione prudentissimi Principis, videatur prudentiæ peritissimus. Nam sicuti olim, apud Thebanos marmorea Memnonis statua spectabatur, quæ ex Solis Orientis appulsu, cum omnium admiratione, voces humanas redderet: ita sapientissimus ille in Imperio, iuris & iustitiæ moderator, tanquam viua sanctimonix imago, vbi imperium illuxit ALDOBRANDINORVM splendore, sic continenter de ijs pëdicauit, vt non voce hominis, sed numinis tota vrbs semper videretur resonare. Id autem neq; libenter dico, quia prudentia P. ALDOBRANDINI, vt de ea fiat fides, nullius eget testimonio: neq; non grauati taceo, quoniam nullius voce magis, ALDOBRANDINORVM laus nutritur, quàm sapientissimi eius viri præconio. Quemadmodum enim de Musica, non ratum est, nisi quod à musico fertur, iudicium: ita prudentiæ laus, nisi oratione prudentissimi viri efflorescat, omnis flaccescit. Est autem hic tam prudens, vt sicuti ipsa apud Diodorum præ-

capit prudentia, norit, & ex aliorum erroribus, rectum quod est sequi: & ex periculis, quod tutum est, amplecti, erudiriq; ad gloriam ex aliorum infamia. Sed quid Alij ferant de Prudentia P. ALDOBRANDINI quæ ars est imperandi desino repetere. eius. n. aliò me vocant sapientissimè de præceptis prudentiæ dicta, ac responsa, quorum series hæc est.

- 1 Quòd Ars imperandi sit Prudentia.
- 2 Quòd vir prudens bonos viros vincat doctrina: doctos probitate.
- 3 Quòd vinculum Imperij, & obsequij sit Prudentia.
- 4 Quòd viro prudenti nihil fere non cedat ex sententia.
- 5 Quòd vir prudens lentè maturet.
- 6 Quòd vir prudens non solum verba, sed vultum etiam ad suadendum, habeat accommodatum.
- 7 Quòd vir prudens ibi timet, ubi stultus sperat.
- 8 Quòd virum prudentem, vix quicquam possit latere.
- 9 Quòd nulla virtus videatur à viro prudente exulare.
- 10 Quod non difficile sit viro prudenti, ex malis bona: & ex bonis mala præsentire.
- 11 Quòd vir prudens timeat magis futura, quàm oblectetur præsentibus.
- 12 Quòd viri prudentis sit non solum otium, sed etiam extrema omnia vitare.
- 13 Quòd Ars imperandi sit prudentia.
- 14 Quòd quasi plures reperiantur prouinciæ, quàm viri prudentes.
- 15 Quod non sit viri prudentis quicquam admirari, sed admirabilem se omnibus reddere.
- 16 Quod in prudentia sint summa, & pacis & belli auxilia.
- 17 Quòd prudentis consilium, viri fortis robori sit anteponendum.
- 18 Quòd vir prudens victus, formidabilior sit victori: quam victor

Etor fortis victo prudenti viro.

- 19 Quòd vir prudens latentes in simulatione, & dissimulatione exploratos facile habeat hominum animos.
- 20 Quòd prudentis sit momenta omnia obseruare temporum.
- 21 Quòd magnū discrimen sit inter prudentem virum, & fortem.
- 22 Quòd vir prudens nouit aliorum erratis bene uti.
- 23 Quòd nesciat iacere viri prudentis auctoritas.
- 24 Quòd prudentia vita humana sit magistra.
- 25 Quòd nihil sit in bello hosti formidabilius, quàm ducis prudentia.

QVOD ARS IMPERANDI
sit Prudentia. I.



VM Inferior Germania bello flagraret, iaceretq; apud exteras gentes, virtus omnis propè imperij: multi pecuniam: non pauci milites: omnes arma ad imperādum quærebant, quod cū animaduerteteret, dixit non harum rerum, sed prudentiæ adminiculis regi imperium. vt enim iustitia iniuriæ: sic prudentia ægroti Imperij est medicina. Quare Senatus Romanus, quem totus orbis terrarum consulebat, à senibus & esse, & vocari voluit, quia senectus consors, & socia est prudentiæ.

QVOD VIR PRVDENS BONOS
Viros vincat doctrina, doctos
Probitate II.



Demum, aut potius id solum Principi tribuo gloriosum, quod prudentiæ est ornamentū. Solerq; ad hanc rem, ille dicere sicuti Deus dictus est à θεοποιος video,

video: ita Prudentem dici, quasi procul videntem, eò quòd vim ac numen retineat Dei immortalis. Est enim prudentia virtus vera intelligendi, & iusta simul operandi. Inter morales tamen virtutes sibi asciscit locum, eò quòd intelligentia potest esse in Improbis: non potest prudentia esse, nisi in viris bonis. est enim prudentia non solum virtus ingenij: sed etiam iustitiæ dux, & magistra, qua & inveniuntur abdita, & iudicantur inuenta.

*QVOD VINCVLVM IMPERII,
& obsequij sit Prudentia. IIII.*



VM præteritorum iam malorum obducta quasi cicatrix recrudesceret, admisci sceleris in imperando memoria: augereturq; dolor retractando calamitates & inferioris, & superioris Germaniæ: dixit vnā esse artem bene beateq; imperandi, prudentiam: sine qua nec regere quis, nec regi potest. Quare non magis opus est populo Principe: quàm Principi prudentia. Nam quemadmodum in rerum speculatione, falsa sæpe sic admiscuntur veris, vt vera culpentur pro falsis, & falsa proberur, pro veris: ita in rebus agendis honesta plerumq; vitantur pro turpibus, & turpia asciscuntur pro honestis, nisi quod res est in dubiorum tenebris illustretur, nō solis luce, sed prudentiæ.

*QVOD UIRO PRVDENTI, NIHIL
ferè, non cedat ex sententia. IIII.*



IEBAT nunquam accidere viro prudenti, vt cogeretur hoc verbo vti, non putaram. Viri enim Prudentis non solum instructa veritate, & ornata scientijs est

tij est opinio : sed etiam aduersus temporum tempestates omnes sic munita , vt omnia videantur parere eius consilio . Testis est apud Græcos Homerus . Nam cur Vlysses ab eo fingitur is esse , qui ab Æolo tempestatum omnium ventos accipiat , & in vtre teneat inclusos ? quia imperat , nisi plane hebescimus , rei fortuitæ ventis vir prudens : non res fortuita viro prudenti .

*QVOD VIR PRVDENS LENTE
maturet . V.*



VM doctrinæ lacerti , in sapientum sint sententijs : atq , eruditionis succus , & sanguis in verborum tegumentis , tanquàm in venis , & visceribus rationis delitescat : tum sapientissimi huius Antistitis dicta , ac responsa nemo potest sine mira utilitate regustare . dicebat aut vbi vrgerent temporum angustia , non esse accelerandum , sed maturandum . Qui enim accelerant sapè feruntur præcipites : qui verò maturant , omne vacant temeritate , & negligentia . illud inconsiderati est animi : hoc prudentis semper est habitum . Nam quorsum in Symbolis Anchora , cui adhæret Delphinus ? non minus est prudentis in rebus agendis , mora , quàm celeritate duci . illa ostenditur Anchora , quæ ad moram est fabricata : hæc Delphino , qui piscium omnium est velocissimus . nihil igitur sonat ,
aut olet hoc Symbolum nisi , vt veteri
fertur prouerio , lentè esse
maturandum .

QUOD PRVDENS NON SOLVM
*verba: sed vultum etiam, ad suadendum,
 accommodet. VI.*



IR Prudens, etsi periculis est illaqueatus, aditus tamen euadendi habet apertos. Dicebat igitur, viro prudenti nihil magnopere posse nocere. Nouit enim non solum orationem, sed etiam frontem, & oculos ad aliorum voluntatem vsque eò accommodare, dum fiat compos voti. Verus est in Semiramide Regina exemplum. Hæc enim Nino Rege viro mortuo, cum esset filio admodum adolescenti, & statura, & oris figura persimilis, Nini filium virili habitu, & effigie mentita, Regnum à viro relictum, non solum tutata est, sed etiam maiorem in modum auxit, atq; latè propagauit. cognoscere omnia potest prudens, quia videt in tenebris: cognosci non potest, quia vultum habet in manu.


QUOD VIR PRVDENS IBI
timet, ubi stultus sperat. VII.



ON inani honoris aura, non rerum blandimentis, & secundo cupiditatum euentu vir prudens seducitur: sed ratione ducitur, & consilio. interroganti igitur quid maximè timeret vir prudens, res dixit fortunatas. iccirco enim timendum est in prospero hominum statu, sperandum in aduerso: quia nihil est, eo mutabilius. iure igitur laudatur pariter Amasis Ægyptiorum Rex. Etenim cum omnia Polycrati Samiorum Tyranno prospere fluere, per litteras illi remisit ius omne veteris amicitia. videbatur enim

res fortuita Tyranno suis insidiari lenocinijs : cui nemo non stultissimus potest fidem habere.

*QVOD VIRVM PRVDENTEM
vix quicquàm possit latere. VIII.*



VLTO præstrantior est. docto viro prudens, Nam inter vtrumq; hoc interest, quod ille cognoscit, quæ à doctore accepit : hic verò, quæ etiam nunquam didicit. Solitus autem est dicere, virum prudentem absentem, semper adesse : eumq; nō pauca videre in tenebris : multa etiam audire, in silentio. Quia verò sentit & futura, & præterita, ac remotissima quæq; . iccirco non falsò prudens, quasi procul videns, est nominatus. Hūc apud veteres, pertinet biceps Iani imago. Nam curcius vnum caput erat senis : alterum adolescentis ? quia nec seni de sunt vires : nec adolescenti consilium, si modo adest prudentia. Hanc qui possidet, prouidentia viget futurorum, & memoria præteritorum : nec solum ex vtraq; rerum existentium haurit intelligentiam : sed etiam vir redditur omnium horarum.

*QVOD NVLLA VIRTVS VIDEATUR
à Viro prudente exulare. IX.*



ONSVEVIT dicere ab ijs modicè prudentiam laudari, vel etiam intra modum : qui prudentiæ non tantum tribuunt, vt ei non videatur desponsa virtutum omnium gloria. Sapienter quidem. Nam, vt Apollonphanes Philosophus loquitur, huic vni virtuti, cæteræ omnes virtutes, tanquam pedissequæ famulantur.

lantur. Nec rationi id est controuersum. Etenim sine prudentia virtus omnis fit vitium. Hoc non minus doctè, quàm falsè, apud Ægyptiorum Sacerdotes. Nam cur Gangem fluvium Hieroglyphicum fecerunt prudentiæ? quoniam cum virtutum aliæ in cognitione: aliæ in actione: aliæ consistent in oratione: fluitius hic & Carbunculos, qui (si lapidarijs credimus) ab opinionis errore arcem gerentem: & Smaragdos, qui faces restingunt libidinis: & aurum, quod putidum oris commendat spiritum, vehit. Neq; enim potest quis, aut rectè intelligere, qui non prudenter intelligit: aut iustè operari, qui temerè operatur: aut dicere appositè, qui inconsiderate dicit.

QUOD NON DIFFICILE SIT


*Viro prudenti, & ex malis bona: & ex bonis
mala presentire. X.*



ST Prudentis, officiorum momenta diligenter perpendere, atq; plerunq; ex bonis mala, & ex malis bona odorari. Consuevit igitur, in consilij capiendi deliberatione dicere, non minus quæ sunt insidiosa bona, esse cauenda, quàm, quæ expressa sunt mala, refugere. hac ex sententia, non parum multis antè seculis contraxit gloriæ Scipio Nasica. Anceps enim, & dubia cum Romæ inter Patres ageretur hæc quaestio, Carthago funditus nec ne esset delenda: ipse in primis, Cato cui antea prisca fuit nomen, sensit Carthaginem esse delendam, ut Roma incolumis esset, multiq; pedibus ierunt in eius sententiam. At Scipio acerrimè ei restitit: inquit ex-cidium Carthaginis, fore vrbis Romæ exitium. Metuebat enim, ne Populus Romanus æmulæ, & inimicæ vrbis metu liberatus

beratus in bella inrrueret ciuilia, quibus deinceps restinctum magis, quàm debilitatum est imperium.

*QVOD VIR PRVDENS TIMEAT
magis futura, quàm oblectetur pra-
sentibus. XI.*



ON solum in fronte, sed etiam à tergo vir prudens habet oculos, ne tantum quæ ante fuerunt videat, sed etiam quæ post futura sunt, perpendat, & examinet. dicebat itaq; non esse sanæ mentis, rem iudicare ex eo, quod est, sed magis ex eo, quod futura est. Sic laudatur Hanno Carthaginensis, Senator nobilis. Magone enim Annibalis Pœnorum ducis fratre, in curia referente, cæsa intra biennium ducenta millia hostium ab Annibale, quatuor consulares exercitus deletos: magnam Italiæ partem, à Romanis ad Pœnos defecisse, & vt maior fides ijs, quæ dicerentur accederet, tres modios annulorum in Curia vestibulo cùm effudisset. Hanno Magonem percunctatus est, ecquis ex vrbe Roma, post tot clades acceptas, ad Annibalem venisset, pacem petiturus: an Romæ de conditione pacis ageretur, cum ille vtrumq; negasset, grauiter ingemiscens dixit, Carthaginem multis victorijs sui comparare exitium. Nam si res, ait, gradum reuocare cæperit, frustra pacem imploremus, quam nemo nobis vincenibus detulit.

QVOD

QVOD VIRI PRUDENTIS SIT

*non solum otium, sed etiam extrema omnia
vitare.* XII.



INTERROGATVS aliquando, cur Multi ad honores prudentiæ obrepere solent: pauci prudentiam attingere. quia dixit, difficillimum est in prudentiæ arcem inuadere, facillimum verò arcis insignia gerere. Huc pertinet elegans hoc insigne: in quo Grus spectatur, quæ inter volandum librat lapillum: cum titulo, ne quid nimis. Hoc enim insigni triperitum adumbratur viri prudentis munus: primū est, ne malū admit-
tat: deinde, ne bonum omittat: tum ut officium satis præstet: qui in primo errat, nimium: qui in secundo, nihil: qui in tertio, parum censetur agere. hoc belle ipsum insigne. Nam in Grue, is est naturæ sensus, ut in volatu lapidem viribus æqualem, & iusto pondere libret, ne nihil primum tollat: deinde ne nimium: tum ne parum, aduersus ventorum vim sit saburrata.

QVOD ARS IMPERANDI

sit prudentia. XIII.



VI Prudens est Princeps, nouit omnes imperij ab-
sorbere difficultates: quæ cum maiores sint omni multitudinis robore, is solus tamen ijs omnibus sufficit. cuidam igitur interroganti, qua ope fretus, tantam molem non perhorresceret imperij: iuris respondit, aut potius prudentiæ, quæ humanæ societatis Dux est, & communis vitæ magistra, atq; domina. doctè id quidem. vetus enim est Antiquitatis auctoritas. Nam quorsum nuda illa,
quæ

quæ tot sæculis inueterauit, Herculis cum exuuiis Leonis imago: nihil est, in armis victoria, nisi prudentiæ præda: nihil ipsa nuditas, nisi cum rerum contemptu, veluti quidam felicitatis triumphus.

QVOD QVASI PLVRES REPERIANTUR Prouinciæ, quàm viri prudentes. XIV.



MIRAM prudentum virorum paucitatem ostendere volens, consuevit dicere, neminem esse prudentem, nisi qui oculos haberet Mineræ. Hæc enim quæquæ versus æque cernebatur, in omnia oculos iniectos habere: quod ut demonstrarent veteres pictores, ita Mineruam pinxerunt, ut nemo esset ex plurimis assistentibus, quem non fixis oculis spectare videretur. Sic Romæ illam Amulius pictor expressit, ex quo magnam meruit laudem. Nam quæ in viri prudentis conspectum minimè veniunt, in eius tamen aspectum prodeunt omnia. quo fit, ut non solum res omnes præuideat: sed etiam periculis omnibus prouideat. Est enim prudentia armatura, qua qui induitur minimè lædi potest. Nam sicut aspicientes Medusæ caput, ut est in fabulis, in saxa vertebantur: ita qui viri prudentis consilium sentiunt: statim proprio sensu destituuntur, eorumque voluntas non fit ei contraria: sed præda.

QVOD NON SIT VIRI PRVDENTIS quicquàm admirari: sed admirabilem se omnibus reddere. XV.



QVONIAM vir prudens vnum quodque suo examinat pondere, ideo nihil solet admirari. Non enim ex re, sed ex rei inscitia, hominum nascitur ad

E miratio.

miratio. Cum quis itaq; diceret se admirari felicem Ferrariæ
 successum, ei respondit, non fieri id ex rei gloria, sed ex ad-
 mirantis inscitia. Nam vir prudens cum omnia habet per-
 specta & cognita, nihil noui potest ei videri, aut admirabile:
 quia verò noui semper alijs aliquid affert, solus videtur admi-
 rabilis. Doctè id Poetæ. Nam quò ille rerum omnium for-
 mas induens tendit Proteus? viri prudentis habet interpræta-
 tionem, qui parendo temporis, alius sit oportet, alijs in rebus:
 quia tempore, nihil est varium magis, & mutabile. Quare
 vt prima materia, semper pro varietate formarum, aliam figu-
 ram, cum diuerso capit nomine: ita vir prudens, pro rerum
 discrimine, nunquàm fere fit idem: sed modo iustus: modo
 fortis: modo temperans, & habetur, & dicitur.

QVOD IN PRVDENTIA SINT

Summa, & pacis, & belli auxilia. XVI.



CUM quis Antistiti dolorem refricaret me-
 moria læsi Imperij, atq; sciscitaretur quān-
 tàm ægrota Reip. esset medicina: Prudentia
 respōdit. Multa. n. habet in consilij delibera-
 tione: summa in re bellica, malorum reme-
 dia. Testes sunt Romani, qui prudentiæ,
 templum Paci sacrum fecerunt: quiq; in Bello Gallico, quod
 Celticum vocabatur, & Senes & Sacerdotes, prudentioresq;
 omnes. quia omnium esset periculosissimum, non solum in-
 teresse, sed etiam præesse volebant. Quæ enim summa sunt
 belli suffragia, non ab armatorum robore: sed à prudentum
 consilio sunt petenda. Illi enim vt fortes: hi vt diuini Prin-
 cipes regunt imperium. Hoc ipse Homerus per Vlysses.
 Nam cur Vlysses interprætatur regionum omnium peregrinus?

nus? quia, nemo in regendo imperio, nisi veritati obdormimus, verè fit prudens, nisi qui per multas, & varias scientiarum regiones peragrarit.

*QVOD PRVDENTIS CONSILIVM,
viri fortis robori sit anteponendum. XVII.*



MORIS plenissima sunt, quæ à sapientibus in populum proficiscuntur obiurgationes. Quia autem imperitorum vulgus, est alienus à literis, ad rem bellicam magis proclivis, solet hos sapientissimus Antistes suauissimis verbis utens, re grauitè inculpate. Dicebat enim Phæbo, multò plus, quàm Marti tribuisse Deum, quorum alter rei literariæ: alter virtutis bellicæ, apud Poetas, est magister, & Dominus. hoc quippè probabat argumento, prudenti viro fortem, in honore debere concedere. suffragatur huic eius sententiæ Rex secundus Atheniensium Cecrops, apud quem, iudicium Neptuni, & Mineruæ de vrbs nomine agitarum est. Causam enim Mineruæ, ex eius sententia, sustinuit: cecidit Neptunus.

*QVOD VIR PRVDENS VICTVS,
formidabilior sit victori, quàm victor viro
prudenti victo. XVIII.*



NSIDIOSA est, aduersus hostes, viri prudentis clementia: nullumq; eius beneficium, in armis, periculo est vacuum. præclarior enim ingenio, quàm ferro ducit hostes superare. Quare solitus est dicere, prudentem virum inermen, in bello formidabiliorem esse forti viro armato. cò quòd fortitudinis est pu-

gnare: prudentiæ vincere. Non vulgare est C. Cæsaris testimonium, is enim Nicomediam nauigans, cum iuxta Maleam à latronibus Cilicibus captus esset, iniuriam non solum verbis, sed etiam fronte, & oculis texit. cum igitur magnam pro eius libertate mercedem poscerent: ille quasi eorum misertus, quibuscum agebat familiariter, duplicem summam promisit. vbi autem appulerunt Miletum, Cæsar Epicratem, Milesium seruum ad Milesios misit rogans, vt sibi pecunias mutuo darent, qui eas confestim miserunt. Epicrates mandatum habebat à Cæsare, vt cum pecunijs, magnum conuiuij apparatus apportaret, & hydram plenam ensibus, vinumq; mandragora mistum. Cæsar duplicatam pecuniæ summam latronibus numerauit, eisq; conuiuium apposuit. illi exultantes pecuniarum multitudine, tempus omne dederunt corpori: genioq; indulgentes, largiter vinum hauserunt medicatum. Postquam igitur vino somnoq; sunt sopiti, illi ad vnum omnes, nullo negotio à Cæsare sunt trucidati: ac pecuniæ simul recuperatæ, quas statim Milesijs restituit.

*QVOD VIR PRVDENS, LATENTES,
in simulatione, & dissimulatione, exploratos facile
habeat hominum animos. XIX.*



VM multi sint faceti corpore, deformati animo, beneq; loquantur, cum malè sentiant: solitus est dicere, non esse viri prudentis, vel oculis vel auribus, in hominibus iudicandis, fidem habere. Res enim est iudicij: non coloris, aut vocis. Id cum sentiret Chabrias Atheniensis Imperator, vbi impressionem, & impetum aduersus hostes esset factururus, consuevit, si recens præsertim collectus erat exercitus, per præconem, nunciare, vt qui male

male se haberent, separatim arma deponerent. quotquot igitur erant timidi, morbum simulant, arma deponebant. his ad pugnam non utebatur, sed ad præoccupanda loca munita.

QVOD PRVDENTIS SIT

momenta omnia obseruare temporum. XX.



DICEBAT esse prudentis quid res, quid tempus, in rebus agentis, postulet odorari. Quæ enim non loco, aut tempore benè fiunt: pro male factis culpantur. testes sunt omnium inter mortales, sapientissimi Ægyptij. Nam cur Morum Hieroglyphicum constituunt prudentiæ? ut doceant ceriè nihil fieri prudenter, nisi quod sit in tempore. Hæc enim arbor, ne pruina lædi possit, omnium nouissimè in germina, & flores erumpit: deinde quasi cursu tarditatem corrigens, vna ferè noctè tota germinat, primaq; omnium, ne æstus sentiat iniuriam, foetum maturat. quo admoneri videmur, eam demum præclaram esse actionem, quæ temeritate vacat, & negligentia.

QVOD MAGNVN SIT DISCRIMEN

inter virum prudentem, & fortem. XXI.



QVASCVNQVE in oras, Regionese disputationis res delata est, nullo negotio cùm solvatur à viro sapiente: tum virtutum hic omnium Antistes, facile dubitationis hunc scrupulum ex hominum, animis abstergit. cùm ferueret aliquando inter do-

Atos viros quæstio vtrum arma literis, an literæ armis essent anteponenda: Dixit tantum interesse inter prudentem, & fortem virum, quantum interest inter magistrum, & discipulum. Si enim prudentia est rerum omnium magistra, docetq; fortes pugnare: iudices rectè iudicare: bonos viros quid sequi debeant, & refugere, ac deniq; oratores quid dici, & non dici debeat, non potest vir prudens, non esse opifex, & magister virtutū omnium. Quare inter Prudentem virum, & fortem, hoc interest, quòd hic propensus est ad fœlicitatem: ille verò felix quod probat Seneca, per Gradationem, hoc modo. Qui prudens est ait, temperans est: qui est temperans, est constans: qui constans, non perturbatur, qui non perturbatur, est sine tristitia: qui deniq; vacat tristitia, felix est, ergo felix, & beatus est vir prudens.

QVOD VIR PRVDENS NOUIT

Aliorum eratis bene vti.

XXII.



ICVTI in Ædibus vestibula: ita prudentia primos bonorum omnes habet aditus. sciscitanti igitur quis esset prudens, qui respondit addiscit plus ex stultis, quàm ex eo stulti. Nam cùm vererum infamia posteros docet, quæ sit ad gloriam semita: atq; impiorum pœna cautio sit bonorum, & disciplina: tum Princeps prudens nouit ex vnius vitio, alterius corrigere vitium: stultumq; illum esse existimat, qui post exemplum, vsquam incurrat. Hoc vno instructus argumento præsentia cõponit: prouidet futura, & instauratione corrigit præterita. quod vt ostēderet Pythagoras, inquebat viro prudenti, duorum temporum potissimū rationem esse habendā, mane, & vesperti, id est rerū futurarum consilium, & præteritarum iudicium.

QVOD

QVOD NESCIAT IACERE VIRI
prudentis auctoritas. XXIII.



NIL est viri prudentis auctoritate præclarior. Ei enim non metu, sed necessitate compulsi omnes obediunt. Nam quemadmodum solent, in alto robustissimi quique etiam infirmo parere gubernatori: nec consueverunt viatores velocissimum quemque, sed gnarum itineris sequi: ita prudentis est inter mortales dominari: fortium, & validorum obsequi. Quod ut doceret sapientissimus ille Antistes, solet prudentem virum Phœbi pallum nominare. Magna vero in prudente viro, auctoritatis commendatio. Nam Gallus Gallinæus ideo Phœbo Sacer est, quod in bonis & infiris, & foris assumptis, Imperium exerceat, alterum ostenditur, per eius buccinatum, quo ne lædatur, fugatur territus Leo: alterum, admirabili eius præstantia, qua aurum, quod neque igne neque tempore comminui potest, absumitur, si eo liquefacto, os eius alitis ingeritur. Quare hoc testimonij exemplo, in omnibus bonis prima gloria tribuenda est prudentiæ. Nam, ut esset Inuencialis nullum numen abest, si sit prudentia.

QVOD PRUDENTIA VITÆ
humana sit magistra. XXIIII.



QUONIAM nemo in eo, in quo est prudens, errat, fundamentum, & radicem gloriæ altiore habet prudentia, quam fas est breuiter dicere. Solet igitur prudentiæ alumnos, solos viuendi gnatos nominare. Nam ad recte viuendū, ut asserit Menander *ἀγαθὸν μέγιστον ἐκπαινεῖς ἐς ἀνὴρ* hoc est bonum maximum prudentia est semper. Hæc per Serpentem, in sacris literis figurata est.

qua figura virtus hæc ostenditur esse imperantis vitæ humanæ. Nam duplex cum sit hæc vita, vna agendi: intelligendi altera vtriusq; figura, & imago censetur esse serpens. Nam in eo solum animantis genere, Amphibianam parit natura habentem duo capita, vnum in inferiore, alterum in superiore parte. ex quo discrimen vtriusq; vitæ saltè notatur, huc accedit, quòd serpens totum corpus exponit ferienti, vt caput tueatur. Nam vitam omnem habet in capite constitutam. Si enim caput Serpentis cum minimum busti euaserit, viuit: sin mactatur capite, totum corpus statim exanimatur. quorsum? est hominis vita, si prudentes consulimus, in ratione, quæ fons, & caput est virtutum omnium: non in sensibus posita.

*QVOD NIHIL IN BELLO HOSTI
formidabilius sit, quàm Ducis prudentia.*
XXV.



CUM aduersus hostes Ecclesiæ, magnus in Germania fieret armorum apparatus, asseueravit ferri aciem omnem hebescere, nisi in armis adsit hasta Palladis, hoc est prudentia: qua non solum procul, sed etiam absens traiecitur hostis. Nihil neq; festiuus, neq; doctè magis dici poterat. exercitus enim prudentiæ expers, suo se iugulat gladio. oppugnatur enim hostis viribus, expugnatur Ducis prudentia. quod cùm vellet significare Chabrias Imperator, dixit formidabiliorem esse pecudum exercitum, Duce Leone: quàm Leonum, pecude duce. Siquidem, vt vna Aquila sex centû fugantur aues: ita ad ingentem euertendum exercitum, vir prudens vnus sufficit.

DE CONSILIO

TITVLVS QVINTVS.



QVIA ex consilio primùm casus, atq; orbitas pellitur eruditionis, nihil magis ad consilij capiendi deliberationem accommodatum est, quàm vir eruditus. Solet enim res in quæ stionem adducta, ex sordido ingenio simili lingua deformato, etiam honesta sordere: nunquàm autem nisi in iure, & iustitia recreari. multi igitur, consilium norunt offerre: solus sapiens nouit afferre. Cum autem neq; consilij vis, sine prudentia: neq; prudentiæ lumen quale quantumq; sit, sine consilio satis potest intelligi; utrūq; BARTHOLOMÆIVS Brugnolius, Præses in Insubria Regij Senatus, semper maximarum rerum illustrauit gloria: tantoq; Reip. cumulauit beneficio, vt non videatur ex prudentia laudes accepisse: sed prudentiæ dedisse. Præclara hæc sunt eius gloriæ monimenta, non quæ de Brugnolio in penitralibus sapientiæ inferuntur: Sed quòd ipse Brugnolius cernitur à Ciuibus amari, coli, & obseruari à sapientibus: ab omnibus deniq; non solū pater patriæ, & parens utilitatis publicæ haberi: sed etiam nominari. Quoniam autem ex consilio nō tantum ducuntur rerum primordia: sed etiam exitus, Cauendum est ne consilium iniuria exulceratum, rem omnem suo exanimet vulnere. Quia igitur in consilio, docet eruditio: fidem magis facit vitæ probitas, qui prudens est, solus instar est, & boni, & eruditi simul viri, in deliberando: solusq; ansam rei benè gerendæ alijs videtur posse porrigere. Standum enim est eius iudicio. Siquidem non pecunia: non armis, & viribus res grandes geruntur: sed prudentis

ris consilio, quo qui labitur, corrui in omnibus. Quoniam igitur Cardinalis P. ALDOBRANDINVS gnarus est deliberandi: explorator rerum subtilis: ingenio acri: nullius temeritati fidus: veritatis propugnator: iustitiæ, & æquitatis patronus: cuius nulla animæ vis vacat sapientia: mens rerum cognitione armata: ratio artium præsidio munita: opinio historijs firma: atq; oratio, in primis, ad fidem motumq; populi accommoda: statui quæ ab eo de consilio profecta sunt apophthegmata, in ordinem redigere, quæ hæc sunt.

- 1 Quòd non solum prudens, sed etiam occultum oportet sit Principis consilium.
- 2 Quòd nihil in administratione Imperij, utilius sit consilio.
- 3 Quòd nefas sit à consilio principis recedere.
- 4 Quòd mens principis consilij expert, immanis fiat, & efferata.
- 5 Quòd principatus firmamentum sit consilium.
- 6 Quòd hostis consilio magis, superetur, quàm viribus.
- 7 Quòd omni vallo aduersus vim hostium, firmitus sit consilium.
- 8 Quòd malum consilium, consultori sit pessimum.
- 9 Quòd Principis consilium probandum sit magis, quàm inuestigandum.
- 10 Quòd dare Principi consilium res sit periculosa.
- 11 Quòd nihil sit neq; difficilius, quàm deliberanti capere, neq; facilius, quàm alteri consilium dare.
- 12 Quòd præclarior sit, quæ consilio, quàm quæ viribus paratur victoria.
- 13 Quòd qui viribus sit superior, facile vincatur, si cōsilio sit inferior.
- 14 Quòd ei, cui non deest consilium: amicus adsit Deus.
- 15 Quòd consilium non fraudem: sed fraudis medicinam pariat.
- 16 Quòd Necessitas in consilij deliberatione, plurimum habeat auctoritatis.

Quòd

- 17 *Quòd consiliū sit in loco, aurum non capere, sed profundere.*
- 18 *Quòd res sit formidolosa prauī hominis consilium.*
- 19 *Quòd quæ tria sunt bonorum genera, illa omnia in vno delitescant consiliū nomine.*
- 20 *Quòd robur Imperij in consilio sit fundatum.*
- 21 *Quòd Reip. igne, & aqua magis necessarium sit consilium.*
- 22 *Quòd Miles firmus sit non qui ferro, sed qui consilio sit munitus.*
- 23 *Quòd res sit formidolosa perfidi consilium.*
- 24 *Quòd mira sit eorum, qui rectè Reip. Consulunt paucitas.*
- 25 *Quòd cedat imperium consilio.*
- 26 *Quòd infidum sit venale consilium.*
- 27 *Quòd consiliū ratio, historia veluti quodam pabulo sit depascenda.*
- 28 *Quòd turpe consilium, consiliū nomen amittat.*

QVOD NON SOLVM PRVDENS
sed etiam occultum oportet sit Principis
consilium. I.



MAGNA arsest ait, consilij capiendi: summa fides occultandi. Etenim fidem in consilio capiendo habere omnibus, est fatuitatis: nulli pertinaciæ: benè autem consulenti summæ prudentiæ. quia verò consilium principis fide gaudet, & taciturnitate, qui illud detegunt, non solum officium deserunt boni viri, sed etiam vulnerant. Nam quod aduersus hostes maximè capitur consilium, vix prodest, nisi occultum. Hoc falsè Poeta, in perfecto Principe effingendo. Etenim
 cur

cur ab eo Aeneas, & Achates finguntur nebula septi Carthaginem inire? quia certè quidem est Principis, qui alios rogit, sua consilia tegere: non reuclare, viri boni.

*QVOD NIHIL IN ADMINISTRAT-
ione Imperij utilius sit consilio. II.*

QVONIAM ex consilij errore, Imperij vis ruit vniuersa: solet consilium Reip. firmamentum nominare. Nihil enim est consilio, aut in rerum utilitate, utilius: aut in honestate, honestius. Laudem quippe habet probitatis, & doctrinae decus: eoq; præstat pecuniæ, quòd vsus exhauriat pecuniam, augeat consilium. Nec vulgaris est, ad hanc rem, Poetæ auctoritas. Nam cur apud eum Aristæus sumitur pro consilio? quia Aristæus interpretationem habet utilitatis, in cuius nomine latent omnia bona fortunæ. ille enim artem inuenit mellis, & olei conficiendi, qui duo humorum omnium sunt optimi, quiq; sanis hominibus robor: infirmis incolumitatem ministrant.

*QVOD NEFAS SIT A CONSILIO
Principis recedere. III.*

QVANQVAM Consilij laus quocunq; ingreditur, eodem semper virtutum omnium instructu, ornatuq; comitata est: vicit tamen Antistes ille ornatum omnem, præconijs, & gloriæ magnitudine. interroganti enim quid esset Principis consilium, non dixit Musarum esse Senatuum: sed Apollinis oraculum: ex quo humani generis societas salutem, tranquillitatem, atq; optima quæq; petere consuevit

fuevit . est enim eius consilium , malorum omniũ remedium .
Quod conuincitur admirabili hoc argumento . Etenim ad
quid vetus hoc Symbolum , Ciconia rostro ferens Platani fo-
lium ? docet nullum Principis consilio , aduersus hostium infi-
dias firmitus esse munimentum . Noctua enim , si incubat oua
aui alicuius , sicea fascinat , vt inania reddantur , & irrita .
itaq; Ciconia quasi plena consilij , amuletum affert in nidum ,
Platani folium . Nouit enim Noctux Platanum omni morte
esse terribiliorem .

QVOD MENS PRINCIPIS, CONSILII
expers : immanis fiat, & efferata. IV.



QUEM ADMODVM in dolorum facibus ,
& morbi periculis , non noua à medico , sed salu-
taria gessit audire infirmus : ita Princeps in cura-
tione ægrotæ reip. non quæ grata , sed quæ salu-
taria sunt , ex publicæ salutis fundo , haurire velle debet Sena-
tus consilio . Eo enim si destituitur , imperiũ statim non solum
euertit : sed etiam immanis , & efferatus redditur . Sic enim Ne-
ro mentem cùm haberet expertem consilij : existimauit dece-
re , quicquid sibi liceret : eoq; furoris , & insanix processit , vt
Agrippinam matrem peremerit : Octauiam Coniugem , Pom-
pæ pellice ducta , domo exturbarit : eiq; venas restingui vin-
culis iusserit , & per omnes artus sanguinem mitti , neue pau-
re sanguis tardius fluere , feruidi balnei calore necari .

Nec ante imperij licentia abuti destitit , quàm
ipse ab infesta multitudine , ad mor-
tem sit compulsus .

QVOD

QVOD PRINCIPATVS FIRMAMEN-
tum sit Consilium. V.



ON adeò fama, quàm fame videntur ridi-
culi, qui vocem in quæstum conferunt:
nec officium in deliberando, sed spem se-
quuntur. Est enim consilij obses non quæ-
stus, sed prudentia: non petulantia aculeus,
& procacitatis: sed lumen aut numen
potius iustitiæ, & veritatis. id sapientissimus ille Antistes, ut
doceret, dicebat concilium principatus esse baculum, sine
quo stare non potest, iacere potest Princeps. Salsè ille quidem.
Nemo enim scire cum possit omnia, multorum consilio prin-
ceps utatur oportet. ex tot enim sapientibus, qui per omne
æuum floruerunt, nemo adhuc inuentus est, qui se omnia sci-
re profiteretur.

QVOD HOSTIS CONSILIO MAGIS
superetur, quàm viribus. VI.



RÆSTAT virtutum omnium ille Antistes,
totius Græciæ sapientissimo Hippocrati. hic
enim desperatis vetuit adhibere medicinam: ille
vero desperatos etiam excitat concilio, & iacen-
tes à desperatione in spem reuocat. ars quippè medendi, va-
litudinis solum: consilium verò non solum ægrotæ, sed etiam
exanimatæ reipu. est medicina. consuevit itaq; dicere ubi
res ardet bello, pluris imperatoris in armis esse consilium,
quàm impressionem vniuersi exercitus, & impetum. do-
cuit id aliquando suo consilio Fabius Maximus, qui ab
vniuersa Italia, Corona Graminea est donatus, quoniam
non repugnando, sed cauendo, Romanis restituerat rem.

QVOD

*QVOD OMNI VALLO ADVERSVS
vim hostium firmitus sit consilium. VII.*

INTERROGANTI cuidam quo genere armorum, hostium vis maximè posset reparari: vmbone dixit Palladis: quo qui tegitur, nullo modo lædi pōt. Quare res bellica, sine consilij prudentia, nec vilitatem, nec laudem habet. docet id, in Pyrrho intausus rerum euentus. hic quippe Epirolarum Rex, rerum successu elatus, contra Antigonum Macedonum regem, nulla lacesitus iniuria, arma accepit, vi & potentia fretus: Antigonus verò nullo ab exercitu firmus, consilio vtens pro armis, Pyrrhi exercitū cunctando sæpe illudit: ac demum spem eius omnem in contemptum adduxit, & desperationem. hūc accedit & Plopidas Thebanus, & M. Marcellus, qui ambo vi potius, quàm consilio freti, turpiter magis, quàm fortiter in bello ceciderunt.

*QVOD MALVM CONSILIVM
consultori sit pessimum. VIII.*

QVIA in eo deliberandum est diu, quod semel est statuendum: nihil est renitentius consilio, quàm præpropera festinatio. Non enim consilium celeritate, sed prudentia est depascendum, qua reguntur vniuersa. Quoniam autem eò pertinet omnis consilij deliberatio, vt aut depellatur malum, aut accersatur, quod est bonum, dicebat eum, qui in alterutro erraret, nemini ferè peius, quàm sibi officere. Non adeo debet igitur vir prudens, suis bonis inter deliberandum delectari, quàm alienis malis laborare, cauereq; ne alteri male consulat. Nam quæ mala in alios exeunt, grauiora in auctorem redeunt. docuit

cuit id olim Perillus Atheniensis, faber ingenio præstans, qui Phalaridi Tyranno Taurum ex ære fabricauit, in quo reus clauderetur, ac subiecto igne, mugitum bouis ederet: cuius muneris nomine, cum amplissimum à Tyranno expectaret munus, eò quòd nouis semper tormentis excogitatis oblectabatur: primus in Taurum iniectus, suppositisq; ignibus, lux artis experimentum præbuit. Quare celebris, & peruagata est Heliodi hæc sententia. βέλλὲ τὸ βέλυστατὶ κακίῃ. hoc est consilium malum, consultori pessimum.

QVOD PRINCIPIS CONSILIUM
probandum sit magis, quàm inue-
stigandum. IX.



Nihil aiebat esse in bono consilio, luce peius: itaq; paucorum fidei est cōmittendum, quod cupis latere. Nam, vt testatur Chilo Lacedæmonius, qui vnus ex septem Græcię sapientibus habitus est, nihil est difficilius, quàm secreta silentio tegere. In hoc vitio, cum non parum sit turpitudinis, multum etiam sæpe periculi, Philippides Comicus Pœta, interpellatus à Lysimacho rege, vt aliquid peteret, nihil respondit, ò rex aliud à te peto, nisi vt nunquam recunditi tui consilij me facias conscius. norat enim vir ille prudens, id quod haberet cum alijs commune, non esse in sua manu, vt diu posset latere.



**QVOD DARE PRINCIPI CONSIL-
lium res sit periculosa.** X.



ET SI Consilij vtilitatem, poetæ satis vna Promethei celebrant fabula, dicebat tamen nihil esse periculosius, quàm Principi consilium dare: Nam in consilio, bonorum quæ afferuntur vtilitas, est Principis: Si quid verò res mali attulerit, id omne in auctorem consilij incurrit. interroganti igitur quid tutum esset viro liberè agenti cum Principe: obsequium dixit: deinde quid periculosum: consilium ait. vbi enim res malè cedit, ibi consilij auctor pessimè habetur. Quare vt est apud Plautum, plus oportet scire subditum, quàm loqui. Hoc ipsa Promethei fabula. Nam quamquàm interpretationem habet multi consilij, isq; ignem mortalibus, qui obsoniorū omnium est suauissimus, impertiuit mortalibus, quoq; detracto, nec metalla, nec artes haberemus illiberales: is tamen præmij loco in monte Caucaaso, grauitè affectus, & afflictus censetur sic lacerari à vulture, vt nec cum lætitia mori, nec viuere possit sine atrocissimo dolore.

**QVOD NIHIL SIT NEQ; DIFFICILIS
quàm deliberanti capere, neq; facilius quàm alteri
consilium dare.** XI.



NQVIEBAT neminem esse, qui se non mallet esse Vlyssēm, quàm Cyclopem. nec falsò. maiores enim sunt consilij vires, quàm corporis. homo pusillus; ingentes Elephantēs, per Sylvas capit, frenat equos, subiugat boues aratris: volucres deicit arundinibus: ac deniq; in imo maris, quæ submissa sunt retibus

F extrahit.

extrahit. verum in tanto bono, hoc est incommodi: quod omnes in re aliena consilio videntur abundare: in propria nemo non egere. dare enim consilium est cuiusvis: capere sapientis tantum. Thales igitur interrogatus quid esset homini facile, *ἄλλοι ὑποτίθεται*, hoc est alteri consilium dare. Nul- lum est grandius argumentum stultitiæ, quàm eius, qui cùm sua ignoret, aliena cogitet sapere.

*QVOD PRÆCLARIOR SIT, QVÆ
consilio, quàm qua viribus paratur
victoria. XII.*



ON instituta, sed inueterata est, in ALDO- BRANDINO, consilij gloria. aiebat non esse turpe, Imperatorem à viro sapiente supera- ri: sapientem verò vinci ab Imperatore tam gloriosum esse imperatori, ut nomen vinceret imperatoris magnitudine gloriæ. Nihil, in bello, priscis ho- minibus antiquius fuit consilio. Non enim superi ijs, in armo- rum conflictu, sunt auxilio, qui se inconsulto mittunt in pe- riculum. Nihil enim neq; Mithridati memoria: neq; The- mistocli prudentia: neq; Aristidi iustitia, nec deniq; Heracli- to ingenium, qui sine præceptore sapientissimus euasint, sine consilij deliberatione profuisset. Quare omnis fere an- tiquitas consilio plus, quàm vel arti, vel robori, vel vlli de- mum virtuti tribuit. Itaq; lacones si quando stratagemate, id est Callido consilio superassent hostem; Marti bouem im- molabant: sin aperto prælio, Gallum gallinaceum. Hoc pa- cto commonebant belli duces, ut magis consilio, aduersus hostes, quàm ferro digladiarentur.

QVOD QVI VIRIBVS SIT SVPL-
rior, facile vincatur, si consilio sit
inferior. . . . **XIII.**



SOLITVS est dicere non esse roboris, & vi-
rium, in bello: sed consilij, periculis consulere:
vincere iccirco eum, non qui viribus, sed qui cō-
silio plus potest. loquitur id ratio: probat Ma-
ior Cyrus sui Testimonio. Cū enim in exercitus robere, &
militum multitudine hosti concederet, is trans Araxen flu-
uium Castra quasi timidus posuit, Massagetisq; in se irruen-
tibus reliquit diripienda: illos mox cibo potuq; graues, ac
sumno deditos nocte intempesta adortus, cum suo rege truci-
dauit. facile quippe est struere insidias, cauere difficile.

QVOD EI, CUI NON DEEST
consilium, amicus adsit Deus. **XIV.**



HOC interest in bello, inter pecuniam, & consi-
lium, quod illa potentiori cedit: hoc imperat:
quod illa eripi, & surripi potest: hoc non potest.
aiebat igitur, quia Deo amicū est consilium, eos,
qui olim consilio floruerunt, nō vt Heroes improbitati impe-
rassent: sed vt diuinos homines. Arti quippe, & prudentiæ non
solum cedunt mores peruersi: sed etiā, in armis iratorum fax,
& furia. Nullus hostium sapius vicit Romanos, quā Annibal
Barchinus: at astu, & consilio potius, quā ferro. arte ad
Trebium vicit: arte ad Trasimenū, & Cannas, & ipse magna
quidē arte à Fabio interclusus, maiore aliquanto, per Cassina-
tem saltum, Romano milite illuso, euasit. Ludibrium dici pōt,
q̃ bobus sarmentis ad cornua inc̃ r̃sis, in aduersum mōtem ab

hoste obscura nocte adactis, Romanus Miles noua specie territus, præsidio abscesserit.

*QVOD CONSILIVM NON FRAVDEM
sed fraudis pariat medicinam. XV.*



PRÆCLARA est in summo eo Antistite, consilij laus, qui semper Deum, vix vnquam hominem, in rebus tractandis secutus est consiliarium. Quare in præstigijs vitandis, consuevit dicere, consilium non esse fraudis artificium: sed medicamentum. ita M. Brutus imperator, cum Lycios trans Xanthum amnem compulsos vrbe exclusisset, indicio comperit supert aquam nando eos urbem repetere: tetendit itaq; occultè resia, cum tintinabulis supernè apposis, quo indicio, incidisse hostes in retia significaretur. multi per hunc modum capti sunt: cæteri à simili conatu deterriti, extorres esse maluerunt.

*QVOD NECESSITAS IN CONSILII
Deliberatione, plurimum habeat auctoritatis. XVI.*



NE C tarda, nec parum efficax est, ad consilium capiendum, vrgens necessitas. Hęc enim æquè statim & sedem, & motum facit. Solet igitur dicere vim omnē suadendi vna vinci necessitudine. Non solum enim aduersus necessitudinem, raucescit ars dicendi: sed etiā omnis flaccescit periculi metus. Testis, inter Romanos, est C. Marius. Nam cum rei summa, in aperto sita esset discrimine, sic castra posuit, vt militi antè non liceret aquari, quàm cum hoste congrediretur. Quare exercitus cum videret, aut in acerbitate sitis, sibi esse contabescendum: aut extremum rei tentan-

sentandum, imperatore etiam tacente facta est militibus fides esse pugnandum: & ita ut moræ impatientes, congressum cum hoste non petere, sed extorquere ab imperatore velle viderentur. Reserat Marius aduersus Teutones, & Ambromes: is autem Imperator ad Sicietes milites conuersus cruore, inquit, à nobis potius hodie emendus est, aut vestro, aut hostili, dignum ad flumen intendens. Quare æque ad pugnam, & vnam simul felici euentu illos duxit. Nam satis, & hostilis sanguinis, & fluuiialis aquæ ad facietatem, Victor Romanus militibus suppeditauit.

QVOD CONSILII SIT IN LOCO,
aurum non capere, sed profunder. XVII.



IEBAT sapientis esse auidos præcio emere: ita Mithridates Rex Ponti magno prælio à Lucullo victus, cum acie egressus, ita fugeretur, ut hostem haberet vestigio hæredem: multum auri onus sequentibus obiecit: cæterum dum Romanus prædæ cupidus aurum diripit, maiorem prædam è manibus labi passus est.

QVOD RES SIT FORMIDOLOSA,
prauis hominis consilium. XVIII.



NIHIL magis danti consilium, fidem derogat, quam ipsa ingenij, aut morum deprauatio. in literis igitur non obstrepentium gregibus, sed vni Phæbo credimus. is verò solet dicere non solum imperitos: Sed etiam imperitorum consilia esse fugienda. Siquidem, & Troia fortè adhuc staret, nisi Paris Veneris paruisset consilio: Et Hercules certè miserè

non interijſſet, niſi aut Deianira Neſſi Centauri conſilio ſi-
dem habuiſſet, aut Deianiræ coniugi ipſe Hercules. ne igitur
dolus, nomen conſilij induat, deſciſcendum eſt in delibera-
tione, à veſana veteratorum opinione.

*QVOD QVÆ TRIA SVNT BONORVM
genera, illa omnia in vno deliteſcant conſilij
nomine.* X I X.



V M Imperium, apud exteras gentes, culpa
potius, quàm errore lapſum, non minori
infamia, quàm vulnere iaceat exulceratum:
ſolet dicere nullum eſſe remedio, in quo con-
ſiſtat, niſi in conſilio locum: conſilij nomen
eſſe glorioſum, rem verò ſalutarem. Hæc
enim magni eſt ingenij: non parvæ doctrinæ: ſummæ verò
beneficentiæ, & vtilitatis: illud omnia ſimul ſapit bonorum
genera. Dictum enim conſilium, ſiue à conſulendo ſit, quòd
tanquàm res optima, ſalutarisq; omnium conſulat rationi-
bus, ac incommodis: ſiue à ſale dictum ſit potius, quòd in eo
ſal contineatur ſapientiæ, quodq; admirabilis eſt ſalis vis,
& in imperfectis animantibus necandis, & perfectis ſanandis:
ea eſt conſilij natura, qua accerſuntur bona omnia, & ex-
terminantur contraria. Nec à ſale ſolum conſilium, ſed et ſala-
rium, quaſi ſal neceſſarium eſt nominatum, & ſapientia quaſi
ſapida ſcientia, eſt vocata. quod igitur eſt, & animi, &
corporis. & fortunæ bonum, id omne ſimul
in vno conſilij nomine, videtur
deliteſcere.


Quod

QVOD ROBVR IMPERII, IN
consilio sit fundatum. XX.



VANTVM quisq; arti studet, & doctrinæ, quæ artis est soboles: tantum consilio est aut idoneus, aut alienus. interroganti igitur quale esset prudentis cōsiliū, qualis dixit, fuit Samsonis capillus. Nam quemadmodum ille sine capillo, robur statim simul cum libertate, ac vita, amisit virium: ita imperium sapientis, enudatum consilio, sua ruat mole necesse est. atq; sicuti per capillos purgatur cerebrum: ita per consilium sordes è corpore reip. eluuntur omnes vitiorum. Nam quorsum, quod Samson dum ei fuit capillus, nihil vnquàm potuit perhorrescere? est consilium veluti quædam eorum, quæ metuuntur maiorum, medicina.

QVOD REIP. IGNE, ET AQUA
magis necessarium sit consilium. XXI.



NON adèò ex Promethei igne homo, vt est in fabulis, vitam est mutuatus: quam apertum vitæ lumen nactus, ex cōsilio. Solitus est igitur dicere in rep. siue igne Promethei frigere omnia. Nā quid est homo, siue igne Promethei, id est siue consilio, nisi hominis tantum adumbratio, hoc est corpus siue lutum, nulla face rationis animatum? acres sunt fabulæ in hæc nostra tempora morsus, & aculei: quæ magna consilij laborant penuria. Quemadmodum non potest ignis, neq; humidus, neq; frigidus reddi, neq; vt cætera elementa putrescere: ita non consilium rebus, sed res vniuersæ subiiciuntur con-

filio. Sursum tendit ignis, consilium nescit iacere: sordes Deniq; ignis purgat vniuersas: consilium item, omnes labe abstergit vitiorum, nec vlllo crimine pollui potest, & commaculati, si modo vim retineat consilij.

*QVOD MILES FIRMVS SIT, NON
qui ferro: sed qui consilio sit armatus. XXII.*



VM essent Imperatori imbecillo, cum Hoste robustissimo manus confingendæ, interrogatus quomodo Imperator cum hoste se deberet gerere, vt Leopardus, respondit, cum Leone. Annuebat arti, & consilio fidendum esse plus: quam hostium vim, & crudelitatem esse timendum. Capitale enim est inter vtramq; bestiam odium: verum Leopardus impar viribus, vbi cum Leone est congressurus, cuniculum agit, cuius vtrinq; ad ingrediendum, & egrediendum latum sit orificium: in medio autem tam augustus sit transitus, vt vix ipse euadat: Leo verò ne vix quidem. Simulata igitur in congressu fuga, Léo hostem insequens, loci angustijs sic intercipitur, vt neq; progredi, neq; regredi possit. tùm à tergo præsto adest Leopardus, qui Leonem dolo distentum discerpit, & laniat.

*QVOD RES SIT FORMIDOLOSA,
perfidi consilium. XXIII.*



VNQVAM Palamedes, nisi perfido Vlyssis consilio fidem habuisset, lapidibus obrutus fuisset. inquebant igitur in consilij deliberatione, ab ijs maxime cauendum esse, quorum consilium astutum, & callidum sit

fit magis, quàm fidele. res festiuo patet Apologo. Equus quondam, aduersus armatum Ceruum, bellum gerens, opem implorabat ab homine: persuadet hic, vt forti sit omnino, eiq; spem ostendit victoriæ, si freni modo patiens sit, & fessoris. admissio igitur vna cum freno homine, auxilij loco in seruitutem pulsus, perenni etiamnum præmitur seruitutis iugo. quorsum? Nihil est in consilij deliberatione, magis quàm ab insidiosa beneuolentia, cauendum.

QVOD MIRA SIT EORVM, QVI
rectè Reip. consulant paucitas. XXIV.



CVIDAM sciscitanti, quis bonus esset consiliarius: is respondit, cui sit, & Angenora mater, & Harpocrates pater. ex quo notauit eum esse demum bonum consiliarium, in quo ipse reuiuisceret Pythagoras, qui eloquentiæ, & silentij fuit magister: Sapientiæ verò dominus. id Romani olim significare volentes, Bullam in toga prætexta constituerebat, veluti quoddam deliberandi monumentum. illa enim cordis effingebatur figura, vt eam gerentes adolescentuli, & se excordes esse, & tum se cordatos fore sentirent, cum in Senatu, communis consilij fierent participes. Non enim Castor, & Pollux magis nautis in turbulento mari, errantibus tranquillitatem nunciant, quàm aut cor consilij Lumen, aut consilium felicitatem adumbrat imperij: quæ non opibus definitur, sed virtutibus.



QVOD

QVOD CEDAT IMPERIVM
consilio. XXV.

SI laudatur Antiquitatis diligentia, in inuestiganda eruditione, felicitas in reperienda, nec non ars in declaranda: non possum sapienrissimum illum Antistitem non laudare, qui studiosissimus est Antiquitatis. Interroganti igitur quid posset plus imperio, consilium dixit. Hoc ipsum, vt etiam in silentio, assueuerent veteres, Consum Deum consiliorum constituerunt. hoc enim pacto, docebant omnia à Deo fieri, quæ consilio fierent: imperium vero & obsequium, quia vtrumq; est hominis, cedere iccirco oportere consilio, quod vim & auctoritatem habet non ingenij, sed numinis. Scribit P. Victor Ædem consilij subterraneam fuisse, quasi lucem metuat consilium, nec vsquàm melius adolescat, quàm in recundito. Dictum autem est consilium à Conso Deo, quòd nihil sit neq; consilium, nisi Consi Dei auxilium: neq; consulatus, nisi Consi latus, id est magnus Deus. Ara eius, in Equestribus certaminibus, tantum patebat: reliquum verò tempus latebat. quo satis odorari fas est, Senatus consilium non verbis: sed factis esse aperiendum.

QVOD INFIDVM SIT VEMALE
Consilium. XXVI.

Nij fluxa ferè, & dubia est fides, qui aurum anhelant. Interroganti igitur cuius fidele esset consilium, aurum respondit, contemnentis. ita laudatur Fabricius qui à Pyrrho muneribus, & pollicitationibus, nec corrumpi potuit: nec adduci, vt contra dignitatem patriæ, veniret in Regis sententiam.

QVOD

QVOD CONSILII RATIO HISTORIA
veluti quodam pabulo sit depascenda. XXVII.

INTERROGATIVS vnde prudens sumeretur
consilium: ex memoria dixit, earum rerum, quæ
antè fuerunt. Nam de futuris, præteritum tem-
pus, vt ait Plato, nobis exempla suppeditat. Qua-
re Historias tenere, optimum est ad consilium perficiscen-
ti, viaticum.

QVOD TURPE CONSILIVM
consilij nomen amittat. XXVIII.

CONSILIVM veteres Consi Dei, dixerunt es-
se auxilium, vt docerent id verum demum esse
consilium, quod nulla turpitudine esset comma-
cularum. Itaq; sciscitanti cuidam avaro, quale
deberet esse consilium, honestum respōdit, non quæstuosum.
Aristides igitur, vbi intellexit Themistoclis consilium de fran-
gendis Lacedæmoniorum opibus, incensa clanculum ad Cy-
theum eorum classe, dixit perutile quidem esse: sed minimè
honestum. Quare id statim ex præscripto publico, tanquam
indignum, fuit inuolutum silentio. Sagacis enim:
viri, & prouidi laudatur consi-
lium: non veteratoris,
& perfidi.



92
DE INTELLIGENTIA
TITVLVS SEXTVS.



ET SI pecuniæ nerui, & vires sunt rerum
agendarum: robur tamen imperij, non est
in pecunijs, quibus sapiens gloriosius ducit
non egere, quàm abundare: sed in rerum
intelligentia versatur, & doctrinæ sagacita-
te. Neq; id solum, quia animi egere, mi-
serissima est egestas, sed etiam quia intelligenti earum rerum,
quas vulgò suspiciunt, non difficilis est copia. Nam arti, &
doctrinæ omnia parent, quæ in bonis, homines censent esse
optima. Cum igitur principium, & fundamentum doctri-
næ sit ingenium, doctrina virtutis: virtus benè institutæ Reip.
nulla laus est imperij, quæ non videtur ex sapientissimorum
virosum ingenio proficisci. Quantum autem quis virtuti,
quantum doctrinæ, quantum publicæ utilitati tribuit: tanti
(ut ab aliorum infinitate, qui in Antiquissima, & præclarissi-
ma BOSSIORVM familia floruerunt, recedam) certè
summi, Amplissimi Magistratus Præsidis SIMONIS Bossij
ingenium omnibus scientiarum dotibus locupletatum faciat
oportet. Sensit vrbs Mediolanum, duobus potissimum tem-
poribus, quanta vis, in eo sit sapientiæ. vno, cùm in summa ca-
ritate annonæ, fames, qua mortales necabantur, eius vnus
studio est depulsa, quam vniuersi simul ciues poterant auge-
re, non poterant leuare: altero, in ipsa etiam pestilentia con-
tagione, quam semper, in ipsa periculi flamma, tanta pietate,
tam singulari officio, totq; muneribus oppunauit, ut illam
tandem vrbi vniuersæ exitialem, non oppugnasse, sed expu-
gnasse videatur, victori tamen non minimum deinceps re-
mansit

mansit negotij. Nam cum Agri propter pestilentiam vasti, & deserti, nihil præter famem, & sterilitatem ijs afferrent, qui superstites remansissent: ingruit statim tanta rerum inopia, & egestas, ut nihil Sol vnquam viderit ea vrbe neq; miserius simul, neq; propter opem statim à SIMONE Bossio, quasi de Cælo allatam, Beatius. Sed quid ego hæc? is ille est, qui non adeo videtur sperare, vel spirare potius, quàm spirando, dare rationes certas, & præcepta rerum agendarum, & vitandarum, quæ habet ordinem, & quasdam in agendo, errare non patientes vias. Quocirca ille à Rege Regum PHILIPPO propter innumeras, singularesq; eius virtutes, ad plurima publici muneris officia ascitus: virtutis plus dignitatibus semper attulit, quàm illi dignitates attulerunt honoris. Magistratus demum ordinarij Præses minimè appetens, nedum petens, factus: in eo munere continenter clementiam seueritate: & seueritatem clementia temperauit: iustitiam vero tanta perpetuò honestauit obseruantia, morumq; grauitate, ut non iurisprudentiæ alumnus videatur esse, sed opifex, & auctor iuris, & iustitiæ. quorsum? Nihil est Imperium administrantis intelligentia, nisi imperij sanitas, consilij lumen, populi robur, & rerum omnium affluentia. Doctrina verò illa diuina, & recundita Cardinalis P. ALDO BRANDINI, ea est cui omnia obtemperant, cum armatura sit rationis, quæ omnia vincit, atq; sibi subiicit. Hæc est quæ, & iusta cognoscere, & vera loqui, & grandia operari docet. Quæ verò de intelligentia fudit Apophthegmata eorum, index hic est.

- 1. *Quod Respirare sine intelligentia non possit imperium.*
- 2. *Quod sinuosa sit ad doctrinam via.*
- 3. *Quod Imperium par sit Imperantis doctrina.*
- 4. *Quomodo pareatur doctrina.*

Quod

- 1 Quòd cum ingenio crescat, & decrescat, eruditio.
- 6 Quòd fabula lumen fundant, ad res omnes, ingenij.
- 7 Quòd ad Imperandum maximè sit accommodatus, qui plus sapit.
- 8 Quòd Principis non minus angusta sit sapientum familiaritas: quàm sapientibus principum, gloriosa, & utilis.
- 9 Quòd Principes in primis probentur, qui Musarum sunt alumni.
- 10 Quòd Principis gloria sapientia est depascenda.
- 11 Quòd Palladis doctrina, Principum sit instructio, & disciplina.
- 12 Quòd, ea intelligentia maximè probetur Principis, quæ minimè norit otiosi.
- 13 Quòd vir intelligens ex aliorum erroribus addiscat, quid agendum sit.
- 14 Quòd ad perfectam vitam nemo perueniat, nisi doctrinæ semita.
- 15 Quòd viri sit eruditi quid res, tempusq; postulet, odorari.
- 16 Quòd vir doctus quæ sunt diuina, sentit in humanis, & quæ sunt humana, in diuinis.
- 17 Quòd nulla sit, apud sapientem voluptatis auctoritas.
- 18 Quòd alijs, alius sit doctrinæ gustus.
- 19 Quòd periculosius sit Bellum aduersus sapientem, quàm contra exercitum fortem.
- 20 Quòd Ars procreatrix sit omnium scientiarum.
- 21 Quòd virtuti literaria cedat res bellica.
- 22 Quòd exitum in literis inuenire sit difficile.
- 23 Quòd arētissima sit cum virtute societas doctrina.
- 24 Quòd res sit laboriosa doctrina.
- 25 Quòd Doctrinam qui habet, controuersiarum omnium habeat medicinam.
- 26 Quòd solus sapiens sit diues.
- 27 Quòd sapiens pater sit patria.
- 28 Quòd Doctrina supremum honoris gradum sibi vendicat.
- 29 Quòd Nefas sit aduersus viros doctos scire.

QVOD RESPIRARE SINE INTELLIGENTIA non possit imperium. I.

VT Hominum decus est ingenium: ita ingenij lumen est æqui & iniqui intelligentia, qua vniuersa reguntur. Nam sicuti Abies, quæ arborum omnium est pulcherrima, ramis omnibus truncatis, vix relanguescit, solo autem cacumine rescisso, statim moritur: ita imperium, etsi patiens est plurimorum incommodorum; vna tamen rerum intelligentia sublata, quia non est patiens ignorantia, statim intereat oportet. Interrogatus igitur vbi bene viueretur, ibi dixit, vbi non exultat scientia. Non enim qui spirat, sed qui vera, & falsa intelligit, vitam agit hominis. Itaque Arist. solitus est dicere, hoc interesse inter doctos, & indoctos homines, quod interest inter viuos, & mortuos.

QVOD SIN VOSA SIT AD doctrinam via. II.

QVIA ex doctrina virtus, ex virtute felicitas manat humanæ societatis, qui doctrinam deserunt in imperio, non solum videntur principium, & fundamentum communis salutis deserere: sed etiam vulnerare. Sed multæ sunt in doctrinæ campo, errorum flexiones, & diuerticula. consuevit igitur dicere, curiosos in literis facere intelligendo, vt nihil intelligant. quæ enim adfunt negligunt, quæ remota sunt, & retrusa perquirunt. Sic Thales ab Anicula est irrisus, qui cum Astra contempleretur, in Scrobem, cui imminebat incidit: tum inquit illa, an quæ ob oculos habes, non videns, quæ procul absunt potes videre: non minus artis est interdum pauca quædam dediscere: quam multa addiscere.

QVOD

QVOD IMPERIVM PAR SIT

Imperantis doctrina. III.



VI gnarus est veri, & falsi, eorum habet cognitionem, quæ sunt, fuerunt, & futura sunt: sed quia fons, & caput veritatis, post Deum immortalem, est sapientia: solet sapientiam rerum omnium mensuram esse dicere, ex quo solus sapiens nouit imperium, in quo sunt omnia, regere. Quare, & Scipio Africanus Pædiam Cyri, de manibus non ponebat: & Carolus Magnus studia bonorum artium summo exarsit Studio. vterq; imperium magna cumulauit felicitate, ille in armis: hic in literis. Nam Parrhisiense Gymnasium, & Papiense, accersitis, vndiq; doctissimis viris instituit.

QVOD DISSERENDO PARETVR

Doctrina. IV.



VM Scholaris quidam disputantium refugeret circulos, nec adduci posset, vt cum repugnantibus dissereret, facis addiscendo, inquit, dum refugis disputare, vt nihil addiscas. quæ enim vera est doctrina, digladiandi neruis paratur, & viribus. Ideoq; Minerua ab antiquitate fingebatur armata, quia doctrina nullis, nisi acriter disceptantibus sit præda.

QVOD CVM INGENIO CRESCAT,

Et decreascat eruditio. V.



NTelligentia res est, ait, fundo, & fino carens, ex qua tantum hauritur, quanta cuiq; vis, est ingenij. Gordianus igitur Imperator, maiora Imperij

Imperij præsidia posuit in literis, quã in armis. illa enim imperant: hæc imperata faciunt. Quare vsq; adeò literarum fuit studiosus, vt pluris fecerit librorũ, quàm auri, vel argenti Thesaurus. habuit enim in Bibliotheca sexaginta duo millia librorũ.

QVOD FABVLÆ LV MEN FVNDANT,
ad res omnes, ingenij. VI.



ICVTI quæ aperta sunt, atra nocte obscurantur omnia: ita splendore veritatis obscura illuminantur vniuersa. interroganti igitur cuidam qua luce, quæ latet imperij felicitas, esset inuestiganda, veritatis respondit. Lampas veritatis lucet etiam in fabulis omni sole clarius. illæ enim tectis verbis grandia: hic aperta luce, leuissima quæq; etiam illuminat. Nam vt strabo refert, & Græci scriptores omnes testantur, lampades Musarum, sunt fabulæ, quibus restinctis, obscuratur ingenij lumen: fuit enim Ars poetica, omnium disciplinarum antiquissima. Hæc olim docuit quæcumq; ad veritatem, hominumq; mores pertinent. proinde vetres, solos poetas sapientes esse arbitrabantur. illi enim in erudiendo magis fidem faciebant fabulis: quàm Philosophi argumentis.

QVOD AD IMPERANDVM MAXIME sit accommodatus, qui plus sapit. VII.



ANTI literæ apud Ægyptios, sunt habitæ, vt qui rudis esset literarum, vir tantum inter mulieres: mulier verò inter viros haberetur. Quoniam igitur viri est, non mulieris imperare mortalibus. interroganti quid Princeps in armis sibi deberet comparare subsidio: rerum re-

G spondit

spondit intelligentiam. Nam Dux, & Imperator doctrinæ expers, quasi cassus lumine, cæcus cæcos ducit. id Philippus Macedonum Rex cum odoraretur, Nato sibi filio Alexandro, ei felicitatem à magistro Arist. non à Patre rege auspica- tus est, cuius extat Epistola hæc. Philippus Arist. salutem. scito filium mihi genitum esse: qua de re ingentem Dijs habeo gratiam: non adeo quia natus est, quàm quòd Aristotelis, à quo potest erudiri, natus est tempore. spero forè, vt edoctus abs te, dignus fiat regno paterno. Vale.

QVOD PRINCIPI NON MINVS

*Augusta sit sapientum familiaritas, quàm sapien-
tibus Principum, gloriosa, & utilis. VIII.*



VE MADMODYM homo, ratione cæteris præstat animantibus: ita vir doctus eruditione imperitis hominibus antecellit. Quare solitus est dicere, Principi non minus gloriosum esse eruditorum hominum commercium: quam Principum, erudito viro utile. Præclare id loquitur etiã præsens exempli testi- monium. Archelaus. n. Macedonũ Rex, Euripidis familiarita- te vehementer oblectatus est: sed Poeta ab eo rediens, præ ma- leuolorum inuidia, ab eius canibus est laceratus. cuius rei ille dolorem, non solum lugubri veste, sed etiã crine tonso: mu- tisq; propter tã immane scelus, de medio sublatis, demonstrauit.

QVOD PRINCIPES IN PRIMIS

probentur, qui Musarum sunt alumni. IX.



VIA arbor non sua, sed surculi fert poma, inqui- bat pluris esse principem bene educari, quàm ma- gnificè nasci. vix enim perperam agunt Musarum amici:

amici : vix non sapienter alumni. Quare M. Antonius inter Cæsares, singulari exarsit literarum studio. diligenter enim admodum singulas quasq; disciplinas perdidicit, & præcipuè Grammaticen : in qua præceptores latinos habuit Trasium : Aprum : Palæmonem, & Proclum, cui tantum detulit, vt ad consularum vsq; prouexerit.

*QVOD PRINCIPIS GLORIA,
sapientia est depascenda. X.*

QUEM AD MODUM sine cibo, certus est viuentis interitus: ita & ratio sine rerum intelligentia, & honor, sine ratione, suo quasi destitutus pabulo, statim interit. Quocirca consuevit dicere, principis gloriam sapientia esse depascendam: duo ad eam, puero Principi addenda esse calcaria: vnum inscitiae pudorem, alterum doctrinae decus: quorum in utroq; acres sunt aculei, & stimuli. Hi sunt meo quidem iudicio, in principe Historiarum lectione, veluti quadam cote, exacuendi. ex ea enim virtutum omnium exempla depromuntur. Non hebetes, fateor, & statuae, & imagines heroum, ad gloriam habent aculeos: at Historia habet acerrimos. Nam tanto præstat imaginibus, & statuis, quanto corpori præcellit animus.

*QVOD PALLADIS DOCTRINA
Principum sit instructio, & disciplina. XI.*

SCISCITANTI quæ ars, & doctrina esset Principis: non quæ ab Aristotele, aut Platone, sed quæ à Pallade respondit est profecta. ideo enim Pallas

G 2 effingitur

effingitur armata, vt intelligamus sapienter magis, quàm fortiter esse pugnandum. Hac instructus C. Cæsar: Scipio & Fabius Maximus, nihil oppugnauit, quod non expugnauit. doctè id in primo Odyssææ Homerus. Nam quorsum quòd Iupiter vbi ad Æthiopes diuertit, Phœbum inter epulas ad cytharam canere iubet, Gigantæam victoriam? quia, vt hoc patet argumenti testimonio, nullus neq; est, neq; esse debet principibus iucundior, quàm Phæbi, & Musarum sensus. Nam eorum, & concentu, & consensu ad fœlicitatem ducitur virtutum omnium chorus.

*QVOD INTELLIGENTIA EA MAXIMÈ probetur Principis, quæ minimè norit
otiari. XII.*

SE MEN & causa felicitatis, in imperio ars est, & scientia principis. Nam quemadmodum male imperanti infelix est obsequium: ita qui imperanti prudenter, obtemperant, felices redduntur, & beati. Sciscitanti igitur quæ ars laudaretur in Principe: ea dixit, quam, qui possidet Sol nuquam videt dormientem. quo re sponso docuit rerum intelligentiam in Principe parum valere, nisi solers sit, & diligens. Sic Pyrrhus Epirotarum rex laudatur, qui etsi omnes suæ ætatis Imperatores virtute, & gloria anteibat, ita tamen semper publico incubuit commodo, vt per omnem ætatem ab otio semper abhorruerit.

QVOD

QVOD VIR INTELLIGENS EX
aliorum erroribus addiscat quid agen-
dum sit. XIII.

SCISCITANTIBVS aliquando amicis, vbi maxime intelligentes redderentur homines, nullum respondit, viro prudenti locum vacare instructione, & disciplina. fundamentum enim, & radices eruditionis, qui prudens est, habet altiores ferè in stultis, quàm in sapientibus. Nam, vt placet Xenophonti sicuti Oeconomicis; & amici prosunt, & inimici, eò quòd illi honesta amant: hi turpia accusant: ita qui studiosus est, & vigilans, non solum ex bonorum exemplis, sed etiam aliorum erratis fit cruditiôr.

QVOD AD PERFECTAM VITAM
nemo perueniat, nisi doctrina semita. XIV.



QUEMADMODVM translatũ verbum, & significantius, & illustrius est proprio, ita per allegoriam, quæ omni iucunditate est referta, rerum figuræ, venustius, quàm ipsæ res spectantur. Quare, vt olim Ilocrates, ita sapientissimus hic Antistes dicta, ac responsa sua, artis sale aspersit. consuevit igitur dicere eum de- mum artem tenere viuendi, qui calleret Homerum. nec falso. Nam quotsum Homeri, & Ilias, & Odyssæa: illa vitæ, quæ in actione: hæc, quæ in contemplatione consistit, habet figuram: quarum altera mundum cœlestem: altera elementarem est complexa: quorum ex utroq; quæ perfecta est, efflorescit hominis vita.

*QVOD VIRI SIT ERVDITI, QVID
res, tempusq; postulet odorari. XV.*



SOLITVS est dicere stupidi hominis esse, aut ne hominis quidem, quid tempus postulet, non sentire: sapientis verò tantum, nosce tempori parere. id ipsum veteres, vt docerent, Echinum sapientis fecerunt symbolum. Nam sola hæc animans momenta obseruat temporum: quæ, quoniam alia, alio sunt momento, iccirco sapientis est mutare consilium. illa autem animans duo latibuli extruit orificia, vnum Boreæ, alterum austro expositum. Borea igitur spirante, ei quod est expositum occludit, referat alterum: & contra Austro ingruente, pandit boreale, altero clauso.

*QVOD VIR DOCTVS, QVÆ SVNT
diuina sentit in humanis, & quæ sunt huma-
na, in diuinis. XVI.*



XORBET qui doctrina bene est munitus, omnes difficultates. inquebat non esse sapientem Reip. administratorem, qui aut cælum, dum terræ inhiaret, negliget: aut terram despiceret, dum cælo animum intenderet. Nam male consulit Reip. qui vni parti efficit, vt prosit alteri. cum igitur nihil sit resp. nisi veluti quædam hominum societas cum Deo constricta: qui bonus est reip. administrator, ex Deo, & homine fædus inire debet summæ beneuolentiæ: atq; res humanas cum diuinis arctissimo honestatis vinculo constringere. Testes sunt Ægyptij. Nam cur Gryphem fecerunt Apollinis Hieroglyphicum? quia certè quidem imperatrix rerum omnium, quæ, & in cælo,

in cœlo, & in terris dominatur, rerum est intelligentia, quam qui habet, Dei lumen ad rerum omnium Imperium habet. Hoc bellè per Gryphem veteres. Hæc enim animans, quia ex Aquilæ ceruice, & Leonis corpore constat, quarum altera sacra est Iuouis, alter Herculi: falsè videtur vtrumq; ius, quo vniuersum regitur imperium, figurare.

*QVOD NULLA SIT APVD
sapientem voluptatis auctoritas. XVII.*



VEMADMODVM minus lumen, maior hebescit lumine: nec splendor vllus est Lychni, in aperto sole: ita in sapientiæ iucunditate, sensus omnis relanguescit voluptatis. solet igitur viros sapientes, non mortales, sed cum Platone, mortiferos nominare, eò quòd quasi mortem ferentes, viuant in mortuo corpore. Hæc quippe, si sapientum auctoritatem consulimus, vis est sapientiæ. Testis est Poetarū auctoritas. Nam quorsum apud eos Gorgones illæ? volebant sapientiam suo effingere colore. Nam vt qui Gorgones ceruebant in lapides verrebantur: ita qui lumen habent sapientiæ, non magis quàm lapides ipsi, irritari videntur vllò voluptatis lenocinio.

*QVOD ALIIS ALIVS SIT
Doctrina gustus. XVIII.*



ICEBAT aliū à natura, ad aliam disciplinam esse natum. Nec falso. frustra enim nititur vis agentis, patiente indisposito. hoc falsè veteres. Nam cur mulieres verabantur olim Herculis lacris interesse? quia cum mulierum callidissima, inter

viros sit frigidissima, non est ad doctrinam nata: quo fit, ut ei interclusa sit ad Heroicam gloriam ipsa virtutis semita.

QVOD PERICVLOSIVS SIT BELLVM
aduersus sapientem quàm contra exercitum
fortem. XIX.



VERTATIS materiam tollunt: vel ansam potius præbent in dicendo ariditatis, qui ad sapientiæ commendationem, dicta Heroum non regunt. interroganti igitur quodnā omnium difficillimum esset bellum. non cui hostium obstat respondit, aut naualis, aut terrestris apparatus: sed iudicium & sapientia. ita Philippus Macedonum Rex, negorij plus habuit cum vno Demosthene, quàm cum vniuersa Græcia. quid? vetus est temporum Auctoritas. Nam cur Hercules vicit Leonem Nemæum? ut hoc argumento cognosceremus intelligentiā non robori: sed robur, in conflictu cedere intelligentiæ. Hercules enim Iouis cum sit filius, sapientiæ habet interpretationem: Leo autem Bestiarum Rex, virium, quæ sensu, & robore: non consilio ducuntur. In his veterum commentis forma, atq; ut ita dicam, facies quædam cernitur veritatis.


QVOD ARS PROCREATRIX
sit scientiarum. XX.



INTERROGANTI quæ brevis, & compendiarie esset ad doctrinam via: ea respondit, qua ducit ars. est enim sine arte, ad scientias proficiscentibus omnis interclusus aditus. Nō vulgare est Antiquitatis testimonium. Etenim quorsum, quod Iupiter dicitur abfor-

absorbuisse, & postea Mineruam è capite peperisse? ^{BOUAN} interpretationem habet artis: Minerua doctrinæ, quorum inter utramq; hoc interesse videtur, quod interest inter sobolem, & parentem. Nam ut ratio artem, sic ars doctrinam parit: fitq; iccirco, ut ars naturam: doctrina artem imitetur.

*QVOD VIRTVTI LITERARIÆ
cedat res bellica. XXI.*



SCISCITANTI quid omni militum robore esset validius, res dixit literaria. gravis certè, & cum exitu doctrinæ responsio. Nam si antiquitatem velimus regustare, cur doctrinæ Dea Palas est vocata? ut cum Pallantem virum procerem, & robustissimum interfecit, hoc vno vocis testimonio intelligamus nullam vim, posse reniti doctrinæ. Nihil igitur est validius docto viro, qui nunquam minus est solus, quàm cum est solus. habet enim eos secum omnes, qui sunt, & qui fuerunt, nec eorum consilium solum, sed etiam errata adiumento habet.

*QVOD EXITVM IN LITERIS
inuenire sit difficile. XXII.*



TEMPORVM verustas, ne in commentando censeretur hebetior, numquam à commentatione artis, & ingenij est feriata. Hac oblectatus, solet dicere, literarum studium esse sine exitu. finis enim vnus scientiæ: Principum est futuræ. hoc falsè veteres. Etenim quare Musæ ab Apolline, in gyrum sic ducuntur, ut altera, alteram teneat? quia ars artem vehit, doctrina doctrinam

doctrinam: omnes vero Musæ in hoc vno consentiunt, quòd montes incolunt, & nemora. Viri enim docti solitudine potius gaudent: quàm hominum turba, & consuetudine.

*QVOD ARCTISSIMA SIT CVM
Virtute societas doctrina. XXIII.*

SOLET inter doctos virum bonum, & inter bonos viros, doctum in primis probandum esse dicere. eò quòd probitas sine doctrina veluti quædam videatur fatuitas: & doctrina, sine probitate, infamia. tanta igitur est viriusq; virtutis affinitas, vt vna Deo placere vix possit, sine altera. Salse id veteres, qui Nectare, & Ambrosia cibos definiebant Deorum. Nectar enim apud Platonem, virtutis habet significationem: doctrinæ Ambrosia: qua vtraq; diuina voluntas, quasi Deus est depascenda. hoc ipsum loquuntur Musæ. Nam cur natæ censentur esse ex Ioue, & memoria? vt cum cœlestis sit doctrina, nihil minus sit, quàm docti viri curare terrena.

*QVOD RES SIT LABORIOSA
Doctrina. XXIV.*

QVONIAM plurimis difficultatibus circumsepta tenetur omnis doctrina, solet dicere ignavis, ad doctrinam nullum patere aditum. bellè id suis commentis docuerunt Poetæ. Nam cur fingunt Palladem natam esse ex patre, sine matre? vt hoc certe commento ostenderent doctrinam non ex voluptate, qua capiuntur mulieres: sed ex plurimo labore, quo viri vitam agunt, nasci.

nasci. Neq; alia de causa Palladi templi. apud Græcos in altissimis erigebantur arcibus, nisi vt docerent scientiam in arduo, & difficili loco esse sitam: nec in vllis, nisi in magnis, & elatis habitare animis. Quod si tamen rei difficultas, cum vtilitatis conferatur magnitudine: multò censetur vtilior, quàm difficilis. Etenim cur Pallas dicitur oleum inuenisse? non adeo, quia artes omnes oleo, & lucubrationibus ad sapientiam attingendam indigent: quàm quòd sapientia veluti oleum, medicinam habet malorum omnium.

*QVOD DOCTRINAM QVI HABET,
controuersiarum omnium habeat medi-
cinam. XXV.*



NOVIEBAT non esse fortunati, sed docti viri, vbi in discordiæ flammam incidisset: controuersiarum incendium, ac belli faces omnes restinguere. ita enim natura comparatum, est vt imperiti omnes, morem gerant peritioribus. graue, & elegans est antiquitatis testimonium. curenim Phœbo Cithara, & plectrum ab antiquitate traditur? quia certè quidem docti viri est, absque omnia in imperio, sic in ordinem, & concordiam redigere, vt rationi consonent, & legibus.

*QVOD SOLVS SAPIENS SIT
Dives. XXVI.*



VM rebus utimur secundis, nec aduersis affligimur, errata etiam videntur ornamenta ingenij. at quæ vera est laus, illa non in externis: sed in inuitis bonis, consistit. Quare diuites dicebat viros esse eos, non qui bona

bona possiderent, sed qui essent boni. Etenim cur ab Orpheo Pallas dicitur, mas simul, & fœmina? ut censeatur sapiens, nullius esse indigens: nihilq; esse in humano genere, tam optabile, quod in sapiente viro, videatur desiderari posse.

*QVOD SAPIENS PATER
sit patria. XXVII.*



DOCTOS viros alio nomine Prometheos vocabat. hoc est hominum opifices, & architectos. Nihil enim est ignis Promethei, ut ait Plato, nisi doctrina: qua remota, ex homine truncus, & addita è trunco redditur homo. Etenim nihil est, ad mortaliū mores formandos, neq; gloriosius, neq; admirabilius doctrina. Nam quorsum apud Poetas, qui nullum florem non sequuntur doctrinæ, & ingenij, virga illa, cuius ex altero capite ictum recipientes, in bestias mutabantur Vlyssis Socij: & rursus è belluis, in viros redibant, ex alterius ictu? hæc est doctrinæ vis, & iustitiæ, cuius duo sunt extrema: Supplicium, & præmium: quorum altero homines ad bestias: altero à bestijs ad homines reuocantur, utroq; enim fit, ut aberrantes in viam redeant, ac demum errata instauratione corrigant.

*QVOD DOCTRINA SVPRÆMIUM,
in honore, gradum sibi vendicet. XXVIII.*



QVONIAM singulare bonum est, in doctrina: dicebat doctrinæ nullum honorem, nisi qui sublimis, & elatus est, satis respondere. Nec est quòd quemquàm in dignitate, mordeat hæc responsio. asseueravit enim id ipsum, graui argumento Alexander

der Macedonum Rex, multis ante seculis. Nam post Darium praelio victum: scrinium in regia præda ex auro, & gemmis fabricatum ubi comperit, veluti quoddam artis, & opulentiae sacrarium, sciscitantibus amicis equis esset tam pretiosi operis futurum opus: longè dixit magis præciosa, in eo inclusa tenebo, Homerumq; in eo clausit: dignus ipse, qui talem nancisceretur, qualem Nactus est Æacides, præconem.

QVOD NEFAS SIT, ADVERSVS
Viros doctos scire. XXIX.



ON est fabula hæc futilis, & inanis, sed veluti quoddam flabellum veritatis: Vulcanum, quia Mineræ vim inferre voluit, non solum deturbatum esse de cælo, sed eum impietatis suæ, per singulos gratos claudicando admoueri. Solebat autem dicere Mineruam non solum Marte robustiorem, sed etiam omni Venere esse amabiliorem. illud multis docuit monumentis: hoc probat etiam Alexander Macedonum Rex. Nam Thebis bello captis, cum urbis excidio communis omnium strages immineret, statim edixit, ut à Pindari Penatibus, & eius familia, omnis vis bellica abstineretur. omnia enim bona vna eruditio, dignitate exæquat: quæ non solum hominum iura, sed etiam Dei religionem est complexa.



DE MEMORIA TITVLVS SEPTIMVS.



QVONIAM omnis rerum disciplina ex memoria constat, non possum quem video plurimarum, maximarumq; scientiarum cognitione florere, non ei summam memoriam laudem tribuere. Nec falso id quidem. probat autem id ipsum sui ordinis decus, & ornamentum grauissimo sui exemplo Admodum Reu. D. MATTHIAS Guarguantus Soncinas, Theologus, & Sacrosanctæ Theologiæ interpres præstantissimus. Nam quemadmodum in nulla artium, & scientiarum regione hospes est, & peregrinus: ita etiam eo memoriæ locupletatus est thesauro, ut de re grauissima quaq; possit aptè, distincte & ornatè ex tempore dicere. Nec id, quoniam per omnes scientiarum regiones peragravit: sed quoniam sui, ut est, in oraculo Delphico, habet cognitionem. Nam, cum homo sit Dei templum: atq; vniuersi domicilium: is demum vnus est, quem nihil subterfugit, qui sui habet cognitionem. Cardinalem autem is ALDOBRANDINVM semper ab ineunte ætate, commendauit ingerij acie, & memoria: altera, quia plura semper intellexit, quæ quæ à magistris accepit: altera, quia sic vniuersa, quæ aut didicit, Aut lectitauit retinet, ut animata iam habeatur Bibliotheca, ex quo nunquam fuit coniectura difficilis, illum natum esse ad imperandum. Quos enim Deus ad imperium euexit, ij ferè omnes admirabili claruerunt memoria. testis est, ut ab aliorum infinitate recedam, Cyrus Rex: Mithridates: Themistocles, ac deniq; apud Romanos Iulius Cæsar, qui ut scribit Plinius, conlucuit eodem tempore legere, dictare, & audire simul. de memoria igitur, quæ ex tanto Antistite colligimus, hæc sunt.

Quod

- 1 *Quod Magistra sit rerum omnium memoria.*
- 2 *Qualis in addiscente requiratur memoria.*
- 3 *Quod nulla sit maior, quàm sui memoria.*
- 4 *Quod nihil sit ad rem literariam accommodatius memoria.*
- 5 *Quod in Principe laudatur potissimum memoria.*

QVOD MAGISTRA SIT RERVM
Omnium memoria. I.



DVRI est hominis, vel potius vix hominis, in ignorantia dedecore, morsus non sentire infamiae. interrogatus igitur quænam optima esset sapientiae schola, memoria dixit. Hæc enim non solum magistra, sed etiam mater ab antiquis constituitur Musarum. Quia, ut inquit cœlestis ille, & diuinus Plato, nihil aliud est scire, quàm reminisci. Quare ut scientia virtutum: ita memoria, anima est scientiarum omnium. nihil quippe est doctrina, nisi disciplinæ memoria. Quare vna cum memoria, cadat simul omnis ars oportet, & doctrina. ingenio ad percipiendum, memoria ad retinendum magis utimur. ingenij verò acumen cum memoriæ tenacitate, quia fiunt ex contrarijs causis: raro simul inueniuntur. Testis est Bartolus summus I.C. qui singulari fuit ingenio: memoria fluxa, & caduca.


QVALIS IN ADDISCENTE
requiratur memoria. II.



SICVTI miser famulatus est, seruientis voluptati: ita intelix est disciplina addiscentis, sine memoria. Sciscitantibus igitur amicis, qualis in addiscente deberet esse memoria, quale respondit in Apol-

in Apollinis simulacro olim fuit tricipitium: Vnum enim erat lupi, ad rapacitatem: alterum Leonis, ad tenacitatem; tertium canis, ad fidelitatem. ea enim demum probatur memoriæ vis, quæ sua rapacitate statim omnia deuorat: & diu firma quadam retinet tenacitate, quæ rapuit: quæq; deniq; vsq; adeo sit fida, vt minimè fallat sibi fidentem.

*QVOD NULLA SIT MAIOR
quàm sui memoria. III.*

VM quendam, de memoria comparanda, multi vrgerent solitudinum aculei, & scrupuli, interrogaretq; cuiusnam maximè probaret memoriam. Non Mithridatis dixit, qui duarum, & viginti gentium linguas percalluit: nō Themistoclis, qui recordabatur etiā, quæ noller: quæ vellet non posset obliuisci: non Cyri Regis, qui nomina cunctorum militum in exercitu tenebat: Non deniq; Senecæ, quæ in prodigium vsq; eò processit, vt duo millia nominum recitara, quo ordine erant dicta, referebat. Sed eius, in primis memoriam dixit se probare, qui sui nunquam caperetur obliuione. Sapienter ille quidem. Nam qui sui est memor, cum homo sit Μικρόσμοτος, plurium rerum, quàm illi simul omnes, videtur recordari.

QVOD NIHIL SIT AD REM LITERARIAM accomodatius Memoria. IV.



VONIAM acrius tenentur turpia, quàm honesta: iccirco illa nunquàm in publicum sunt admittenda: hæc semper inculcanda. scholas igitur, virtutis ædes nominabat, quas à iuuenibus

bus frequentari volebat. at interrogatus quem ad literas, vt maximè idoneum, potissimum probaret. Laudo inquit Heraclitum, qui tantum valuit ingenio, vt nunquam egerit præceptore: Democritum amo, qui recundita sic intellexerit, vt quæ ab alis acciperet, redderet meliora: solum Hortensium facio ad rem literariam, præter omnes fuisse idoneum. Hic autem, vt refert Cic. tanta fuit memoria, vt quæ secum commemoratus esset, ea sine scripto verbis iisdem redderet, quibus agitaſſet.


QVOD IN PRINCIPE LAUDETUR

potissimum memoria.

V.



TENENDA est imperanti antiquitas, & exemplorum vis. Quare nonnullis sciscitantibus, qui optimi essent publicæ societatis administratores: qui respondit plurimarum étatum pollent memoria. Hæc enim Reges, ac Principes plurimum commendat, ita ALEXANDER Farnesius, apud Belgas commendatur: qui plurimarum ét nationum linguas, ex quibus exercitum constabat, adeo callebat, vt singularum oratores palam audiret, & responsum sine interprete, suo quibusq; sermone secorsum redderet.



H D E


DE IUSTITIA

TITVLVS OCTAVVS.



QUAMVIS ætas longa effluxerint, minimum tamen vixisse videtur is, qui parum iustè vixerit. Nam ars viuendi, sola est iustitia, qua detracta mortales spirare tantum videntur, non etiam viuere. Quare ijs qui anhelant viuere, nihil præter iustum est faciendum. Quæ enim vita est humana, non tempore: sed virtute est definienda. Etenim hæc eius operatio est, non sentire cum belluis: non vegetare cū plantis: sed recundita intelligere: iusta operari: & quæ vera sunt loqui. in quorum anfractu, & gyro virtus omnis tenetur inclusa. Iustitiam verò cū omnium sit tueri, & defendere: tum maximè interest Principis. quid ita? quia Imperium reddit maximè diuturnum, & pacatum. Etenim iure agere volentibus, non opus est armis. Nec apud bonos iudices, magnopere opus est diserto patrono. Nam iustitia facile exorat, quod cum difficultate patronus videtur orare. quid? pro iustis non est orandum: nec pro iniustis exorandum. Themistocles igitur Simonidi petenti, vt iniustam causam diceret. Neq; tu inquit, bonus Poeta fueris, si præter Musicæ medulos: neq; ego princeps bonus, si contra leges pronunciem. Eam autem laudo in primis iustitiam, quam video in GALEATIO Vicecomite Senatore residere, hoc est quæ habeat sapientiæ lumen: vim eloquentiæ, & artem imperandi. Sapiens autem debet esse, non solum iustus, iudex: quia Dei immortalis personā induit, quo nihil est sapientius. Nec par est, vt qui alios regat, sit indifertus. Nam vt præco mutus: sic est magister populi ab eloquentia nudus.

Nec



Nec iustitia tantum, sed etiam ars quædam requiritur iustitiæ administrandæ. Etenim ut mali medici corpora: sic imperiti reip. administratores, concordiæ vincula dissolunt, atq; iura occidunt. Hæc sunt quæ tanti Senatoris iustitia, & in Senatu Mediolani, & in Ticinensi prætura, continenter spiravit. qui urbem moribus collapsam, non solum restituit: sed etiam tanta virtute honestavit, ut nihil magis, quàm prætoris pietatem, prudentiam, & integritatem videatur olere. Iustitia quippe, ut docet tantus Antistes, non solum est ars vicendi, sed etiam omnium rerum possidendarum scientia. Hoc autè iure quis possidet, quod benè institeq; possidet. Male autem possidet, qui male vitur. ergo malè vitens rebus, non est rerum proprietarius. Nihil enim est aliud iustitia, quàm non peccare: nihil est autem non peccare, nisi legis præcepta servare. Quare iustitia omnis in agendo, & abstinendo consistit, eò quòd honesta præcipiantur, vetantur contraria. Sed venio ad Apophthegmata, quorum series, & numerus hic est.

- 1 Quòd fundamentum, ac firmamentum imperij sit iustitia.
- 2 Quòd Ars vivendi sit iustitia.
- 3 Quòd Imperij felicitas manat ex Principis iustitia.
- 4 Quòd iustitia decus sit Aequitas.
- 5 Quòd Ars Imperandi sit iustitia.
- 6 Quòd utilissima virtutum omnium sit Iustitia. (Iustitia)
- 7 Quòd nulla Imperij Ars adversus omnia mala sit firmior, quàm iustitia.
- 8 Quòd iuris scientia in actione magis, quàm in cognitione consistit.
- 9 Quòd sola Iustitia novit malis bene vit.
- 10 Quòd Iustitia aequè teneantur Imperantis obsequio, atq; Imperio.
- 11 Quòd Iustitia, ars sit tempestatum, & discordias tollendi.
- 12 Quòd Iniquus sit a Iustitia recedens, qui nunquàm iustitià attigisse.
- 13 Quòd Iustitia dei magis, quàm hominis sit virtus.


- 14 Quòd Iustitia mentem, Voluntatē, & conatus hominū perficiat.
- 15 Quòd Iusti sit iudicis abis, non alios consulere.
- 16 Quòd nihil neq; deo, neq; hominibus gratus sit iustitia.
- 17 Quòd iustus iudex improbos non damnat, sine dolore.
- 18 Quòd nulla est aurium: plurima oculorū apud Iudicē auctoritas.
- 19 Quòd qualis sit Iudex, tale sit iudicium.
- 20 Quòd solus vir iustus norit sustinere, & abstinere.
- 21 Quòd semper addere, numquam demere soleat Iustitia.
- 22 Quòd constans sit Iustitia.
- 23 Quòd apud virum iustum, nullum sit discrimen personarum.
- 24 Quòd Lex eadem voce omnes alloquatur.
- 25 Quòd Iustitia in Imperio lumen, aut Numen potius habeat feli-
- 26 Quòd nihil sit aquabilius iustitia. (citatis.)
- 27 Quòd pana magis, quàm pramio seruetur Iustitia.
- 28 Quòd virtutum omnium columna, sit Iustitia.
- 29 Quòd vir iustus forti sit ante ponendus.
- 30 Quòd Iustitia calum, & terram sua compleat gloria.
- 31 Quòd nulla Principis auctoritas debeat extra fines euagari Iustitia.

QVOD FVNDAMENTVM, AC
Firmamentum Imperij sit Iustitia. I.



ATIONIS auctoritate, & veritatis testimonio adductus, solitus est dicere: neq; iustitiam multum, sine principis auctoritate, & auctoritatem principis, sine iustitia minimum valere. Etenim nihil est iustitia, si fidem modo habemus antiquis, nisi vis, & robur Atlantis, quo mundum, hoc est imperij globum suis sustentabat humeris. Quare qui princeps dat operam, vt ex æquo, & bono, suum quisq; teneat, omniq; diligentia, & studio

dio curat, ut ciuitas, moribus, industria, facultatibus augeatur, is certe omni administrationis gloria dignus est. Hoc olim qui præstiterunt, quia sapere plus, quàm fert natura hominibus videbantur: eos antiquitas Semideos appellabat.

*QVOD ARS VIVENDI SIT**Iustitia. II.*

QVI vir iustus est, nunquàm nisi alienissimo reip. tempore moritur. Nam eius vita multorum est instructio, & disciplina. Verùm cum alij, aliò intenti uiuant, interroganti cuidam quomodo omnibus esset viuendum. iustè respondit. Sola enim iustitia, ars est & viuendi, & vincendi. laudatur itaq; Camillus dictator Romanus, pro remisso pedagogo virgis, ab ijs pueris cæso, quos secum transfuga, in castra hostium duxerat. Et iure laudatur. Nam Phalaris, quos vi expugnare non poterat, iustitia & clementia postquàm instruxit, nullo deinceps negotio, in suam ditionem accepit. fit enim pugna ad propugnandam, non euertendam iustitiam.

*QVOD IMPERII FELICITAS**manat ex Principis Iustitia. III.*

ACULEATUS sermo, si sale modo aspersus sit ingenij, magis oblectat, quàm mordet. Cum igitur Gallorum proceres, nescio quàm auram aucuparentur gloriæ, ex Regni amplitudine: atq; iccirco interrogarent, quodnam regnum maximè laudaret, iusti respondit Regis. Aculeus hic plenus ingenij, & amoris, neminem adeo oblectauit, quàm quem momordit. atq; cum animatum ius sit Rex, & iustitia spirans, publicæ felicitatis

sons, & caput bonorum omnium pariter sit oportet. Nam, ut Academici veteres, & Peripatetici affirmant alienum bonum est iustitia. Iustus igitur Princeps priuata commoda publicæ utilitati habet postposita: mauultq; populi salutem sine vita, quàm vitam siue eius salutem.

QVOD IUSTITIÆ DECUS SIT
Æquitas Principis. IV.


DICEBAT iustitiam eam facile iniuriæ exulcerari vulnere, quæ à Principe nulla adiumenta caperet æquitatis. Nam ut ait Ennius summum ius, summa est iniuria. Quocirca Princeps qui æquitate nritur, quia; in Iudicijs, æquitas principis amabilior est iure, leges non dirimit, sed singulari commendat pietati, & beneuolentiæ.

QVOD ARS IMPERANDI
est Iustitia. V.

VIA Reip. splendorem nullis maculis potest aspergere, qui iustè imperat, artem omnem imperandi, vna definiebat iustitia, quod ipsum quasi Asseuerans Democritus, consuevit dicere duo esse in sinu iustitiæ numina, quæ cuncta gubernarent, præmium scilicet, & pœnam. Nec falso; Nam duabus his rebus, ut fert vetus Solonis sententiâ, resp. omnis sustinetur.

QVOD

QVOD UTILISSIMA VIRTVTVM
omnium sit Iustitia. VI.



IST publicæ utilitatis alumna iustitia, cuius nisi succus, & sanguis vigeat in imperio: adulterinus color est imperij, pigmentis collustratus. Sciscitanti igitur, quis iuste clauum teneret imperij: qui nemini respondit, nocet: prodest verò omnibus. grauis verò sententia; qua quod vulgus Philosophorum inculcar, retunditur, qui solam iustitiam, inter omnes virtutes, asserunt esse alienum bonum. Nam iustitiæ nomine continetur ius etiam naturale, quo cautum est, vt quisq; sibi melius, quàm alteri cupiat esse.

QVOD NULLA IMPERII ARX,
aduersus omnia mala, sit firmitior quàm
Iustitia. VII.



IACES malorum omnium vincit iucunditate bonitatis, iustitia. Itaq; felix est ea ciuitas, quæ in officina, conflata est iustitiæ. Interroganti igitur cuidam, quæ mænia essent munitissima imperij: quorum ait ex claustris vis omnis pellitur, & iniuria: at quæ illa essent, cum interrogaretur, iura esse dixit. quo responso impetum omnem armorum, rei literariæ voluit succumbere. Nec temerè. Testes sunt inclitæ illæ Lycurgi leges: quibus quamdiu obtemperarunt Spartani, maximi omnium Græcorum extiterunt: vbi verò eas abrogari permisissent: statim eorum corruit imperium: omniq; libertate enudati, ijs paruerunt, quibus ante Imperarant.

QVOD IVRIS SCIENTIA IN

*Actione magis, quàm in cognitione
consistat. VIII.*



ARIDA est, & spinosa iustitiæ disciplina, quæ verbis funditur à Principe, sine testimonio vitæ. Itaq; interrogantibus amicis, quem inter Principes, maxime iustum esse existimaret principem: cum dixit, qui potius vitæ exemplo populum, quàm vocis testimonio instrueret. Populus enim ad sui disciplinam, acrem habet sensum oculorum: aurium hebetem. Quare optimè, ut testatur Diodorus Siculus, se gubernare putabant Egyptiaci Reges, si parendo legibus, populum potius excitarent sua virtute, quàm legum auctoritate.

QVOD SOLA IUSTITIA NOVIT

malis bene vii.

IX.



INQVIEBAT non rumoris aura afflatum esse, sed sapientissimorum iudicio inculcarum, bonas leges, ex malis ortas esse moribus: ut hoc putato, te statum apud omnes relinqueret, nihil tam tetrum esse, & immane, ex quo aliquid fas non esset haurire commodi. apertè ille: occultè id ipsum, sed falsè Anacharsis. Nam quorsum, quòd diceret leges Arancarum telis esse simillimas? habet res non minimum ingenij: Plurimum doctrinæ. Nam sicuti illæ texuntur telæ, ex veneno Arancarum: quæ tamen medicinam habent veneni: ita lex, etsi ex hominum peccato originem trahit, remedium tamen parit peccati.


QVOD IVSTITIA AEQVE TENEATUR
Imperantis obsequio, atq; imperio. X.



INTERROGANTI quis, inter principes, maximè iustus esset: qui respondit, nullas leges populo præscribit, quibus ipse parere recusarit. Sic Lycurgus nihil alijs edixit, quod non ante ipse seruavit. Hinc æquissimum illud Romani Prætoris edictum.

Quod quisq; ius in alterum statuerit, ipse eodem quoq; iure utatur. quorsum? Hic demum nouit alijs imperare; non qui codicem deuorauit, sed qui Epicteti Philosophi dicto parere didicit. Hic enim duobus his verbis, leges omnes fere clausit. ἀρεχθ, καὶ ἀπειχθ hoc est, sustine, & abstine.

QVOD IVSTITIA ARS SIT
Tempestates, & discordias Tollendi. XI.



SOLITVS est dicere vnam esse, in controuersiarum procellis, & tempestatibus, discordiarum medicinam, iustitiam. Nam vt morbi incolumitas: sic iniuriæ iustitia, summum est remedium, & medicina. Hoc Poetarum fabulæ, præclaris lineamentis, nec inanibus verborum floribus. Etenim cur Æolus fingitur apud eos, imperare ventis? vt hoc certe significarent, virum iustum in tractando imperij clauo, nullis perturbationum tempestatibus cedere, sed imperare. est enim iustitia Æoli ars, & scientia, quam qui habet, non solum, in aduersa tempestate nouit nauigare, sed etiam enauigare.

QVOD INIQVIVS SIT A IVSTITIA
recedere, quàm nunquàm Iustitiam attigisse. XII.



VONIAM qui liquefcunt voluptate, fluntq; mollitia, difficile poffunt, vbi in viam redierint, iter infiftere iuftitiæ: dicebat grauius eos, qui à via defleunt, quàm qui illam nunquàm attigerunt peccare. Vetus eft Magorum Ænigma: non afpiciendum eſſe retro. hoc ipſum ſapit Pythagoræ prouerbium. per eandem viam, ne reuertitor. quorſum? non eſt flagitiſis, poſtquam reſpuerint, redeundum ad vomitum. Nam vt grauius ægrotant, qui de integro in morbum incidunt: quàm qui eò nunquàm ſunt liberati: ita qui ad virtutem acceſſerunt, periculoſius illam deſerunt, quàm qui eam nunquàm attigerunt. Hùc pertinet Orphei fabula: qui retro reſpiciens, non ſolum Euridicen iterum amiſit: ſed etiam ſpem recuperandi.

QVOD IVSTITIA DEI MAGIS,
quàm hominis ſit virtus. XIII.



S eſt ſapientiſſimus ille Antifteſ, qui ſatieta-tem aurium vincit ſuaui- tate orationis: ſuaui- tatem magnitudine vilitatis. ſolet igitur, ne longè abeam, Iuſtitiam Dei immortalis, bonorum diſciplinam eſſe dicere. quod ipſa antiquitas maximè videtur comprobare. Nam cur Ioui Temp- la olim erigebantur re- cto perforato? vt hoc ipſum docerent veteres: virtutem Iouis hoc eſt Iuſtitiam, nò à mortalibus, ſed de cælo eſſe petendam. eſt igitur Iuſtitia virtutum omnium regina: Cæteræ verò vir-

tutes iustitiæ comites, & pedissequæ: quarum corona cincta tenetur, & stipata. nihil ab antiquis recedo. quorsum enim solis Ædes, apud Romanos rotunda, nisi quod circulari virtute hoc est omnium corona tenetur circumsepta? Hæc Regibus dignitatem: infimis gratiam parit: nec solum ansam supplicibus porrigit orandi, sed etiam necessitatem exorandi.

*QVOD IVSTITIA MENTEM:
voluntatem, & conatus hominum perficiat.*
XIV.

IVSTITIAM dicebat iccirco Prudentiæ: Temperantiæ, & Fortitudini anteponendam: quod prima mentem: alteram appetitum: vltima conatus: iustitia verò hæc omnia simul perficiat. Nec debilis, aut fluxa est ratio. Nam cur Plato, in Dialogo vndecimo de legibus affirmavit, à tribus dijs prodire artes imperij omnes, id est à Vulcano, Pallade, & Marte? quia Hæc est iustitiæ trinitas, quæ Ioui semper assistit. Pallas enim scientiæ: Vulcanus voluntatis, Mars potentiæ habet interpretationem: quarum si desideratur aliqua, nihil est, quod iustum, in dictis factisque possit probari. Pallas quippe ducis: Mars Artificis: Vulcanus ministri, in humana ratione personam induit: quorum omniū instructio, & disciplina vna est iustitia.

*QVOD IVSTI SIT IUDICIS ALIIS
non alios consulere.*
XV.

VI nouit veterum Historias, aut fabulas, nouit item dubitationum scrupulos, ex mortalium animis omnino abstergere. Dubitanti quales esse deberent iudices

dices, Dixit prauos eos esse iudices, qui iustitiam sensu defini-
rent aurium. Lutulentum quippè est, quod in eius sensus for-
dibus volutatur iudicium. Testes sunt Cretenses, apud quos
Iudicis effingebatur simulacrum, auribus destitutum. quid ita?
quia, cùm aures sint disciplinæ satellites, hoc monumento do-
cebant, non esse iudicis, ab alijs disciplinam haurire iudican-
di: sed pleno ore firmamentum fundere iudicij.

*QVOD NIHIL NEQ. DEO, NEQ.
Hominibus gratus sit Iustitia. XVI.*



CUM de multis, ac varijs imperandi adminiculis
oratio incidisset, dixit aridam, & spinosam om-
nem esse, sine iure reip. administrationem: sine
iustitia, infauſtam & infelicem. Nam cùm hoc
inoleuit malum, vt quæ Deo placeant, ea ferè displiceant ho-
minibus: & contra nihil gratum sit hominum generi, quod
non graue, & acerbum sit Deo immortalis: sola iustitia Deo
ſimul placet, & hominibus. Quare Iustitia lux est orbis ter-
rarum, arx omnium gentium: atq; Dei immortalis ornamen-
tum. Etenim cur Themis Dea, vt in Theogonia ait Hefio-
dus, Iouis coniuux eſſe cenſetur? Themis, ſas ſiue iustitia in-
terprætatur, ab Orpheo Ὀρφεύς, eſt cognominata. hoc eſt
cœli filia. ex ea natæ ſunt in primis Æquitas, lex, & pax. *ſas*
autem apud Græcos ſas ſignificat. Hac à Superis iudi-
cantur homines: Hac ab ipsis hominibus
ſoluuntur rerum ciuiliū
fora.

QVOD

QVOD IVSTVS INDEX IMPROBOS
non damnat sine dolore. XVII.



CVIDAM interdum interroganti, quid iudici in re capitali, & litigiosa maximè esset molestum, non aculei responder, tabularum aut offensionis suspicio: sed homo cum sit, hominem perdere. Quia enim dolet, iniurius iudicat: & quia iudex constituitur iustitiæ causa: non iustitia gratia iudicis, lubens item iudicat. Nam commiserationis fundamentum simul, & vindictæ una est iustitia. quæ enim naturalis est iustitia, ad commiserationem: quæ verò est legalis, ad vindictam magis exacuit iudicem. id bellè in Symbolis, Crocodili imago, cum verbis plorat, & deuorat. Etenim neq; vt clemens potest non dolenter neq; vt iudex non lubens, aduersus reum capitis, ius dicere.

QVOD NULLA EST AVRIVM;
plurima oculorum apud Iudicem auctoritas. XVIII.



DOCTRINA iuris, & iustitiæ exacuitur sapientiæ subtilitate, & ingenij. Cum tabularum turba aliquando obstreperet iudici, dixit sensum aurium in iudice hebescere: vigere autem in primis oculorum. non vulgaris est, apud Græcos auctoritas. Nam cur Iouis statua spectabatur in area subdiali, ad quam Priamus aufugit, in Troiæ excidio, quæ esset sine auribus, haberetq; in fronte oculos tres? vt cum censeatur Iupiter esse exemplar iuris, & iustitiæ, atq; supremus iudex, admonerentur mortales, non esse iudicis obloquentium calumpnijs aures: sed

sed oculos legibus habere apertos: quæ numerantur tres in-
tueri, & examinare, quarum vnâ est ab ipso rerum Impe-
rare Deo, Diuina: altera ab ipsa rerum procreatrice, natura-
lis: tertia à Principe, qui obses est iustitiæ simul, & æquitatis,
ciuilis.

QVOD QVALIS SIT IVDEX
tale sit Iudicium. XIX.



ICEBAT facile esse sine iuris prudentia, ius
peruerrere: dicere difficile. eò quod iudicare hoc
est ius dicere, nemo potest sine iuris cognitione.
Quæ igitur adsunt, in rudi iudice inscitia macu-
læ, illæ non sunt sine iustitiæ vulnere. Nota, nec inelegans est
fabula. Nam quorsum, quòd cùm Phæbus, & Pan carmine cer-
tarent, Midas iudex inter vtrumq; electus, sententiam contra
Phæbum tulit? vt certè hoc intelligamus, aut etiam fateamur,
eum qui male intelligit, non posse in iure dicendo, bene senti-
re. Quare quod veteri fertur prouerbio, Midas asininas au-
res habet: id plane ad stolidos omnes pertinet Iudices.

QVOD SOLVS VIR IUSTVS NOUIT
Sustinere, & abstinere. XX.




RECTA, & astricta in iustitiæ disciplina, sunt
virtutum omnium præcepta. Quare eum in-
quiebat omni flagitio vitam polluere, & dedeco-
re maculare, qui iustitiam non coleret. Testes
sunt veteres illi doctrinæ, & ingenij patres. Nam cur ab ijs
Nemesis iustitiæ Dea constituebatur, cuius expressa imago
spectabatur, altera manuum Equi frenum: altera cubitarem

mensu-

mensuram tenens? quia non vna est, sed omnis virtus, iustitia. Hæc quippe frenum inijcit cupiditati, atq; mensuram parti adhibet irascibili, quam pariter in dictis, factisq; rationi consentaneam tenet.

QVOD SEMPER ADDERE, NVN-
quàm demere soleat iustitia. XXI.



SOLITVS est dicere nullam, in foro pestem iustitiæ esse capitaliorem, quàm venale iudicium. Non potest enim ea resp. esse salua, in qua fas est nundinari ius. Itaq; apud Thebanos spectabatur iudicis statua sine manibus. Ante enim capere non debet iudex, quàm velit capi. Præclarum est in M. Curio iustitiæ lumen, qui contra ius neq; capere, neq; capi potuit. Legatos igitur Samnitum cum suis pecunijs remisit, inquires malle se dominari aurum habentibus, quàm auro abundare.


QVOD CONSTANS SIT
Iustitia. XXII.



INTERROGANTI quid in omni rerum vicissitudine, constans esset potissimum, iustitia respondit. Non Apollinis verùm magis, quàm hoc Antistitis fuit responsum. quod inconstans est, & non permanens, virtus non est: cū virtus nesciat mutari. In sacris igitur Ægyptiorum literis, Palma Hieroglyphicum constituitur iustitiæ. non quia ea planta est incorrupta: sed quia docet, quales ij esse debent, qui iustitiam administrant. Nec enim, qui iustus est, spe, aut metu ducitur, sed officio. itaq; Fabricius, cum Nicias Pyrrhi Epyrotarum Regis medicus,

cus, promississet se pacta mercede, præministraturum Pyrtho venenum, non solum non deflexit ab æquitate: sed etiam Pyrthum Hostem literis monuit, vt à domesticis caueret insidijs.

*QVOD APVD VIRVM IVSTM,
nullum sit discrimen personarum. XXIII.*



EST iusti viri vlceribus iustitiæ mederi, atq; tela iniuriarum depellere, sine discrimine. Quare dicere consuevit, à viro iusto parentes etiam ignorari: eò quòd non sanguis, non natura: sed virtus solum, apud eum plurimum habeat ponderis. Hoc sentientes Ægyptij Cupressum fecerunt Hieroglyphicum iustitiæ. Nam Arbor hæc à radice ad fastigium recto surgit stipite, æquales ad summum, ramos æquo ordine & magnitudine habens, & ita, vt alius, alium non excedat: sed pari æqualitate omnes reddens. Hæc autem planta iccirco iuris, & iustitiæ imago constituitur: quia omnes æqualiter iuri, & iustitiæ subijciuntur.

*QVOD LEX EADEM VOCE
omnes alloquatur. XXIV.*



VNS est communis, apud ciues omnes, defensionis mucro, lex scripta. Hæc enim æque, & bonos viros omnes suo patrocinio defendit, & oppugnat improbos. Soler igitur dicere eos legibus derogare, qui legum recusant subijci auctoritati. plena falis est Allegoria. Nam quorsum quòd Gorgones tres vnum tantum habebant oculum, quo per vices utebantur singulæ? tres sunt ciuitatis ordines, qui omnes vno iure tanquam, vna
rerum

rerum omnium vtuntur lampade: Senatus, plebs, & equestris ordo. Nec enim minus lex infimis, quàm summis viris solet fauere. Hanc fundit Principi Deus: mutuatur à Principe Senatus: à Senatu Magistratus: ac deniq; à magistratu vniuersus populus.

QVOD IUSTITIA IN IMPERIO

*Lumen, aut numen potius habeat
fœlicitatis.* XXV.



INQVIEBAT in iustitiæ ambitu, & gyro fœlicitatem omnem imperij clausam teneri. Nihil sapiente Principe dignius dici potuerat. Testis est, non ieiuna plebecula: sed tota prope Græcia. Hæc enim tanti fecit iustitiam, vt Aristide Atheniensi superstite, qui provincias omnes sua complebat iustitia, ætas aurea, ab ea sit vocata: qua Saturno quondam Rege, censebantur omnia mortalibus ex voto cedere. itaq; cum ei summus honor decerneretur: nec gloriosius quicquam inueniri posset iustitia, nunquàm deinceps alio, quàm Iusti appellatus est nomine. Explorata quippè est, in ea virtute fœlicitas imperij. Nam, vt veteri fertur prouerbio, semper feliciter cadunt Ionis Taxilli.

QVOD NIHIL SIT ÆQVABILIVS

Iustitia. XXVI.



LLIS, qui alijs imperarent, eam incudem inquiebat in primis esse tundendam, vt cauerent, ne stateram transcenderent. Etenim ad firmamentum imperij, nihil est accommodatius iustitiæ æqualitate.

bilitate. Id vt doceret Lycurgus, Spartanum agrum, ita ciuibus suis est partitus, vt ex rep. quasi familiam fraterno studio, & domestico propè amore constituerit. nonnullis igitur mirantibus videtis, inquit, quàm multorum fratrum, qui ex æquo prædia, inter se sunt partiti, sit Laconicus ager.

*QVOD POENA MAGIS, QVAM
Pretio seruetur Iustitia. XXVII.*



INTERROGANTIBVS quibusdam, quid iustitiæ maximè reniteretur, indulgentia dixit. ideo enim iustitia, ab antiquis singebatur Mucronem, dextra districtum tenens: quia blandimenta ignorat sanguinis, aut familiaritatis. nec vulgaris in eo est Populi Romani auctoritas. Nam cur M. Manlio, qui sæpius in acie stetit pro patria: qui seruauit Capitolium: qui strenuè dimicans aduersa vulnera accepit, vix vlla gratia est relata: grauis contra pœna, propter ambitionis suspicionem, est irrogata: quia acriores sunt iniuriæ, quàm beneficij sensus. itaq; cum supra dignitatem priuati ciuis, aliquid optare crederetur, populi suffragio damnatus est. Hæc enim, in Imperio iustitiæ vis est, vt illum minimè ferat, qui legibus, cum opus sit, cogi non possit. itaq; etsi inuito iustè non datur beneficium: ei tamen iustè infligitur pœna. illud enim est consilij: hoc autem necessitatis.

QVOD

QVOD COLVMNA VIRTVTVM,
omnium sit iustitia. XXVIII.



AFFINIS culpæ sit is oportet, qui quod res est, in moribus non intelligit. Nam ignorans non culpam solum admittit inscitia: sed etiam quia errat, crimen iniuriæ. Quare iustissimus ille Antistes errantes omnes solet, iniustitiæ insimulare nomine. Solus enim iustus constans cum sit, in ratione: nec ab ea possit reuelli, non errat. Nam hoc est iustitia, inter virtutes morales, quod est terra, inter elementa. Hæc enim, ut placet Philosophis, æquè librata in medio, proprijs consistit poderibus. Sola quippe elementorum est immobilis, atq; bonorum omnium venter. quid? Cardo virtutum omni est iustitia, quæ sola nescit mutari, quæq; sola alijs vtilitates omnes parit.

QVOD VIR IUSTVS FORTI SIT
anteponendus. XXIX.



CV M de fortitudine, & Iustitia arderet quæstio, utra virtutum alteri esset anteponenda, dixit hoc interesse inter iustitiam, & fortitudinem: quod interest, inter Iouem, & Herculem. propterea, quod illa Iouis: hæc virtus sit Herculis. Quare longo interuallo Iustitiam fortitudini: non fortitudinem iustitiæ anteposuit. Nec falso. Ibi enim, ubi viget iustitia, numquàm opus est viro forti: at ubi est fortitudo, ibi opus est iusti viri præsidio. Armorum quippe, iure uti volentibus, nulla est auctoritas: iuris verò etiã, in belli incendio, magna est necessitas.

*QVOD IUSTITIA COELVM, ET
Terram sua compleat gloria. XXX.*




AIEBAT Tanti esse iustitiam, vt ad eius gloriam non satis esset, in omni orbe terrarum, loci. vetus est prouerbiū. *יוטי ה'ס, ו'ס' ס'ס'ס' ס'ס'ס'ס'.* neq; cœlum, neq; terram attingit, de eo, qui sit tam iniustus, vt neq; humanum, neq; diuinum ius attingat. Iustitia enim cœlum, Terramq; tuetur. Nam cū terra parens sit vtilitatis, cœlum honestatis, vtrumq; communis vitæ, & salutis: horum simul omnium ars, & disciplina sola est iustitia.

QVOD NULLA PRINCIPIS AVCTORITAS debeat, extra fines euagari Iustitiæ. XXXI.



NQVIEBAT Principi extra fines, & terminos iustitiæ, nullam aciem remanere auctoritatis. eò quòd imperans contra ius, aduersus se, tanquam ferrum acutum, excitet imperium. Quare Antiochus Tertius Asiæ Rex, omnibus regni sui Ciuitatibus scripsit, si quid in literis, quæ eius nomine scriberentur, esset, quod legibus aduersum videretur, crederent se in seio eiusmodi scriptas esse literas, & iccirco ijs non paterent. Non enim Rex imperando potest plus, quàm ius, & ratio, cū nihil sit aliud Regis

auctoritas, quàm animata, atq;
loquens iustitia.



DE AMICITIA

TITVLVS NONVS.



CVM in ciuili societate, nulla magis retineatur concordia, quàm quæ beneuolentiæ constringitur vinculo: nec ibi, vbi est amicitia, sit seditioni, in quo consistat locus: nullum est neq; diuturnum, neq; laudabile magis imperium, quàm quod amicitia præsidio tenetur circumseptum. quæ res, in hoc faustissimo Pontificatu, ad ALDOBRANDINORVM gloriam, ingens accedit cumulus. ea quippè beneuolentia CLEMENS VIII. ab omnibus colitur, & obseruatur, vt omnes, eo sedente, sibi videantur in cælo esse. Huius cœlestem ac diuinam virtutem maximè attingit Ampliss. Cardinalis PETRVS ALDOBRANDINVS, qui cùm vniuersam etiam Hispaniam complevit sui amore, & obseruantia: tùm Regiæ in eum, beneuolentiæ, vnus instar omnium obses est IO. FERNANDEZ Velaschius Comes Stabilis, qui inclinatis his temporibus, imperij gubernacula militiæ, togæq; sic tractauit, vt non solum multis commodis recrearit, sed etiam plurimis virtutibus honestarit Imperium. Sed vt eò, vnde digressa est, redeat mea Oratio. Nihil est amicitia, nisi amor mutuus. Quare nisi vterq; amat, neuter est amicus. Atq; quia amicus est alter idem, nihil est Principi ad Imperij robur, & diuturnitatem accommodatius, principum amicitia. Nam qui amicum intuetur, tanquam exemplar aliquod intuetur sui, omniaq; ab eo explorata habet salutis præsidia. qui igitur non destituitur amicis, & absens adest, & egens abundat, & imbecillis fit robustus, atq; quod dictu est difficilius, mortuus viuere. Verus

enim lex hæc est amicitia, vt idem amici semper velint. Diadema igitur in regibus, quod à demēdis malis est dictum, Symbolum videtur esse beneuolentia, & amoris. Nam vbi est amor, ibi nihil est, quod quis imperando possit timere mali. Ea quippe est beneuolentia, & amoris vis, quam ad benè beateq; imperandum, temporis Antiquitas, & in pace, literis, & in bello, armis semper habuit antepositam. Et enim quorsum vt est in fabulis, Vulcani illa catena, cuius ex vinculis nec Mars, nec Venus potuit extricari? conuincunt hoc commento Pœtæ, ad vtrumq; tempus & belli, & pacis nihil esse amore, & beneuolentia accommodatius. Sed cauendum est, ab adulterina amicitia: qua vulgò qui ducuntur non amicum, sed amici bona diligunt. inter verum enim, & fictū amicum, hoc inter est: quòd ille in aduersis, hic in secundis amici rebus vtrò adest. itaq; res aduersæ illum probant: hunc secundæ tantum parant. Huad quicquàm enim est vero amico constantius. Nam vbi est amicitia, ibi est virtus, vbi virtus ibi est habitus, hoc est altera natura, quæ nescit mutari. Quare Nunquam verè fuit amicus, qui facile desijt amare. Quoniam igitur amicitia, vinculum est bonorum omnium, eò plaris est omnibus bonis facienda, quo diuturnius bonum præstat, minus diuturno. Ad amicitia etiam vtilitatem, non exiguus cumulus accedit gloria. Nam cum amor desiderium sit boni, & pulchri: solusq; nouit sapiens amare, nemo potest, nisi vir bonus, alteri esse amicus. Sed quæ de Amicitia, ex eo sapientia fonte, collegi apophtegmata, eorū series hæc est.

- 1 Quòd nulla Imperij arx sit firmior Principis amicitia.
- 2 Quòd amicitia cedat odium: non odio amicitia.
- 3 Quòd amicitia Comes sit, in egestate vtilitas: in bello socia victoria.

Quòd

- 4 Quòd qua benefiunt amicis , longè gloriosa sunt magis,quàm que inimicis inferuntur mala.
- 5 Quòd amicitia decus, sit beneficentia.
- 6 Quòd nulla Benevolentia pestis sit capitalior,quàm crudelitas.
- 7 Quòd in bonis, nihil sit Utilius amicitia.
- 8 Quòd amicus sui , non alterius causa sit diligendus.
- 9 Quòd Amicorum à Principe delectus sit habendus.
- 10 Quòd ubi sint amici , ibi sint opes.
- 11 Quòd nullus amicus sit Ultra aras.
- 12 Quòd sola procreatrix amicitia sit Virtus.
- 13 Quòd in omni genere bonorum , nihil sit melius amicitia.
- 14 Quòd amicitia morbus sit, in rebus agendis ipsa cunctatio.
- 15 Quòd nihil propius ad felicitatem accedat, quam Amicitia.
- 16 Quòd Amicus absens semper adest.
- 17 Quòd nunquam solus sit amicus.
- 18 Quòd suus etiam sit amicitia fucus.
- 19 Quòd semper idem in alijs rebus sit amicus.
- 20 Quòd in amicitia claustris , vera mortuorum sit sepultura.
- 21 Quòd Amicitia, vim quasi quandam habeat numinis.
- 22 Quòd fons, & origo duplex sit amicitia.
- 23 Quòd Ratum amici , de amico debeat esse iudicium.
- 24 Quòd nihil sit , nec fidentius , nec fidelius amicitia.
- 25 Quòd nihil sit in bonis , optabilius amicitia.
- 26 Quòd omnia, in Vno amicitia nomine, lateant bonorum genera.
- 27 Quòd Amicus sit alter idem.
- 28 Quòd Amicitia anima sit iustitia.
- 29 Quòd Amicitia plura sit, quàm iustitia.
- 30 Quòd nihil capitale sit magis, quàm numaria amicitia.
- 31 Quòd indulgentia, insidiosa sit benevolentia.
- 32 Quòd truces ex amoris ardore, facies sapè accendantur odij.
- 33 Quòd Amoris origo non sit id, quod bonum est, sed quod placet.

QVOD NVLLA IMPERII ARX
fit firmitior, Principis Amicitia. I.



LST Principis amicitia consors felicitatis, & publicæ salutis socia. itaq; interrogatus, cuius Principis aduersus imperij periculum, summum esset propugnaculum. eius dixit, qui non armorum arce: sed amicitiaæ æde tenetur stipatus. Sapienter ille quidem. Nam fida, vt ait Isocrates, regum custodia, non turribus: non propugnaculis: non mænibus: non satellitibus: non armis: sed amicorum præsidij, & ciuium beneuolentia tenetur, sine quibus imperium non potest stare, nedum augeri, & propagari.

QVOD AMICITIÆ CEDAT ODIVM
Non odio Amicitia. II.



NON modo adulta odij pestis, sed etiam stirps, & semen maleuolentiaæ, in amicitiaæ campo relanguescit. Solitus igitur est dicere, non propter odium, amicitiaæ: sed propter amicitiam, odio esse derogandum. id aliquando re, & euentu Mithridates Rex Ponti testatus est. Hic enim pro vno Leonico amico, à Rhodijs in nauali pugna capto, omnes hostes captiuos, qui plurimi erant numero, permutauit.

habet quippe vnus amicitia ponderis plus:
 quàm inimicorum simul omnium odium.

QVOD

QVOD AMICITIÆ COMES SIT

In egestate utilitas: in bello socia victoria.

III.



VERITAS ipsa illum in eam cogitationem aduexit, ut diceret nullam arcem esse Principi, contra hostes firmiorem, quàm est Populi erga Principem, beneuolentia. Etenim ad incolumitatem Imperij, nec aptius est quicquam, quàm cum diligere, nec alienum magis quàm timeri. Nam si amicus est, ut testatur Aristoteles, σώματα μὴ δύο ψυχὴν δὲ μία. id est eadem anima, in diuersis habitans corporibus: qui amicitia habet: cornu habet Amaltheæ, cuius beneficio Hercules nihil frustra unquam voluit.

QVOD QVÆ BENEFICVNT AMICIS,

longè gloriosa sint magis, quàm qua inimicis inferuntur mala.

IV.



MÆRORE qui est afflictus & profligatus, solo ab amico potest excitari. Dicebat igitur in armis, longe esse gloriosius Imperatori, amicos seruare, quàm inimicos perdere. idq; puto, ductus Græcorum legumlatorum exemplo: quorum legibus, qui ferrum in bello amisisset, formidabili pœna afficiebatur: qui verò galeam, aut Thoracem abiecisset, nullo obnoxius erat supplicio. Nam iustè quis potest vitam deferere: non potest, non iniuste amicum deferere, ad cuius tutelam in bello, arma sumuntur. Atq; ex Iustiniani Legibus præclarius est virum in fontem seruare: quàm fontem perdere.

QVOD

QVOD AMICITIÆ DECVS
sit beneficentia. V.



TSI Amicitia pars, indulgentia appulsu consuevit exarescere: pars obrigescere asperitate morum: solet tamen interdum indulgentiam laudare: difficultatem semper reprehendere. aliud enim inquit, est prestare se seuerum, aliud sauum. illud quippe est iustitia: hoc crudelitatis, qua nihil est detestabilius. Nam improbus peccat contra legem: inofficiosus contra merita: sauus autem contra Deum, contra pietatem, atq; humanitatem. itaq; olim Senatores Romani Romulum, cum sanior esset, discerpserunt, ne ex lege fieret Tyrannus. Liberi enim qui sunt, seuerum principem vix: sauum ne vix quidem possunt tolerare.

QVOD NVLLA BENEVOLENTIAE
pestis sit capitalior, quam Crudelitas. VI.



VI Beneuolus est, auctus est pietate, omniq; beneficentia cumulatus. Quare inquebat hominem crudelē, non solum aduersari communi omnium beneuolentia, sed etiam naturam exerce hominis, induere bestia: si tamen vlla Bestia tantam stragem, humanae societati potest infligere: quanta infertur ab homine crudeli. L. Sylla Romanorum omnium crudelissimus hostium capita licitabatur, maximis propositis praemijs illis, qui proscriptos interemissent: & supplicijs ac morte ijs, qui illos occultrassent. ex quo nefarie, & crudeliter, sicuti Dionysius Halicarnasseus scribit, quadraginta millia Romanorum ciuium, voluntario iudicio peremit, praeter illos, qui illius ductu, in praelijs ceciderunt.

*QVOD IN BONIS NIHIL SIT
vtilius Amicitia. VII.*



COMPOSITVM genus dicendi, acce & exped-
ditum, non tam verborum filo : quàm rerum te-
xitur testimonio. Multum enim in vno, non pa-
rum in altero ad fidem faciendam, Antistites hic
sapientissimus semper habuit auctoritatis Solitus autem est di-
cere, non vtile esse Principi opes : sed amicos parare : quando
opes non sint possidentium : sed amicorum. Sic pariter præ-
cepit Polybius : sicq; instituit Scipio, qui ante gratuabatur è fo-
ro redire, quàm aliquem benemerendo sibi amicū effecisset.

*QVOD AMICVS SVI, NON
Alterius causa sit diligendus. VIII.*



INTERROGATVS quos, inter familiares ha-
beret charissimos, eos respondit, qui magis mihi,
quàm me ipsum metuunt. Nam illi amicum : hi
vero seipfos magis amant.

*QVOD AMICORVM A PRINCIPE
Delectus sit habendus. IX.*



TSI non est amicus, quem non absorbet quasi qui-
dam æstus benemerendi. longo tamen interuallo,
dispar est amicorum ratio. interroganti igitur, quo-
rum amicitia, & consuetudine oblectari in primis
deberet Princeps, eorum dixit, quorum familiaritatem Pyr-
rhus Rex Epyrotarum aucupabatur. Multò vero sale asper-
sum responsum, Eloquentes enim viros annuebat, inter
quos

quos Cyneam Thessalum in summo honore habebat: nec falso. Hic enim solus plures ciuitates facultate dicendi debellauit, quàm vniuersus Pyrrhi exercitus. Quare quod falsè fert Euripidis sententia: eos esse neruos, & vires eloquentiæ, vt multa efficiat viri eloquentis oratio, quæ hostile ferrum nequit efficere: id re, & euentu ille comprobauit.

QVOD VBI AMICI, IBI SINT
opes. X.



DICEBAT Amicos cùm peterent, non aliena petere, sed repetere quæ sua sunt. Nam cùm tam arctum sit amicitiae vinculum, vt vnus fiat ex pluribus, omnia amicorum sint communia oportet. fit igitur vt amicus dans egenti amico, non dare videatur, sed reddere quod debet: sin minus suggerit, quod res tempusq; postulat, alienum quod est retinere.

QVOD NULLVS AMICVS
sit ultra aras. XI.



CM in amicitia non solum sint adiumenta salutis: sed etiam ornamenta dignitatis, cuidam petenti quid ab altero amico, alteri honestè posset negari, quod turpe est, respondit. Itaq; Phocion, cùm Antipater peteret quiddam, quod minimè esset ex æquo, & bouo. O Antipater dixit, tu non potes Phocione & amico simul, & adulatore vti. Ille enim honesta tantum: hic etiam turpia admittit amici gratia. Quare qui ab alio iniusta exorat, non ab amico: sed ab adulatore censetur exorare.


QVOD

QVOD SOLA PROCREATRIX
amicitia sit virtus. **XII.**



VIR bonus amoris aculeos, in eorum animis relinquit, à quibus est auditus. Nam virtus, qua nihil est amabilius, non oculis hauritur, sed auribus. Quamquam tamen suæ partes etiam oculis, ad benevolentiam sunt tribuendæ itaq; sciscitanti cuidam, quis color amorem maximè conciliaret, virtutis dixit. Nam qui est sanguinis, sæpe fucum facit. Quare vt Thales Milesius asseuerabat, oris elegantia adulterinos: animi autem pulchritudo veros amicos parit.

QVOD IN OMNI GENERE BONORVM,
nihil sit melius Amicitia. **XIII.**



NULLIS asperitatibus rerum, & angustijs temporum, vel ad bona comparanda, vel ad depellenda contraria, vnquam intercluditur amicitia. Cuidam itaq; ex familiaribus interroganti, qui Domum refererat annuo com meatu, quarum rerum gestiret copia: amicorum dixit. nihil enim est neq; in bonis, melius: neq; in honore, honestius amicitia. Quare apud Scythas, is habebatur ditissimus, qui non opes plures: sed amicos possidebat. Nam ad vitæ præsidium, plus est in amicis, sine pecuniâ firmamenti: quàm in pecuniarum redundantia, sine amicis. dicere igitur solitum legimus Socratem, nullam esse prætiosorem possessionem vero amico: nec aliunde vtilitatis plus, aut iucunditatis posse capi. Quocirca non solum turpiter sentiunt, sed etiam præposterè agunt, qui grauius pecuniæ iacturam, quàm amicitiae ferunt.

QVOD

*QVOD AMICITIÆ MORBVVS SIT IN
rebus agendis, ipsa cunctatio. XIV.*

IN amicitia quædam sunt amputanda: quædam etiam inferenda. interrogatus igitur quid, ex amicitia esset tollendū: cunctatio inquit, in primis est tollenda: cura verò inferenda solers, & diligens. Acerbum enim redditur, quod amicè sit, nisi prumptum sit, & expeditum. Quare nihil turpius est in amicitia, quàm rogari. Non enim dari, sed rapi videtur, quod precibus extorquetur. Amicum igitur pluribus verbis qui rogat: facit rogando, vt amico videatur diffidere. Nam vt Crates Thebanus testatur, veri qui sunt amici, in rebus aduersis vltro adsunt inuocati: in rebus autem prosperis, nunquam nisi accersiti.

*QVOD NIHIL PROPIVS AD
felicitatem accedat, quàm Amicitia. XV.*

NON attenuata, & imminuta est amicitia gloria: quod sine ea, neq;, in malis vlla doloris medicina: neq;, in bonis sensus vllus sit felicitatis. consuevit igitur dicere, nihil esse amicitiam, nisi consortem felicitatis, & Sociam: vero autem amico vti, ipsam esse felicitatem. ita Sylla cognomento felix, inter felicitates suas, duas præcipuè ducebat, vnam quòd Pium Metellum haberet amicum: alteram quòd Athenas non subuertisset, quarum in solo, tanquam in feracissimo agro, virtus fructus vberrimos fundebat amicitia.

*QVOD AMICVS ABSENS,
Semper adest. XVI.*

INQVIEBAT Amicum fide adduci, & officio, ut etiam procul magis, quàm secum ageret cum amico. Nam amici adeo tenax est memoria, ut absens, semper adesse videatur. Est enim amicitia ea animorum coniunctio, quæ nullo disiungi potest locorum, aut temporum interuallo. Nulla igitur apud Amicos excusatio est obliuionis: nisi fortè quis, etiam sui capi possit obliuione.

*QVOD NVNQVAM SOLVS SIT
Amicus. XVII.*

AD verborum angustias, & ad literarum angulos, qui volet reuocare amicos, facile intelliget, amicitiam, quasi animi communis, & consilij officinam esse vocatam. Interroganti cuidam igitur quidnam nunquam esset solus: amicus dixit. Hic enim ex vno fit geminus: nec ambigi de eo potest. Naturæ enim testimonio intercluditur via omnis dubitationis. Etenim quorsum duo Aspides expressi? habet Hieroglyphicum veram amici interpretationem. Aspis enim numquam è latibulo, sine comite exit: cumq; sensum habet beneuolentiæ, ut si eorum vnus occidatur, alter qui superstes remanet, alterius mortem vlciscatur.

QVOD

QVOD SVVS ETIAM SIT,
Amicitia fucus. XVIII.



DVLTERINVS amicus cū aliud habet in pectore clausum, aliud in ore prumptum : ingemiscens aliquando dixit, multos gestare amicitia insignia: paucos verò amicitiam attingere : ideo si quid humanitus cuiquam accidisset, illum sine ope, & adiuumento, in asperitatibus rerum, & mæore iacere. Hoc ipsum vt docerent Ægypti, Arborem Amyram Hieroglyphicum fecerunt Adulterinae amicitia. Nam & arbor hæc odorem fundit suauem, fructum nullum ferens : & Amicus adulterinus, ostentationem semper spirat officij : numquam præstat officium.

QVOD SEMPER IDEM IN ALIIS
rebus sit amicus. XIX.



INTERROGANTI cuidam quis inter homines non consenesceret, amicus dixit. Nam virefcit amicitia, non relanguescit tempore. Notum est ad hanc rem, in sacris Ægyptiorum literis, Canis Hieroglyphicum. id etsi tacitum est, & elingue : non tamen, aut mutum, aut nudum est à doctrina, & virtute. Etenim cur Canis Vlyssis post annos viginti, solus ex domesticis cognouit dominum? quia, si naturam consulimus non canis, sed rationis : nec virtus, nec doctrina subijcitur tempori.

*QVOD IN AMICITIAE CLAVSTRIS
vera sit mortuorum sepultura. XX.*

QVERENTIBVS amicis, cùm omnes de ægro-
tante familiari essent solliciti, vbi quis optimè sepe-
liretur: in amicorum dixit sinu, & gremio. Sapien-
ter ille quidem. Nam ineptias qui vult ex falsa
amicitiæ opinione, refecare, & tollere quod sordescit; sen-
tiet amicos non minus mortuis, quàm viuis prodesse. Non
est vulgare Antiquitatis testimonium. Etenim cur à Parthis
canes alebantur, quorum voracitate cadauera absumebantur,
non condiebantur in sepultura? vt cùm canis symbolum sit
amicitiæ, hoc certè monimèto mortalibus testatum relinque-
rent, homines non posse melius sepeliri, quàm in beneuolo-
rū animis, quorū memoria amici in diēs reuiuiscunt mortui.

*QVOD AMICITIA VIM QVASI
quandam habeat Numinis. XXI.*

ETSI virtus ab Aristotele mos, à modo vocatur
cò quòd quæ honesta sunt, nisi modus adhibea-
tur, turpia redduntur, & inhonesta omnia: so-
lam tamen amicitiam inquebat, inter omnes vir-
tutes, & loco, & tempori, & personis maximè moderari. ma-
gna vero tanti Præsidis: non exigua Antiquitatis Auctoritas.
Nam cur à Græcis Amicitia Dea, quam *φιλία* vocabant con-
stituebatur? vt certè hoc vnum ostenderent, Amicum verum,
veluti numen aliquod, nihil perhorrescere: hocq; inter sapien-
tem, & amicum interesse, quod illius sit parere: huius impera-
re, & loco, & tempori. Bellè id quidem olim, meo quidē iudi-
cio, Romani. Nam cur apud eos, amicitia hæc spectabatur
imago, luuenis aperto capite: tunica rudi indutus: cuius in Fim-

bria scriptum erat mors, & vita: in fronte æstas, & hymens: habebatq; latus apertum, cuius in præcordijs digito inscriptum ostendebat longè, & propè: nãuos, & nebulas rationi & disciplinis offutunt, qui malunt ex verbis, quàm ex his præclarissimis monumentis amicitix vim attentare, quibus censetur amicitiam, nec morte, nec loco: neq; deniq; tempore reuelli posse.

*QVOD FONS, ET ORIGO
duplex sit amicitia. XXII.*



QUÆMADMODVM Anaxagoras, & Empedocles amicitiam, & litem fecerunt principium rerum omnium: eò quòd per consociationem, & disunctionem, generatio fit, & corruptio: ita solitus est dicere duo esse amicitix primordia: simile, & dissimile. Summa enim amicitia est, vt Testatur Cic. quam morum similitudo coniugauit: Lubrica verò, & imperfecta, quã dissimilitudo conciliauit. Illa vt testis est, & Prometheus Ægyptiorum legislator, & Pythagoras, cadit in virum bonum tantum, quia honestate solum definitur: Hæc verò, quia suauitate, & vtilitate omnia metitur, dissimilitudine magis gaudet personarum. ita Diues à paupere: & vir à muliere magis diligitur, quàm vel mulier à muliere, vel pauper à paupere, etsi sui sunt similiores.

*QVOD RATVM AMICI, DE
Amico debeat esse iudicium. XXIII.*



NON VIEBAT, amanti quod erratum est, rectum videri: non item amico: eò quòd ille sensu, & opinione, hic animi feratur iudicio. Quare de amico
ratum

ratum semper debet esse, amici iudicium. Nam ut benevolentia fit ciui, qui amatur gratia: amor contra illius causa, qui amat: ita amicitia virtutis ergo conflata, nihil præter id, quod honestum est spectat.

*QVOD NIHIL SIT NEC FIDENTIVS
nec fidelius amicitia. XXIV.*

N ore sæpè habebat nihil esse ad omnes res ardentius amore, & amicitia: nihil valentius, quæ nec vi, nec metu frangi pōt. probant id duo amicitia lumina, Damon, & Pythias, Pythagorei discipuli, quorum alterum, cum Dionysius Syraculanus interficere veller, propter suspicionem perducitionis: alter se mortis vadem præstare non dubitauit, tantisper, dum qui rapiendus erat ad supplicium, rebus suis compositis, reuertetur. cum verò adesset hora morti destinata, & iam obses esset proximus supplicio, vnusquisq; sponsorem stultitiæ, & temeritatis damnabat: at is nihil de amici fide dubitare constanter prædicabat. eodem igitur momento, quo Tyrannus supplicium indixerat, qui discesserat, superuenit, obsidem liberaturus, cuius rei Tyrannus percitus admiratione, reum impunè dimisit, & inter vtrumq; amicum certius haberi voluit.

*QVOD NIHIL SIT IN BONIS
optabilius amicitia. XXV.*



TA amicus est animatus, ut non paret magis se sua, quàm amici causa esse natum. Quare aiebat nullum in vita bonorum genus esse tam grande, quod amicitia non videatur exæquare, aut po-

rius superare. auget sententiæ huius auctoritatem, vetus Darij
vorum, qui non aduersus hostes victoriam: non regna: non
gloriam: sed oblato tibi malo punico, tot optasse fertur Zo-
piros, (quia Zopirus non fucatus erat amicus) quot granulis
esset malum illud refertum. vera enim regni præsidia sunt
amici, quos nec ferro cogere, nec auro parare queas. Sola igi-
tur militum amicitia fretus Scipio Africanus, dicitur bellum
Carthagenensibus intulisse.

QVOD OMNIA IN VNO AMICITIÆ
nomine, lateant bonorum genera. XXVI.

DICEBAT iure amicitiam ab amore esse voca-
tam, quia natura cùm sit suavis, utilis, & hone-
sta, nihil ei deest, quod amari potest. Tantum
quippe vnumquodq; est suaue, quantum ama-
tur: eoq; vtile magis, quò ad res plures vsus eius frequens est,
& idoneus: nec deniq; quicquam magis est honestum, quàm
^{modus} siue amicitia, quæ anima est iustitiæ. Sed quò res me-
lior est, eò rarior est amicitia. nihil enim vnquam sol vidit ra-
rius virtute. Itaq; consuevit Menander dicere, illum esse fe-
licem, cui vel amici congisset vmbra. est enim amicitia ani-
mal minimè gregarium. Hac ratione commotus Alexander
Magnus, Achillem fuisse felicem pronunciauit: eò
quod viuens fidum amicum: post fata ma-
gnum sui nominis, & famæ na-
ctus esset præconem.



QVOD

*QVOD AMICVS SIT ALTER**idem.**XXVII.*

SOLITVS est dicere amico chariorem esse amici vitam, quàm suam: atq; iccirco inanem illam esse sententiam, qua vulgo fertur, quòd quisq; sibi melius, quàm alteri cupiat esse. Nam amicus cùm viuat in amico, in se autem sit mortuus: nihil habet potius amici vita. graue, & elegans est Promethæi Aegyptiorum legislatoris testimonium. Hic enim vbi interierat coniux, tulit moderate, quòd pars domus periisset: vbi direptæ essent eius opes: dixit non sua, sed fortunæ bona esse sublata: cùm pariter filius de vita migrasset, dixit parte se aliqua tantum esse comminutum: at mortuo amico, statim frangi dolore caput, atq; in luctu, & squalore ita iacere, vt vix sine suspirio, posset respirare. quod cùm admiraretur populus, rei admirationem, eius ex animo absterisit, inquires amico mortem obtigisse: sibi vero mortis dolorem, quia ipse vt mortuus, sensu non careret: amicum non esse amici exemplar: sed alterum idem. Hoc ipsum Lyricus Poeta sentiens, amicum dimidium animæ vocat. quasi vna sit animæ vis, & libera voluntas, duobus in corporibus.

*QVOD AMICITIA ANIMA**Sit Iustitia.**XXVIII.*

INQVIEBAT amicitiam non solum omni iure esse imbutam: sed etiam animam esse iustitiæ. vbi enim non est amicitia, ibi iustitiæ succus, & sanguis statim exarescit. Nam ius diuinum amore Dei: ius humanum amore hominum definitur.

K ; quam-

Quamquam enim vulgo amor differt ab amicitia, quòd ille ferarum etiam bestiarum sit: benevolentia solum hominum: amicitia verò bonorum tantum: tamen amor hoc loco, vim obtinet virtutis, in qua laus omnis consistit amicitiae. quæ si obseruaretur in ciuitate, nihil ei accideret iure, & legibus magnopere opus esse. Nam posito fine, nihil ijs opus est, quæ pertinent ad finem.

QVOD AMICITIA PLVRIS SIT,
Quàm Iustitia. XXXIX.



T circuitum, & quasi orbem relinquam honoris, quo fertur, & ducitur Amicitia, inquiebat Amicum viro iusto esse anteponendū: cò quòd iustitia malum prohibet, Amicitia bonum ministrat: Estq; illius plerunq; destruere: huius semper seruare. Nam, vt partes corporis se mutuo amant, atq; aliæ alijs seruiunt, vnamq; animantem simul omnes constituunt: ita veri amici eo societatis constringuntur vinculo, vt ex pluribus, vnum quasi corpus fiat salutis. Amicitia enim diuitibus est, pro gloria: pauperibus, pro censu: exulibus, pro patria: mortuis pro vita: ac deniq; perditis, pro salute.

QVOD NIHIL SIT CAPITALE
Magis, quàm numaria amicitia. XXX.



NQVIEBAT Insidiosam benevolentiam suo enudari scelere, per hunc Apologum. Annum se natalem celebrare simulabat vultur: auiculaq; ad cœnam inuitarat. aduolant igitur longinquis ex locis Auicula, quæ omnes primùm cum applausu excipiuntur

epiuntur à vulture : tum vbi hora cœnæ adest, illæ omnes ad vnam deuorantur: simile quiddam est, in quæstuosa amicitia, quæ in vtilitate est fundata. Nam amicus ijs potissimum applaudit, quos sibi ad pactum videt prodesse. ijs enim cùm videtur aliquid dare: tum maximè inhiat rapere: estq; in hoc genere ijs amicus, vt oleum plantis: quibus nihil non letale spirat.

QVOD INDVLGENTIA INSIDIOSA

Sit beneuolentia.

XXXI.



CVM liberorum amore, multos cerneret infatuari, atq; ab ijs liberos, per indulgentiam in educatione non ad disciplinas duci, sed seduci: dixit indulgentem beneuolentiam, suaue esse venenum. Nec contemnendum de ea re est, in Simia naturæ testimonium. Hæc enim bestia, ex pluribus catulis, quos in lucem edit, quem plurimum diligit, lætè in vulnis gestando, & gestiendo cruciat, ac demum cruciatum trucidat. Cæteri, quibus minori plausu indulget, soli animâ superant. atq; vt ab indulgentia parentum recedam, qui Impurus est, & libidinosus, quos maxime diligit, hos in primis inficit omni turpitudine, vel graui potius conficit scelere. Blandè enim amplectendo quos amat, nefariè lædit.

QVOD TRVCEX AMORIS ARDO-

re faces sæpe accendantur odij.

XXXII.



CONVULSA, & labefactata multo furore, non paruo scelere læpè fuit amoris vis. Quare consuevit dicere amorem, nisi modus adfit, facile in capitale

talē odium commutari. Nec vulgare est apud Poetas testimonium. Medea enim Ætæ Colchorum regis filia Iasonem cum deperiret, illum in Græciam est secuta, patrem verò insequentem ut vitaret, discepti Absyrti fratris membris retardauit. At ex tanto amore, statim venit in odium tam capitale, ut odij nomen visa sit omni crudelitate superare. Hæc enim à Iasone repudiata, filios suos, quos ex eo susceperat, occidit: Glaucamq; Creontis filiam, cum qua Iason secundas contraxerat nuptias, incensa regia, viuam cremauit, ac ipsum etiam Iasonem impatientia doloris, manus sibi iniicere coegit. Quare cum amor odio sit finitimus, nemo rectè, ex Hælionis sententia, amat, nisi qui amat tanquàm aliquando osutus. præsertim quando facile odij flamma, ex amoris ardore accenditur.

*QVOD AMORIS ORIGO NON SIT
id, quod bonum est, sed quod placet. XXXIII.*



INHONESTA nolim crepare: hoc non quæo tacere, plures quod volunt, quàm quod debent sequi. Non enim, ut inquit, amat, quod pluris est, sed quod videtur. Ita Canis à Cane in amore, boui præponitur: Sic Formica, Tauro Formicam anreponit: ita ferè inter mortales, amor non fit, ex iudicio, sed ex opinione. Ita Alexander Magnus tanta beneuolentiâ Ephæstionem est persecutus, ut eo mortuo, propugnacula vrbium diripi, equos mulasq; ronderi, plerosq; gregarios homines interfici ad maioris argumentum iusserit: idq; vocauerit Ephæstionis inferias.

DE LIBERALITATE

TITVLVS DECIMVS.



VM nihil neq; ad robur imperij, populari gratia: neq; ad popularem gratiam liberalitate sit accommodatius: Card. ALDO-BRANDINVS ea pietate, summi Pontificatus liberalitatem cōmendat, vt nunquam magis Pōtificatus augeat patrimoniū, quā cum sit liberalissimus. Est enim diuini eius ingenij, & summae liberalitatis, omnia ita largiri, vt qua pietatis semita, ex apostolico ærario exeunt, eadem ad Ecclesiasticas opes redeant cumulatiore mensura. Idq; minimè mirari soleo. Nam qui homines à Principibus beneficium capiunt, faciunt capiēdo, vt magis capi, quā capere videantur. Itaq; nec Princeps, nec Deus fieri potest prodigus. Nam vterq; eorum quæ largitur, nihil videtur abalienare, sed semper omnia in sua ditione, & potestate retinere. Quare in ornamentis imperij, nullum neq; clarius beneficio nitet Diadema: neq; gestatur amore præstantius. At inter Principes, & priuatos homines longe dispar est Liberalitatis ratio. Nam inter hos, difficile est liberalem fieri diuitem: inter illos difficilius, auarum non fieri miserum. Pluris igitur ducebat liberalitatem, sine diuitijs, quā diuitias sine liberalitate. Iubens itaq; dabat, grauare verò ab ijs præsertim, in quos beneficium collocarat, quicquam, ne collocati beneficij iacturam faceret, capiebat. Nam si quod redditur, non est datum, quod donum est, ab omni restitutione nudum sit oportet. Vtrò igitur, non necessitate adductus, apud bonos viros beneficia collocat. Nam quod ab inuito extorqueretur, non beneficentiam, sed prædam esse putat.

putabat. rogari vero semel poterat late: sapius non nisi graduatè poterat, eo quòd dona precibus empta, stomocharetur quasi malefacta. Beneficium enim, quòd aut non loco, aut non tēpore, aut non libenter fit, beneficij non solum gratiam amittit, sed etiam maculam quādam capit maleficij. aiebat igitur nihil esse liberalitatem, nisi externorum bonorum artem, & disciplinam, qua qui destitueretur nesciret pecunia uti. Quæ autem de ea tulit Apophthegmata, eorum, quantum colligere potui, series hæc est.

- 1 Quòd nihil, in virtute gloriam magis, quàm liberalitas attingat, Principis.
- 2 Quòd Principis liberalitas, nulla exhauriatur beneficentia.
- 3 Quòd liberalitas minus accipienti, quàm largienti sit fructuosa.
- 4 Quòd malè precans, non precari, sed sibi imprecari videatur.
- 5 Quòd tum maximè habeatur Princeps liberalis, cum parua à parvis capiat.
- 6 Quòd non exigua sit liberalitatis, in Principe commendatio, munera à subditis capere.
- 7 Quòd aurea munera à priuatis capere, negligat Princeps.
- 8 Quòd in liberalitate alijs, aliud genus beneficentia expediat.
- 9 Quòd Res sit insidiosa capere munera.
- 10 Quòd Principis liberalitas in eos, qui respiscunt, debeat esse propensa.
- 11 Quòd Musis amica debeat esse Principis liberalitas.
- 12 Quòd Capiens honestet, in liberalitate largientem. & largiens capientem.
- 13 Quòd liberalitas ars sit eroganda pecunia.
- 14 Quòd non pecuniosus, sed liberalis sit dives.
- 15 Quòd nulla erga improbos sit liberalitas.
- 16 Quòd liberalitas non meritis accipientis: sed donantis dignitatē

magis

magis respondere debeat.

- 17 *Quòd Raro ab incognitis : nunquam ab inimicis sit capiendum.*
- 18 *Quòd ex liberalitate, nemo reddatur inops.*
- 19 *Quòd liberalitas contabescat, sine Gratiarum actione.*
- 20 *Quòd Tarda sordeat liberalitas.*
- 21 *Quòd liberalitas, prudentia consors sit, & religionis socia.*
- 22 *Quòd qui liberalis est, vitam maximè agat hominis.*
- 23 *Quòd liberalis non timeat sumptum : sed amici incommodum.*
- 24 *Quòd felix sit qui seruit liberati Principi.*
- 25 *Quòd libentius liberalis ultrò prosit, quàm Rogatus.*

*QVOD NIHIL IN VIRTUTE,
Gloriam magis, quàm liberalitas attingat
Principis. I.*



VM ab omni oculorum consensu, atq; auri-
um probatione, avaritiæ crimen sit
exclusum: tum nihil ad popularem gratiam
liberalitate est conditius. Atq; quoniam
rumores, iam de admirabili beneficentia
CLEMENTIS VIII. per totam Ita-
liam calebant, cum quis curiola quadam cupiditate iudicij,
quæreret, quid in virtute maximè esset gloriolum, alijs respon-
dit commodum, ex suo parere incommodo. Etsi virtus enim
non est pecuniæ præmium: est tamen pecunia in loco negle-
cta, non vulgare virtutis testimonium. Ita Fabius ille, qui
cunctando Romanis restituit rem, laudatur. Hic quippe ca-
ptiuos ab Annibale acceptos, cum Senatus negaret se redem-
pturum, fundum vendidit, ut id solus præstaret,
quod tota ciuitas præstare refugeret.

QVOD PRINCIPIS LIBERALITAS,
Nulla exhauriatur beneficentia. II.



EXILITER, & exiguè est nimis agere: ad calculos omnia reuocare. quæ, inquit, profusio est in alijs: ea est liberalitas, in Principe. Etenim nec Deus, nec Princeps dando, potest miser fieri: Nam uterq; eorum, quæ largitur, remanet dominus. docuit id aliquando Alexander Magnus. Cum enim omnia amicis donasset, & iam regias ferè opes absumpsisset, tum Perdicus, ex intimis eius familiaribus, quid tibi Rex inquit, iam superest? spes respondit. Norat enim si res postulabat, quo ex fonte, quæ per liberalitatem erogarat, eodem propter beneuolentiam posse ad se redire: onus autem beneficij, apud accipientes remanere.

QVOD LIBERALITAS MINVS
accipienti, quàm largienti sit fructuosa. III.



VBI non adsunt exercitationes styli: non parum profunt curricula sermonum, quibus eruditio facundiæ coniunx, quasi sopita interdum, est excitanda. Itaq; cum fortè de liberalitate ageretur, quæ ex persona constat largientis, & accipientis: interrogareturq; quid in ea haberet potius: dare magis, respondit quàm accipere. qui enim dat, alium obligat, qui capit alij obligatur. Quare liberi hominis non est capere, nec quicquàm aliud est Principis donum, nisi veluti quoddam seruitutis vinculum. Itaq; beneficium qui inuenit, compedes inuenit, qui non ferri naturam retinent, sed obsequij, & obligationis. Magna igitur mercede beneficium emit, qui precatur: **summa**

*summa qui capiendo capitur : nec paruum precium accipit,
qui largitur.*

*QVOD MALE PRECANS NON
precari, sed imprecari sibi videtur. IV.*



HABET verbi vis, in rogando morsus acres, aculeos non hebetes. petimus enim gratia: rogamus precibus: poscimus iure: flagitamus ardore. Horum verborum, nisi parcus sit in petente vsus: comminuitur, in largiente, beneficij gratia. Ad beneficia igitur impetranda, non est celeritate, sed prudentia, opus. Importunitas enim poscentis plerumq; liberalitatem comminuit, & restinguit largientis. Sic M. Crassus petentium vitio, ex liberalissimo tenax euasit, & auarus.

*QVOD TVM MAXIME HABEATUR
Princeps liberalis, cum parua à paruis
capiat. V.*



NIHIL est tam cognatum præceptis, quàm cautiones, & diuerticula. Etsi enim potior pars est in liberalitate largientis, quam capientis: Princeps tamen sæpe, capiendo fit liberalior, quàm largiendo. Nam multum dat, cum exigua capit ab amicis. addit enim primùm, quia nemo vir bonus vult donari ab improbo, graue virtutis testimonium: deinde spem ostendit plurimi meriti. Hoc in virtutis genere laudatur Artaxerxes Persarum Rex, qui ab operario aquam sibi oblatam, eo animo accepit, vt plurima gratia compenfarit.

QVOD

QVOD NON EXIGVA SIT

Liberalitatis, in Principe commendatio, munera à subditis Capere. VI.




VLINARIVM inquebat esse ingenium, nedum hebes, & obtusum non odorantis, quantum Princeps munuscula à subditis capiendo, illis impertinet honoris, & gloriæ. Quoniam enim nemo probus, veteri proverbio, vult ab improbo donari: muneris laus, quod fit Principi, non est penes accipientem, sed largientem. Quare olim, apud Parthos, ut omnes maiori ad virtutem studio contenderent: nemini Regem sine munere, licebat adire. Nam acceptum munus, in signe virtutis: recusatum, notam criminis afferebat largienti.

QVOD AVREA MVNERA A PRIVATIS capere negligat Princeps. VII.



RVDITIO facundiæ coniux, & gloriæ socia, nullis magis, quàm sententiarum pigmentis se colorat, & corroborat. Hæc cum funditur undiq; à tanto Antistite: tum interroganti cuidam, quod munus Principi à privato viro plurimum haberet gratiæ: non illud inquit, quod accersitur ex fortunæ bonis. Nam cum ijs redundet, non fortunæ, sed gloriæ bona sunt ei ministranda. Qui enim Principi aurum, argentumvè largitur, non tam videtur, ut ait Illocrates, velle largiri, quàm mercari, ac tænerari.

*QVOD IN LIBERALITATE, ALIIS
aliud genus beneficentia expediat. VIII.*



NE Q. Cæco casu, neq; opinionis temeritate duci debet Principis liberalitas: sed iudicio. Itaq; inquebat penes Principem plus in dando, quam in rei, quæ daretur magnitudine, residere gloriæ. Nam eò spectat Principis largitio, ut omnes ad sui muneris studium, accendat virtutis amore. Quare Reges Persarum, obuijs mulieribus aurum dono dabant: viris autem Sagittas, & iacula, quò docerent fœminis fragilitatem: viris rem militarem curæ esse debere.

*QVOD RES SIT INSIDIOSA
capere munera. IX.*



RES cæcæ, & ab aspectus iudicio remotæ, nulla luce magis clarescunt, quàm sententiarum splendore. Cùm igitur quæ apud Thebanos statua iudicis erat expressa, sine manibus, ei ostenderetur: ingenuit quod ei, cui fas esset dare, non liceret capere. tum sciscitanti cuidam, à quo non liceret munus accipere: ab insidioso amico respondit, præclara verò, & æternitate digna sententia. Nam in inimicorum muneribus, morsus lateraspidis, qui interimit sine dolore. Itaq; Cyneas cum ingentibus donis à Pyrrho Romam missus, ciuem nulum inuenit, cuius domus illius muneribus pateret.

QVOD PRINCIPIS LIBERALITAS

*in eos, qui resipiscunt, debeat esse pro-
pensa. X.*



IN his carceribus hominum vita tenetur interclu-
sa, è quibus anceps cogitandi ratio nunquam est
exclusa. Cum igitur in sermonem, de liberali-
tate Principis incidisset, interrogareturq; in quos
potissimum Princeps deberet esse liberalis: in eos respondit,
qui resipiscunt, etsi ei antè graues fuerunt, & infesti. Ita Xer-
xes, Themistoclem, à quo in bello antè fusus, fugatusq; fue-
rat, Athenis relictis: beneuolè excepit, atq; in maximo hono-
re habuit: tresq; illi vrbes opulentissimas, dono dedit.

QVOD MUSIS AMICA DEBEAT

esse Principis Liberalitas. XI.



QVONIAM Musæ, quæ honesta, non quæ sunt
quæstuosæ, sequuntur: iccirco ferè qui Musis sunt
addicti, cernuntur inanes, & ab opulentia nudi.
Quocirca consuevit dicere, Principum liberali-
tate Musas esse depascendas. Huic eius sententiæ suffragari in
primis videtur Alexander Magnus. Nam cum facilis, & be-
nignus esset in omnes viros doctos, tum Xenocrati, cuius acre
ingenium admirabatur, quinquaginta talenta dono misit, cò
quod acceperat ab amicis, illum ex angustia rei familia-
ris laborare, atq; eam ob rem, Musas ipsas
cum viro abiecto, in squalore
iacere.

QVOD CAPIENS HONESTET IN
Liberalitate largientem, & largiens ca-
pientem. XII.



STERILITATE ingenij, & inopia doctrinæ, stirps, & semen virtutis, in quæstionum campo, sæpe exarescit. Cum igitur in dubium, & quæstionem esset adductum, vter in liberalitate magis esset laudandus, capiens ne, an largiens: eò quòd ille delistit esse sui iuris: hic verò non libertatis, sed rei possessione tantum amittit: Nō est respondit, cur id quenquam vllis confodiat dubij stimulis. Nam largientis gloriam ex capiente, & capientis laudem, ex largiente metiri oportet. Ex quo ambo videntur in virtute, & honestate esse pares. Testis est Diogenes. Etenim cum à quodam magna recreatus fuisset beneficentia, illumq; iccirco, qui Diogeni præsto fuerat, nonnulli magnopere laudarent, tum Diogenes, præclarum, ait, est beneficium dare: mereri verò præclarius, quàm dare. Nam, vt vetus Pub. Mimi est sententia, beneficium dando capit, qui digno dat: qui autem non dat, videtur potius quod alienum est retinere, quàm quod suum est, non dare.


QVOD LIBERALITAS, ARS SIT
erogande pecunia. XIII.



QVIA Non solum pellenda est cæca, & temeraria animi dominatrix cupiditas, quæ arcam nescit referare: sed etiam accersenda est ars quædam pecuniæ erogandæ: interrogatus aliquando ab amicis, quis optimus esset pecuniarum vsus, qui in largitione dixit est positus. Huc accedit Aristippi plena pon-

deris auctoritas. Nam reprehensus aliquando, quòd ab amicis pecunias sæpius caperet; non ideo dixit, capio, ut ipse utar, sed ut illi addiscant, ad quas res sit utendum pecunijs.

QVOD NON PECVNIOSVS, SED
liberalis sit diues. XIV.



N hoc, diuitiarum cardo omnis vertitur, ut non adeò pecunia, quàm pecuniæ adsit vsus. Sciscitanti igitur quis esset diues, qui inquit, suas pecunias, ut Alexander Macedonum Rex, deponit apud amicos. Nec falso. Nam ut verus est Isocratis sententia, nullus præclarior est thesaurus, quàm beneficium apud bonos viros collocatum.

QVOD NULLA ERGA IMPROBOS
sit liberalitas. XV.



QVOCVNQVE me animo, & cogitatione conuerto, non minus est viri liberalis improbos deserere, quam bonis viris præsto adesse. Solitus verò est tantus Antistes dicere, nò esse magis contra officium, improbos iacentes excitare: quam illis ansam ministrare improbitatis. Laudatur igitur Rex Antigonus, à quo cùm Cynicus talentum peteret, respondit non esse Cynici talentum accipere: tum ille cùm diceret, da igitur denarium, non est respondit Antigoni denarium dare. Quæ ex re intelligimus non magis expedire improbo pecuniam, quàm febricitanti aquam gelidam esse suppeditandam. Nam huic interitus: illi infamia ministratur.

QVOD LIBERALITAS NON MERITIS
accipientis : sed donantis dignitati magis
respondere debeat. XVI.



ON coniectura id prospicimus : sed experti videmus, aliquid citra meritum accipientis, poscere dignitatem donantis. Quare, cum de liberalitate Principum ageretur, consuevit dicere, nihil ei, qui modo leuiter profuisset, non grande ab illis esse sperandum : eò quòd dona non fiant ex accipientis imbecillitate : sed ex magnificencia donantis. Hæc ratione Alexander Magnus commotus, cum ciuitatem cui-dam donasset, atq; tum indignati æmuli Alexandro inculcarent, non conuenire homini tam humilis fortunæ, tantum muneris : tum ille non quæro, inquit, quid oporteat illum accipere : sed quid deceat regem dare.

QVOD RARO AB INCOGNITIS:
nunquam ab inimicis sint capiendum. XVII.



OLITVS est dicere, dona ab incognitis capere, rem non inanem esse suspicionis : plenam autem periculi, capere ab inimicis. Nec id, si Homerum consulimus, falso quidem. Nam quorsum apud eum Ajax, & Hector sibi inter se dona ferentes? ut certè ex utriusq; ostento colligeret posteritas, non minus dona, quàm vulnera ab hoste esse cauenda. Hæc enim minus læduntur, quia vitantur : illa verò grauius officiunt, quia ut bona excipiuntur. Quare, & Hector Balthæo, quod ab Aiace acceperat, ad currum ligatus miserrimè ab Achille per exercitum fuit distra-

ctus: & Ajax gladio, quo ab Hectore donatus fuerat, crudeliter se traiecit.

QVOD EX LIBERALITATE NEMO
Reddatur inops. XVIII.

INTERROGANTIBVS amicis quomodo res cresceret familiaris: non rapiendo dixit, sed largiendo. Serendum enim est beneficium, ut metere possis fructum. Non est in Symbolis obscura ratio. Nam quorsum in sacris Ægyptiorum litteris, Mulier dextra mensuram: laeva cornucopiæ tenens, interpretationem habet liberalitatis? ut cerè inde intelligamus opes non comminui, sed crescere cum liberalitate. Nam ex cornucopiæ quicquid detrahebatur: id omne sta im redibat malitiam, quam antè cumulatione mensura.

QVOD LIBERALITAS CONTABESCAT
sine Gratiarum consociatione. XIX.

CVM nonnullis arctior videretur amicitia, quam sanguinis consociatio: alij contra assererent. Eò quòd sanguinis coniunctio nò solum nodus sit amoris: sed etiam vitæ: in re tam ancipiti, cum fluctuant, quærentq; demum quodnam arctissimum esset societatis vinculum: Gratiarum dixit, cum liberalitate. Neq; enim liberalitas stare potest, sine Gratijs: & Gratiæ intermoriuntur, sine liberalitate. Frigent enim munera, nisi & capiens largienti, & largiens gratus sit accipienti. Nam quorsum, quòd Hæ numerantur Gratiæ tres *varia: inopere, agra: quæ* mutuis amplexibus sic tenentur constrictæ, ut sola intermedia aduersa: duæ reliquæ spectentur auersæ? pender
Libera-

Liberalitas, vt *euaporum* loquitur, non ex re, sed ex animi, quod res traditur, bonitate. quæ verò sunt vtrinque; auersæ gratiæ, docent beneficium nullum, nisi vtilitate, & gloria cumulatum, in beneficium, & benemerentem, reuerti debere.

*QVOD TARDA SORDEAT
liberalitas. XX.*

RVMP TVM, & expeditum aiebat oportere esse beneficium. Nam quemadmodum, qui cito dat, bis dare videtur: ita qui serò dat, semel dando, censetur sæpius negare: nec conferre, sed vendere beneficium existimatur. Est autem liberalitas vna Gratiarum, quæ Græcè *χαρις ἀπὸ τοῦ χαρίζω* gaudentes sunt nominatæ: ex quo intelligimus id, quod non datur libenter, non solum naturam, sed etiam nomen amittere liberalitatis. Hæc inter Gratiarum honoris ergo medium locum obtinet: quasi nihil liberalitate sit gloriosius. Deus igitur à Dando, quod omnia det, ab ea virtute nomen accepit.

*QVOD LIBERALITAS PRVDENTIÆ
consors sit, & religionis sociæ. XXI.*

N Dubiorum tenebris, cæcisque errorum nubi-
bus, cum grauitè offendant, qui incognita ha-
bent, pro cognitis: tum auaros omnes talpa cæ-
ciores esse dicebat, cò quòd ille oculorum: hi
mentis casti sint lumine. cuius ex iudicio maxime prudens ha-
bendus est liberalis, quid prudens? imò bis, terque beatus. Itaque
Alexander Magnus, inter Philosophos de felicitate aliquando

disputantes, dixit nihil esse beatius, quàm multos sibi donis, & muneribus obstringere. is enim maximè Dei immortalis, qui prospicit omnibus, naturā videtur attingere. Quando non solum Homines, sed superi etiā placantur donis, nihil est quod à quoquā vir liberalis, metuere possit mali. Liberalitas igitur multò, apud me pluris est, quàm lapillus Gagacromenon, quem qui gerit, non solum sospes, ut volunt lapidarij, sed etiā victor, ex periculis abit. Quanquam enim, ut aiunt, lapilli huius beneficio Alchides Princeps, & ex nauali, & ex pedestri conflictu, victoriam reportavit: multò tamen viri liberalis gloriosa magis est victoria, qui non vires, corporis: sed animos expugnat hominum.

*QVOD QVI LIBERALIS EST,
vitam maximè agat hominis. XXII.*



TSI difficile est, frangere corroboratam vetustate opinionem cupidorum hominum, qui pauca honestate, omnia definiunt utilitate: solitus tamen est dicere, quia homo homini est natus, ambigere se, num is, qui alteri non prodest, vitam agat hominis. id ipsum visus est, non solum non dubitare, sed etiam pro comperto habere Vespasianus. Nam in cœna aliquando recordatus, quod eo die nemini benefecisset, ingeniscens, dixit se de vita, diem vnum perdidisse.



QVOD LIBERALIS NON TIMEAT
sumptum, sed amici incommodum. XXIII.



QVONIAM is Amicorum nece, iura omnia cruentat, qui amicos non tegit, in periculis: eorumq, bona expilat, qui illis, in egestate opem non ministrat: solitus est dicere, neminem esse liberalem, qui impensas magis timeat, quàm amicorum egestates. Hoc olim comprobavit Hiero Syracusanorum Rex: Nam audita clade, qua Romani apud Thrasimenum Lacum, afflicti erant, trecenta millia modiorum tritici: ducenta hordei: auriq; ducenta, & quadraginta pondo Romanis misit: quod munus capere ne verecundia impediret, prædâ simulavit esse hostiũ: non amici beneficentiam. Quare in eo, vt mittendi volũtas: sic prudentia cauẽdi nè remitteretur, est laudata.

QVOD FELIX SIT, QVI SERUIT
Liberali Principi. XXIV.



NVLLA conspiratio, consensuq; hominum maiorem, in laboriosos homines, spirat mercedem, quàm Principis liberalitas. Quare solet dicere, cum multum lucrari, qui Principi seruit liberali. vetus, at rarum est Alexandri exemplum. Nam Dario superato, cum in itinere videret Agasonem, qui mulum defessum auro onustum agebat, à mulo in humeros suos sarcinam transfuisse, ne eo amisso, ipse quoq; vitam amitteret, & interea ipsum Agasonem oneri succumbentem, ipse Agasoni vicinior factus dixit, vt tibi hoc onus minus graue sit, in tabernaculum tuum, aurum hoc deserto: quoniam iam id omne tuum esse iubeo.

QVOD LIBENTIVS LIBERALIS
Ultrò proficit, quàm rogatus. **XXV.**



CV M distrahitur in multas partes, ac propè exul-
 ceratur cupidorum opinione, dandi ius, & ratio:
 dicebat liberalitatem non solum artem esse dan-
 di, quæ sunt danda, & retinendi quæ sunt reti-
 nenda: sed etiam magistræ opportunitatis, nec patientem
 esse moræ, & tarditatis. Maius enim euadit munus, licet sem-
 per idem sit, quod in loco sit, & tempore: gratissimum verò,
 quod vltro confertur. præclarum, est Archesilai Philosophi
 posteritati commendatum exemplum. Hic enim Cresibium
 ægrotantem, inopiaq; rerum pressum officij causa visens, mar-
 supium auro refectum, clam eius puluino subiecit,
 quo reperto, Archesilai, inquit Cresenius, hic
 est ludus: quo nemo nisi liberali-
 ssimus recreatur.



DE MAGNIFICENTIA

TITVLVS VNDECIMVS.



MAGNIFICENTIA Græcè μεγαλοπρέπεια, à *μεγαλύνω* res grandes facio, dicitur. Est igitur Magnificencia magnarum rerum, & excelsarum cum animi quadam elatione administratio. In hac autem virtute, cum mihi venit in mentem eximij Senatoris, & Equitis FRANCISCI Sesse. Est quod in dolore, quidem gaudeam: nec possum in angore, qui me, alienissimo tanti viri tempore, laniat, & lacerat, non pro eximia eius virtute, & constantia recreari. Nam quemadmodum Cato nullis unquam Casibus mutatus est, nulliq; succubuit tempestati: ita Eques ille strenuissimus rectæ voluntatis conscientia potius gaudēs, quàm aduersis rerum procellis mærens, tanta semper fuit animi constantia, vt summos tempestatum acernos sibi ad gloriam, virtutis fecerit cumulos. Nam quid alitè de singulari eius sapientia repetam? vna est ab eo tribus iam ante annis scripta Velascorum Historia, in qua tanquam olim Ilias Homeri, in vna nucula, tota temporum antiquitas videtur teneri inclusa. Quare ego in ea, & ingenij acumen, & animi fidem, atq; orantum dicendi, admirabili doctrina aspersum admiratus, eo studio Historiam omnem, eam sum amplexus, vt è vernaculo idiomate, in sermonem latinum, nō sine plurimis vigilijs, & laboribus, traduxerim. Tanta enim arte, tot rerum gestarum insignibus, eaq; antiquitatis gloria illam referfit, vt auctor videatur is esse, cuius cognitionem nulla post homines natos, preterat rerum antiquitas. De ea igitur, est cur non parum gratulei huic nostræ ætati: plurimum verò Antiquissi-

mo Velaschiorum generi, ac in primis Sapientissimo Principi IOANNI FERNANDEZ Velaschio Comiti Stabili: Optimo meo Meccœnati. Magnificentiam autem virtutem in Hispania, VELASCHIIS: in Italia ALDOBRANDINIS maximè tribuit, quæ sicuti principibus est gloriosa: ita à pauperibus maximè est aliena. Nam his in rebus operosis, & admirabilibus, agendi nerui, desunt pecuniæ. Est igitur virtus diuitum, atq; in primis Regum, Imperatorum, & Summorum Principum. Atq; vt certis gloriæ Cancellis, teneatur inclusa, refertur potissimum ad Hospitij Dignitatem: ad victus apparatus: & ad munerum amplitudinem. Hospitij dignitas, partim splendore ædificij perpenditur: partim munificentia, qua portus & perfugium videatur bonorum omnium: victus autem ratio apparatu splendet cum elegantia, & copia: præsertim si frequens assistat concursus ad nutum parentium. Ad munera deniq; referuntur, vestes, arma, serui, & equi, utensilia, agri, pecuniæ, dotes virginum: libertas, ac redemptio captiuorum, atq; alia huius generis. Sed eorum, quæ ex sapienter dictis, ac responsis sapientissimi Antistitis, collegi, loci hi sunt.

- 1 Quòd magnificentia non cadat in homines abiecta fortuna.
 - 2 Quòd ille est Magnificus, qui à rebus magnis non superatur.
 - 3 Quòd Magnificentia sit bona fortuna, tanquam ludibria existimare.
 - 4 Quòd non minoris sit Magnificentia, manus continere, quàm multa adificare.
 - 5 Quòd vix quicquam veniatur Magnificentia.
 - 6 Quòd mense Magnificentia, non luxuria apparatu, sed temperantia sit definienda.
 - 7 Quòd in excipiendis amicis, nō sumptus debeat spectari, sed decus.
- Quòd

2 *Quòd Abiectis magnifica vestis sit ignominiosa: fortibus vero abiecta sapè gloriosa.*

*QVOD MAGNIFICENTIA NON
cadat in homines abiecta fortune. I.*



ON potest quis, sine re ampla, esse magnificus. ratio est ab omni dubitatione disiuncta. Nam interroganti quis esset Magnificus: qui muros urbis, respondit, qui naturalia: aquarum ductus: Theatra: porticus: fana, & omnia extruit, quæ ad communem usum ciuitatis pertinent: nedum ædes in cælum erectas. Domus vero viri Magnifici non auro, non ebore, non argento, vt sentit Homerus: sed spolijs hostium magis est ornanda. illa enim incontinentiæ sunt blandimenta: hæc veræ virtutis monumenta.

*QVOD ILLE EST MAGNIFICVS,
Qui à rebus magnis non superatur. II.*



ONO viro id omne est dependendum, quod spondet ratio. Interroganti igitur quid esset maximum, non vinci, dixit beneficio. quid secundum? non egere ait, potius, quàm abundare. In viroq; non desunt gloriæ Lumina. In altero fuit Alexander Macedo Terrarum Princeps, singulare Magnificentiae exemplar: qui prædicare est solitus, vt refert Cælius, se à nemine vnquam benignitate fuisse superatum. In altero omnibus etiamnum est exemplo Democritus, qui non modo humana omnia est aspernatus: sed etiam luminibus se priuauit, vt quantum

quantum detraheret oculis, tantum adderet menti ad doctrinæ lumen, & rationi. Itaq; cassus lumine, solus plus, quàm vniuerla ferè vidit Græcia.

QVOD MAGNIFICENTIAE SIT,

Bona fortuna, tanquàm ludibria existimare. III.



ON minus aiebat esse domiciliū Magnificentie, in contempione, quam in largitione pecuniæ. cò quòd hoc etiam est ambitiosi, illud solum viri boni. Quare Phocion Atheniensis, nihil, in magnificencia concedit Alexandro Magno.

Hic enim cum audisset plures esse mundos, ingemuit, quòd vix vnus esset dominus: ille nec habuit quicquam, nec habere voluit. Hic ex Persica Gaza bello parata, Phocioni magnum auri pondus misit: ille recusans interrogauit ab ijs, qui munus attulerant, cur ad te solum tantum auri, Rex mitteret: quia responderunt te omnium Græcorum optimum esse arbitratur. Sinite igitur inquit, cum esse me, quem ille me esse arbitratur. credidit homo magnificentie amicus, nihil fieri posse magnificentius, quàm in continentie gyro omnes frenare appetitus.

QVOD NON MINORIS SIT MAGNI-

ficientia manus continere, quàm multa edificare. IV.



VM de rebus gestis, multorum laus communi omnium ore esset diffusa, & dissipata: tum interroganti cuidam, quis esset Magnus, non qui nouit respondit

spondit ditescere, sed alios ditare. sic laudatur Valerius Publicola, qui ter ex hostibus victis triumphauit: cæterum tam pauper discessit, vt publico sumptu sit funeratus. Ex quo non minus gloriæ reportauit: quàm Agrippa, qui in sua ædilitate septingentos lacus fecit: fontes mille, & quinquaginta: Castella crexit supra mille, statuas æreas posuit ter centum: columnas è marmore quadringentas.

QVOD VIX QVICQVAM RENITATUR munificencia. V.



SOLITVS est dicere, res omnes ex difficilimis, munificencia reddi facillimas. Nam homo natura auidus, quia capitur auro, non est sui iuris: sed aurum largientis. Elegans est fabula. Atalanta Schænci filia, cum mira corporis velocitate præstaret, & à nuptijs omnino abhorreret, procis suis cursus certamen proposuit, in quo victum mortis pœna: victorem coniugij sui præmium sequeretur. Multis itaq; superatis, tandem ab Hippomene, Veneris consilio victa nupsit victori. Nam ex Damasceno agro, ei tria mala aurea donauit, vt in cursu proijceret virgini, quæ cum sequeretur virgo, ille victor euasit. Hoc commento docent Poete, muneribus summa quæq; facile expugnari, nec eum difficile capi, qui paratior est ad capiendum, quàm ad largiendum.



QVOD MENSÆ MAGNIFICENTIA

*Non Luxuriæ apparatus: sed Temperantiæ
sit definienda.* VI.



VM Romæ regij ferè cernerentur apparatus, nec pauci plurimis curis essent distenti, quo magnificentius aduentantes Heroes exciperent, interrogatus à quodam Principe, cuius mensam magis laudaret: Masinissæ Regis, dixit potius, quàm Cleopatrx vltimæ Ægypti Regina: mensarum ornamentum temperantia, non luxuria definiens. Ille enim semel tantum interdium vesceretur, & sine pulmento: Hæc autem in apparatu vsq; eo excessit, vt Cœnam parauerit Antonio, in qua Centies sestetium, id est ducenta, & quinquaginta millia aureorum, vno ferculo secundæ mentæ, consumpta sunt.

QVOD IN EXCIPIENDIS AMICIS

*non sumptus debeat spectari, sed
decus.* VII.



VANDO nonnulli in certamen de Hospitalitate, & discrimen venissent: quæsiissetq; subtilis quidam disputator, quis magnificè amicos hospicio exciperet, qui respondit magni amicitiam: parui pecuniam æstimat: sic apud Romanos laudatur L. Lucullus. Nam cum animaduerneret eadem mensa sæpe amicitiam esse depascendam: domum sic constituit, vt pro varietate amicorum, varia esset tricliniorum ratio. vnum quodq; igitur cœnaculum non solum suo appellauit nomine, sed etiam suo definiuit prætio, & apparatu. Siquidem in Apolline, quod cœnaculum

eulum nomen erat: quingenta millibus cœnari consuevit. habebat enim cuncta ad eò apparatus, ut domesticis satis esset cœnaculi nomen intelligere.

QVOD ABIECTIS MAGNIFICA

*Vestis sit ignominiosa: fortibus vero abiecta
sape gloriosa. VIII.*



VE M A D M O D V M, inquit Hercules gloriosum erat exuuiò indui Leonis, ei verò, qui non erat Hercules, ignominiosum: ita magni interest, quo quis utatur vestitu. Nam cum vestis dicatur à vehendo, quod statum vehat cuiusq; personæ, summa semper apud Antiquos, de vestitu, fuit religio. Quare Lysander, cum à Dionysio Siciliæ Tyranno, pro filiabus, vestes preciosissimas accepisset, illas remisit metuens, ne illis indutæ deformiores fierent. vexillum enim in Luxuria vestium, est incontinentiæ, quæ deformitatem omnem propè habet animi. Itaq; Annibal eodem Sago, quo gregarius miles, utebatur. Dionysius verò Syracusanus, cum in fures omnes grauissimè animaduерteret, his tamen ignoscebat, qui croco, & auro vestes sustulissent, quo admoneret mortales ab ornatus luxuria esse abstinendum.



DE GRATI ANIMI VOLVNTATE. TITVLVS XII.



GRATI animi voluntas est, vt inquit Cice-
ro, in qua amicitiarum, & officiorum me-
moriam, cum remunerandi voluntate conti-
netur. Dare enim Liberalitatis est: accipere
verò, & referre velle, gratiæ proprium.
Illius est dati beneficij obliuisci, huius ve-
ro meminisse; & cum datur opportunitas, etiam cum fæ-
nore, si possit, reddere. Inde, vt Plautus ait, quod bonis be-
nefit beneficium: gratia ea grauida est bonis. Debemus igitur,
si Hesiodo modò credimus, in referenda gratia imitari
agros fertiles, qui multò plus afferunt, quàm acceperunt.
Etenim non dare, multis licet: non reddere nemini. Dux
quippè sunt iustitiæ potissimum partes, gratia, & pœna. qui-
bus reguntur vniuersa. Sed vna longè est præstantior altera.
Nam qui gratiam refert, non curat liberalem, sed seipsū: qui
verò iniuriam punit, non se perficit: sed iniuriæ auctorem.
Iccirco Cato senior aiebat, malle se pro collato beneficio, gra-
tiam non recipere, quàm pro illata iniuria supplicium non
subire. Est gratia, & Deo, & hominibus virtutum omnium
iucundissima, quàm qui habet, ideo gratus dicitur, quia apud
Deum neq; religio, neq; pietas, neq; obseruantia: nec apud
homines vlla virtus sine grati animi volūtate, coli, & obserua-
ri potest. Hac vna virtute, cùm ab omnibus optimi Cardinalis
fides, & prudentissimi in periculis propulsandis consiliū vni-
cè ametur: tum à sapientissimo Senatore **LVDOVICO**
Madio,

Madio, summis laudibus celebratur. quod minimè soleo mirari. Noui enim Senatorem eum, omnium esse gratissimum. Nec vnquam Rex Attalus adeò in P. R. gratus fuit, qui ab eo honoribus auctus, ei deinceps memor beneficij, Asiam testamento legauit: quàm princeps ille virtutis, & doctrinæ Madius erga Cardinalem ALDOBRANDINVM, propter summa ac incredibilia eius merita, semper extitit. Nam si muneris ratio, non ex rei magnitudine, sed ex animi voluntate penditur: nihil est cur in munificentia, Attalo Regi debeat concedere. ille enim Populo Romano multò minora præstitit, quàm potuit præstare: hic verò, ita erga sapientissimum illum Antistitem continenter est animatus, vt plura etiam eius gratia conetur, quàm nauare possit, & efficere. Quæ ille verò de grati animi voluntate fudit Apophthegmata, eorum series hæc est.

- 1 Quòd non solum rerum euentus, sed etiam sine euentu, ipsi conatus præmio, sunt compensandi.
- 2 Quòd minus sit Principis beneficio, quàm ferro superari.
- 3 Quòd Principi nulla labe sit minus, quàm ingrati animi nota ferenda.
- 4 Quòd sine ope, frigeat in miseros, verborum consolatio.
- 5 Quòd benefico nulla merces sit ærior, quam gratia.
- 6 Quòd, non relata, apud Principes gratia, nulla sit excusatio.
- 7 Quòd nullum beneficium, gratiam maiorem exigit, quàm honor.
- 8 Quòd instructio, & disciplina magnos gratiarum aceruos sibi vendicet.
- 9 Quòd Magnam is referat gratiam, qui apud virum bonum beneficium collocat.
- 10 Quòd ingrato homini, qui benefacit, sibi efficit.
- 11 Quòd grati animi expectatione, virtus nutriatur populi.

- 12 Quòd qui gratus est, fortis item sit, & benignus.
- 13 Quòd ingratus suo se iugulat gladio.
- 14 Quòd cum bono viro, non moriatur, quæ ei debetur gratia.
- 15 Quòd in Bestijs, quasi grata voluntatis sit sensus.
- 16 Quòd ex Gratiarum sinu, nata sit, quæ summa est gloria.
- 17 Quòd Mortui cum externis bonis, non amittant gratiam.
- 18 Quòd in armis vincere munificentia, non minus gloriosum sit, quàm ferro.
- 19 Quòd Grato viro pluri sit gratia, quàm vita.
- 20 Quòd Beneficos persequatur gratia etiam mortuos.
- 21 Quòd ne verbum quidem benè collocatum, præmio & gratia sit indignum.
- 22 Quòd in restinctis, pro virtute, reuiuiscat gratiarum gloria.
- 23 Quòd ad popularem beneuolentiam, nihil sit Principis facilitas, & gratia accommodatius.
- 24 Quòd nullum maius ad Principem, quàm beneficentia redeat vœtigal.

QVOD NON SOLVM RERVM
 euentus, sed etiam, sine euentu, ipsi conatus præmio
 sint compensandi. I.



ADMIRANTIBVS nonnullis, quòd quæ res magnæ videbantur, exiguo interdum: quæ paræ; magno à CLEMENTE VIII. sæpè compensarentur præmio: dixit non rebus, sed voluntati, & studio gratiam parem, & æqualem esse oportere. Docuit id aliquando Sibylla Cumana. Hæc enim nouem libros Tarquinio Superbo obrulit, pro quibus trecentos aureos Philippeos postulauit, Rex abnuic: illa indignata, libros tres in conspectu Regis crema-

cremavit: pro sex reliquis, idem pretium poscens: rursus à Rege contemptui habita reliquos tres exussit, & pro tribus, qui supererant, nihilominus eandem summam poposcit. Hoc testimonio doctus Rex, quod non rebus, sed studio, quo res effertur, parem gratiam esse habendam: data pecunia illa, Sybillam voti fecit compotem. Non enim ex librorum interitu, deminuta erat, quæ antè solers eius, & diligens fuerat opera.

*QVOD MINVS SIT PRINCIPIS
beneficio, quàm ferro Superari. II.*

QUÆMADMODVM qui non sunt soluendo, rem differre quodiè solent, & procrastinare: ita qui dubitant, rei quæstionem non solent diluere, sed eius certamen, & discrimen dicendo augere. Cum igitur summis dubijs delibuta sit gratia Principis, interroganti cuidam, quod morbi genus vitare deberet Princeps: ingrati potissimum respondit animi. Nam regium est magis beneficentia, quàm potentia vincere. Quare Pyrrhus Epirotarum Rex, cum in respondenda gratia solerissimus fuit: tum nullam ex re grauius dolebat, quàm si parum alteri, in amore, & officio respondisset. Itaq; cum de morte Æsopi, quo familiariter vsus fuerat, accepisset nuncium: grauius indoluit, non quòd ille de vita migrasset: sed quòd tardior fuerat in referenda ei gratia. Non enim idem est pecuniam, & gratiam debere. Nam illa post mortem hæredibus: hæc non nisi viuentibus reddi potest.

QVOD PRINCIPI NVLLA LABES

*sit minus, quàm ingrati animi nota
ferenda. III.*



ST ingrati animi nota, non solum cū dedecore: sed et cum scelere coniuncta. Cuidā igitur interroganti, quid maximè, cauere deberet Princeps, qui omnium optimus habetur, & sapientissimus, vt ne minima, dixit, adsit ingrati animi suspicio. Idipsum Cimon, apud Athenienses sentiens, etiam in Bestias, quarum vsus esset opera, post opus, gratissimus fuit. Itaq; Equorum monumenta, quorum opera, victor in olympiacis ludis, coronatus fuerat, iuxta sepulchrum suum, magna impensa, collocari voluit: ne ingratus, vlla ex parte, mutis etiam animantibus haberi posset. Siquidem ingratus, non solum, vt asserit Plautus, improbus est homo, qui beneficium scit sumere, & nescit reddere, sed etiam impius, quia qui naturam violat, fit bestia deterior.

QVOD SINE OPE, FRIGEAT IN *miseros verborum consolatio. IV.*



TA loquitur, vt in digitis suis singulas causæ partes ex tempore constituere videatur. Inquebatibi, vbi opus est facto, rem omnem relanguescere consilio. Testis est Anaxagoras. Hic enim cum iaceret in rerum angustijs, & desperatione: illum Pericles beneuolè monebat, ne se perderet, sed amicis seruaret: cui statim ille, ò Pericle dixit, qui lucerna indiget, oleum instillat. Hæc sententia velim in nostrorum hominum animis sit defixa, qui nihil, præter bona verba, norunt imitari.

QVOD

QVOD BENEFICO NVLLA MERCES
sit uberior, quàm Gratia. V.



IRTVTEM non solum ministrat, sed etiam ornat lapidissimis suis dictis. Solitus autem est dicere, quæstuosum magis esse dare, quàm accipere. Qui enim dat, facit sæpè dando vt capientem capiat. Graue est, & fide dignum Socratis testimonium. magna quippè diligentia Æschinem discipulum cum instruxisset, nec haberet discipulus vnde persolueret: Socrati, loco mercedis, gratias egit, quòd ei, vbi res tempusq; postularet, semper præsto esset futurus. tum Socrates, reddis, inquit, Æschines gratiam habendo, mercedem cumulatiorè, quàm arca potest capere, mensura.

QVOD NON RELATÆ APVD
Principes Gratia, nulla sit excusatio. VI.



V M quidam non restituti beneficij crimen: cum Principe frugalitatis laudibus deprecatur: dixit nihil esse facilius, quàm apud Principes acceptum rependere gratia beneficium. Nam vt scribit Hesiodus, sicuti Superi, qui maxima, in dies bona largiuntur mortalibus, paruo thure sunt contenti: sic Principes, & magna dando, & parua capiendo lætari solent.



QVOD NVLLVM BENEFICIUM,
gratiam maiorem exigit, quàm honor. VII.



SCISCITANTI cuiusnā sagax, & prudens in referenda gratia, deberet esse excogitatio principis: eius potissimā dixit, qui aliquo collustratus est honoris splendore. ita superior Scipio, Ennio non solum viuo gratiam retulit: sed etiam mortuo. Nam poetæ illius effigiem, in monumentis Cornelix gentis collocari voluit, ut ei gratiam referret, à quo laudatus fuerat.

QVOD INSTRUCTIO, ET DISCIPLI-
na magnos Gratiarum acervos sibi vendit. VIII.



NIL est indiserta eruditione languidius, rantaq; est Gratiarum cum Musis necessitudo, ut diceret eum, qui pro eruditione, gratiam nō rependeret, ingratiorem esse, quàm qui gratias ipsas truculento scelere exulceraret. vix enim vllæ possunt cum institutione, & doctrina, pares inveniri gratiæ. liquet id vulgato Alexandri testimonio. Hic quippè Aristoteli Magistro, & Philippo patri pares gratias se debere dicebat, quòd ab altero vitam: ab altero vitæ ornamenta accepisset.

QVOD MAGNAM IS REFERAT
gratiam, qui apud virum bonum beneficium collocat. IX.



VM multorum linguam, in ingrati animi turpitudine suffutos, rei exacuat turpitude: interroganti cuidam, quid viro bono in collatione beneficij, maximè

maximè esset metuendum : non impensa dixit est formidolosa, sed ingrati hominis persona. Nam vt Actæon à suis canibus : sic beneficus ab ijs sæpè laceratur, quibus benefecit.

QVOD INGRATO HOMINI, QVI
Benefacit, sibi officit. X.

INQVIEBAT Ingratum hominem nefario sceleri, nexu & mancipio esse proprium : vsu, & fructu ne suum quidem. Itaq; quoniam beneficium compensat, maleficio, eum sibi officere, qui illi non vereatur prodesse. Elegans est, per viperam, in Symbolis, testimonium. in earum enim genere femella marem admissum, præ voluptate rei Veneræ, mordicus truncat capite : hæc verò deinceps gerens in utero, à sobole, cui vitam dedit, descissa, dum illa per vteri medium prorumpit, miserè interit.

QVOD GRATI ANIMI EXPECTA
tione virtus nutriatur populi. XI.

GRATI animi exemplis, quasi nutrimentis aiebat esse educanda, inter mortales, virtutum studia. Nec enim aliam ob rem Populus, vel Atheniensis publica alimenta, ad extremum vsque vitæ diem mulis decreuit, quorum opera in Hecatum phyloædificando, vsus esset : vel Romanus Anseres, in honore habuit, quòd dormientibus vigilibus, cùm Galli in summum Capitolium perrepissent, clangore Romanos milites excitassent, nisi, vt spe grati animi omnes, ad optimè de patria promerendum, concitarent. Statuit enim P. R. vt in co loco, in poste-

rum magnus anserum numerus, publica impensa aleretur, atq; ad eam rem, Censores inter Publica onera, publicanos primo obligauit.

*QVOD QVI GRATVS EST, FACILIS
item sit, & benignus. XII.*



VM omnium aures sitientes expleat plurima eruditionis iucunditate, tum interroganti quid primum viro grato esset difficile, beneficij dixit obliuisci: deinde quid facile, iniuriæ respondit, non recordari. Præclara verò vox, & æternitate memoriæ digna. exemplum verò in Cæsare minimè contemnendum. Hic enim captis, apud Pharsaliam Pompei Scrinijs, epistolas omnes inclusas, bona cremauit fide, nulla earum lecta, ne timor, in vrbe recrudesceret vindictæ. Maluit igitur, qui essent inimici ignorare, quàm sui metu inimicos sollicitare.

*QVOD INGRATVS SVO SE
ingulat gladio. XIII.*



NQVIEBAT ingratum hominem, suo se officio eruditum perdere. quare ex omni salutis spe expulsus est, & eiectus. falsè id loquitur hic Apologus. Cerua quondam venatores fugiens, sub vite deliuit. cum autem ex eorum seseffu, se in tuto esse existimaret gratiarum loco, pampinis se ingurgitare cepit. at statim conuersi venatores, & quod res erat arbitrati, spiculo ceruam traicerunt. Tum illa moriens, qui nocet, dixit, de se benemerentibus, se ipsum prodit. Nam ingrati animi lues fontem exhaurit pietatis.

QVOD

QVOD CVM VIRO BONO, NON
moriatur, quæ ei debeatur gratia. XIV.



NIL apud antiquos, maiori cura, & cogitatione Seruabatur, quàm gratia. Ipse verò inquit gratiam nescire mori: solamq; viro bono post mortem esse superstitem. Hoc ipsum itē cum silentio, loqui videtur vrbs Athenarum. Hæc enim mortuo Aristidi, Gratiam reservauit. Nam filias eius honestè dotatas, ex publico Palatio ad virorum ædes deduxit: Lysimacho autem filio centum argenti minas, & totidem agri iugera, quadragintaq; dragmas in singulas dies, vnde viveret, contulit.

QVOD ETIAM IN BESTIIS,
quasi gratæ voluntatis sit sensus. XV.



CVM nihil videatur natura, turpius ingrato homine cuomere, atq; foras proijcere: tum ille solitus est dicere ingratum hominem, fera bestia idē esse deterriorem: quōd etiam in feris bestiis sensus aliquis resideat quasi gratæ volūtatis. Insigne est Elephantis exemplū. Nam cum Pyrrhus in urbem Argos irruisset, Elephas in ipso urbis ingressu, magistrum à quo regebatur præsensit interemptum: cuius dolore percitus, sine discrimine amicos, hostesq; vrgendo in exercitum progressus, non prius destitit, quàm Magistri cadaver adinuenit: quod proposside, ac dentibus captum retro in turum ab hoste locum retulit.

QVOD EX GRATIARVM SINVA-
ta sit, quæ summa est gloria. XVI.



ES est cælo, & hominibus iucunda, grati
animi voluntas. Quare solet dicere eum,
qui gratus est, Numen potius, quàm nomen
inter mortales, possidere virtutis. Itaq; sin-
gulari, & propè diuina colitur obseruantia.
Gratus fuit T. Flaminius: nō ingrata in eum
ipsa Græcia. Nam post Philippum Regem victum, vbi Græ-
ciæ populis, quorum libertatem Macedonum Rex oppresso-
rat, pristinum fortunæ statum, publica Præconis voce resti-
tuit: tantus populi clamor, in eius honorem est in cælum ela-
tus, vt aues supernè volantes, ad terram deciderint. Quin
multò maiora etiam grati animi argumenta extiterunt. Nam
Chalcidenses diu, in eo perseuerarunt, vt nulli Deorum, tem-
plum, nisi Flamminij nomine appposito, dedicarent, vt Hercu-
li: Mineræ: Neptunoue, & Flamminio sacrum inscriberent.

QVOD MORTVI CVM EXTERNIS
Bonis, non amittant Gratiā. XVII.

NON potest, inquiebat, Mors benè merenti lucem
gloriæ eripere, & quasi noctem quandam eius splen-
dori offundere: viuit enim continenter beneficij
memoria in eorum animis, qui beneficium accepe-
runt. Testis est ille Romanarum Mulierum luctus: quæ lu-
nium Brutum, ob Lucretiæ violatam pudicitiam, insigniter
vindictam, annum integrum luxerunt. Testes sunt fumosæ
illæ Heroum imagines, & statux conflatæ, ac deniq; Panegy-
rici aliorum sæculis conscripti.

QVOD

QVOD IN ARMIS VINCERE
munificentia, non minus gloriosum sit, quàm
ferro. XVIII.



RATIONEM præcipitem ex sua sede, inquiebat ab eo exturbari, qui ex bello gratiam exturbaret. eò quòd, in armis non magis de iniuria: quàm de grati animi gloria, sit confligendum. Id etiam Demetrius Asiæ, & Ptolemæus Ægypti Reges, posteris restatum reliquerunt. Nam cùm inter vtrumq; bellum conflatum esset capitale, belli tamen iura vterq; conatus est summa beneficentia, non solum honestare: sed etiam alter alterum superare. Itaq; Ptolemæus cùm Demetrium prælio vicisset, eumq; impedimentis spoliasset, illi Regiam, tentorium, cum alijs opibus, captiuisq; charioribus remisit, non cians inter se de gloria, non de opibus certamen esse. Ptolemæo autem Demetrius cùm gratias egisset, respondit Deum se magnopere orare, vt cito parem ei gratiam pro accepto munere, posset referre. Nec multò post Demetrius Cilem Ptolemæi Ducem collaris signis superauit, quem captum, cum omni aliorum captiuorum manu, dono Regi remisit.

QVOD GRATO VIRO, PLVRIS
quàm vita, sit ipsa Gratia. XIX.




QVONIAM non procacitate linguæ, sed plurimo rerum discrimine, vitæ sordes eluuntur, solitus est dicere, illum nullam habere amicitia gratiam, cui potior sit vita, quàm gratia. Sapienter ille quidem. Testis est, per Antiochi Regis equum, ipsa natura. Siquidem Centaretrus Gallata cùm Regem Antiochum,

tiocum, in prælio occidisset, exultans gloria, Regis equum conscendit, verum ubi equustergo suo domini hostem insidere sensit: statim frænum momordit, atq; citato cursu ad eminentissimum saxum contendit: ab eoq, ut Domino mortuo gratiani referret, se, & insidentem simul hostem præcipitavit. eaq; re docuit, antiquiorem mortalibus grati animi voluntatem esse oportere, sine vita: quam vitam, sine grati animi voluntate.

QVOD BENEFICOS PERSEQVATVR

gratia etiam mortuos.

XX.



INQUIEBAT tantam vim esse gratiæ, ut quæ honorum insignia, in Imperatorum triumphos essent constituta: ea in reſtinctorum funera, non veritus sit Populus Romanus expromere. Enituit hoc animi grati specimen erga Q. Fabium Max. Nam cum quinq; Consulatus benè beateq; administratis decessisset, certatim æs contulit, quò maior ac speciosior, eius funeris pompa duceretur. ex quo non difficile est cognitu, optimum quemq; gloriosius ſepeliri, quàm ignavos vivere.

QVOD NE VERBUM QVIDEM

benè collocatum, premio, & gratia ſit

indignum.

XXI.



QUEM ADMODVM oratio mores effingit hominum: ita morum commendationem habet grati animi voluntas. Inquiebat igitur nullum verbû, apud Principem benè collocatum, ſua vacare mercede, & gratia. Non minus graue quàm laudabile est Philip-

pi Macedonum Regis Testimonium. Hic enim cū, in sub-
hastatione quorundam captiuorum, spectator esset, veste su-
pra gēua collecta sedens: tum captiuorum vnus exclamauit
iura à Philippo violari amicitiae, quod eius amici esset filius.
petijt Philippus vt nomen exprimeret: respondit captiuus ei
soli se dicturum. vicinior igitur factus, vestem, ait, ò Rex,
quā supra gēua collegisti, dimitte: neq; enim ita sedendo
deorem seruas. Hoc verbo audito Philippus, vt amicæ admo-
nitioni gratus esset, captiuum statim, veluti amicum libe-
rauit.

*QVOD IN RESTINCTIS, PRO
virtute reuiuiscat gratiarum gloria. XXII.*



VOD gloriæ principium, ex Gratiarum fonte
trahitur, etsi neq; inuenire, neq; euoluere exitum
quis potest: summum tamen viro forti, inque-
bat, deberi Gratiæ ornamentum. Nam qui
pro publica vtilitate, vitam contemnit, is villicus sit publicæ
laudis, & gloriæ. Quod cum sentiret Solon, legem tulit, vt
qui in bello occubuissent, præmijs honoribusq; eorum filij
publicè alerentur, & instituarentur. Romanorum autem le-
gatis, qui à fidenatibus occisi erant, ex Senatusconsulto,
quia ob Remp. occubuerant, statuae pro
Rostris, posite fuerunt.




QVOD AD POPVLAREM BENE-
uolentiam, nihil sit Principis facilitate, & gratia
accommodatius. XXIII.



AD Interitum, exitiumq; ciuilis discordiæ, nata est in Principe gratia, & morum facilitas. Quare id frequenter in ore habebat, & sermone: popularis quietis officinam esse Principis benignitatem, & gratiam. Nam, ut serenum quietumq; cælum, maria omnia reddit tranquilla, & pacata: ex eoq; cessant omnes fluctuum tempestates, & procellæ: sic ex Principis fronte serenitas, ciuium omnium placantur animi, & ex communi spe, omnium concordia augetur.

QVOD NULLVM MAIVS, AD
Principem, quam beneficentia redeat
uestigal. XXIV.



SCISCITANTI cuidam quod optimum Princeps, ex ciuitate caperet uestigal: quod populus respondit, pendit potius ex honore, quàm ex onere. Id ipsum patet, & Tiberij Cæsaris, & Alexandri Magni testimonio. Ille enim uigentibus amicis, ut prouinciarum augeter uestigalia, dixit esse boni pastoris tondere, non deglubere oues: Hic cum accepisset longè uestigalium plus à ciuitatibus exigì posse, odì respondit olitorem, qui radicitus herbas excidat.

DE VERITATE

TITVLVS XIII.



ALSITATIS prouincia, vt ait Philo est terra: cœlum veritatis domicilium. Illius fame, & fama mortales: huius nectare, & ambrosia victitant superi. itaq; vt lapis Lydius aurum indicat: Sic hominum virtutem, omnipotens veritas. Nec verus quis habetur iuris, & iustitiæ minister, nisi qui censetur abdita, & retrusa intelligere: æqua & iusta operari, atq; vera potius loqui, quàm grata. Veritas enim res est omnium iustissima: dixi quasi validissima. Nam sola omnes humanas cogitationes superat. Ego igitur, quia suauius semper esse duxit vera dicere, quàm audire, eius de veritate sapienter dicta, in hunc ordinem congeffi. Quanti autem sit veritas non solum testis est locupletissimus sapientiæ hic Aristes, sed etiam Antiquitatis Decus Pythagoras. Interrogantibus quippè aliquando amicis, quid mortales Deo faceret similes: veritas respondit. Nihil enim est Deus, nisi lumen ipsum veritatis. Huc pertinet Magorum auctoritas. Nam illi maximum Deorum, quem Oromagden vocabant, corpore quidem asseriebant esse luci similem: anima autem veritati. veritas enim obscurissimam mendatij noctem pællit, eiusq; veluti quodam Sole illuminantur rerum omnes tenebræ. Quapropter veritati famulatur prudentia, eiusq; ministræ sunt omnes scientiæ, & artes ingenuæ. Testis est grauissimus, Senator LAVRENTIVS Pola, cuius in fide, probitate, atq; consilio, tanquàm in sua sede, & domicilio ius omne quiescit, & veritas: quæ in sapientissimo eo Senatore multò est ad imperij incolumitatem, quàm Herculis clara validior.

Nam

Nam Hercules nullam vnquam Clauæ vilitatem accepit, sine pugnæ incendio: L A V R E N T I V S autem Pola plurima iustitiæ, & veritati commoda attulit etiam non pugnando. Ad veritatem autem rutandam, cuius in claustris ars omnis habitat, & doctrina, quia nihil est indiferta oratione languidius, eam dicendi artem sibi comparauit subsidio, vt nihil pro communi vilitate, consueuerit orare, quod statim etiam ab inuito populo, non videatur exorare. Multò quippè maior est, in publici muneris, & officij administratione, eloquentiæ vis, quàm aut in bello armorum, aut in otio, & pace, literarum. Cùm enim nulla ferè res sit, quæ quasi mendacij non aspergatur maculis, vix vlla est aut rei, aut suspicionis infirmitas, cuius medicina non sit, in veritate posita. Sed multa sunt ex sapientissimo eo Principe monimenta veritatis, cuius loci, & quasi Apophthegmatum notæ hæ sunt.

- 1 Quòd Veritatis fucus non sit à Principe ferendus.
 - 2 Quòd Principi nullus sit, Veritate iucundior nuncius.
 - 3 Quòd Res sit insidiosa Veritati opinio.
 - 4 Quòd Res sit gloriosa, rara tamen Veritas.
 - 5 Quòd Principis sit non Verisimilia, sed vera sequi.
 - 6 Quòd Imperium cedat Veritati: non Imperio Veritas.
 - 7 Quòd aut Metus, aut periculi gratia, qua data est fides, non sit deserenda.
 - 8 Quòd Res sit perfida ambitio.
 - 9 Quòd fraudalenta fides, non sit fides.
 - 10 Quòd res sit suspecta, hominum fides.
 - 11 Quòd in Iudicio mendacium veritati cedat, non Veritas mendacio.
 - 12 Quòd Veritas non alia, alijs sit temporibus.
 - 13 Quòd Virtutes omnes, in Veritatis claustris teneantur inclusa.
- Quòd

- 14 *Quòd sine veritatis luce, intermoriantur artes omnes & scientiæ.*
- 15 *Quòd Res sit inuentu difficilis veritas.*
- 16 *Quòd suadendi vis summa sit in veritate.*
- 17 *Quòd Humane coniunctionis nodus, una sit veritas.*
- 18 *Quòd veritas ad Principem maximè pertineat.*
- 19 *Quòd veritas æquè mente, atq; oratione loquentis sit depascenda.*
- 20 *Quòd non debeat esse venalis, sed gratuita veritas.*

QVOD VERITATIS FVCVS NON
Sit à Principe ferendus. I.



TSI res est tam latens, & retrusa veritas, vt Argum etiam sæpè fallat: solitus tamen est dicere, putidum esse Principi, non modo dicere, sed etiam audire, quod à vero sit alienum. audire enim qui non recusat, facit audiendo, vt animi næuos, & rationis nubes, aures hauriat, seq; alterius mendacij plurimis aspergat maculis. Mentiri autem est peruersitatis: mendatium effutire inscitix. illud enim est callidi, & veteratoris: hoc creduli magis, & inconsideranti animi.

QVOD PRINCIPI NVLLVS VERI-
tate iucundior sit nuncius. II.



VERITAS olim filia, siue hæres effingebatur temporis, quo nihil est neq; potentius, neq; sapientius: cuiq; parere semper sapientis est habitum. interrogatus igitur cuius rei, Principi iucundissimus afferri posset nuncius: veritatis respondit. Nam quæ auditu sunt iucunda, sordent omnia sine veritate: quæq;
N sunt

sunt honesta, siue veritatis neruis, & viribus flaccescunt omnia. itaq; nec ars, nec scientia quicquam perhorrescit magis, quàm non obsequi veritati. Hac igitur, vt docet Isocrates, sic debet oblectari Princeps, vt cuncti intelligant, iniurato Principi potius, quàm priuatis simul omnibus iuratis, fidem esse adhibendam.

QVOD RES INSIDIOSA SIT
veritati opinio. III.



QVOD arte fieri debet, id inani opinione tentandum non est. Interrogatus itaq; quid suo maxime noceret auctori: ea respondit, quæ non ex veritate, sed ex caduca, & fallaci opinione sumitur deliberatio. Loquitur id Ixionis fabula. vt enim hic pro Iunone, quàm perditè amabat, nubi se commiscuit, & ex ea Centauros genuit: sic mendacium imaginem induens veritatis, monstra sæpè parit horrenda, & nunquàm ferè auctori suo non ignominiosa.

QVOD RES SIT GLORIOSA:
Raratamen veritas. IV.



TOTA vrbs, hac eius voce sæpè percrebuit, paucorum esse veritatem aspicere: multorum despicere. altero ignaros: altero inuoluit improbos: vtroq; difficultatem culpauit veritatis. Hæc autem quantæ difficultatis sit, ex hoc vno fas est intelligere: quòd Heraclitus Aram veritatis, in Antro: Democritus, in puteo latitare affirmat. Nam ex eo intelligimus, hominum mentem non ante ad veritatem penetrare, quàm ad intimas, & obscuri-

obscurissimas rerum causas sit immerfa: pluraq; videat, quàm Sol ipse oculus mundi, vnquàm viderit. Duce igitur veritate, non solum tollitur errorum infamia: sed etiam crescit virtutum omnium cohors, cum gloria.

*QVOD PRINCIPIS SIT NON
Verisimilia: sed vera sequi. V.*



VONIAM quæque virtus, in Principe efflorescit ingenij laudibus, inquebat non esse Principis verisimilia: sed vera sequi. Etenim neq; prudentiæ astutia: neq; fortitudini audacia quicquam est similis, & tamen nihil est ijs magis renitens, & controuersum. Quare omnes doctrinæ alumni, de veritate in circulis degladiantur. Nam virefcit argumentorum vulnere veritas, elucescitq; disceptationum ventis agitata. Hanc tueri proprium est Principis. Etenim non magis fides, sine veritate: quàm societas humani generis, sine fide, potest consistere.

*QVOD IMPERIVM CEDAT VERI-
tati: non Imperio veritas. VI.*



VM ad dignitatem cuiusdam, qui promoueri ardebat desiderio, eblandita essent, non enucleata suffragia: dixit Candidatum perbellè egisse cum Collegio: pessimè verò collegium cum Principe: quoniam minimè sit Principis, fidem fallere. monuit id ipsum aliquando Macedonum Rex Alexander. Nam cum Parmenio quippiam suadet Alexandro, quod præter fidem ac decorum esset, inculcaretq; sæpius facerem si essem Alexander: & ego respondit Rex, si essem Parmenio. Nulla

utilitas Principi : nulla potentia : nulla victoria tanti esse debet, quæ cum fide, & veritate æquari, aut conferri potest. fidei enim, & iusiurandi sponsores vocantur superi.

QVOD AVT METVS, AVT PERICULI gratia, quæ data est fides, non sit deferenda. XII.



TSI ad optatos exitus, res non prouehitur: illam tamen dicebat nec vi, nec metu extra fidei cancellos debere detrudi. Non minus præclarum, quàm vetus est, apud Romanos M. Attilij testimonium. Hic enim ex seruata fide, tantam consecutus est gloriam: quanta ei vix ex æquari potest ullus victoriæ triumphus. Nam datam hosti fidem maluit, quàm sibi vitam incolumen seruare inuiolatā. Quanquam tamen pro comperto habebat, quantus sibi ad nactem, futurus erat cruciatus.

QVOD RES SIT PERFIDA ambitio. XIII.



VAMQVAM perfidum execrantur, eiq; male precantur omnes: dicebat tamen, in nemine fidem magis desiderari, quàm in eo qui fertur duciturq; inanis gloriæ aura. Nam quid à fide magis alienum esse potest: quàm propter ambitionem à seipso deficere, nec stare naturæ promissis? Sceleratum est in ambitione perfidiæ: vile tamen exemplum. Non enim solum Gener Tarquinius superbus Soceri: sed etiam eius vxor Tullia patris sanguine iura cruentauit naturæ. Nam ille à Genero Tarquinio: est per insidias occisus: illa in patris iacentis cadauer, sceleratè Carpentum egit, vt virum suum Regem saluaret.

ex quo intelligimus, quàm minimè tuta sit ambitiosis fides: quando ex sanguine etiam domestico ipsa exulet.

*QVOD FRAVDVLENTA FIDES,
non sit fides. IX.*



ONSPERSA quasi verborum, sententiarūq; floribus cū sint tanti Principis dicta: tum hoc vnum, non minimum habet ornamenti: salis plurimum. Inquiebat fidem, non fuco, vt res cæteras, commendari: sed statim restingui, & deleri. itaq; vt refert M. Cic. ab ijs cauendum est, qui cū maximè fallunt, id agunt, vt boni viri videantur. Plena sunt nostrorum temporum exempla: sed priscorum memoriam malo reficere. Thraces, vt Ephorus scribit, cum Boetijs inducias certo dierum numero pepigerant: noctu, cū illi in tuto se esse existimarent, agros eorum populabantur. At cū illi violatam fidem conquererentur: negarunt se perperam egisse, cū induciæ dierum pactæ essent, non autem noctium. Sed non agit ex fide: qui agit ex fide fucata.

*QVOD RES SIT SVSPECTA
hominum fides. X.*



VAMQVAM in fide domus est virtutis, & domicilium gloriæ, interroganti tamen quæ fides, in rebus magnis, & periculi plenis, amicis esset habenda, dubia respondit. Nam fides neminem adeò fallit, quàm eum, qui sibi plurimum tribuit. Alcibiades igitur iudicium patriæ refugiens, interroganti cuidam an non fideret intimorum iudicio: ego respondit, ne matri quidem haberem fidem. videret enim ne insciens pro albo

calculo, nigrum immitteret. Nec multum ad rem facit hominum iuramentum. Nam probis iniuratis habenda est fides: improbis ne iuratis quidem.

*QVOD IN IUDICIO MENDACIVM
veritati cedat, non veritas Mendacio. XI.*



N V D A M inquebat esse ab omnibus præsidij, in foro accusationem, sine veritate: Leue, & nugatorium patrociniū, quod reclamare, non parere videtur veritati. Non enim succumbit in iudicio veritas mendacio: sed mendacium veritati. celebris & peruagata est, de ea re fabula. Nam quorsum Dædalicus ille Labyrinthus, in quo Minotaurus à Theseo occisus est? Non plures sunt eius labyrinthi, quàm mendacij anfractus, ex quibus egressum sola nouit inuenire veritas. Ab ea non Minotaurus: sed Rabula tanquàm à Theseo superatur: ac veluti quoddam naturæ monstrum, plurimis in iure, plagis laceratum dirimitur mendacium.

*QVOD VERITAS NON ALIA,
alijs sit temporibus. XII.*



V I A, puto, veritas finem, & modum nescit transire æquitatis, solitus est dicere veritatem, neq; prospero rerum flatu trahi: neq; earum ventis resstantibus retrahi: sed eundem semper cursum tenere boni, & æqui: nec alio loco, aliam esse. id apud veteres bellè notatur per fabulam Arethusæ. Nam quorsum quòd Alpheus Nympham eam, vt volunt Poetæ, sic amauit, vt etiam in fontem commutatam, aduersus æstus maritimos tutò sit

tò sit secutus? res est plena ingenij: doctrinæ minimè inanis. est enim veritas æquitatis non solum ministra, sed etiam pedissequa, faciliusq; mori potest, quàm ab ea reuelli. Alpheus quippè fluuius, mare subterraneo cursu traiecit, ne vndas suas cum marinis misceat. Sic purus, Sincerusq; iuxta Syragusas vberrimo aquarum gurgite, cum Arethusa fonte emergit. Hoc argumentum dedit fabulæ: ex qua intelligimus veritatem non turbari ex rerum procellis: eamq; obscuro aliquo mendacio posse oculi pollui, & contaminari minimè posse.

*QVOD VIRTUTES OMNES IN
veritatis Cancellis teneatur inclusa. XIII.*



INTERROGANTI cuidam, quibus scientiarum claustris, vniuersa Europæ Gymnasia tenerentur inclusa: veritatis respondit. Nulla enim virtus est, neq; in cognitione: neq; in actione: nec deniq; in hominum ore, & sermone, quæ veritate potest vacare. Nam cum natus sit homo potissimum ad agendum, & intelligendum: hominis vita omnis, & industria in inquisitione, & inuestigatione veri videtur esse posita. Quare quemadmodum Nilus fluuiorum omnium, in Ægypto Rex, & Imperator, imbrium loco terram reddit fecundam: ita qui Reip. campus inundatus est veritatis fluctibus, feracissimus redditur virtutum cernit in. Etenim sola veritas men-

tem scientia: voluntatem virtute, ac deniq;

orationem sinceritate potest cu-

mularè, & ornare.

QVOD SINE LVCE VERITATIS
intermoriantur artes omnes, & scien-
tia. XIV.



QVEMADMODVM inquebat, quæ viuunt in terris, omnia ex sole viuendi vim habent: ita ex veritate, artes: scientiæ: actionesq; omnes non solum sui primordia, sed etiam gloriæ suæ ornamenta trahunt. Nec alia de causa, puto, veritas à Poetis censetur esse temporis filia, & Musarum parens. Est enim non solum virtutum procreatrix, sed etiam gloriæ eius, qua ducuntur omnes, alumna. Si igitur par est rationi, vt quæ virtus plus potest, alijs imperet, omnium imperatrix oportet sit veritas. Siquidem in difficultate robur virium cedit orationi: oratio menti: mens autem veritati.

QVOD RES SIT INVENTV
difficilis veritas. XV.



DISCITANTI cuidam, quid inuentu esset difficile: veritas respondit, cuius ars tantum est inuestigatrix, semita prudentia, lampas vero scientia. Itaq; à Græcis Dea est constituta, atq; *Altheia* vocata: cuius hæc, vt Philostratus in Amphiarao scribit, spectabatur imago. Mulier niueis induta vestibus, quæ vir tutis esset mater, filiaq; temporis, cuius ara in imo latebat puti. Dea autem iccirco, puto, ab illis constituitur, vt docerent orbem terrarum veritatis non esse domicilium: sed cælum: illamq; aberrantibus mortalibus exulare: atq; in sinu, & gremio tantum bonorum habitare.

QVOD

*QVOD SVADENDI VIS SVMMA
sit in veritate. XVI.*



MULTA opinionis errore sibi fingere solent, qui ad suadendum, colorem, non admittunt, sine fūco orationis. consuevit igitur dicere optimam, artem suadendi, & magistrā esse non Rhetoricam, sed veritatem. Hæc enim, quia nullo negotio fidem facit, ab antiquis Mercurij coniunx est habita, camq; Ægyptij in Mercurij Sacrificijs, melle, & ficu honestabant, exclamantes γλυκὴ ἡ ἀληθεια· hoc est dulcis veritas. Mel enim liquorum: ficus fructuum omnium ex amarissima planta, est suauissimus. Mel quippè non solum nutrimenti vim habet, sed etiam medicinæ: nec prodest modo viuis, sed etiā mortuis, quia suo liquore delibuta, incorrupta seruat cadauera: atq; vt ficus sine flore fructum: ita veritas fidem, sine apparatu facit verborum.

*QVOD HVMANÆ CONIUNCTIONIS
nodus vna sit veritas. XVII.*



QUOD de fædere humanæ coniunctionis fortè ageretur: interrogantibus quibusdam quod arctissimum esset humani generis vinculum, veritas respondit. Nam si neq; fides sine veritate: neq; sine fide societas humani generis stare potest, quid est in humana societate, dixit, quod veritati non debeat acceptum referre? ita quippè vniuersæ Reip. virtutes, cum veritate tenentur connexæ, vt nulla ante vulnerari possit, quàm non eius cruentè vulnere veritas. In omni igitur rerum administratione, summa hæc est, vt veritas, quemadmodum trito fertur sermone prouerbio, prora sit, & puppis. Nihil enim est extra veritatem, quod non veluti quodam æstu abtorbeatur naufragij.

QVOD

QVOD VERITAS AD PRINCIPEM
maximè pertineat. XVIII.



EC fabulæ, nec Apologi mentiuntur. Aliud enim est artificio: aliud mendacio vii. Nam si neq; ars potest errare: neq; mendacium consistere sine errore, nemo Poësim artem vocat, qui fabulas, & Apologos cum Poësi non vendicet ab omni suspitione mendacij. Nec Plato ille diuinus aliam ob rem, suos libros referſit fabulis, nisi quia fabulæ non ad restinguendam, sed ad illuminandam veritatem, pertinent. At cum illæ tribuantur Poëtis: Physicis medicina: Patronis iurisprudentia, cuidam quærenti, quænam virtus potissimum tribueretur Principi, veritas respondit. Eius enim cum sit in omnium rerum conflictu, & controuersia de veritate iudicare: id nunquam præstabit, nisi veritatis sensus omnes sic teneat, vt iugulata apud alios veritas, possit ex oris eius spiritu reuiuiscere, atq; depressa caput attollere. Quemadmodum igitur cognoscitur aus ex cantu: ita est Principis vnumquenq; inter mortales, ex sua voce cognoscere.

QVOD VERITAS ÆQVE MENTE,
atq; oratione loquentis, sit depascenda. XIX.



VONIAM falsitas, nec in simulationis, nec in dissimulationis artificio diu scit latere: sed statim ipso veritatis splendore, fallaciarum elucescunt tenebræ: inquit nihil neq; veritati magis esse consentaneum: neq; mendacio quicquam esse renitentius, quàm vt menti par esset oratio. Nam si mentiri est contra mentem loqui, non potest

testis non iniuriam inferre veritati, qui etsi verum quod est dicit, id tamen minimè credit. Elegans & euidentis est veritatis in Hieroglyphicis ratio: tacita, non contumeliosa mendacij accusatio. Nam cur Ægyptiorum Sacerdotes, Hieroglyphicum veritatis fecerunt pomum persicum, vna cum folio adhærente: in hoc Symbolo veritatis, non solum adiumenta sunt ingenij, & recunditæ doctrinæ, sed etiam ornamenta dignitatis. Nam cum Pomum illud veluti quoddam specimen habeat humani cordis: foliumq; eius linguæ formam præ se ferat: hanc videtur vtriusq; coniunctio veritatis legem sancire mortalibus, vt non aliud in ore prumptum, aliud in pectore clausum habeatur, quorum in vtroq; succus, & sanguis residet veritatis.

*QVOD NON DEBEAT ESSE
venalis: sed gratuita veritas. XX.*



SOLITVS est in foro Doctores, auri, non veri cupidos, Barros nō suo, sed alieno nomine vocare. Nam qui aurum in causis, non fidem sequuntur: ij, sicuti in fabulis Battus, non sunt iudices veri: sed indices auri. Nota est Lydij lapidis fabula. Niuea est veritas: non inaurata. auro enim non inuestigatur, sed constupratur veritatis integritas. Testis est, Apud Poetas, Danae Nympha, quæ auri cupida, à Ioue in aurei imbris effigiem verso, est compressa. Nihil est, ne longè abeam, in publica rerum administratione, laudabilius veritate. Nam quantum veritas vnum quodq; vel respuit, vel admittit: tantum id omne, aut renitens est, aut adhærens virtuti: qua terminatur rerum omnis doctrina, & morum simul probitas.

DE CLEMENTIA

TITVLVS XIV.



MANSVETVDINEM qui violat, non tam procul videtur ab hominis natura recedere: quàm propè ad immanissimæ bestię feritatem accedere. atqui etsi nihil est humanitas sine misericordia, nisi feritas quædam vocata humanitatis nomine, difficile tamen est simul misereri, & sapere. Siquidem nescit, aiunt, neq; iustitia peccati impunitatem: neq; misericordia supplicij cruciatum pati. At longè alia est rationis auctoritas. Nam & iustitia misericordiæ, & Misericordia iustitiæ expers, non solum deserit, sed etiam amittit nomen virtutis. Solet igitur ille Principis eius laudare clementiam, qui cùm improbis parcat, non officit viris bonis: nec eius iustitiam improbare, qui malit, ex improbis bonos viros, commiserandò reddere: quam ipsos improbos puniendo, perdere. Hac vna virtute potissimū **ALEXANDER** Ruidius summis laudibus in celum effert Card. P. **ALDOBRANDINVM**, nec quidem sine consilio. Nam quemadmodum, qui aliqua crudelitatis macula est contaminatus, plurimis maledictis laceratur inter mortales: ita haud cuiusquàm Principis in imperio, clarior elucescit gloria, quam eius cuius pietate, & beneficentia, sceleratorum nefaria flagitia, non ferro & flamma, sunt restincta, & deleræ. Vt enim Ilij incendium, non est victoriæ vexillum: sed flagitij dedecus, & supplicium: ita sceleratorum medicina in Principe, non sceleris habet infamiam: sed Principis gloriam. Ex hac autem virtute ad splendorem tanti Principis, accedit etiam summi Senatoris **RVIDII** auctoritas, qui

qui ornamentum est sui ordinis, eximium patriæ decus, atq; exemplar veræ germanaq; iustitiæ, & pietatis. In eo quippe dum iuris, & iustitiæ fuit aduocatus, tanta semper fuit auctoritatis acies, tot virtutum ornamenta, tam singularis dignitas, ut eum omnes, non ut curiæ aduocatum, sed ut iustitiæ, & æquitatis propugnatorem acerrimum suspexerint: nunc de mum, non ut Senatorem aliquem, sed ut ornamentum, ac summum præsidium Senatorij ordinis colant, & obseruent. In quo, etsi non parum summæ eius virtuti: plurimum tamen eius sanguini, & generi tribuo. Testis est, ne alitè repetam, CÆSAR Ruidius frater, qui vix adulta adhuc ætate tanta virtute floruit, ut in eo, si fas est, quod sentio, vel potius, quod omnes loquuntur, dicere, videretur eloquentia Demosthenis: Platonis ingenium: Aristotelis doctrina, ac deniq; ars omnis vno societatis vinculo teneri inclusa. Itaq; à Rege Catholico, in Ticinensi Gymnasio, ad summum honoris gradum, in Philosophiæ penetralibus interpretandis euectus, ita se gessit, ut Regiæ dignitati, in eo munere, gloriæ plus attulerit, quàm ex ea dignitate acceperit. Nam si à Grecis vniuersis Pythagoras Samius, in cœlum; effertur laudibus, quod ex Ægypto artes liberales in Græciam adtexit: quibus gloriæ insignibus dignus est CÆSAR Ruidius, qui non artes, non Philosophiam, sed artium, & philosophiæ magistròs, non ex Ægypto, sed recundita, & admirabili disciplina, quasi traxit de cœlo? Multi fuerunt in vno Ruidio Pythagoræ. Nam quid fecit apud Græcos Pythagoras, quod nò multi fecerunt illius disciplinæ alumni? Dum adfuit RVIDIVS, suus fuit Ticinensi Gymnasio Pythagoras, qui ut Ægyptius rerum diuinarum habuit cognitionem: qui ut Chaldeus, Syderum tenuit Cursus: qui ut Græcus, aut potius, ut alter Galenus, artem Medicinæ multis scientiarum dotibus locupletauit. Multum Antiquitas

tiq̃uitas debet Pythagoræ: plurimū hæc nostra ætas RVIDIO, Nam ille rudimenta solum reperit Philosophiæ, hic summa inuenit doctrinæ eius fastigia: inuentaq; illustrauit, & illustrata, publicè palamq; non sine plurimo auditorum faustu docuit. quod si igitur gloriatur Græcia suo Socrate, quia omnium primus eam Philosophiæ partem, quæ in morum est probitate, peperit: Cur suo Italia, non glorietur Ruidio, qui in omni genere Philosophiæ, aut noua inuenit, aut inuenta ab alijs, auxit, vel deniq; aucta meliora fecit? Socrates emendabat Græciam: Socratem Ruidius. frater autem eius ALEXANDER quod Baldus: quod Decius: quod deniq; Summi sapientiæ antistites, memoriæ prodiderunt, id omne mente, & animo deuorauit. Quare is, virtutis, & gloriæ dignitatem, qua Cardinalis ALDOBRANDINVS vulgo celebratur, facile suo auget testimonio, & auctoritate. Quæ autem, in hoc virtutis genere, carptim collegi, ex summo eo Religionis Antistite, Apophthegmata, eorum veluti quædam notæ hæ sunt.

- 1 Quòd clementia virtus sit regia.
- 2 Quòd belli ius, Principis clementia, erga Principem sit depascenda.
- 3 Quòd Belli ingressus acer, & acerbus: clemens laudetur exitus.
- 4 Quòd gloriosius delicta à Principe curentur venia, quàm pœna.
- 5 Quòd clementia, veluti quidam cibus sit regia gloria.
- 6 Quòd pugnae audacia: victoria ornamentum sit clementia.
- 7 Quòd Mansuetudinis nomen, Principi sit gloriosum: res verò necessaria.
- 8 Quòd clementia declarationem habet sapientiæ.
- 9 Quòd mansuetus Princeps maiora præstet tolerando: quàm resistendo.

Quòd

- 10 *Quòd in clementia ambitu, incolumnitas clausa sit Imperij.*
- 11 *Quòd Principi, res sit non tam detestabilis crudelitas: quàm gloriosa mansuetudo.*
- 12 *Quòd post Religionem maximè laudetur, in Principe clementia.*
- 13 *Quòd ex aliena culpa, efflorescat Principis clementia.*
- 14 *Quòd non sit ad culpa supplicium properandum.*
- 15 *Quòd Hostis vincendus, ac vinciendus sit clementia.*
- 16 *Quòd nemini magis, quàm improbo debeat venia.*
- 17 *Quòd iuris alumna, & iustitia socia sit clementia.*
- 18 *Quòd clementia, licet faueat turpibus, impatiens sit turpitudinis.*
- 19 *Quòd in clementia tutela, ars resideat imperandi.*
- 20 *Quòd errantibus Asylum sit Principis misericordia.*
- 21 *Quòd ad clementiam, duo faciant ira remedia.*
- 22 *Quòd vir mansuetus aduersus omnes offensiones, sit armatus.*
- 23 *Quòd abiectis, & supplicibus spes non sit fallenda.*
- 24 *Quòd clementia Principis, popularis gratia sit socia.*

*QVOD CLEMENTIA VIRTVS
sit Regia. I.*



SOLITVS est dicere clementem principem, non solum non lædere, sed ne lædi quidem posse. Nam si iniuria non fit nisi iniuito: mitis, & mansuetus ferendo, crimen tollit iniuriæ. Nihil igitur aliud est Misericordia, quàm diuina quædam erga miserrabiles, miseriarum medicina: quæ virtus singularis est Principis, & propria. Testis est natura, per Apum Regem: qui solus inter omnes apes, caret aculeo: quasi Regis sit non sauitia, sed commiseratione uti. Itaq; Iulius Cæsar tantum studuit cæte-

ros Principes mansuetudine anteire: quantum illis semper conatus est gloria antecellere. omnibus igitur ignouit, post Pharsalicam victoriam, qui ante à se defecerant. Summi enim in vna Principis clementia, resident gloriæ acerui. Nam aliæ virtutes Principi, cum multis sunt communes: clementia sola est Principis.

*QVOD BELLIIVS, PRINCIPIS
clementia, erga Principem sit de-
scendum. II.*



Nexiguum gyrum orationis, res grauis de mansuetudine cum esset compulsa: atq; interrogaret nescio quis, num fas esset, in armis Principem interimi à Principe. imò interemptores respondit, tanquam nefarios sicarios debet vlcisci. itaq; Iulius Cæsar, victo Ptolemæo, & ad mortem compulso: Achillam, & Phocinum Pompei Magni trucidatores iugulauit. Princeps enim erga Principes, sic affici debet, vt nullus sit miser, qui ei non videatur miserabilis, hoc est commiseratione dignus. in quo vno tantum residet gloriæ, vt longe regium magis sit, hostem benignitate vincere, quàm armis superare.

*QVOD BELLII INGRESSVS ACER
& acerbus: clemens laudetur exitus. III.*



ELVNI, & inanes sermones, ab eo semper cum procul absint, grauesq; & pleni virtutis tantum audiuntur: interrogatus aliquando, quæ commiseratio maximè aduersus hostem laudaretur, in principe: quæ respondit, in truci bello est cum iustitia: sine indulgentia,

gentia, & crudelitate. indulgere enim est fatui: in superatos
sæuire bestia: sola autem misericordia virtus est Principis, si-
mul & Dei communis. Itaq; Alexander Magnus, sicuti in pri-
mo belli ingressu erat terribilis: sic parva victoria exstitit sem-
per clementissimus. Quare cum vidisset Darium à proprijs
famulis interemptum, grauitè ingemuit, & Bessum illius
percussorem crudeli supplicio affecit. Darij quoq; corpus
dempta sibi regia chlamyde, qua tunc indutus erat, ornauit,
& ad illius matrem perferri iussit.

QVOD GLORIOSVS DELICTA

*à Principe curentur venia, quàm
pœna. IV.*



VI Princeps non ducitur clementia gloria: ve-
ræ laudis gustum non habet. Quare id eius
percrebruit sermone. Principis esse aliena malè
facta, non malè factis compensare: sed beneficijs
corrigen. Isocrates igitur Regi præcepit, vt delicta non cul-
pæ magnitudine: sed clementia metiretur. Boni enim est me-
dici oleum potius adhibere, quàm ferrum. Iure igitur lau-
datur C. Cæsar, qui ne in prauos animaduertetet, gloriabatur
nullius rei se magis obliuisci, quàm iniuriarum. Non
minus quippè turpia sunt Principi multa sup-
plicia: quàm Medico plurima
funera.



QVOD CLEMENTIA VELVTI
quidam cibus sit Regiæ gloria. V.



CVM penes Principem sit & vitæ, & necis alienæ potestas: asseuerauit aliquando inter eos, qui de Principe, & eius ingenij ornamentis discebant, Principis gloriam nullo virtutis magis, quàm clementiæ pabulo esse depascendam. Hoc ipsum opinor, vt posteritati testatum relinquerent Ægyptiorum Sacerdotes, Leonem Hieroglyphicū fecerunt Principis. Rex enim cum sit ferarum bestiarum: prostratis parcit: in robustos viros sæpe: raro in fœminas: nunquam in pueros sæuitia exardescit, & crudelitate. quo naturæ testimonio admoueri videntur Principes, sua olim gloriæ insignia ab antiquissimis populis ex clementia, & mansuetudine fuisse petita. Nam quo quis propria ope magis destituitur: hoc dignior videtur esse commiseratione.

QVOD PVGNÆ AVDACIA:
victoria ornamentum sit clementia. VI.



QVONIAM vt digladiando miles, ita vir doctus interdum disserendo gloriæ lumen quærit, non veritatis: vis disserendi apud eum, veri pigmentis fucata, parum valet ad fidem: plurimum ad suspicionem faciendam. Quodam igitur supra modum Xerxem Regem Persarum laudante, quod æquæ ad mortem, ac eadem in bello esset expositus, nec vlllo loco, victis etiam hostibus, quiesceret. Dixit æque probari Imperatoris clementiam erga hostes victos, atq; contra pugnantes audaciam, & magnanimitatem. Quare vnice laudatur Annibal. Nam

cuius

eius insidijs cùm perijsset Marcellus, ei mortuo Pœnus anulum quasi virtutis præmium è digito detraxit, cuiusq; cadauer splendide, ac magnificè cremari iussit, & reliquias, ac cineres Romam ad necessari os eius perferri.

*QVOD MANSVETVDINIS NOMEN
Principi sit gloriosum: res verò necessaria. VII.*



ISI ex sua mansuetudine Princeps capiat tranquillitatis plus, quàm ex alienis delictis stomachi: res in arte imperandi, iam non est inclinata, sed funditus euersa. Mansuetudinem itaq; dicebat iure, ab assuescendo esse dictam, quod ad ferenda Imperij incommoda, nemo, nisi qui mansuetus sit videatur assuescere. Hanc igitur Alexander Magnus tanta coluit obseruantia, vt iram vincere gloriosius duceret, quam hostem superare. cò quòd illud semper sit virtutis: hoc sæpè fortunæ. Itaq; vbi ex victoria ditiores facti milites insolescerent: Alexandrumq; interdum maledictis lacerarent: id tamen cùm resciret Alexander, eorum petulantiam modestè, placideq; ferebat, asseuerans regium esse, apud eos potissimum malè audire, apud quos nò cessaret beneficium ponere.

*QVOD CLEMENTIA DECLARATIONEM
habeat sapientia. VIII.*



LEMENTIS nomen est gloriosum: res admirabilis. Nam si Clemens, vt Varroni placet, dicitur, quasi clara mens, nec quicquàm est claritas mentis, nisi ipsa sapientia, qui iure optimo potest, aut dici, aut haberi clemens, nisi sapiens? omittit hoc loco,

quod mihi esset dicendum de CLEMENTE VIII.
 Nam vicit cęlesti, ac diuino suo numine mortalium omnium
 cogitationes. Hac vna illius virtutis luce sapientissimus ille
 Antistes Collustratus, interrogantibus quis esset Clemens, ne-
 mo respondit, nisi qui omni fulgeat virtutum splendore.
 quę omnis sita est in honesti memoria, & inhonesti obliuio-
 ne. Testis est Imperatorię, ac Regię virtutis decus C. Cęsar,
 qui virtutes omnes tenaciter memoria tenebat: iniuriarum
 tantum quamprimum obliuiscēbatur. facile enim eorum
 nos capit obliuio, quę contemnimus: nec ea punimus, quę
 non curamus. Magnanimus autem, nec curat, & contemnit,
 quę sine causa fieri putat. iniuriam igitur pro nihilo ducit:
 auctoresq; iniurię pariter parui pendit.

QVOD MANSVETVS PRINCEPS
maiora præstet tolerando, quàm
remitendo. IX.



FXILE, aridum, concisum, & minutum est in
 iracundis imperandi artificium: licet illi polleant
 ingenio, nec destituantur viribus. Itaq; interro-
 gatus qua arte, imperium ex suis recrearetur in-
 commodis: mansuetudine dixit imperantis. Nec grauis minus
 hæc illius est sententia: quàm salutare Fabij Maximi exem-
 plum. Hic enim in tolerandis aduersis hominum moribus,
 felicissimè populo imperauit. Aiebat autem eum, qui alijs
 imperaret, non verbis, aut verberibus oportere sæuiri: sed
 tolerando, mulcendoq; homines in suam sententiam adduce-
 re: absurdum esse feras bestias à nobis cibo, & blanditijs Ci-
 cures reddi: homines verò metu, & asperitate morum, ad no-
 stri amorem cogi.

QVOD

QVOD IN CLEMENTIÆ AMBITV,
Incolumitas clausa sit Imperij. X.



QVI in Imperio, à clementia deflectit: non deflectere, sed cadere ab eminentissimo dignitatis gradu videtur. Dicebat igitur mansuetum à manu eò esse dictum, quòd Principis sit mansueti, pro rebus vniuersis, manus in Cælum tollere, id est, omni gestis felicitate. Etenim aliud est, se præstare seuerum: aliud sæuum. eò, quòd illud adumbrationem habet iustitiæ: hoc notã crudelitatis, qua nihil est in Principe detestabilius: vtriusq; tamen scopulus, vna cauetur mansuetudine, vel etiam quidam grandius. Nam improbus peccat contra legẽ: inofficiosus contra merita: sæuus cõtra Deum, pietatẽ, & humanitatẽ. Quare qui mansuetudine destituitur: truculentus habetur, & immanis, cuius quàm detestabile, in Principe sit crimen, testes sunt Senatores Romani, qui Romulũ, cũ sæuior esset, & atrocior, discerpserunt: ne ex rege fieret Tyrannus. Nam quem seuerum vix: Sæuum ne vix quidem vnquàm potuissent pati.

QVOD PRINCIPI RES SIT NON
tam detestabilis crudelitas, quàm gloriosa
Mansuetudo. XI.



QVANTA labes, crudelitati inuritur infamiæ: tantum, ad mansuetudinem accedit gloriæ. illam igitur non ad eò vt detestaretur: quàm vt hanc commendaret, multa plurimo sale aspersa effudit. Atq; in primis solitus est dicere, hominem crudellem, naturam exuere hominis: induere bestiæ: si tamen vlla bestia, tantam stragem humano generi, potest infligere: quan-

ta infertur ab homine crudeli. L. Sylla Romanorū omnium crudelissimus, hostium capita licitabatur, maximis propostis præmijs, illis qui proscriptos interemissent: & supplicijs, his, qui occultassent. itaq; L. Syllam Dionysius Halicarnasæus scribit, quadraginta millia Romanorum ciuium voluntario iudicio peremisse, præter illos, qui eo Duce, in prælijs ceciderant.

QVOD POST RELIGIONEM,
maximè laudetur clementia in Principe. XII.



DE virtute Principis, alia opinionis vis est: alia iudicij: alia vox sapientis: alia imperitæ multitudinis: nec idem est sensus rationis, & aurium. Hic enim sæpe falsitati: ille semper auscultat veritati. Solitus autem est dicere, Principem duplici potissimum commendari virtute: religione erga Deum immortalem: & commiseratione erga calamitatem mortalium. Idq; iure optimo. Athenienses igitur Misericordiam, non vt animi affectum: sed tanquam Deam coluerunt, vt intelligerent, opinor, Principes, se diuina etiam præstare, cùm misericordes essent.

QVOD EX ALIENA CVLPA EFFLO-
rescat Principis Clementia. XIII.



QVONIAM qui clementiam deserit, non adeo videtur officium deferere boni viri, quàm vulnerare: consuevit dicere, satius esse nocentem absoluerè: quàm infontem condénare. Atq; cùm notaretur ali quando quòd improbum periculo liberasset, non faui, dixit, impro-

improbis, sed homini: qui nisi esset improbus, nullus relinqueretur, apud eum clementiæ, in quo consisteret locus. Aliena enim culpa Clementiæ, in Principe leges est, & materia.

*QVOD NON SIT AD CVLPÆ
supplicium properandum. XIV.*



VIDAM patronus, qui norat humilia subtiliter: magna grauitur: mediocria temperatè tractare, ne habetior in iure aduersus improbos haberetur, instabat coram iudice, vt statim de scelerato homine, qui in vincula erat coniectus, supplicium sumeretur. At summus ille virtutum Antistes, neq; Medicus, dixit, si Lippitudinem non potest tollere, tollit oculum: neq; bonus iudex, vbi scelus nequit auferre, debet statim scelertum perdere.

*QVOD HOSTIS VINCENDVS, AC
vinciendus sit clementia. XV.*



VM ob singularem sapientiam, in nulla re hostis sit, & peregrinus, interrogatus aliquando à strenuissimo milite, quomodo hostis esset vincendus: si fieri potest, dixit, clementia: sin minus ferro. Hoc ipsum cum sentiret C. Cæsar, dicere est solitus sibi idem esse consilium aduersus hostem: quod pleriq; medicis, contra morbi acerbiteriam. Nam Medici non, nisi tentatis omnibus, ad sectionem descendunt.

QVOD NEMINI MAGIS, QVAM
improbo debeatur venia. XVI.

IN grauitate delicti, si minus hominis, at humanitatis ratio est habenda. Quare cum de impiorum poena infligenda, sermo haberetur: interrogantibus amicis, cuinam esset parcendum, Improbo dixit, ne afflicto addatur afflictio. Nam, vt verus est Pythagoræ sententia, mali plus patitur improbus, ex animi conscientia, quam ex vlllo corporis cruciatu. Quare, vt verus est, ad hæc vsquè nostra tempora, Socratis opinio: nunquam sperare debes te lætaturum, si quid mali feceris.

QVOD IVRIS ALVMNA, ET
Iustitia socia sit clementia. XVII.

MILITE quodam aliquando inimicum, ad certamen lacecente, dixit eos, qui ad arbitrium nutumq; se effingunt sacrosancti iuris, & iustitiæ, nihil minus in offensione, quàm de vindicta cogitare. elucescit ratio, ex veteri mortalium consuetudine. Nam cur olim ex ferro, & ære Deorum non fiebant simulacra, & statuæ? quoniam vt est videre, apud Platonem, tam grata est clementia Deo immortali, vt etiam seges, & materia, ex qua fiunt ad vindictam, bellica instrumentata: Deo sint exosa, & eius pietati controuersa.



QVOD CLEMENTIA LICET

*faueat turpibus, impatiens tamen sit
turpitudinis. XVIII.*



VONIAM ignorantia coniunx, est stu-
por animi: stuporis socia lingua debilitas,
iccirco illi de clementia non solum prauè
sentiunt, sed etiam malè loquuntur, qui
aiunt clementiam turpem videri, quia fauet
turpibus. Cōsuevit igitur ille dicere, clemen-
tiam non solum obsidem esse regiae virtutis, quia eius est par-
cere, cuius est punire: sed etiam ignorantiae inimicam, & tur-
pitudinis: cuius in opinione etiam fuerunt Aegyptij. Nam
cur illi clementiae Hieroglyphicum expresserunt, per Elephan-
tum? vt certè clementiae ostenderent sinceritatem. Nam ele-
phas tanquam impatiens turpitudinis, ita inter animantes,
suum stomachatur, vt interitum facilius, quàm eius gunni-
tum possit pati. itaq; olim Megarenses in bello, fues pice il-
linitos, & mox igne inflāmatos in Antipatri elephantos immi-
serunt: eosq; hoc stratagemate, cū vniuerso exercitu fugarunt.

QVOD IN CLEMENTIAE TVTELA,

ars resideat imperandi. XIX.



VM in vna Dei mansuetudine, spes omnis huma-
nae salutis est posita: tum ea sublata, Reip. admi-
nistratio omnis in discrimem, & periculum voca-
tur. Quare inquiebat clementiam, non solum rem
esse salutatem in Prīncipe, sed etiam suauem, & iucundam.
Testis est iam, non hominum: sed ipsa Dei schola natura.
Cur enim Ros apud Aegyptios Hieroglyphicum est clemen-
tiae? quia sicuti, ex rore fit mel, quod non solum, & sanis ad
paltum.

pastum, & infirmis ad medicinam ministratur: sed etiam mortuis ad diuturnam cadaueris conseruationem additur: ita clementiæ præsidio vniuersa seruantur bonorum genera.

*QVOD ERRANTIBVS ASYLVM
sit Principis Misericordia. XX.*



MISERICORDIA apud Deum, ut ait Philo Iudæus, antiquior est, quàm iustitia: cum antè sceleratos toleret, quàm iudicet. Quare solitus est dicere, nihil esse tam æquum, quàm ad misericordiam refugientes, non reijcere. Est enim Misericordia, Dei templum, quod Athenienses Asylum vocarunt, ex quo nemo poterat ad vindictâ extrahi: dictumq; est iccirco Asylum ab à priuatiua particula, & *eruo* rapio, quòd inde ad supplicium nemo rapi posset.

*QVOD AD CLEMENTIAM DVO
faciunt ira remedia. XXI.*



CVM incunabula clementiæ sint, in minimè irascendo posita, interroganti cuidam quæ essent aduersus iram remedia, duo potissimum respondit, vnum in mora: alterum in silentio. Moram docuit olim Senatus Romanus, qui ut refert Plutarchus, instituit, ut securibus, quæ præferebantur magistratibus, virgarum alligarentur falces: ne temerè eam alteri pœnam infligeret, cuius illum postea frustra peniteret: silentium monstrauit Thendorus Philosophus. Nam cum ab Augusto se missum fieri vellet, rogatus in postremo congressu, ut aliquid quod perti-

neret

neret ad institutionem imperatoris, proderet: monuit Augustum, ut quoties in iram incideret, nihil prius vel ageret, vel diceret, quàm græcum Alphabeticum secum recitaret.

QVOD VIR MANSVETVS, ADVERSUS omnes offensiones sit armatus. XXII.



VM quis de iniuria sibi illata quæreretur: querelarum dixit hæc sunt crimina potius: quàm culpæ. vtenim graue est inferre, sic turpe est nescire iniuriam pati. vir quippè bonus non est, qui malos non tolerat. Mansuetus igitur qui est, aduersus omnes iniurias, est armatus. Nam cum benè fecerit, malè audire non iniuriæ, sed gloriæ sibi ducit. Quare sicuti Maluæ succo aspersus neq; apum, neq; scorpionum aculeis, neq; araneorum moribus lædi potest: ita Mitis qui à mitigando ideo est dictus, quòd summa mitiget hominum odia, nulla redditur deterior iniuria.

QVOD ABIECTIS, ET SVPLICIBUS, spes non sit fallenda. XXIII.



MI SERICORDIA olim apud Persas, sic celebratur, ut nunquàm antè Reus in iudicio damnaretur, quàm de eius virtute ageretur: ne crimen plus ad supplicium: quàm virtus ad præmium videretur habere momenti. Dicebat autem ille neminem esse tam peruersum, qui nulla ex parte posset laudari: proinde graue quiddam esse, & acerbum, supplicem à se abitterre, & excludere. ita sensit Zenocrates Carthaginensis. Nam cum aliquan-

aliquando sederet, in Aprico loco, & Passer, quem ad prædam accipitèr insectabatur, ei in sinum deuolasset: ille passerem, quem cum hilaritate exceperat, statim ubi euolauit accipiter, nudato sinu dimisit: inquires nefas esse, supplicem prodere.

*QVOD CLEMENTIA PRINCIPIS
popularis gratia sit socia. XXIV.*

INTERROGANTI cuidam quæ breuis, & compendiaria esset Principi, ad beneuolentiam populari via: clementia respondit. Nam qui Princeps Clemens est, imperitiæ multitudinis linguam, quæ flabellum est plurimarum contumeliarum: in sui laudem excuit. Testis est Philippus Macedonum Rex. Hic enim cum maledictis, à Nicanore Macedone laceraretur: atq; itèrcò vgeretur ab amicis, vt in illum animaduerneret, non solum negauit Rex: sed etiam ubi accepit, Nicanorem magna laborare inopia: dono ei pecuniam misit. itaq; statim ex petulanti, & maledico, factus est Regis studiosus, & buccinator eius gloriæ. quod tandem illis mirantibus, videris inquit, in manu nostra esse, vt quæ velimus, à populo, de nobis audiamus.

Non est populi in Principem difficilis amor, si modo adsit clementiæ umbra. Nam veteri prouerbio, vt hamo pisces: sic beneficio capiuntur homines.



DE VINDICTA

TITVLVS XV.



VO in Rep. aiebat Democritus esse Numina, sine quibus, ciuilis dirimitur societas: præmium, & pœnam. Etsi enim vindictam non sumere mitis forrè, & beneuoli est Principis: est tamen contra ius, iustitiam à vindicta reuellere: non pietatem colere, sed truculentam plagam iuri, & legibus infligere. Non enim magis vitium supplicio, quàm virtus præmio, in bene instituta Rep. potest vacare. Siquidem nihil est vindicta, nisi iuris confor, & iustitiæ socias. Quod si iudex non debet esse mitior lege, vbi vindictam negligit, legem violat. quid legem violat? imò Sonem deteriore facit. Nam miser quis non supplicio fit, sed peccato. At cùm aliquando de hac Cardinalis ALDOBRANDINI virtute, & gloria multa afferrentur digna cognitu, disputationis tamen plena: non potui, non acquiescere in ore, & sermone FABRICII Boslij. Non quia iurisprudentiam plurimarum artium dotibus locupletauit, vialq; differendi omnes nouiteas, quibus in rerum disceptatione, fuga intercluditur tergiuersantibus: Sed quia in facultate dicendi, quasi alter Carneades, doctrinam cum delectatione fundit earum rerum, quæ aguntur, & dicuntur, in quo sales sunt cæterarum omnium virtutum. Sed quæ partim ab eo, partim ab Alijs, Cardinalis ALDOBRANDINI de vindicta colligere potui Apophthegmata, eorum series hæc est,

Quod

- 1 Quòd nihil graue, & acerbum oleat vindiçta.
- 2 Quòd vindiçtam Principis, populi temeritas vertat in crudelitatem.
- 3 Quòd vir iustus pluris faciat vindiçtam sine vita, quàm vitam sine vindiçta.
- 4 Quòd crimen nullum relinquatur impune.
- 5 Quòd Res momentanea sit peccatum: nota peccati sempiterna.
- 6 Quòd Nemo sit tam improbus, qui supplicio non corrigatur.
- 7 Quòd infontibus tantum, non Amicis, non parentibus parcat vindiçta.
- 8 Quòd inulta esse non debeant, quæ funduntur inutilia.
- 9 Quòd qui Male iudicat, se grauissima pœna condemnet.
- 10 Quòd vir bonus maximè vindiçtam sumat de inimico.
- 11 Quòd ad Deum Immortalem, & Principem solum pertineat vindiçta.
- 12 Quòd suos habeat vindiçta errorum scopulos.
- 13 Quòd vltro suæ impietatis vindiçtam facit, qui Principi inferre iniuriam.
- 14 Quòd minime fas sit, impune peccare.
- 15 Quòd vindiçta non sit pœna delinquentis, sed Medicina:
- 16 Quòd supplicij pœna, sit delicti mensura.

QVOD NIHIL GRAVE ET
acerbum oleat vindiçta. I.



ST aiebat, vindiçtæ nomen suaue, res salutaris. Nec enim supplicium est peccati pœna: sed medicina. Vindiçta igitur iure à vinciendo est dicta, quòd sola virtutum omnium sit vinculum. Quid enim est aut prudentia, nisi fraudulentia: aut temperantia, nisi libidinis: aut iustitia, nisi auaritia: aut deniq; fortitudo,

ritudo, nisi ignauia ultio, & vindicta: poenam qui oderit, non debet is occultare peccatum: sed cauere. Etenim nihil diu potest homines latere. optime id Poetæ. Nam cur veritatem Temporis, & Memoria filiam fecerunt: quia, ut Ægyptiorum Sacerdotes asserunt, alius de alio iudicat dies: superamus autem de omnibus.

QVOD VINDICTAM PRINCIPIS,

Populi temeritas vertat in crudelitatem. II.

NON falso Cato Senior solet prædicare, malle sibi pro beneficio gratiam non haberi: quàm pro maleficio, culpam non expiari supplicio. Nam præmium qui capit, largientem docet esse iustum: qui verò poenas luit sui criminis; ipse ex iniusto fit iustus. Boni igitur cum sit Principis, bonis viris malle præmium dare: quàm ab improbis supplicium exigere, cuidam interroganti quid potissimum Principem ad sæueritatē iudicij, exacueret: populi respondit prauitas. Etenim Alexander Macedonum Rex, ut ab aliorum exemplis recedam, ex minimissimo, propter nefaria populi scelera, acer euasit, & acerbus. Nam donec Darij opes euerit, nemo eo fuit benignior: at ubi deinceps sensit spem impunitatis, in populo magnam esse illecebram peccandi: atq; per insolentiam conspirationes, nocturnosq; in sui cædem tumultus fieri: ex facili, mite, & placido: sæuus, & crudelis factus est.

QVOD

QVOD VIR IVSTVS, PLVRIS FACIAT
*Vindictam sine vita: quàm vitam sine
 vindicta. III.*



VONIAM qui peccanti indulget, dupliciter peccat; semel quia legi derogat, & iustitiæ: iterum quoniam Reus pœna destitutus, ea destituitur medicina, qua par est animi eius morbum curari: solitus est dicere, iusto Principi non minus charam esse vindictam, quàm iustitiam: iustitiæ autem vitam semper esse postpositam. Grande in fabulis, argumentum est veritatis. Nam cur Achilles à Thetide matre Dea admonitus, ne occideret Hectorem, cò quòd post illius necem, sibi statim moriendum esset, voluit potius eius morte, Patroclum amicum ab eo occisum vlcisci, quàm Hectore superstitè, morti non succumbere? quoniam vindicta pars est iustitiæ, sine qua nemo potest respirare, sine turpitudine.

QVOD CRIMEN NVLLVM RELIN-
quatur impunè. IV.



TSI vindicta in Sacrario iuris, sic videtur esse reposita, vt eius metus ad multos, cruciatus ad paucos pertineat: inquebat tamen neminem ex peccato abi re sine supplicio. Nec deest in hac re, antiquitatis auctoritas. Etenim cur apud Homerum, Cacus ob surreptas boues, ab Hercule, bobus recuperatis, est suffocatus? quoniam non est satis, innocentem habere quod suum est: nisi etiam habeat qui nocens est. Quod dicitur de Caco, id est eiulmodi, vt ad improbissimū quemq; possit transferri:

Nam

Nam Cacus si vox ad viuum refecetur, Improbi viri habet interpretationem.

*QVOD RES MOMENTANEA SIT
peccatum: nota peccati sempiterna. V.*



VM inter differentes de vindicta peccati, venisset, dixit multò minus esse mortis supplicium, quàm peccati delictum. Partim quia moriens potest esse felix, non potest peccans, non esse miser: partim quoniam mortis pœna, vno definitur momento temporis: peccati verò nota etiam perexiguus, vix vllò abstergitur seculò. Ad rem non inelegans est fabula. Nam quare Coruus, si Poetis credimus, ex albo in nigrum est commutatus? non quia quod falsum: sed quoniam quod verum erat, non loco, protulit. Itaq; leuissimi etiam peccati, vt videre est Corui testimonio, sempiterna sæpe est macula.

*QVOD NEMO SIT TAM IMPROBUS,
qui supplicio non corrigatur. VI.*



NQVIEBAT nihil esse flagitiosis indulgere, nisi ius, & iustitiam iugulare: nihil improbos defendere, nisi bonos viros oppugnare. quæ quidem res non est misericordiæ, sed extremæ crudelitatis. Quocirca grauius sæpe peccant, qui peccatum non puniunt, quàm qui committunt. Tanta quippè est vindictæ utilitas, vt non solum eius pœna sit delicti commissi medicina: sed etiam cautio tacita futuri. Nam quorsum, si sapientes consulimus, Malus Punica in Hieroglyphicis, Cuncto ad medullam per medium adacta: habet Symbolum ex

P suppli-

supplittio correctionis significationem. Hæc enim arbor fructus pariens acidus, si cunco, ex pinu, ducto, vsque ad medullam transfigatur, fructus ex acidis, & austeris, in dulces, & suaves conuertit. ex quo admoneri videmur, neminem magis nosce, quàm qui dat pœnas sui sceleris, malis bene uti.

QVOD INSONTIBVS TANTVM:

*non amicis, non parentibus parcat
vindicta.* VII.



VM ageretur de scelerati hominis iudicio, & pœna: atq; in hydriam ab ipso Senatu, attriti omnes coniecti essent calculi, tum fautori cuidam eius interroganti, cuinam igitur esset parcendum: si ei non parceretur, cuius pœna displiceret multis. Dixit non amicitiae esse parcendum, non sanguini, sed innocentiae: Satiuscq; esse improbi vnus supplicio, multorum arcere improbitatem: quàm propter multos improbos, vni parcere. Zaleucus itaq; qui legem locris cùm statuisset, vt qui in adulterio essent deprehensi, ijs eruerentur oculi: eamq; legem filius violasset: tandem veniam rogante populo, iussit, vt aliquid videretur facere in gratiam populi, filio vnum, sibi alterum oculum erui: quò & populo, & legi simul obtemperaret.

QVOD INVLTA ESSE NON DEBENT.

quæ funduntur inutilia. VIII.



NON magni interest quàm singulari verborum apparatu quid dicatur: sed quàm munita ratione, & quàm verè dicatur. itaq; eos non solum censura, sed etiam pœna dicebat esse dignos, qui suauia scriberent,

berent, non vilia. sic Lacedæmonij Archilochum Poetam ex vrbe eiecerunt, quod carmen scripserat, in quo ostendi videbatur satius esse, in prælio, arma: quàm vitam amittere. Non enim virtus vitæ: sed vita virtutis gratia seruanda est.

*QVOD QVI MALE IVDICATA, SE
Grauissima pœna condemnat. IX.*



CV M quis se muneribus in amorem iudicis insinuasset, magisq; amici corruptelam, quàm ipsum amicum diligeret: Iudex partes agens potius patroni, quam iudicis, interrogauit fortè, cuius legis, & iudicij grauissima esset pœna: malè ius respondit, dicens. ita Cambyfes Rex peruersi cuiusdam iudicis, ex corpore pellem detractam sellæ intendit: in eaq; filium iudicaturum sedere iussit. Hoc nouo supplicij genere, ne iudices corrumpi possent, in posterum cauit.

*QVOD VIR BONVS MAXIME, VIN-
dictam sumat de inimico. X.*



NE QVE in oratione languidum est eius ingenij Lumen: neq; ipsa oratio morosa sapientiæ interpret. Interroganti num priuatis etiam hominibus licita esset vindicta: certè quidem, sed ea, in primis dixit, quæ à Diogene præscribitur. Hic enim sciscitantibus, quomodo quis in dicta causa, posset vindictam de inimico sumere: si bonû virum is, respondit, se præstiterit. Nihil enim inimicus minus potest pati, quàm laudem, & gloriam inimici. Quare vir bonus vincit ferendo;

vicusq; redditur victore superior. Nam iniuriam accipiens potest esse beatus: inferens non potest non esse miser, & infelix.

*QVOD AD DEVM IMMORTALEM
& Principem solum pertineat vindicta. XI.*



CV M nullum sit peccatum nisi contra ius: nullaq; nisi peccati vindicta: nihil inquitur esse rationi tam consequens, quam ut penes Deum, & Principem vindictæ omnis esset auctoritas. Nam duplex est ius, diuinum vnum, quod est Dei immortalis: Alterum quod vocant positivum, quia poni potest, & tolli, quod est Principis. vindictam igitur aduersus inimicum, qui sibi usurpat, non fit vindex, sed depopulator iniustus: quoniam, & Deum, & Principem spoliatur suo iure. Nam vindicta, ut asserit Plato, est per quam iniuria omnis vlciscendo propulsatur, non autem defendendo. Et enim hoc interest inter defendere, & vlcisci, quod illud est privatae etiam personæ: hoc tantum publicæ.

*QVOD SVOS HABEAT VINDICTA
errorum scopulos. XII.*



INTERROGANTI cuidam quam in Principe probaret vindictam: illam respondit, in qua ius neq; relanguescit indulgentia, neq; effertur crudelitate. illa quippè qui labitur, condonando derogat legi: hac qui seducitur, legem obsequio non colit, sed obruit scelere. probanda est igitur iudicij severitas. Hac enim iudex non læuus redditur, sed semper verus.

QVOD

QVOD VLTRO SVÆ IMPIETATIS
vindictam facit, qui Principi infert iniuriam.

X I I I.



QVÆ ab alijs fit Principi iniuria, summis in auctorem, vindictæ acerbitatibus est inuoluta. Consuevit igitur dicere illum, qui aduersaretur Principi, suo se gladio iugulare. Vetus est exemplorum auctoritas: nec in Hieroglyphicis muta est ad hanc rem & elinguis natura. Nam cur Ægyptiorum sacerdotes Regiæ vindictæ Hieroglyphicum, per Leonem telo transfixum fecerunt? Neque Leo, neq; Princeps scit, aut beneficentia, aut iniuria vinci. Illud omitto: hoc ita patet, vt qui studeat principem lædere, seipsum studeat destruere. Non est, de Leone, res obscura, aut tacita. Ferunt enim Iubæ Maurorum Regi iuuenem præstantis animi fuisse Comitem, dum per deserta, & inculta Africæ loca exercitum trajiceret: Leonem verò ab eo iuvene, ex armatorum manu, qui fortè occurrerat, sagitta trasissum fuisse, vulnusq; suum tunc, se in sylvas recipiendo dissimulasse: anno verò iam elapso, cum Rex Iuba, rebus ex voto compositis, eadem via copias traduceret, illum Leonem, obseruato iuvene,

à quo vulnus acceperat, per medium exercitum, repente irruisse, atq; ex tam ingenti militum nu-

mero percussorem inuasisse sic, vt illum ante

tè in partes discerplerit, quàm quis

in ipso exercitu, posset adesse

Iuveni,

QVOD MINIME FAS SIT
impune peccare. XIV.



VIA mori sæpe fas est: nunquam peccare, potiusq; est moriédum, quàm peccandum, peccati nulla est excusatio. Cum autem alterum naturæ: alterú moribus sit renitens: illudq; improbo: hoc bono viro longè sit difficilius, quærenti, quæ res omnium esset difficillima, crimen respondit, impunè abire. Nescit. n. virtus. Nescit Natura iniuriam inultam pati. Itaq; T. Manlius Torquatus eò reiecit consulatum, quòd neq; Manlius posset ferre populi vitia: neq; Populus Manlij feueritatem. videtur item esse contra naturæ ius, peccatum inultum remanere. Siquidem & apes, qui hominem pupugit, amisso aculeo interit: & Scorpio collitus, atq; vulneri, quod homini infixit, appositus dolorem tollit vulneris: atq; sicuti hæud quicquam, apud medicos vsitatum est magis, quàm ex venenatis bestijs, remedium capere veneni: ita diuinis, humanisq; legibus comparatum est, ex improborum supplicio, medicinam sumere improbitatis.

QVOD VINDICTA NON SIT POENA
delinquentis, sed medicina. XV.



NQVIEBAT vindictam fells naturæ esse simillimam. vtraq; n. amara est: salutaris tamen. Altera sua acritate sensum exacuit oculorum: sanguinem purgat, & attenuat, vniuersumq; corpus prauis humoribus abstergit: altera suo morsu pariter, & acerbitate, ex peccantis animo, sordes omnes tollit vitiorum. Quare Laocon apud Spartanos, nemini parcebat erranti: cūq; lucens

luens pœnas quidam exclamasset peccauit inuitè, castigare igitur dixit, & inuitè. Improbis .n. à supplicio, & pœna crepus, deteriori est conditione: quàm ægrotus medicina, & salutis præsidio destitutus. Quare quò Princeps est populi amas magis, & studiosus, eò in eius erratis expiandis est seuerior. Pœna .n. curatur animus: perditur vitio. Sed cauendum est, ne vindicationis amore, ex seueritate ad crudelitatem, Principi pateat aditus. Sic .n. Derbices vindictæ insaniuerunt studio, vt delicta omnia, vel minima vltimo expiarent supplicio.

QVOD SVPPPLICII POENA.

fit delicti mensura. XVI.



CONFERT & sordidis, & honestis viris Principis vindicta: qua vt medicina, non homines, sed morbi tolluntur hominum: illis ne alios lædant: his, ne ab aliis lædantur. Interrogatus igitur quanta deberet esse pœna, quantum respondit est ipsum peccatum. Nihil .n. est vindicta, nisi peccati cum supplicio æstimatione par, & mensura. At peccatum semper est nimis, nec corrigi potest, nisi sublatum: quia in peccati genere quod parum est, non reperitur. Res est igitur summæ artis, & diuini propè consilij, parem delicto pœnam inuenire.



DE FORTITVDINE

TITVLVS XVI.



FORTEM, & prudentem simul aliquem reperire est difficile. Nam vtriusque causæ sunt contrariæ. Dilutus quippè sanguis, & tenuis prudentiæ: crassus, & niger fortitudinis, in homine habet significationem. Nec ambæ illæ virtutes eiusdem sunt ætatis. Nam prudentia senili; fortitudo iuuenili viget etate. Nihil autem est in externis malis, quod fortem perterreat. Etenim qui mortem, & dolorem contemnit, quid est, cum nihil neque in corpore, neque in fortuna, mali constituat, quod in ijs magnopere possit timere? Quia fortitudo, virtus est pugnans pro æquitate, qui fortis est, non periculum timet, sed dedecus. Victus igitur laudatur, quia non timuit mori: vincens etiam alios ad laudem excitat, quia nihil quod contra ius est, sustinet. Solus habet artem audiendi, & timendi. Nam vbi audet temerarius, ibi timet fortis: & vbi timidus perhorrescit, ibi effertur audacia fortis. omnia enim audere, est infantiæ: nihil audere desperationis: audere vbi est timendum temeritatis: timere verò vbi est audendum fracti, & remissi animi: horum omnium ars, & scientia in vna fortitudine est posita. Nihil tamen magis, in fortitudine, quàm metus improbat. Non enim quia res sunt difficiles, eas sæpè timent mortales: Sed quia timent, redduntur difficiles. Fit igitur plerunq; vt plus sit in timore, quàm in eo, quod timetur, mali: Nec ferro vinci, nec malis artibus decipi, scit vir fortis: nec patientia dedecus pati:

peri.

periculoque succumbere, omni morte tristius ducit. In bello igitur æque est ad mortem, atque ad cædem paratus. Non enim, ut inquit Plato, vita ætate longa: sed virtute aucta, feliciter terminatur. Quare nemo est vir fortis, cui non crescit animus cum ipsa rerum difficultate. Nam si in armis aut vi, aut dolo superandus est hostis, nunquam fortitudo audacia debet vacare. Nam sine audaciæ præsidio, ut ait Thucydides, nullus dolus valet contra periculum. Ad huius autem virtutis gloriam Cardinali ALDOBRANDINO veluti quidam cumulus accedit singularis GEORGII RIPA Senatoris auctoritas. Nam si ea laus omnis, quæ ab impuris hominibus profiscitur, contumeliosa est, quia nihil, quod non turpe sit, & putidum, probant: illa demum, qua Cardinalis ALDOBRANDINVS à GEORGIO RIPA sapientissimo Senatore celebratur, plena est auctoritatis, & gloriæ, quia cum iudicij, & virtutis testimonio est coniuncta. Hic enim vnus est Senator, qui non minus fide probatur, quàm eloquentia: quique non ingenium doctrina: sed doctrinam omnem decorauit ingenio. Nam in eo fax illa Promethei de cælo accensa, ad omnes controuersiarum tenebras illuminandas elucescit. Quare lubens, iam tanto viri auspicio, ad Apophthegmata venio.

- 1 Quòd Imperij tutela fidissima sit, in vna fortitudine posita.
- 2 Quòd fortitudo temperantia, in Imperio sit anteponenda.
- 3 Quòd fortitudo in periculis, Lydius lapis sit amicitia.
- 4 Quòd fortitudo virtus singularis sit Principis.

Quòd

- 5 Quòd in Bello, animi robur præstat corporis viribus.
- 6 Quòd Imperator, non vitam in bello, sed victoriam cures.
- 7 Quòd nulla apud virum fortem, sit Minantis auctoritas.
- 8 Quòd quò res sit periculosa magis, eò gravior sit viro forti.
- 9 Quòd fortem qui lace scat, suo se iugulet gladio.
- 10 Quòd fortitudo aduersus timorem, animi sit armatura.
- 11 Quòd viro forti quantum detrahitur: tantum addatur animi.
- 12 Quòd Rara res sit fortitudo: umbra fortitudinis frequens.
- 13 Quòd Principis gloria una fortitudine sit depascenda.
- 14 Quòd in hoste non virium robur: sed animi timenda sit fortitudo.
- 15 Quòd vir fortis non videatur posse in exilium detrudi.
- 16 Quòd viro forti, ne minimus quidem inimicus sit contemnendus.
- 17 Quòd viro forti nulla lingua sit procacitas.

QVOD IMPERII TVTELA FIDISSIMA
sit in una fortitudine. I.

INCVNABVLÀ Reip. & disciplinæ militaris
 cùm trahantur ab vno Hercule, interrogati cuidam
 qualis deberet esse Princeps: fortis, respondit. Offici-
 um .n. Principis non solum versatur circa difficilia:
 sed etiam circa terribilia. Solitus igitur est Tiberius Cæsar di-
 cere: cùm inter amicos ageret, nescitis quanta sit bellua, quâ-
 que multorum capitum, imperium. Tutius quippè est lu-
 pum, veteri prouerbio, auribus tenere, quâ populo imperare.

QVOD FORTITVDO, TEMPERAN-
tia, in imperio, sit anteponenda. II.

ILLIVS oratio quocunq; ingreditur, eodem semper
 instructu sapientie, ornatuq; est comitata. Interrogan-
 ti igitur

ti igitur, cùm de militari disciplina ageretur, cur fortitudo præstantior esset, quàm temperantia: quia respondit fortitudo ad bonum commune: ad priuatum magis spectat temperantia. Nec id artis solum: sed etiam naturæ, quæ nescit mentiri, conuincimus testimonio. Nam cùm sensus eò maiori commendantur voluptate, quò magis sunt necessarij, cur in re uenerea plus, quàm in alimenti necessitate, est voluptatis? ut cerè natura magistra intelligamus, quia altera priuatæ: altera publicæ consulit utilitati, publicum bonum semper priuato esse anteponendum.

*QVOD FORTITVDO IN PERICVLIS,
Lydius lapis sit amicitia. III.*



A probatur maximè oratio, quæ in sensus eorum, qui audiunt cum virtutis aculeo influit. Solitus autem est dicere, amicum ab amico in periculis deferri, non culpam esse ignauitæ: sed crimen perfidiæ. Non vacat vox ista, apud multos, iudicij gloria: quam sua auctoritate non debilitat, vel auget potius ipse Solon. Nam legem sanciuit, qua capite puniebatur, qui in ciuili seditione, neutram partem esset securus: eò quòd patriæ, in qua, communis teneretur ciuium omnium amicitia, quaque nihil est amabilius, videretur non desertor, sed proditor.

*QVOD FORTITVDO VIRTVS
singularis sit Principis. IV.*



ERBIS eius obscurissima quæq; doctrinæ documenta, quia solent illuminari, illis non est hoc loco obdormiendum. Interrogatus quippè quo fortitudinis

diuis studio duci deberet Imperator: eo dixit, quo ferebatür Pelopedas Thebanus Imperator. Nam cū aliquando hic, in expeditionem proficisceretur, eiq; vxor quam vnicè diligebat, profusis lachrymis supplicaret, vt saluti suæ consulere. Non est respondit, Imperatoris: sed priuati militis, suam salutem defendere: Huius enim officium est, se ab hoste regere: illius vniuersum exercitum incolumem seruare.

QVOD IN BELLO, ANIMI ROBVR
præstat corporis viribus. V.



VNQVAM tot occupationibus est inuolutus, vt si modo respirare possit, non videatur quod consonet publicæ vilitati, spirare. De re igitur bellicâ cū fortè incidisset oratio, dixit virum fortem in bello, longo interuallo, Robusto esse anteponendum: eò quòd corporis viribus pugnamus: animi robore vincimus. Quapropter si Polydamus pugil, qui tanti fuit roboris, vt montem in specum decidentem, voluerit suis humeris sustentare, cum Scēna Centurione certasset, Robustus certè ille, forti succubuisset imbecillo.

QVOD IMPERATOR NON VITAM
in bello, sed victoriam curet. VI.



AVD vnquam est præcisa, & ieiuna oratio, quæ ab eo funditur, cum multorum documentò, & iucunditate. vbi inclinatis his temporibus de periculo reip. ageretur, interrogareturq; quid, in armis maximè timere debet Imperator: non mortem dixit, sed

sed infamiam. comprobatur hæc eius sententia, grauissimo Epaminundæ Thebanorum Imperatoris exemplo. Nam cum cerneret, in extremo prælio, ad Mantineam, Hostium vires, in se vnum, sic esse conuersas, vt aut sibi, aut exercitui esset pereundum: restitit inuicto animo, donec exercitum suum victorem reddidit. Verum Sparo ad necem traiectus, sensim ad suos se recepit, atq; postquam accepit suos, profligatis hostibus, victores euasisse: satis diu, dixit, vixi: deinde sparum sibi euelli iussit, quo euulso, statim anima, cum sanguine effluxit.

*QVOD NULLA APVD VIRVM
fortem sit minantis auctoritas. VII.*



IRATO nullus est tantus dolor iniustus: vt vlla eius apud fortē, minantis sit auctoritas. Fortem igitur virum dicebat adamanti, qui neq; ferro infringi, neq; igne absumi potest esse simillimum. Minantem autem, qui à minuendo est dictus, ideo vir fortis non timet, quia virtus eius non potest minui. Sic Leonidas Persæ cuidam minitanti, quòd ipsi Lacedæmonij postero die, ex telorum multitudine solem non essent visuri: in vmbra igitur, respondit, commodius pugnabimus.



QVOD

QVOD QVO RES SIT PERICVLOSA
Magis, eò gratior sit viro forti. VIII.



ON est Princeps fortis, in armis, sine consilio: cum animo etiam plurimo. dicebat igitur illum in periculi flamma, non fugere periculum: sed sequi gloriam. itaq; Pædaretus signa cum Hoste collaturus cuidam dicenti magnum esse hostiū numerū, tanto inquit gloriæ plus referemus: quanto plures interficiemus.

QVOD FORTEM QVI LACESCAT,
suo se ingulet gladio. IX.



UEMADMODVM Brasidas vir magnanimus eadem hasta, quam è vulnere eduxerat, hostem interemit: ita nemo, dicebat, fortis est, qui hostium vim, & impetum non retorqueat in ipsos hostes. Sic Theseus in eodem Labyrintho Minotaurum mactavit: in quo ipse Minotaurus mortales interclusos laniabat. Hac opinione ductus Hercules, viam voluptatis facilem, & expeditam spreuit: virtutis arduam, & horridam arripuit, ex qua monstrorum non solum domitor: Sed etiam triumphator euasit.

QVOD FORTITVDO ADVERSVS
Timorem animi sit armatura. X.



B eo semper exit ingenij notis insignita oratio: cum quis igitur benè loricated congressum cum hoste subterfugeret: dixit non lorica animum con-

tra timorem, armari: sed fortitudine. Hæc itaq; tanti olim, est habita, vt ea sola à Romanis, virtutis nomine à viro sit appellata: quòd viri singularis sit, & propria. Nec aliam ob rem, Græci fortitudinem *τὴν ἀνδρείαν*, vocant, nisi vt doceant virum sine fortitudine, non solum dignitate, sed etiam viri exinaniri nomine.

QVOD VIRO FORTI QVANTVM

detrahitur: tantum addatur animi.

XI.



NQVIEBAT virtutis aciem hebescere incōmodis: solam fortitudinem virefcere vulnere. Est enim fortitudo animi armatura, quæ ferro non potest penetrari: nec vllō modo vinci: qua qui est indutus, in ipso etiam exultat doloris cruciatu. Testis est ille Mutius, cui scæuolæ, cò quòd læua, propter dextram inflammatam, vteretur, cognomen fuit. Hic enim Porſenæ castra ingressus regium scribam, pro rege interfecerat. captus igitur atq; sui erroris admonitus, dextram flammis iniecit, vt ea parte, qua erratum erat, à seipſo pœnam exigeret. viſum est id ſpectaculum, cum cæteris, tum ipſi regi plenum horroris. itaq; Rex vnus Romani ciuis virtute territus, pacem reddidit vniuerſæ ciuitati, urbemq; ſoluit obſidione,

QVOD RARA RES SIT FORTITVDO:

umbra fortitudinis frequens.

XII.



VIA non potest dici, quàm iaceat turbulētis his temporibus, fortitudo: quantoq; fūco contra vmbra clareſcat fortitudinis, quærentibus amicis quis

nunc demum esset fortis: Nemo respondit, nisi qui Horatio Cocha sit simillimus. Sapienter ille quidem. Nam cum fortitudo ex duobus maximè consistat, ex susceptione periculorum, & perpeſsione malorum: viroq; Claruit Horatius Cordes. In altero enim omnem Hetruscorum vim solus tandiu sustinuit, quoad pons, quo Hostes erant in urbem irrepturi, fuisset ab ijs, qui à tergo erant, abreptus: in altero autem à suis exclusus, hostium impetus non sustinens, in subicium Tiberim armatū se præcipitavit, atq; incolumis ad suos enatauit.

*QVOD PRINCIPIS GLORIA, VNA
Fortitudine sit depascenda. XIII.*



EMO, aiebat, magis Principem videtur incesto ore lacerare, quàm qui Principi laudem tribuendo: Principis tamen fortitudinem incoluit silentio. nec falso quidem. Nam tota ars Imperandi, in fortitudinis claustris tenetur inclusa. Non obscura, aut vulgaris est Agesilai auctoritas. Nam percontanti quousq; fines paterent, apud Lacedæmones imperij: ille hasta vibrata, respondit, quousq; hæc potest vibrari. Qui enim fortis est Princeps, nouit non solum & in pace sustinere, & in bello defendere: Sed etiam, re iam inclinata, & prope perditā, augere imperium.

*QVOD IN HOSTE NON VIRIVM
Robur: sed animi timenda sit fortitudo. XIV.*

VM quis in eum inueheretur, qui plurimum haberet animi, non minimum consilij: vide dixit ne Leonem in te excites dormientem. Neq; enim Leo: neq; vir fortis

vir fortis scit superari: faciliusq; potest mori, quàm perterrerì. præclarum est Marci Seruiliij testimonium, qui vicies, & ter amplius singulari certamine pugnavit, ac semper victor in castra est reuersus, hostili spolio onustus. Neq; per leonem obsecrum est naturæ Monumentum: qui mauult in conflictu mori, quàm turpiter vulnera vitare. Neq; forti viro grauis videtur mors, si honesta sit modo: vt aliquando docuit ille Lacon. Insidijs enim ab Iphicrate Atheniensium Duce interclusus, interrogantibus militibus, quid esset in re tam profligata agendum: nihil aliud dixit, nisi vt vos vestræ saluti consulatis; ego verò fortiter pugnando gloriosè moriar.

*QVOD VIR FORTIS NON VIDEATUR
posse, in exilium detrudi. XV.*



VM fortè de exilio ageretur, sciscitantibus amicis cur omne solum forti, vt veteri fertur prouerbio, patria sit: quia dixit, vbi bonum, ibi patria: sed forti nihil vsquàm potest accidere mali, cum vniuersa lucro habeat mala: ergo nunquam exulat, cui vbiq; est patria. Huc accedit, q; nullo locorum interuallo reuellitur, à suo munere, & officio, eò quòd vbiq; gèrium digladiandum est. Etenim nihil est ipse mundus, nisi elementorum dissidium: nihil hominum vita, nisi appetitus cum ratione, societas insidiosa: nihil Resp. nisi personarum discrimen, quarum aliæ imperio, aliæ ducuntur obsequio. Forti igitur soli vita est gloriosa. Nam is in terræ globo: tanquàm in acerrimi certaminis theatro consistit: in cœli medio, ex quo effugere non potest, nisi aut victor, aut victus. vir igitur fortis, Mas quasi Mars bellandi Deus ab antiquis dicebatur: eò quòd victores summo in cœlum rapiuntur triumpho: victi ad inferos detruduntur cum cruciatu, & opprobrio.

Q VOD

*QVOD VIRO FORTI, NE MINIMVS
quidem inimicus; sit contemnendus. XVI.*



AM incudem à viro forti inquebat tundi oportere, vt etiam minimus hostis caueretur. potuit enim aliquando paruus Culex, vt est in Apologis, Leoni non minimum facescere negotij, sensimulq; eos, qui grandes & potentes viros prostrarunt, ab homonculis interdum fuisse prostratos. Qui enim Italiam vicit Annibal, Capuæ à muliercula victus est. quid? Hercules orbis terræ victor, ab vna victus est Deianira. Quare fortis est, non qui hostes modo superat, sed etiam qui superior voluptatibus existit: parumq; est vim repellere, nisi etiam dolus caueatur. illa in malis: hic in voluptatibus magis delirescit. estq; hic maximè cauendus. Nam vt vires ingenio: sic ingenium facile superatur voluptate.

*QVOD VIRO FORTI NULLA
lingue sit procacitas. XVII.*



OLITVS est dicere virtutem esse multæ industriæ, & magni laboris: sermonis verò minimi. ea re Lucius Dentatus, Achilles Romanus est appellatus. Non enim linguâ, sed manus pugnando mouebat, ne canes ignauos, sed Leones videretur imitari. Nam canis timidus vehementius latrat, quàm mordet. Quemadmodum igitur olim umbrici in bello aduersus hostes, turpissimum esse ducebant victum viuere, atq; iccirco necesse esse aut vincere, aut mori: ita vir fortis mauult virtutem sine vita: quam vitam sine virtute.

MAGNANIMITATE

SIVE HONORE

TITVLVS XVII.



MAGNANIMITAS, vt ait Aristoteles, virtus est, per quam vtraq; fortuna: decusq; & ignominia fertur. Nam si magnanimus quis fuerit, nunquam, vt ait Seneca, iudicabit sibi contumeliam fieri: cūmq; inimicum habebit, in sua potestate: vindictam putabit potuisse vindicare. Magnum enim, & gloriosum est vindictæ genus, ignoscere. Hac virtute qui est præditus tendit ad ardua: nec pericula appetit, vt temerarius: nec formidat, vt timidus. magna enim contemnit, mediocriaq; mauult, quàm quæ sunt nimia. Quicquid cadere in hominem potest, id omne vincit ferendo. itaq; Pittacus Mitilæ-næus sic Prudentiam, & Magnanimitatem distrahebat: vt illius esse diceret, ne quid mali fieret cauere: huius autem si quid accidisset, moderate, & leniter ferre. Hanc autem virtutem Optimus Senator **MARIVS** Conradus tanta semper in Cardinali **ALDOBRANDINO** coluit obseruantia, vt diceret eorum magis esse metuendam inuidiam, qui tantam virtutem silentio obruerent: quàm eorum fidem esse laudandā, qui illam laudibus in cælum tollerent. Neq; enim adhuc inuidus vllus est repertus, qui ex alieno bono tantum hauserit acerbitalis, quantum, ex Religiosissimi Principis fructuosissima hac virtute Conradus Senator capit voluptatis. De ea quippè ita sæpè locutus est, vt non solum Cœlestis, &

diuina videretur eius virtus: Sed etiam is aliquo duci numinis afflatu, cum de ea loqueretur. quæ res me ad scribendum, quæ in hoc genere collegi Apophthegmata, fecit liberiorem.

- 1 Quod & spes, & metus apud Magnanimum, minimum habeat auctoritatis.
- 2 Quod honore sit depascenda virtus.
- 3 Quod gloria etiam fugientem sequatur virtutem.
- 4 Quod virtutis honor, non in verbis, sed in factis maximè consistat.
- 5 Quod Magnanimitas sit virtutum omnium decus. (Vlcisci.
- 6 Quod Magnanimus malit iniuria vulnus contemnere quàm
- 7 Quod Magnanimus omnia aperto Marte, ut aiunt, attentet.
- 8 Quod Magnanimus amicus sit honoris: ambitionis inimicus.
- 9 Quod nullum sit ad Magnanimitatem iter, non plenum periculi.
- 10 Quod Honor non cadat nisi in virum bonum.
- 11 Quod Magnanimitati, quæ summa est, desponsa sit gloria.
- 12 Quod pramiorum Maximus sit honor.
- 13 Quod Duplex sit Honoris ratio.
- 14 Quod vir bonus honorem auget fugiendo.
- 15 Quod Honor non languida virtutis sit interpret, & nuncius.
- 16 Quod in Sublato etiam honore Vestigia remaneant virtutis.

QVOD ET SPES, ET METVS, APVD
Magnanimum minimum habeat au-
toritatis. I.



IEBAT Magnanimum se, neq; in populi: neq; in principum benevolentiam blanditijs, & assentationibus immergere: omnes simulandi, & dissimulandi artificio eruditos ab eo in odio haberi.

Testis

Testis est vnus instar omnium Solon. Nam cū propter Pisistrati tyrannidem, Athenis malè acceptus esset: ad eumq; Croesus Lydorum, & Babiloniæ Rex scripsisset, vt ad se veniret: rogassetq; vt secum habenas imperij regere vellet: Solon tamen nec populi metu: nec spe tanti Regis adduci potuit, vt consilium Athenas deferendi caperet.

*QVOD HONORE SIT DEPAS-
cenda virtus. II.*



VIA nulla incurfio, & impetus armatorum potest Magnanimum ex arce detrudere rationis, in qua infedit, atq; inueterauit virtutis omnis, & ingenij gloria: inquebat magnanimitatem, in Principe summis honoribus, quasi quibusdam cibus, esse depascendam. Non enim aurum: non gemmæ: non puellæ captiuae, vt est apud Homerum, merces est virtutis: sed ipsa gloriæ fama, quæ tanta est, vt vix vno capi possit seculo. Atq; hanc ob rem Trophæa: Triumphi: statuae: Coronæ: Panegyrici, qui ad posteros traducantur, sunt inuenti.

*QVOD GLORIA ETIAM FUGIEN-
tem sequatur virtutem. III.*



VIA facile eos officij capit obliuio: qui gloriæ incenduntur cupiditate: quò quis propius ad virtutem accedit, eò longius inanis gloriæ auram fugere consuevit. Itaq; interroganti cuidam qua lemita Duci ad veram gloriam pateret aditus, qua respondit, L. Brutus: Q. Fabius maximus, & Paulus Æmilius est profectus. Hi enim nihil aliud cogitarunt in

vita: nihilq; egerunt, nisi quod pro salute populi, & dignitate patriæ, præclarum videretur, & laudabile.

*QVOD VIRTUTIS HONOR NON IN
Verbis: sed in factis maximè consistat. IV.*



QVANDO multi norunt honesta nomina, turpissimis rebus imponere: sæpeq; fortitudo temeritatis vapulet nomine, & temeritas gestiat fortitudinis appellatione: consuevit dicere, in virtute non verba, sed facta rationis pondere esse examinanda: fortitudinis laudem esse non nomen: sed seipsum vincere: iram continere: nullis illecebris capi: aduersis non perturbari, neq; extolli rebus secundis: nec aliū se in alia fortuna præbere. Quare non est viri, aut cupiditatibus vinci, aut metu frangi: aut iracundia incendi, quæ non solum consilium, sed etiam iudicium tollit.

*QVOD MAGNANIMITAS SIT
virtutum omnium decus. V.*



RAT hoc in eius ore, & sermone habitans, magni esse & elati animi, non hostes in periculis: sed amicis timere: dolorem suum toleranter, grauare ferre alienum: neq; in secundis rebus voluptati, neq; in aduersis cedere languori: nec in consilij deliberatione spem, sed officium sequi: nec deniq; in iudicio pecuniam, sed iustitiam quærere. Nam quemadmodum Caligula Imperator nullius belli tantopere ardebat desiderio, quàm eius, quod plurimum haberet terroris, & periculi: negareturq; ab omnibus confici posse: ita magnanimitatis est ad ardua in

virtutis

virtutis ambitu mortales sic instruere, vt non magnum quod est: sed id quo nihil maius est, appetant.

QVOD MAGNANIMVS MALIT
iniuriæ vulnus contemnere, quàm
ulcisci. VI.



VM demum inquebat esse magnanimum, qui omnino aduersus iracundiæ obdurisset aculeos. eò quòd non magnum sit, in iniuriæ vulnere, irasci: sed nullum iræ, in quo consistat, locum relinquere. Nec enim minus est Magnanimus consilio constans, quàm animo fortis. Nam cùm circa id versetur, quo nihil extet melius, nihil minus videtur esse magnanimi, quàm mutare consilium. In altero vulgare, & peruagatum est naturæ testimonium. Nam quorsum trito sermone prouerbio Aquila non caprat Muscas? non est magnanimitatis, si bene attendimus, ignauorum hominum petulantiam, quæ morsu fertur, & aculeo, curare: sed tanquàm futile quiddam, & inane negligere. In altero etiam non minus est euident, quam præclarum Socratis exemplum. Hic enim tantæ fuit constantiæ, vt accusatus ab Anyto, nec patrōnum quæsierit ad iudicium capitis: nec iudicibus supplex fuerit. facilius enim Magnanimus potest mori, quàm mutari.

QVOD MAGNANIMVS OMNIA
aperto Marte, vt aiunt, attentet. VII.



VIDAM fortè interroganti, quis nesciret simulare: Magnanimus respondit, aperte enim aut odit, aut amat: nihilq; latenter agit. Nam vtrumq; oc-

cultē facere est timiditatis. remota omitto exempla. Quia enim Antistes hic Amplissimus, non se, sed Ecclesiam: non sua, sed reip. bona tuetur: nec in vllō tribunali auro, sed iure capitur: nec in amore gratia ducitur, sed veritate: nec deniq; curat quā laboriose, sed quā iustē gubernacula tractet Ecclesiæ, à nemine vnquā maiora, quā ab eo exierunt Magnanimitatis documenta. Nam cū robur omne Magnanimitatis, in elatione consistat animi, cuius nerui, & vires definiuntur mente, ratione, & opinione: mentem sapientia: rationem arte: opinionem omni rerum experientia auxit, & cumulauit.

QVOD MAGNANIMVS AMICVS
fit honoris: ambitionis inimicus. VIII.



REQVENS, & in omnium ore hæc eius est sententia: nihil Magnanimum aut sequi magis, quā honorem, aut fugere longius, quā ambitionem. ille enim comes est virtutis: hæc fraudis socia. Ambitiosus enim mauult bonus videri, quā esse: honore quippe contentus, virtutem negligit. hūc accedit, quòd temerē se periculis obijcit, vt Torquati docet testimonium. Nam propter ambitionem, cum temerē pugnasset, victor capite damnatus est. Tripliciter errat princeps ambitiosus. primum, quia non virtutem, sed virtutis gloriam quærit: iterum, quia tanquā proditor alienæ salutis, temere amicos obijcit periculis: ac demum, quia euersor est æquitatis, & iustitiæ. Non enim bonis viris:

sed adulatoribus præmia ministrat virtutis.

QVOD

QVOD NVLLVM SIT AD MAGNANIMITATEM iter, non plenum periculi. IX.



RES est ignavis formidolosa, utilis tamen, periculi discrimen. Nam in veritatis campo, iter ad gloriam periculo aperiendum est. interrogatus igitur, quænam ad magnanimitatem tenderet via: quæ est respondit, & laboris, & periculi plena. itaq; Romani venationem in otio, potissimum addiscebant. Nam ea, etiam cum ludicra exercitatione, sunt amplexanda, quibus, cum res postulat, id pellitur, quod non exercitatis plurimum facessit negotij. Quocirca post magnam aliquam victoriam, populo spectaculum aliquod exhibebant, in quo, non modo nostrates feræ: sed etiam ex transmarinis, & remotis prouincijs accersitæ lacerabantur truces, & immanes bestię: non voluptatis: sed virtutis ergo. Nam ex horribili earum specie, & truculento cum ijs, certamine addiscebat Populus Romanus, nihil aduersus teterrima pericula perhorrescere.

QVOD HONOR NON CADAT, nisi in virum bonum. X.



TGN A VI, vt solent olim Parthi, cominus præliari nesciunt: sed omnia tentant eminus: illi non stantes, sed fugientes pugnabant: Hi cæduntur præsentibus, nec resistunt fugientes. Quærenti igitur virum stans, an fugiens interpugnandū magis esset laudandus: nemo, respondit, est laude dignus, nisi vir bonus. Nam Honor non solum præmium, sed etiam opus est virtutis. Hoc declarare cum veller M. Marcellus, honori templum non ex detractis è montibus saxis, sed ex manubijs Siracusanae prædæ erexit, sicq; constituit, vt illud ingredi nemo posset, nisi per virtutis Edem.

QVOD

*QVOD MAGNANIMITATI QVÆ
summa est, desponsa sit gloria. XI.*



TSI omnes ad res operosas, & difficiles incenduntur studio gloriæ: consuevit tamen dicere, gloriā à nemine fieri prædam, sine magnanimitate. Est enim hæc vna virtus, ille apud Poetas, alatus equus, Pegasus, quo vectus Bellerophon monstra superauit. Nihil est magnanimitatis vis, nisi, vt est in fabulis, ille Mineruæ Clypeus, Medusæ Gorgonis capite præfixus, cuius ex intuitu homines omnes in saxa vertebantur. Tanta autem is floret virtute, vt in apparatu belli Ferratiensis, cū accepisset à Duce fortissimo numerosissimum conflatum esse exercitum, magna dixit, animi molestia me Dux liberauit, qui vires suas omnes in vnum contraxit, vt liceat vno die, de summa rerum decernere.

*QVOD PRÆMIORVM MAXIMVS
sit honor. XII.*



EST honor non voluptatis, & luxuriæ diuersorium: sed ingenij, ac virtutum omnium domicilium. itaq; solet dicere aurum egeni: honorem boni viri esse præmium: tantūq; honori aurum cedere, quantum virtus præstat vtilitati. Quare Titus Labienus multum auri, ex præda Gallica cum donasset strenuo militi: miles aurum, ad pedes labieni abiecit: at paulo deinceps idem armillis argenteis donatus, alacer gaudio abiit: contempsit aurum miles, honores amplexus est. nec temerè. quia vel minima

minima honoris aura, omni pretio est potior.

*QVOD DVPLEX SIT HONORIS
ratio. XIII.*



ON debemus sensus, ad res inuestigandas, ita
stupidos habere, vt quæ ab ætatis nostræ re-
mota sunt, nihil sentiamus. Cuidam itaq; sci-
scitanti cur Honor olim Deus constitueretur:
cuiusq; Aedes, ita virtutis templo esset annexa,
vt ad eam nemini pateret aditus, nisi per virtutis templum. Est
hæc fabrica dixit, non Numinis, sed ingenij. oleret enim vim
atq; naturam diuinæ, & humanæ virtutis, quarum ex altera
Honor proficiscitur diuinus: ex altera humanus. ille quasi
numen gaudet, in primis, animi religione: hic corporis
magis oblequio.

*QVOD VIR BONVS HONOREM
auget, fugiendo. XIV.*



MAT defensorem, non fæneratorem iuris: nec
æqui, sed lucri fædera anhelantes odit. Quocirca
cuidam Magistratus dignitate elato dixit, nemi-
nem honorem gerere, nisi qui norit vitam, per
virtutem, agere. Nec aculeata magis, quàm vera, in ambi-
tiosum hæc eius est sententia. Siquidem est viri boni, nihil
aut præter virtutem appetere, aut præter vitium fugere. Ne-
mo igitur debet honorem malis artibus aucupari, quem viri
boni censentur augere fugiendo. Quare nemo, inter virtu-
te pares, debet velle alios honoré anteire. Vetus est, in Tri-
pode Delphico, inter septem totius Græciæ sapientes, exem-
plum.

plum. Etenim ipse cū Apollo respondiſſet ei dandum eſſe, qui ſapientia cæteris præſtaret, nemo eorum inuentus eſt, qui honorem eum alteri potius, quàm ſibi non deferret. Turpe enim eſt inter pares, alijs velle gloria præcellere.

*QVOD HONOR NON LANGVIDÆ,
virtutis ſit interpres, & nuncius. XV.*



ON ſunt hæc Apophthegmata, ancipites mentis eius notæ: Sed graues ſapientiſſimi eius conſilij diguitate corroboratæ ſententiæ. Interrogatus enim, quis ſibi inter bonos viros videretur honeſtandus: qui, vt eſt in prouerbio, dignuſeſt, reſpondit, obeliſco. Erat autem Obeliſcus columna Pyramide minor, Soli ſacra: nec vlli erigebatur, apud Agyptios, niſi ei, cuius vita, veluti ſolis quidam ſplendor omnibus poſſet prodeſſe.

*QVOD IN SVBLATO ETIAM HONORE,
veſtigia remaneant virtutis. XVI.*

RATIO in re ancipiti, & dubia fidem: exempla cognitionem magis pariunt. interroganti igitur numis, cui ſit dignitas abrogata, affectus ſit ignominia. Neq; gloria reſpondit, ſed virtute paratur honor: neq; dedecus, fortuna, ſed animi inſiſcit turpitudō. Teſtis eſt Democritus Phalereus. Nam ab Athenienſibus, quorum Remp. adminiſtrauerat, trecentis ſtatuis honeſtatus, neq; animo eſt elatus: neq; ijs per inuidiam euerſis, deiectus. quin illorum iniuriam hoc aſperſit ſale, ſtatuas dixit, euertunt: virtutes, quarum gratia illas erexerunt, non euertunt.

DE FIDENTIA

TITVLVS XVIII.



FIDENTIÆ magna est gloria: non
 exigua viri timidi infamia, cui, quæ bo-
 na facit, etiam sunt dedecori. Nam
 quanquam peccatum non committit:
 cōsilium tamen peccandi ideo admit-
 tere videtur, quod minimè vacaret pec-
 cato, si impunè posset peccare. Quo-
 circa nemo est aut improbus nisi timi-
 dus, aut vir bonus nisi fidens. Timor enim non est periculi,
 sed mentis morbus. Qui igitur mentem habet sanam, non ti-
 met: qui verò animi morbo laborat, timet etiam sine peri-
 culo. Cùm igitur ageretur de Cardinalis P. ALDOBRANDI-
 NI fidentia, quæ in rebus arduis & timèdi, & audiendi ars est,
 & scientia, MARIVS Conradus Opt. Senator virtutis eius
 gloriam suo nō solum corroborauit, sed etiam auxit testimo-
 nio. Hic enim Pater conscriptus cū nullam, nisi ex virtute,
 rapiat ansam fidentiae, tum quemadmodum Medicus Hippo-
 crati. Iustiniano, I.C. ita ille non parum doctrine: multum in-
 genio: omnia fudit Deo immortali. Præclarior certè quidem
 hic, quam olim antiquitas. Nam apud Romanos, vsus inole-
 uerat, vt Geniorum auspicijs fiderent. vidimus enim passim
 inueterati numismatis inscriptiones Genio Augusti: Genio
 Senatus: Genio Populi Romani: cæterum in fidentia, nihil
 est melius, quàm prudentiæ, consilioq; fidere. Hac animi
 confitione sic ducitur P. ALDOBRANDINVS Cardi-
 nalis, vt semper eius consilium vacet temeritate, & negligen-
 tia. Nihil enim est in fidentia temeritas, nisi Bruti malus
 Genius.

Genius. Icribit autem Plutarchus Bruto secum de bello gerendo cogitanti, hominē eximiæ proceritatis apparuisse, cumq; ubi Brutus interrogasset quis esset, respondisse Bruti se esse malum Genium, quem apud Philippos, in pugna visurus esset, itaq; illē ab eo infaustum rei euentum, & mortem sibi imminentem didicit. Periculosissimum est igitur in temeritate: tutissimum in prudentia spem positam habere, vt ipsa loquuntur hæc Apophthegmata.

- 1 Quòd in Principe fidentia comes debeat esse consilium.
- 2 Quòd in Bello Victoria nuncia sit fidentia.
- 3 Quòd Hosti nihil sit Horribilius, quàm Principis fidentia.
- 4 Quòd Res gloriosa sit sui fidentia.
- 5 Quòd non Arca: sed fidentia homines deddat beatos.
- 6 Quòd Principem sui fidentia Populo magis, quàm Virium robur commendet.
- 7 Quòd Militis ornamentum non sit in auro, sed in fidentia positū.
- 8 Quòd Virtuti fidenti nihil sit horribile.
- 9 Quòd sine sui fidentia nemo rem gerat praelaram.
- 10 Quòd cuiq; fidentia par sit Virtus.
- 11 Quòd fidentia procreatrix sit intelligentia: temeritatis inscitia.
- 12 Quòd quæ habetur pecunia confisio anceps sit, & dubia.
- 13 Quòd fidentia sit Virtute, non pecunia depascenda.
- 14 Quòd Pecunijs minimè sit fidendum.

*QVOD IN PRINCIPE FIDENTIÆ
comens debeat esse alienum consilium. I.*



VNQVAM probatur aut leue, aut turgidum nimis genus dicendi: semper in Principe medium laudatur, & ad omnes res æquabiliter fluens, atq;

vt hoc loco, si in primis aspersum sit ingenij, & eruditionis sale. interrogatus enim quid potissimum cauere deberet princeps: ne præ nimia sui fiducia, respondit, alienum negligat consilium. ita C. Cæsar sua virtute fretus, eos neglexit, qui rogabant, vt sibi salutis suæ custodes ascisceret. Sed exitus docuit, facilius esse mortē præuideri, quàm morti prouideri: Sic pariter Alexander à Chaldæis, per Nearchum monitus est, ne ad Babylonem accederet: quòd immineret ei infelix exitus: at monita spernens, ad paucos dies, veneno ab Iola, in medio victoriarum cursu, sublatu est, quartum & trigessimum annum agens: robore corporis simul, & animi virtute florens.

*QVOD IN BELLO, VICTORIÆ
nuncia sit fidentia. II.*



QUEM ADMODVM, in honoribus virtus, sine acie ingenij: ita in armis, rei bellicæ gloria, fidentia præsidio destituta, manca est omninò, atq; imperfecta. Solitus autem est dicere, fiduciam vincendi, in milite, principium esse victoriæ. Neq; enim mens hominis in rebus dubijs, suis de cælo caret igniculis, qui illum, quo res vocat, quasi inflammant, & incendunt. ita C. Cæsar, cùm Pharsalicæ pugnæ staret acies, omniaq; iam equorum, ac hominum strepitu resonarent, Crastinum decem alarum ductorem, castra egredientem procul nomine compellans, interrogauit, quid de pugnæ euentu speraret, at ille dextram protendens, vinces ò Cæsar ait, & me hodie, aut viuum, aut mortuum laudabis: quorum vtrumq; verum extitit, Nam vicit Cæsar, & Crastinum, qui fortissi-

mè

mè pugnando occubuerat, pro concione laudauit.

*QVOD HOSTI NIHIL SIT HORRIBILI-
lius, quàm Principis fidentia. III.*



VM iam, ad expugnandam Ferrariam, ipsa regio omnis bello arderet, Centurioni cuidam interroganti, quid Hostem maximè perterreret, fidentia dixit Imperatoris. ea enim non tam additur militibus, quàm adimitur hostibus animus. Sic Alexander Magnus Hostium fortunam fidentia: vires fortitudine superare moliebatur. Quæ res ex voto sic ei cessit, vt consueuerit dicere, nihil fortibus insuperabile esse: nihilq; timido satis esse munitum. Hac enim adiutus virtute, sæpe succumbentem in belli flamma exercitum crexit, ac Hostes victores profli gavit.

*QVOD RES GLORIOSA SIT,
sui fiducia. IV.*



D cum quoniam hæreditas virtutis huius pertinet, & gloriæ: interrogatus quanta cuiq; sui deberet esse fidentia: quanta respondit à contemptu, & insolentia se vindicare satis est. in hoc vno laudatur Euripides Tragicus. Nam cum ei Alcestiris poeta tarditatem ingenij obijceret, quòd triduo non ultra tres versus maximo labore deducere potuisset: ipse autem centum perfacile scripsisse gloriaretur. Sed hoc dixit Euripides interest, quòd tui in triduum tantummodo: mei verò in omne tempus sufficient.

QVOD NON ARCA: SED FIDENTIA
homines reddat beatos. V.



DICEBAT multo esse ditio-
 rem, non inopem fi-
 dentia, quàm pecuniæ, vulgatum est Alexan-
 dri Magni testimonium. Etenim Antequàm in
 Asiam transiret immunitates, opesq; ingentes
 cunctis amicis in Macedonia donauit. At Perdicas admira-
 tus dixit, quid tibi ò Rex omnia dando fiet residui: spem re-
 spondit, bona Persarum admirabili fiducia ostendens. Eam
 spe Macedones, vt cum Alexandro haberent communem, fi-
 ducia cõtenti, Alexandri renuerũt munera. Longè enim pluri-
 est fidenti spes futurorũ bonorũ: quàm voluptas existentiũ.

QVOD PRINCEPEM SUI FIDENTIA
*populo magis, quàm virium robur com-
 mendet. VI.*



QUEM AD MODVM ex Amussi Architecti, sic
 Sapientissimi quiq; viri, ex tanti Antistitis opinio-
 ne statim quid deceat, & dedecat, vbi rerum vrget
 difficultas, gestiunt odorari. Interroganti igitur,
 quid Principem populo maxime commendaret: sui potissi-
 mum respondit fidentia. Testis vnus est instar omnium Anti-
 gonus Macedonũ Rex. Nam cum ad regiam dignitatem re-
 cens ascendisset, idq; grauate ferret, stomachareturq; popu-
 lus: ipse virtute, & conscientia fretus, in populi conspectu dia-
 dema, sceptrumq; deposuit, atq; palam monuit, vt si alium
 quempiã se regno digniorem inuenirent, ad eum ex arbitrio,
 Diadema sceptrumq; deferrent: commemoratis antè ijs re-
 bus, quas magna virtutè, & gloria gesserat. Ita hac animi fidu-
 cia,

R. cia,

cia, populi animum mouit, vt vltro omnes ad capescendum denuo Regnum hortarentur: magnisq; precibus contenderent, quod ipse constanter renuit, nisi ante de seditionis auctoribus supplicium sumeretur.

*QVOD MILITIS ORNAMENTVM
non sit in auro, sed in Fidentia positum. VII.*



VM virtus multis semper incommodis sit oppressa, ac temporum vicio exulcerata: hæc continenter à Principe tanquàm à sapientissimo medico est curanda. Interrogatus igitur cùm militiæ multi croco, & auro diffuerent, quo ornamento maximè decoraretur miles, non purpuræ dixit, sed fidentia. I laudatur itaq; quicumq; fuit, vir ille Lacedæmonius. Nam cùm in Clypeo pictam gestaret muscam: sibiq; ab amicis diceretur, insigne nimis paruum id esse, neq; ab hoste visum iri: respondit se ita hosti appropinquare, vt muscam non solum posset videre, sed etiam odorari.

*QVOD VIRTVTI FIDENTI, NIHIL
sit horribile. VIII.*



FIDENTIA ingenij, & virtutis ministra, si pellitur à consuetudine, locū dare, & cedere solet socordia. Quare solitus est dicere & artem, & arcem boni militis vnā esse fidentiam, ad quam timori vix vllus datur accessus. Testes duo sunt Lacedæmonij: quorū vñ vnus increpatus, q̃ in aciem claudus descenderet, respondit pugnare sibi propositum esse, non fugere: alter minitanti cuidam, q̃ sagittis Persarum sol ipse videretur obscurari: addis dixit nobis animū. Nam in vmbra, melius præliabimur.

QVOD

*QVOD SINE SVI FIDENTIA, NEMO
rem gerat præclaram. IX.*



ES Bellica cùm limati, & subtilis: tum acerrimè est iudicij. Cuidam itaq; militum præfecto interroganti, quibus gradibus res militaris ad gloriam procederet, neq; hominis, neq; bestia dixit, sed fidentia, à qua si imperator cadit, à toto cadit exercitu. Ea igitur iure laudatur Scipio Æmilianus: Nam cùm urbem præualidam obsideret, suadentibus quibusdam, ut circa mœnia eius ferreos murices spargeret, omniaq; vada tabulis plumbatis consterneret, habentibus clauorum spicula, ne subita irruptione hostes in Scipionis præsidia impetum facere possent: respondit non esse eiusdem imperatoris, & capere alios velle, & timere.

*QVOD SVI CVIQVE FIDENTIA,
par sit virtuti. X.*



VONIAM ita natura comparatum est, ut optimus quisq; imperet deteriori: cùm princeps imperat omnibus, par est item rationi dixit, ut omnium sit optimus: Suiq; iccirco fidentissimus. præclarum est C. Fabricij testimonium. Nam cùm ab omni leuitate, & instantia maximè esset alienus, quantam sui haberet fidentiam ostendit. is enim Legatus ad Pyrrhum missus cùm esset, rogatus est à Pyrrho, ut inter duces atq; amicos suos primum vellet occupare locum. At ille ei in aurem dixit, id ex re Pyrrhi Regis minimè fieri posse. quod utroq; bene cognito, omnes à Pyrrho, ad C. Fabriciū deficerent. Tantumq; hæc eius fiducia valuit, ut non modo Pyrrhus eam, quanquam aculeatam, non grauare tulerit, sed etiam, ut veritatis nunciam probaret: illiq;

vni captiuos omnes quorum causa, legatus erat, dono dedit.

QVOD FIDENTIÆ PROCREATRIX
sit intelligentia: temeritatis inscitia. XI.



ONSVEVIT dicere Herculis imaginem, apertam habere fidentiae significationem. Nam cum ignorantiae sit, & improbitatis dubitare: ingenij est, & recte voluntatis confidere. Recte enim in eo quilibet fedit, quod bene intelligit. Nasceatur quippe fidentia ex consilio, & scientia, ut ex inscitia temeritas, & audacia. alterum apud Poetas docet Herculis gloria: alterum Phærontis, & Icaris infamia. vis quippe expertus consilio sua ruit mole.

QVOD QVÆ HABETVR PECVNIAE
confisio, anceps sit & dubia. XII.



VONIAM nerui rerum agendarum sunt pecuniae, interrogatus quænam in rebus agendis, auro fidentia esset habenda: ea respondit, quam ministrat Aegyptijs sua Regio. falsè id quidem. Nam Aegyptis cum hominum convenit ingenijs. Bene quippe utentibus saluberrima medicamenta præbet: malè utentibus mortifera, & exitiosa venena. Nec sapienti admodum sunt necessariae pecuniae: primum quia res grandes non auri, sed ingenij sunt præsidio: deinde quoniam, omnes ut asserunt stoici sunt diuites, qui cælo, & terra uti possunt.

QVOD FIDENTIA SIT VIRTUTE,
non pecunia depascenda. XIII.



NQVIEBAT neque florem, neque colorem eorum vocibus adesse, qui asseuerant iccirco spem hominibus cum pecunia crescere, quia omnia obediunt

diunt pecuniæ. Non enim diues est, qui bona possidet: sed qui bonus est. Nam diues dictus est, quasi diuinus, quòd nihil egeat. Quare vt Histrio non est felicior, quòd in scenis adornatus Rex, aut Deus videatur: sic, neq; in bonis fortunæ, vir redditur bonus: Morum igitur probitas multò diuitijs est vtilior. illis enim sæpe turpia: huic nunquam obediunt nisi honesta. Quocirca iurè reprehenditur Epicharmus, qui inani hac opinione numos fecit deos: quòd illos, qui possiderent, nihil frustra cuperent.

*QVOD PECVNIIS MINIME SIT
fidendum. XIV.*

QUANTQVAM disputantium laquei, pecuniæ videntur non in abiecto aliquo bonorum genere, irretire: pecuniæ tamen non sunt, vt fert sententia Lycurgi, bonæ. Nam diuites, vt ipse sentit, si opibus suis frui volunt, diffluunt voluptate: sin custodire student, coguntur per auaritiam, ab ipsa iustitiæ semita deflectere. Interroganti cuidam igitur, quibus rebus minime esset fidendum, opibus dixit, quæ non solum videntur esse Ludibria fortunæ, sed etiam sui possessores ludibrio habere. Sed bona sint, quid ijs bonis est fidendum, quæ vt ait Bion, fortuna largitur ignauis, & virtus aufert à bonis? insidiosa res est diuiti pecunia: committitur enim cædes lucri gratia: expilantur templa: amicitia violatur: fides soluitur: produntur patriæ, ac deniq; nihil non mali perpetratur. Hoc animaduertens Lycurgus Spartanorum legislator monetam auream, & argenteam ex Lacedæmone substraxit, instituitq; vt ciues ferreo duntaxat numo vicerentur.

DE PATIENTIA

TITVLVS XIX.



QUEMADMODVM Eschines Philosophus pro dolore lateris, è quo grauius laborabat, nunquam ingemuit: semper rationis plagam, & virtutis vultus grauius, & acerbè tulit: ita Cardinalis P. ALDOBRANDINVS nunc facies dolorum restinxit patientia, nunc accendit virtutem. Id cum omnes laudant vehementer, tum CÆSAR Galaratus Senator Grauiissimus optimo cuique; asserit esse imitandum. Non enim facit fortiter, qui rerum amat difficultatem: sed qui, aut publicam acriter ardet, aut propriam non graue sustinet. Nemo quippè ad præclarum aliquod facinus adeo est Idoneus, quàm qui, ad rerum asperitates occalluit patientia. Quid enim attinet, quod res est altè repetere? Est Tolerantia vehiculum, præsertim in bello, magni oneris: in pace, iustitiæ, & æquitatis: quam facile princeps deserit, nisi in rerum asperitatibus adsit patientia, hoc est ars patiendi & scientia. Est autem hæc principi necessaria. Nam qui dolores tam priuatos, quàm publicos nescit perferre: mollis, & effeminatus: qui ferendo vincit, patiens rectè dicitur. Qui autem laborem deserit: fugit quod cupit. Nam vt refert Epichurru, laboribus omnia nobis Diij vendunt. qui autè impatiens est doloris, facit non ferendo, vt duplicem ferat dolorem. Non enim minus graue est dolori cedere, quàm ipse dolor. Atque contra quæ mala caueri non possunt, libenter ferendo, euadunt bona. quod gratia impetrari non potest, patientia quæri debet.

Nam

Nam cuiusvis doloris remedium est patientia. qui igitur perferre nouit, vincit. Nunquàm est virtus patientia, in rebus prosperis. ille vero est patiens, qui in aduersis conflictatur, nec tamen ab æquo, & bono potest amoueri. Nec minor interdum est victoria, mala ferendo vincere, quàm resistendo. Hoc enim est fortunæ, illud magis virtutis. Magnum igitur est vindictæ genus: ignoscere victo. quia bis est victus virtute simul, & armis. Pusillanimus contra est, qui non potest iniuriam pati: nec est vir bonus, qui malos non tolerat: nec fortis, qui ira deijcitur.

- 1 Quòd Patientia in Bello, veluti quadam sit, ad victoriam semita.
- 2 Quòd in patientia fundo, Virtus omnis radices agat.
- 3 Quòd plus sit in luctu, & mœrore mali, quàm in ipso malo.
- 4 Quòd sine patientia quis non solum malo, sed etiam metu mali torqueatur.
- 5 Quòd viro etiam patienti, luctus pro amici interitu sit honestus.
- 6 Quòd Virtutes omnes vna pariat patientia.
- 7 Quòd Princeps patientia adminiculis maiora efficiat, quàm robore virium.
- 8 Quòd abundat etiam in paupertate, qui est patiens.
- 9 Quòd Patientia, ad felicitatem maximè pertineat, principis.
- 10 Quòd Patientia sit armatura adamantina, quæ omnes respuit, & ferri, & ignis impetus.
- 11 Quòd Principis patientia sit, in populo obsequij disciplina.
- 12 Quòd aduersus oris procacitatem, non armatura profit, sed patientia.
- 13 Quòd Rex ex difficillimis patientia reddantur facillima.
- 14 Quòd neq; Populus plurimum dominum: neq; Virtus otium nocui pati.

15 Quòd sine Patientia, nemo non sit miser.

16 Quòd Libertatis decus sit Patientia.

QVOD PATIENTIA IN BELLO

veluti quadam sit ad victoriam

semita.

I.



VONIAM non imperio ius: sed imperium iuris nomine continetur, in iure lucus, & sanguis est positus non solum imperandi, sed etiam imperata, & in pace, & in bello faciendi. illud autem cum appetant omnes: hoc nemo ferè non grauare ferat: quòd in altera multum sit dignitatis: in altero plurimum oneris. Cuidam militi, qui impatiens erat obsequij, sciscitanti quænam via in bello tenderet ad victoriam: non qua sulcatur æquor, aut transgrediuntur montium iuga respondit: sed vna extat patientia, qua sola omnes superantur difficultates. Hac tantum virtutis semita Lacedæmonij, quamuis pauci, & inopes essent, Græcorum omnium euaserunt forissimi, & Spartiæ maximum Imperium opulentissimæq; vrbes, ac regiones subegerunt, quæ totius Laconicæ prouinciæ principatum tenebat.

QVOD IN PATIENTIÆ FVNDQ.

virtus omnis radices agat.

II.



VM Ars imperandi in virtute residet, tanquam in sua sede, & fundamento, atq; ex arte, qui bonus est princeps, nouit non solum florem, sed etiam fructum excerpere imperij: interrogatus

ab amicis, quo in campo, virtus maximè radices ageret, in fundo dixit patientiæ. Malus enim est virtutis minister, qui nescit mala pari. id cum intelligerent Spartani, non solum pueros alboris, sitis, & inedia reddebant patientes: sed etiam in bello, ad vulnera assuetos ut haberent, nec mortem formidarent, vtrò plurimis plagis lacerabant: in quibus, pueris facilius erat mori, quàm ingemiscere.

*QVOD PLVS SIT IN LVCTV ET
Mereore mali, quàm in ipso malo. III.*



Tres cum imbecillitate languet orationis: sic rei dignitas cum verborum apparatu, & splendore doctrinæ, in ALDOBRANDINO efflorescit. Amico aliquando in luctu, & qualore iacenti dixit, omni malo fædius esse lugere. eò quòd illud maculam habeat fortunæ, hoc animi dedecus. itaq; in legibus decemviralibus, quas duodecim tabulas appellant, non modo viris, sed etiam mulieribus eiulatus, fletusq; funebri prohibitus est. Nec est, ait, pro eius interitu, qui gloriose vltimum vitæ suæ diem obierit, dolendum. Laudant igitur veteres Lacænam illam, quæ cum accepisset filium suum in prælio dimicantem cecidisse, ne ingemuit quidem, sed Dijs se gratiam habere dixit, quòd eum filium peperisset, qui pro patriæ salute mori non dubitasset.



QVOD SINE PATIENTIA QVIS
non solum malo, sed etiam metu mali
torqueatur. IV.



QVIA non regit, qui errantes non corrigit, quando nihil sit regere, nisi opus iustitiæ, regia ars est, qua vniuersi homines, ad virtutem informantur, & à vitiorum turpitudine procul pelluntur. Interrogatus igitur, à quodam, qui in armis, impatiens erat periculi, vbi esset hostis: timidus, respondit, in animo. falsè quidem. Nam metus, in armis, omni hoste est capitalior. Terror igitur dictus est, quasi ter error, eò quòd vir timitus mente ab honesto: corpore ab incolumitate, ac deniq; ab opibus fortuna procul aberret.

QVOD VIRO ETIAM PATIENTI
luctus, pro amici interitu, sit honestus. V.



QVM patientia virtus sit viri, ab amicis interrogatus, vbi luctus viri, nihil, quod examinati est animi, oleret, vbi respondit, mors est amici. Amicus enim amici difficilior fert casum, quàm proprium. itaq; Alexander Magnus à virtutis magnitudine sic appellatus, pro morte Hephæstionis amici, non se solum sordidatum, ac luctuosum monstrauit: sed etiam eorum iubas tonderi, ad cutem vsque iussit, & turrium pinas, ac murorum propugnacula exturbari,
 vi mania et am ipsa desiderio
 Hephæstionis lugere
 viderentur.

QVOD

*QVOD VIRTUTES OMNES VNA
pariat patientia. VI.*



DEVS cùm omnia regat, qui regit, dei personam induit: cui omnes debent velle parere. Sed quoniam verbum parco, quasi à patiendo dictum est, nemo, nisi qui sit patiens, videtur ad virtutem esse accomodatus. Interroganti igitur vbi haberetur optima virtutis schola: in patientiæ dixit regione. Hoc ipsum sentientes Gymnolophistæ, Indi sapientes, summam laudem ponebant in patientia, & in doloris contemptu. Nudi igitur per niuem, & glaciem Caucasii montis errabant, nec cùm ad ignem accessissent, ingemiscebant.

*QVOD PRINCEPS PATIENTIÆ
adminiculis, maiora efficiat, quàm robore
virium. VII.*



CVM virtutis laus, in Principe sæpe ex siccitate orationis exarescat, tùm nullius de eius dignitate oratio magis, quàm ALDOBRANDINI vbertate irriganda est. Nam cùm duplex sit Principis officium: vnum in vitiorum sordibus, ex hominum societate abstergendis: alterum, vt omne studium eorum ad virtutem acre sit, & expeditum: vtrumq; semper plurimo studio anhelauit ALDOBRANDINVS, qui aliquando interrogatus, quibus adminiculis tot, tantas, tamq; arduas res gessisset, patientiæ respondit. Hac enim Princeps res grandiores sustinet, quàm potentia, & viribus: tum quia versatur circa dura, & arcerba, quæ ferendo magis superantur, quàm renitendo: tum quoniam homo, vt refert Xenophon Socraticus, omnium animantium, in rectorem suum est ingratisissimus.

QVOD ABVNDAT ETIAM IN
paupertate, qui est patiens. VIII.




NE Q; Gregis sine pastore: neq; populi sine Principe, vlla est vtilitas. Solus enim princeps, virtutem cum ministrat, sufficit omnibus. Semper igitur inquiebat, in paupertate abundat, qui est patiens. Nescit enim vir bonus, qui nihil appetit, egere. Hoc sentiens Socrates dicebat gratiam esse habendam naturæ, quæ res bonis viris necessarias, vltro exposuisset: difficiles verò, ne paratu quidem esse necessarias. Quare diues est, non qui affluit pecunia, sed patientia.

QVOD PATIENTIA, AD FELICITATEM
maximè pertineat Principis. IX.



QUEM ADMODVM si Plantæ radices, odoris aliquo inficiuntur genere, qui ab ijs gignuntur flores non vacant odoris eius vel grauitate, vel suauitate: ita qui mos est Principis latenter repit per vniuersum corpus populi. Patientem igitur populum, ex tolerantia constituebat Principis, dicebatq; Principem præter eum felicem esse neminem, cuius animus aduersus mala omnia, obduruisset patientia. eò quòd sicut in Boetia, ad Trophonium, iuxta flumen Orchomenon, duo sunt fontes, quorum alter memoriam: alter obliuionem affert potantibus: ita ferè in Imperio sine laboribus, & vigilijs, magnæ felicitati, magna pericula sunt finitima.

QVOD PATIENTIA SIT ARMATVRA
*adamantina, quæ omnes respuit & ferri, &
ignis impetus. X.*



LOS virtutis, & firmamentum gloriæ, vna est, dicebat, patientia. Nam patientiam qui tollit, maximum animi munimentum tollere videtur. patet id cū multorum virorū testimonijs, tūc vno potissimum Anaxarchi exemplo. Nam quorsum, quòd hic malleis in doleo cōtus, potius in dolore exiliit, quàm in gemuit? non est obscura ratio. Dolor enim succumbit patientiæ: non patientia dolori. Hoc sentientes Ægyptiorum Sacerdotes, Hieroglyphicum patientiæ fecerunt tergus Crocodili: Nec falsò quidem. Nam sicuti id, ea obrigere solet duricia, vt omnes ferreos respuat ictus: ita patiens potest lacerari iniuria, lædi verò minimè potest.

QVOD PRINCIPIS PATIENTIA
sit, in populo obsequij disciplina. XI.



PRINCEPS iustitiæ, & legibus nō obtemperans docet imperando, sibi non esse obtemperandum. Si quidem, dicebat non esse verissimile, vt quis alteri onus imponeret, quod ipse non sustineret. Quare nihil est ad imperij auctoritatē, in Principe firmius: quàm diuturna in iure, obsequij patientia. Multa sunt veterū testimonia, sed nulla probationis arx est firmior, quàm quæ naturæ exemplis stipata, septaq; tenetur. Sicuti enim arbor, suber difficile recipit vulnus, & si recipit lucro habet, quia arbor ea præter aliorum naturam, nisi lanietur, suo suffocatur cortice: ita vir patiens, ybi alij flaccescunt, alacritatē reuitescit, & robore.

QVOD

*QVOD ADVERSVS ORIS PROCACI-
tatem, non armatura proſit: ſed
patientia. XII.*



NIHIL eſt in bonis melius, quàm quod princi-
pi debetur. Nam à Principe non ſolum com-
munis vitæ, ſed etiam virtutis recunditæ, &
doctrinæ manant ſumma auxilia. Itaq; olim
ſapientiſſimi quiq; viri non ante, libros ſuos in
lucem edebant, quàm illos Principis nomini, vt eò virtus om-
nis rediret, vnde digreſſa eſſet, conſecrarent. Reſ eſt ex An-
tiſtiris inſtructione, & diſciplina in aperto. cùm enim in po-
puli turba, pauci benè ſentiant: multi peierent: omnes verò
malè loquantur, interrogatus quæ aduerſus petulantia, & pro-
cacitatis morſus eſſet armatura: non lorica, aut thorax dixit,
ſed patientia. Nam cùm non fiat niſi nolenti iniuria, qui
non ægre fert iniuriam, vim omnem retundit iniuriæ. De-
moſthenes itaq; à quodam conuicijs laceſſitus, nolim tecum
dixit in hoc genus Certaminis deſcendere, in quo qui vinci-
tur ipſo victore eſt melior. is enim demum inter mortales eſt
reterrimus, qui peſſimè loquitur.

*QVOD RES, EX DIFFICILLIMIS,
patientia reddantur facillima. XIII.*



PRÆCLARVM obſequij, quod ALDO-
BRANDINO debetur, teſtimonium: non
molle, & remiſſum amoris, familiares eius, vt
oſtenderent, ab eo aliquando percontati ſunt,
cuius ope adiutus tot res, tam graues, & acerbæ ſuſtineret:
patientia reſpondit. Nam patiendi virtus hæc eſt, vt difficil-
lima

lima quæq; ex diurna consuetudine, reddantur facillima. ita Socrates Alcibiadi miranti, quòd Xantippen ad res omnes acrem, & acerbam, quæ nunquàm in virum dentes non excuret, pateretur, ego inquit iam pridem eius iurgijs sic affueui, ut ipsa iam callum obdlexerit meo stomacho.

*QVOD NEQVE POPVLVS PLVRIVM
dominium: neq; virtus otium norit pati. XIV.*



CV M plures eundem Imperij clauum tractare contenderent, dixit neq; populum plurium dominium: neq; aspirantem ad virtutem scire otium pati. alterum Lydorum Rex Cræsus sua interdum docuit stultitia. Nam cùm fratrem imperandi sibi ascisceret socium, tum quidam ex lydis, ò Rex inquit, omnium in terra bonorum Sol est auctor: at si gemini soles forent, periculum esset, ne omnia incenderentur: ita regem quidem vnum accipiunt Lydi: duos simul tolerare non possunt. in altero restis est ipse Antistes. Nam interrogatus ab ambitiosis quibusdam cuius ope pararetur imperandi sapientia, non dignitatis dixit, sed temporis, & studij. Non enim ut Cæneus, qui subito è muliere factus est vir, oprando tantum: sic repente qui stultus abit cubitum, surgit sapiens.

*QVOD SINE PATIENTIA, NEMO
non sit miser. XV.*



CV M conspiceret plurimis calamitatibus obiectam esse mortalium vitam, multiq; ob id, grauiter in dies ingemiscerent: dixit non eos esse miseros, qui in do-

in dolorem inciderent, sed eos qui patientes non essent doloris. neq; enim patiens est sine dolore: neq; vir bonus sine patientia. Zaleucus igitur fratri in malis quærenti: non quæreris dixit, propter acerbitatem malorum: Sed quia ipsa mala nescis pati. Elegans hùc pertinet Apologus. Cùm enim in Comitijis animantium Asinus expostularet, quòd careret cornibus: ingemuit item Simia, eò quòd cauda destitueretur honore: at Talpa utrumq; felicem esse dixit, se autem tantum esse infelicem, quando perpetua præmeretur cæcitare. quorsum? nemo, si benè attendimus, est tam felix, qui sine patientia, nō sibi videatur deteriori, quàm par est, esse cōditione.

*QVOD LIBERTATIS DECVS, SIT
patientia. XVI.*



VIA nuda, & enermis est ratio, sine doctrinæ præsidio, Antistitis doctrinam cùm passim, tùm hoc loco, fas est carpere, & colligere. differentibus enim quibusdam de populi libertate, dixit neminem præter patientem esse liberum, eò quòd solus is non posset cogi. docit id ipsum olim apud Romanos Pompei vir-
tus. Hic enim legationis officio cùm fungeretur, à Genthio Rege interceptus est, ut Senatus consilia prodere iuberetur: ac ille constanti fide, fortiq; animo, admotæ lucernæ cremandum digitorum præbuit, eaq; patientia non solum Regi desperationem tormentis quicquam ex se cognoscendi attulit, sed etiam posteris vniuersis testatum reliquit, eum non posse cogi, qui nouit dolorem pati.

DE SOLERTIA

TITVLVS XX.



QUANTVM Populus Romanus ita olim, & lumem, & oculos amauit intuentium, vt neq; ante solis ortum, neq; post occasum, voluerit Senatuscōsulta esse rata: ita tamen solertiæ exarsit amore, vt cūm Dies labori sit Sacer, nox quieti, diem voluerit à media nocte, præter Græcorum, & Ægyptiorum consuetudinem, initium trahere. id autem eò pertinere volebant, vt omnes intelligerent, noctem nullam neq; labore neq; studio, cuiquàm debere esse vacuam. Quoniam autē difficillimæ quæq; res, solertiæ curantur præsidio: Ægyptij Hieroglyphiū Regis, qui versatur circa difficillima, fecerunt Draconem, qui inter omnes animantes, solus ad eò somni est inimicus, vt cum nemo adhuc viderit dormientem. Tam solers autē, & Diligens, est **P. ALDOBRANDINVS**, vt apud eum nulla sedes sit, nisi in labore, quietis. in quo quanta sit Rom. Ecclesiæ felicitas, ex eo liquet, quòd longè res est capitalior principi cum otio, quàm cum hoste. Nam cur Nasica, in Consilio de Carthaginis euerfione, magis probabat Carthaginensium aduersus Romanos discrimen, quàm Carthaginis euerfionem? quia res secundæ ex otio infelicem: aduersæ felicem, ex studio habent exitum. virtus enim diligentia: inertia vitium omne nutritur. Nam cur Homerus Agamemnonem, cūm ceteri dormiant, semper facit vigilantem? quoniam otiosi nescit virtus, quæ omnis in actione consistit. Sed quid ego hæc? vicit is summus Antisthes

S studio,

studio, & solertia Scipionem Africanum, qui solitus est dicere se nunquam minus esse solum, quam cum esset solus, nec minus otiosum, quam cum esset otiosus. In quo anno Sapientissimi Senatoris FRANCISCI Glusiani testimonium. Nam cum Senatores olim itcirco Patres conscripti sunt nominati, quod eorum nomina, in Diademate essent inscripta, quasi eadem sit, & Regis, & Senatoris cura: tunc in eo Senatore, tantum est solertiæ, & studij, ut Glusianus maiori quam Atea Rex dignus videatur laude, & gloria. Ille enim quanquam terrori erat PHILIPPO, quod Philippus Macedonibus tantum imperaret hominibus pugnandi peritis: is verò Scythis, qui etiam aduersus famem, sitimq; pugnare norant, obdormiuit tamen aliquando tempori: Glusianus autem tanto continenter publicæ utilitatis effervescit studio, ut nunquam videatur, nisi in plurimarum rerum asperitatibus quiescere. Nam quid de Senatu dicerem vrbis Mediolani? nullam admittit solertiâ sine fide, & prudentia. illa, ut semper appetat quæ honesta sunt, declinet contraria: hac, ut quæ utilia sunt cæteris, curet & perficiat. Atq; sicuti Aegypti Reges, neminem ex ijs hominibus, quorum utebantur opera, admittebant, nisi qui liberali esset forma, & virtute insignis: ita ad incredibilem Senatus Mediolani gloriam, hoc accedit etiam, quod nullos habet sui administratores, nisi quorum ars, summæ sapientiæ ministra sit, & famula. Testis est vnus pro omnibus IO. FRANCISCVS Landrianus, à secretis, qui in scriptis dictisq; Lyram extorsit Apollini, & ita extorsit, ut ex eius concentu videatur, vel Landrianus ex Apolline natus, vel ex Landriano reuiuiscere iam ipse Apollo. Nam ex soluta & libera eius oratione, duplex percipitur fructus, vnus artis & ingenij: alter virtutis, & doctrinæ, quorum vterq; est eiusmodi, ut haud sciam an quicquam

quam viro docto possit accidere laudabilius. facundia enim nisi rerum cognitionem attingat, verborum quædam est inanitas: Rerum vero cognitio, sine facundiæ præsidio, infantia potius, quàm doctrina. Sed quò mea me abducit oratio? Quot in Senatu Mediolani, sunt virtutum opifices, & Architecti: tot sunt solertiæ, qua rerum Asperitates, atq; temporum angustias omnes Cardinalis PETRVS ALDOBRANDINVS superat, aperti, & expediti obsides.

- 1 Quòd Imperatorie artis difficultas, nihil ferat vacui temporis.
- 2 Quòd Ingenij eòs, & doctrina procreatrix sit solertia.
- 3 Quòd nulla sit imperandi tutior via, quàm animi solertia.
- 4 Quòd studio, & solertia, superetur hominis vis & natura.
- 5 Quòd in Diligentia tutela, omnia bonorum genera sint posita.
- 6 Quòd Principi solerti, non sit properandum, sed maturandum.
- 7 Quòd Acres sint in honore, ad res arduas, solertia stimuli.

QVOD IMPERATORIÆ ARTIS difficultas, nihil ferat vacui temporis. I.




VANTI sint neruorum, ac laborum fructus, ij omnes nisi solers, & diligens adhibeatur ratio, iniuria sæpè ablorbentur temporum. Sciscitantibus igitur amicis, quis in discrimine rerum, Princeps abundaret auxilio: qui inops est otij dixit. docuit id C. Cæsar, cui, in vita, nulla hora fuit labore, & studio vacua, quiq; adeò tenax, & avarus fuit temporis, vt quemadmodum Oppius meminit, duobus pluribusue scribis plerumq; epistolas alienissimi argumenti, eodem tempore dictitare. Nam semper inops est otij, qui nescit otio vii.

*QVOD INGENII, COS ET DOCTRINA
na procreatrix sit solertia. II.*



CVM minutis, & angustis quæstiunculis aliquando ageretur de re literaria, nonnulliq; in nostris hominibus desiderium prisce eruditionis refricarent, dixit non doctrinam, sed docendi artem, hac nostra ætate deesse: at qua dixerunt: qua Demosthenes respondit ex infantissimo, factus est oratorum omnium eloquentissimus, quo responso solertiam potissimum fecit ingenij, & doctrinæ magistram, atq; dominam. Nam Demosthenes, ut refert Cic. eo exarsit ardore studij, ut iniquo animo ferret, si quando opificum antelucana vinceretur industria. Hic etsi omnia, ad doctrinæ, & eloquentiæ laudem, habebat impedimenta naturæ: labore tamen, & studio tantum effecit, ut doctissimos, ac eloquentissimos quosq; longo intervallo post se reliquerit.

*QVOD NVLLA SIT IMPERANDI
tutior via, quàm animi solertia. III.*



NON imperandi via solum est solertia, sed etiam imperantis ad summa quæq; vehiculum. Sciscitantibus igitur amicis, quibus gradibus, in imperio, ex rebus paruis, ad magnas fieret ascensus: non dignitatis dixit, sed Solertiæ. Nam magnæ res labuntur ignavia: parvæ crescunt solertia. id ipsum ut doceret Agathocles ex figulo patre natus, cum Sicilia positus esset, Rexq; declaratus, solitus est in mensa fictilia pocula iuxta aurea ponere, eaq; iuuenibus ostendens dicere fictilia, propter solertiam, aureis facta esse potiora.

QVOD

QVOD STUDIO, ET SOLERTIA
superetur hominis vis, & natura. IV.



SOLERTISSIMVS quisq; princeps pessimè sapè audit. Nam virtuti simul, & otio vulgi difficillimum est morigerari. dicebat tamen ex diuturna laboris consuetudine; & ingenio acumen, & corpori robur ministrari. illud probatur Alcibiadis testimonio, qui ex studiorum assiduitate, statim quæ minus expressa erant, percipiebat, & quæ callidè versurèq; dicebantur cauebat: hoc admirabili quodam elucescit Anus cuiusdam exemplo. Nam cum consueuisset paruum vitulum, quotidie portare, nec ab incepto, vllum diem intermisisset, tandem adultum quoq; bouem dicitur portasse.

QVOD IN DILIGENTIÆ TVTELA
omnia bonorum genera sint posita. V.



QVEM ADMODVM terra ab Homero mater, Oceanus externorum bonorum pater vocatur: ita diligentia à tali, tantoq; Antistite, eorum, quæ diliguntur magistra, & domina est nominata. Etenim neq; vile, neq; honestum quod est, potest nisi in diligentia fundo succrescere. Nā quod consuevit Antisthenes discipulis, antè quàm ad se eosmitteret, dicere, opus esse libro nouo: stylo nouo: nouaq; tabella, res est plena studij, & solertiae, sine qua summa est bonorum omnium desperatio. Nam ad ea non solum comparanda, sed etiam conseruanda animus requiritur vigilans: studium acre, & tenax memoria.

*QVOD PRINCIPI SOLERTI NON
sit properandum: sed lente maturandum. VI.*



VE MADMODVM ex solis accessu, & recessu, quæ è terris gignuntur omnia aut meliora, autem deteriora fiunt: ita, ex principis diligentia, & negligentia, vniuersa vel pelluntur, vel accersuntur Reip. mala. Solet igitur dicere nihil esse solerti Principe gloriosius, si in armis præsertim, non properet: sed maturet. vincit enim, non qui celeriter ferit: sed qui suo ferit tempore. Præclarum est in Rhombo naturæ testimonium. Nam cum Rhombus tardissimus sit omnium piscium, semper tamen eius in vtero mugil reperitur, qui piscium omnium est velocissimus, ex quo intelligimus, non esse sapientis accelerare, sed lentè maturare, semperq; cito satis fieri, quod benè sit: neq; res magnas corporis, sed ingenij administrari viribus.

*QVOD ACRES SINT IN HONORE,
ad res arduas solertia stimuli. VII.*



VM trita sit Apophthegmatum, & peruagata ad veritatem via: qui tanti Præfulis Apophthegmata negligit, is non adeò videtur illa negligere, quàm qui breues sunt, & compendiarij tramites, refugere veritatis. Cum autem res amicis plurimum facelceret negotij, nec onus satis sustinerent, interroganti cui-dam, cuius presidio tanta rei difficultas redderetur facilis: honoris dixit. Nec falso. Nam res omnes, propter honorem ex difficillimis, redduntur facillimæ. itaq; Scipio Aphricanus solet ex Xenophontis libro, de Cyri institutione, fortes laudare: non vt hoc faceret, sed vt viris, eos laudando, vires adderet. Siquidem neq; Imperatori, neq; militi labores ij videntur graues, quibus vehuntur ad honores.

PERSEVERANTIA

SIVE CONSTANTIA

TITVLVS XXI.



LST Perseuerantia fida patientiæ comes, & in rebus aduersis perferendis, adiutrix. Nec vlla est certior ad finem vsq; perseuerandi ratio, quàm viribus æquare onus, vt quisq; non quantum ferre potest, sumat: sed perferre. Hæ sunt in Principe columnæ Herculis. Quia firmi, ac fortis est animi, summam conseruare virtutem, quam semel amplexus fuerit: optima autem perseuerandi ratio est, non solum non retrocedere: sed etiam in dies vltius progredi, & quantum possumus, semper ad sublimiora tendere. Quod grande est opus, tarde est aggrediendum: deinde perseueranter progrediendum. Cæpisse quippe, est multorum: perficere paucorum. alterum enim est consilij: alterum laboris. Nec enim qui pugnat, sine perseueratione, victoriâ consequitur: nec virtus sine, perseuerantia perficitur. dicitur perseuerans, quasi semper sequens verû: Eò quòd nulla gratia, nullis illecebris nulloq; terrore sit mutabilis. Hac in virtute, vt **ALDOBRANDINORVM** iam exempla præteream, habet etiam temporum antiquitas sua monimenta gloriæ. Nam ea sic floruit Aristides, vt ab eo filiam, in matrimonium cum peteret Dionysius, responderit filiam suam eiusmodi esse educatam, vt mallet mori, quam tyranno in vxorem dari. Eam igitur cum de medio sustulisset, quæreretq; Tyrannus iterum ab Aristide num etiam in

eadem persisteret sententia, dixit factum dolenter se ferre: dicto autem lætari. Sed quid ego remota attento, propinqua relinquo? **LVCIVS** Albricius Senator, ita ad urbis publicū, & cōmune hominum commodum, in iure perseuerat, ut ius non solum videatur seruare, & tueri: sed etiam plurimarum virtutum gloria honestate. Nec est eius perseuerantia, in labore, & studio, otij, quod cupit ex ciuitate exulare, patiens. Nam ex otio voluptas: ex voluptate flagitium: ex flagitio offensio, ex offensione interitus demum fit iuris, & iustitiæ. Quare olim in benè instituta Rep. perseuerantiæ gratia fiebāt Gymnasia & ludi, & artes exercebantur. Nam cū virtus omnis in actione consistit: tum in ea non satis est, virum bonum temeritate vacare, & negligentia: sed ars, etiam & perseuerantia requiritur. Hoc est, quod sapientissimus ille Senator, in vno maximè suspicit **Card. ALDOBRANDINO**. Nam quid de ipso Senatu, atq; admirabili eius virtute dicerem? Quemadmodum non difficilis est, ex ipsis militibus, de Imperatore coniectura: ita ex Senatoriæ gloriæ ministris, qui potissimum sunt à secretis, facile est de Senatus admirabili sapientia, iudicium. Nam cū nullos habet sui ordinis ministros, nisi ingenuarum artium magistros, plurimarumq; virtutum dominos: tum vnus adest **IO. BAPTISTA** Saccus à secretis, in quo Senatoriæ virtutis, & gloriæ non obscurum, sed euidens est testimonium. Nam quod is vita sit honestus: ingenio subtilis: doctrina politus: quodq; sic oratione est elegans, ut eius oratio, quasi scientiarum floribus conspersa, omnium animos oblectet, nemoq; sit, qui ex ea gustum, sensumq; non capiat summi ingenij eius, & eruditionis, id omne est eiusmodi, ut non exigua censeatur esse Senatus gloria. Nec enim ex Sacco obscurum est: qui fundus sit in Senatorio ordine sapientiæ: quod imperij decus:

quæ

quæ felicitatis officina, cuius alumni liquido, fuso, vago, atq;
multiplici floreant genere dicendi. Sed ne mea me alio ab-
ducatur oratio, venio ad Perseuerantiam, qua vnus maximè flo-
ret Card. ALDOBRANDINVS, vt doctè eius docent
Apophthegmata.

- 1 *Quòd tanquàm fluctus à Saxo, dolores omnes infringantur
constantia scopulo.*
- 2 *Quòd sine perseuerantia, virtus omnis ruat.*
- 3 *Quòd inconstans nesciat in suscepto consilio persistere, sed ruas
semper in deterius.*

*QVOD TANQVAM FLUCTVS A
Saxo: dolores omnes infringantur constantia
scopulo. I.*



ERSÆ nulla in re magis, quàm in obserua-
tione regis, erant constantes. Itaq; si quis
regi non paruisset: is capite, & brachijs am-
putatis, insepultus abijciebatur. Sapientissi-
mus aut hic Antistes, quia acerba ferre robu-
sti animi est, magnæq; cōstantiæ, interroga-
tus quid, in dolorum cruciatu esset boni: constantia dixit.
Nam vt voluptates, continentia: sic dolores constantia in-
fringuntur viribus. præclarum est, in dolore contemnendo
Castij Scæuæ testimonium. Nam ei, ad Dyrrachium oculus
lagitta cum esset excussus: nihil cessit dolori, sed forti animo
in pugna continenter perstitit. At in dolore ferendo, alia
gens, aliter se habet. Nam Galli pugnacissimi habentur, &
fortes in bello: morbo autem afflicti statim ingemiscunt:
Græci

Græci contra ignaui sunt in prælio, in lectulis verò suis constanter ægrotant.

QVOD SINE PERSEVERANTIA

Virtus omnis ruat.

II.



QUAE perseverantia est, in ratione bene considerata, stabilis & perpetua permantio, solitus est perseverantiam, baculum virtutum omnium esse dicere, sine quo statim coguntur omnes ruere. Est autem virtus hæc magni & constantis animi. Nam celeritas, & magnitudo, raræ est felicitatis: multo vero ratiore diuturnitas, & constantia. Hac vna duce, non solum virtutes, sed etiam fruges omnes censentur ad maturitatem peruenire. natura enim in omni rerum genere, nō nisi gradatim, solet progredi: nec antè perficere opus, quàm ad vltimum vsq; gradum peruenerit. Nihil est igitur in moribus perseverantia, nisi animi excelsi, atq; inuicti magnitudo, ac robur. Testes sunt Ægyptiorum Sacerdotes. Nam cur apud eos, Hieroglyphicum per Gruis pennas constituitur perseverantiæ? ut docerent virum constantem nunquam cedere temporum iniuriæ. Nam Gruis pennæ nulla solent, ut cæterarum alitum, mutari, per ætatem, coloris vicissitudine: sed eodem semper persistunt colore: quin eorum alæ si gestantur, aiunt gestantibus laboris sensus, ad res omnes, hebescere.

QVOD

QVOD INCONSTAS NESCIAT IN
suscepto consilio persistere, sed ruat semper
in deterius. III.



NIL est magis in oratione, aut vitandum, quàm quod aurium habet satietatem, aut appetendum, quàm quod earum sitim auget, cum doctrina & iucunditate. id hoc exempli pater testimonio. Inquiebat enim fortem virum non tam felicem esse, & beatum: quàm hominem & inconstantem, alijs exosum, & sibi miserum. Alterum, quoniam æqua qui grauate paritur, iniqua vt plurimum, cogitur pati: alterum, quoniam nulli conuenit, qui sibi est renitens, & controuersus. semper enim inconstans abit in deterius. inde verus prouerbium. *ἐπὶ mandράβδου χερσὶ το πρᾶγμα.* hoc est Res Mandraboli more succedit. quadrat in inconstantem virum, & instabilem: qui hoc laborat vitio, vt nunquam mutet cōsiliū, nisi in deterius. veritatis est in proberbio, testimonium. Nam Mandrabolus thesaurum cum reperisset, primū auream ouem posuit Iunoni Samiæ: proximo anno Argenteam: tertio Æneam: eò res pertinet, vt quò sæpius mutetur in constans, semper melius quod est, postponat deteriori.



DE TEMPERANTIA

TITVLVS XXII.



ST temperantia virtus Principis. Nam, ut inquit Socrates, virtutum omnium est saluberrima, tamq; publicæ, quàm priuatæ humanę societatis conciliatrix. Itaq; vetat ille, ex Magorum sententia, ante curari corpus, quàm curetur animus. Nec obscure in eos inuehitur, qui minima curantes, summa curare negligunt. Quid enim ijs ridiculum magis videri potest, qui & equis, & canibus ægrotantibus remedia quærunt: in sui verò & corporis, & animi morbis, medicos minimè consulant? animum ferunt intemperantem: Citharam minimè ferunt nō temperatā, quotidieq; curiosè aliena tractant, propria deferunt. Nam, si bene attendimus, omnia sunt aliena, præter animum, qui minimè curari potest, sine temperantiæ præsidio. Plato igitur, in Charmenidis vult sapientiam quoque, in ipso latere temperatiæ nomine. Nec falsò id quidem. Nam primi perturbationum sensus, vel ad fortitudinem, per iram: vel ad prudentiam, per timorem: vel ad iustitiam, per amorem: vel ad patientiam, per dolorem, iter ostendunt. Soli verò Temperantiæ, omnis impetus opponitur perturbationis. Nam temperantiā qui habet, omnia decenter agit, cum summa animi tranquillitate. Temperatis autem hominibus, ut ait Plato, lex est ipse deus: intemperantibus voluptas. Quamquam tamen ne voluptatis quidem expers est temperantia. Nam ut satietas omnia ex iucundis, reddit iniucanda: ita temperantia voluptatem rariore usu maiorem facit. In hac una

virtute

virtute, optimum ingenij, incolumitatis, ac modestiæ, per
vniuersum vitæ curriculum, positum est viaticum. Hæc au-
tem virtus sapientis est potius, quàm diuitis. alterum quia
res est difficilis, aut diuitem temperantia, aut temperantem
oblectari diuitijs: alterum quoniam nihil Est Deo grātius
viro temperante. Nam modestè viuere, diuinum officium
est: eoq; tanquàm optimo rerum omnium concentu maximè
colitur Deus. Hac virtute cùm maximè oblectetur: tū in ea,
omnibus rebus nouit MARTINVS Veraſtigius Senator
Æquissimus, nisi laboribus temperare. Nam publicæ utili-
tatis, & communis commodi gratia, tot sollicitudinum sti-
mulis, & curarum aculeis confoditur, vt semper finis vnius
negotij, principium sit futuri, nec ei quicquam aliud sit la-
bori finem imponere, quàm laboris primordia capere.
Hæc enim eius est natura, hoc tam acre, tam ardens studium,
vt solum videatur mensura carere. Nam vt publicæ quieti
consulat, nullam partem capit quietis, omnesq; suas cūras
tam intento animo, atq; incredibili labore, in publica utili-
tate tuenda fixit, vt qui Veraſtigium benè norit, verum con-
globatæ virtutis, & doctrinæ exemplar norit. Quare eius,
ad Cardinalis ALDOBRANDINI Apophthegmata,
gestio hoc loco, vt auctoritate, & testimonio.

- 1 *Quòd malus sit virtutis magister: qui turpitudinis sit mi-
nister.*
- 2 *Quòd nulla sit tam insidiosa, quàm quæ maximè placet Voluptas.*
- 3 *Quòd Princeps alios iustitia: seipsum magis perficiat Temperantia.*
- 4 *Quòd res sit difficillima virtutem simul, & pecuniam amare.*
- 5 *Quòd voluntaria paupertate nihil sit beatius.*
- 6 *Quòd Papulus venter sit Principis, cui debet morigerari.*
- 7 *Quòd intelerantia, Rationis, & iudiciij sit inimica.*

Quòd

- 8 Quòd non minus gloriosa sit, aduersus voluptatem, quam contra hostes victoria.
- 9 Quòd Principis frugalitas, veluti quandam ansam porrigat populo admirationis.
- 10 Quòd parero virtuti, Regi sit gloriosius, quàm hominibus imperare.
- 11 Quòd Princeps, nec in armis odio; nec in otio amore debeat superari.
- 12 Quòd Temperantia maximè expediat ciuili societati.
- 13 Quòd quasi in temperantia vtero concipiantur laudes virtutum omnium.
- 14 Quòd Temperantia Semita, non solum ad virtutes, sed etiam ad scientias aperiatur aditus.
- 15 Quòd in Temperantia penu reposita sit acies ingenij, & robur virium.
- 16 Quòd abstinentia pabulum sit ingenij, & integritatis.
- 17 Quòd Abstinentia sales omnes habeat, & animi, & corporis.
- 18 Quòd in fame non adeo cibus, quàm in cibo abstinentia sit requirenda.
- 19 Quòd Abstinentia animi simul, & corporis sit medicina.
- 20 Quòd cum Abstinentia, vires corporis crescant, & decrescant eaq; virtute maximè res gaudeat militaris.
- 21 Quòd victus laus commendatur abstinentia, non epularum elegantia, & copia.
- 22 Quòd in cibus nihil sit ipso appetitu conditius.
- 23 Quòd Abstinentia flagitiorum sit medicina.
- 24 Quòd Abstinentiam sequantur ducem summa quaq; bona.
- 25 Quòd ubi sobrietas non sit, ibi nec rationis, nec imperij vllus sit usus.
- 26 Quòd Principis cōtinentia popularem gratiam maximè concilies;
- 27 Quòd ditissimus sit, qui inops sit cupiditatis.

QVOD MALVS SIT VIRTVTIS MA-
gister: qui turpitudinis sit minister. I.



VÆ Constituitur virtus Principis, non scholastica dape: sed rerum omnium vsu, & experientia est depascenda. Hac qui est præditus, ad ardua tendens, stomachatur cupiditatum omnia Lenocinia. Interrogatus itaq;, quis summus esset Imperator: qui ventri, dixit, qui voluptrati, quiq; suis sic imperat sensibus, vt nullis vitiõrum irretiatur illecebris. ita quippè laudatur superior ille Cato, qui pellibus hædinis, pro stragulis, domi, militiæq; vtebatur: quiq; Hispaniam gubernans, trium seruatorum comitatu contentus, eodem & cibo, & potu, quo illi vtebantur, vitam trahebat eam, quæ exemplo erat amicis: terrori inimicis.

QVOD NVLLA SIT TAM INSIDIOSA,
quàm quæ maximè placet voluptas. II.



INIS benè imperandi, non est artis cognitio: sed eius rei, quàm ars adhuc nullà ferè intellexit, inuestigatio. Non enim artis est, sed virtutis honestè viuere. cùm autem multarum deliciarum comes sit Principis dignitas, sciscitanti fortè cuidam, quid in delicijs potissimum esset cauendum: quod maximè placet dixit. Hoc ipsum non verbis: sed re ipsa aliquando cõprobauit Scipio Aphricanus. Nam puellam sibi in Hispania eximiæ formæ oblatam, non modo renuit: sed etiam aurum, pro ea redimenda, doti adiecit, eamq; accersitis parentibus, integram, & incorruptam viro restitui iussit.

QVOD

QVOD PRINCEPS ALIOS IVSTITIA:
seipsum magis perficiat temperantia. III.

QVI non potest quæ acerbæ sunt, & difficilia ferre: non est credibile, ut ijs cedendo, possit ad res grandes aspirare. Nam quæ res grandis est, & gloriosa, ea omnis plurimis rerum asperitatibus est interclusa. Interrogatus igitur quid maximè probarer, in principe, eam dixit virtutem, qua Cic. in primis, commendat Deiotarum Regem. Erat quippè in eo, ut ait, singularis, & admiranda frugalitas. Etsi inquit, hoc verbo scio laudari reges non solere: nec frugi hominem, multum laudis habet in rege: sed fortem: iustum: seuerum: grauem: magnanimum: largum: beneficum: liberalem: ego tamen frugalitatem, id est modestiam, & temperantiam, virtutem maximam esse iudico. Nam Princeps alios illis virtutibus: hac autem virtute se magis perficit.

QVOD RES SIT DIFFICILLIMA
virtutem simul, & pecuniam amare. IV.

NON consistit ingenij laus, in rebus nouis inueniendis, sed vtilibus: nec iudicij gloria est de rebus recunditis, sed veris: In utroq; autè quantum præstet sapientissimus hic Antistes, non difficile est odorari. Nam cuidam interroganti, quid homini maximè esset operosum, & difficile. Supienter, dixit, viuere, & opes amare. In hac sententia cum esset Anaxagoras Clazomenius, omne patrimonium necessarijs suis vltro largitus est. qui enim in cælo fixit omne bonum, nihil est in terris, quod quicquam putet retinere boni. Quare ille per varias regiones peragrans, compellantibus

pellantibus quibusdam quò tenderet iter : cœlum intuens , in patriam dixit . illa enim vera est patria , in qua quis non est inquilinus : sed habitandi dominus : & ex qua non solum sine crimine , sed etiam sine criminis suspicione , originem traxit .

*QVOD VOLVNTARIA PAUPER TATE
nihil sit beatius. V.*



NULLA virtus , tam angustis terminis , & finibus sui nominis est definita : cuius quasi doctrina , non videatur , eo nomine teneri inclusa . cum igitur Temperantia , ab vberissimo eius fructu , & animi , & corporis , rerumq; omnium , siugalitas à latinis sit nominata : interrogatus aliquando , cuius in terris diuitias maximè probaret : non Cræsi , dixit , sed Diogenis Cynici . Grauis in summa breuitate responsio . Non enim est diues , qui multum possidet : sed qui minimum appetit . Id autem Diogenes Alexandro ita interdum comprobauit , vt ipse Alexander visus sit Diogenis felicitati subinuidere , cuperetq; quasi commutato Alexandri nomine , esse Diogenes . Diogeni enim nihil deerat : plurima deerant Alexandro . Nam cum tantum cuiq; desit , quantum appetit : qui contentus est , nihil etiam habens , omnia possidet .

*QVOD POPVLVS VENTER SIT,
Principis , cui debet morigerari. VI.*



QVONIAM neq; turpe quod est , opinione tollitur honesti : neq; quod est erratum , nomine artis , imminuitur , & doctrinæ : falsò rebus turpibus , vt fit , honesta imponuntur nomina . Interrogatus igitur , quem non auarum : sed frugi duceret esse principem : non qui vni ventri , respondit , imperat : sed qui

T tanquam

tanquam Briareus multos plurimis brachijs alit ventres. Hoc apertè magis, quàm Poetæ, Plato ad Archytam Tarentinum. Ne quicquam igitur Princeps sapit, qui non plurimis sapit.

QVOD INTEMPERANTIA, RATIONIS, & iudicij sit inimica. VII.



VM in vino, nec regi, nec vehi. potest rationis clauo, imperium: inquebat principem, in vino non solum mentem: sed etiam principatus amittere auctoritatem. Non vulgare est priscæ vetustatis exemplum. Nam cùm Philippus Macedonum Rex oscitanter inter Scyphos, peregrinam quandam mulierem, indicta causa, damnasset: tùm illa grauibus verbis iudicium, ac iudicem mordens, exclamauit, se prouocare ad alium iudicem: ad quem Philippus Rex respondit: tùm illa ad Philip-pum sobrium. tunc rex ad se rediens, atq; re bene cognita, mulierem, vt postulabat ius absoluit, liberamq; dimisit.

QVOD NON MINVS GLORIOSA sit aduersus voluptatem: quàm contra Hostes victoria. VIII.



VLLA est in suasionis, & dissuasionis fluctibus, firmior anchora, ad versus omnes fallaciarum tempestates, quàm viri sapientis in ratione fundata auctoritas. Solitus autem est dicere, gloriosius esse Imperatori Hostem temperantia, quàm armis superare: nec minus esse honestum, te n-
peratè aduersus voluptatem, quàm fortiter contra pericula pugnare. Nam ferro, hostium robur: virtutè animus magis
lu; era-

superatur. itaq; Scipio Maior non tantum gloriæ ex hostium trophæis, quantum ex victis voluptatibus reportauit. Hic enim illas ita continenter frenauit, vt semper à captiuis mulieribus abstineret, nec vllam vnquam in conspectum suum venire voluerit, vt non solum mentem, sed etiam sensum oculorum continentem haberet. Cùm autem virgo quædam captiua ad eum duceretur formæ elegantia admirabili, illam honestè integreq; custodiri iussit, atq; Luceio Principi Celtiberorum Sponto integram, intactamq; restitui. quæ res Celtiberis causam tantæ benevolentia præbuit, vt illi vtrò in potestatem Romanorum venerint. Quod igitur armis Scipio assequi nequiuert: continentia præsidio statim assecutus est.

QVOD PRINCIPIS FRUGALITAS

*veluti ansam quandam porrigat populo
admiracionis.*

I X.



QUÆ fluunt à tanto Sapientiæ Antistite Apophthegmata, eo sale sunt aspersa, vt in ijs nullus satietatis: plurimus etiam sit iucunditatis sensus. Cùm de populari gratia, erga principem fortè ageretur: cuiusdam sciscitanti, quo in primis adiumento Princeps gratus redderetur populo, & admirabilis: vitæ respondit integritate. Hanc enim virtutem non solum ciues, sed etiam hostes, in imperatore amant, & admirantur. Quare ad Scipionem Africanum, qui Linterni exulabat, visendum, & salutandum Prædones longa nauigatione accesserunt, vt eum aliquando cernerent, quem pro fama temperantia, & rerum gestarum gloria, summo semper amore coluerant.

T 2

QVOD

QVOD PARERE VIRTVTI, REGI
fit gloriosius: quàm hominibus imperare. X.

PLVRIMVM amo in Præsule, sententiæ do-
 ctrinam: nec minimum laudo dicendi genus.
 Nam cum orationis gravitate, argumenti cre-
 scit dignitas. Cùm de optimis Regibus, & Im-
 peratoribus fortè incidisset quaestio: rogareturq; quem iudi-
 caret optimum: non qui multis dixit, sed qui sibi vni nouit
 imperare. Hanc laudem Anacharsis Scythæ sibi vendicans,
 statuis, & imaginibus suis inscribebat, linguæ, ventri, pu-
 dendis obtemperandum. Gloriosius enim est virtutis impera-
 ta facere, quàm ne ab alijs omittantur, cauere.

QVOD PRINCEPS NEC IN ARMIS
odio: nec in otio amore debat superari. XI.

DELICTI, & erroris fuga: virtutis laus est, &
 gloria. cum igitur nihil magis in honoris splen-
 dore cauendum sit, quàm dedecus, & ignomi-
 nia: interrogareturq; quid Principi, qui magni,
 & inuicti est animi, sit metuendum: ne, dixit, qui in armis, non
 potest vinci odio hostium: in otio amore vincatur voluptatis.
 comprobauit hoc eius sapienter dictum, aliquando Alexan-
 der graui temperantiæ testimonio. Nam cum inuitaretur, ve
 Darij Regis filias, quas captiuas tenebat, viseret, quòd admi-
 rabili essent formæ elegantia: recusauit inquires, non esse sibi
 committendum, vt qui viros vicisset, à mulieribus vinceretur.
 Nec enim Principi minus præclarum est, imperare cupidita-
 tibus, quàm hominibus.

*QVOD TEMPERANTIA MAXIME
expediat civili Societati. XII.*



ERV M asperitas, virtutis compensanda cum sit suauitate, sciscitanti cuidam quid ciuitati bene moratae maximè expediret: Temperantia dixit. Nam sublata cupiditate, nihil est, quo quis magnopere possit egere. Itaq; Pythagoras, qui primus Philosophi nomen inuenit: uiris fortitudinem: mulieribus pudicitiam: pueris uerecundiam: omnibus frugalitatem proposuit.

*QVOD QVASI TEMPERANTIÆ
utero concipiantur laudes omnium uir-
tutum. XIII.*




VIDE illæ ab omnibus, & animo, & auribus hauriuntur voces, in quibus non solum scintillæ sunt suauitatis, sed etiam faces ardentes doctrinæ, & virtutis. cùm autem de bonorum generibus ageretur, quorum fons, & caput est Princeps: Dixit in Imperij bonis, nihil esse melius temperantiæ. nec falsò id quidem. Nam auctore Pythagora, mensura rerum omnium est optima. à fructu igitur dicta est hæc uirtus latinè frugalitas, cò quòd sola fructum habeat uirtutum omnium. Ægyptij igitur, ut docerent hac uirtute regnum esse muniendum, Taurum quadrupedum omnium continentissimum, Regis fecerunt Hieroglyphicum.

*QVOD TEMPERANTIÆ SEMITA,
non solum ad virtutes, sed etiam ad scientias
omnes aperiantur aditus. XIV.*



QUAE laudatur antiquitatis diligentia, in inuestiganda eruditione: felicitas, in reperienda: ars deniq; in declaranda, dicebat eorum ingenia maximè esse probanda, quæ antiquam Musarum integritatem sibi viderentur olere. Nam & Musæ, & Pallas, ut scribit Lucianus, omnes tutæ fuerunt à sagittis cupidinis. Atq; ut, est in fabulis, iccirco à re Venerea censentur alienæ: quia voluptas non solum virtuti, sed etiam doctrinæ, & ingenio exitialis est, & pestifera. Non est res in fabulæ argumento: sed in Anacharsis, qui Græcorum fuit sapientissimus, testimonio. Hic enim in conuiuium receptus, intemperantes omnes, ut, etiam cum silentio, reprehenderet: quasi accumbens quieti, alteram manuum pudendo: alteram ori adiecit. Hoc ex testimonij signo, omnis ferè intellexit posteritas, quæ Resp. summa mala vitare vellet: ei neq; gulæ, neq; Veneri esse indulgendum.

*QVOD IN TEMPERANTIÆ PENV,
reposita sit acies ingenij, & virium
robur. XV.*



QUAE demum Temperato viro tribuitur laudatio, non inanis est iudicij, & gloriæ. Nam si abstinentiæ decoratur coloribus, & pigmentis, ad speciem est honesta, nec ad sensum, & cogitationem fit impurior. Interrogatus igitur quo cibi genere maximè

maximè oblectaretur, eo dixit, quo fames: non voluptas curatur. qua vna voce abstinentiam maximè commendauit. Natura enim ventrem non delectari vult, sed sedari: non impleri, sed obsonari. Nam ciborum copia, lumen restinguitur ingenij: vis & robur obruitur corporis. Etenim alimenta, vt medicamenta, nihil prolunt, nisi loco, & tempore, adhibeantur, cum mensura.

*QVOD ABSTINENTIA PABVLVM
sit ingenij, & integritatis. XVI.*



NON olet solum temperantia, morum integritatem: sed etiam ingenij acumen. itaq; interrogatus aliquando qua elegantia, & copia apparatus maximè honestaretur, Temperantiæ respondit. cibi enim tenuitate acies exacuitur ingenij: ac faces simul restinguntur libidinis. Alterum docuerunt priscorum temporum omnium sapientissimi, sui testimonio, Persarum Magi: Indorum Gymnosophistæ, ac deniq; Ægyptiorum Sacerdotes, qui omnes à carnibus, & vino abstinerunt: Alterum in re aperta, non eget probatione, non necessaria. Nam veteri prouerbio, sine Cerere, & Bacho friget Venus.

*QVOD ABSTINENTIA SALES
omnes habeat, & animi, & corporis. XVII.*



VE MADMODVM lumen restinguitur prudentiæ, sine ingenio: ita ingenij acies hebescit, sine abstinentia. Sanguis enim non solum ieiuniate attenuatus vim habet, in homine ad res intelligendas, acumi-

nis : sed etiam facierate oppressus , stuporis . Sciscitanti igitur cuidam quis studiosis cibus maximè esset accommodatus : qui est dixit , parcissimus : inculcanti rursus quis esset , suauissimus , quem respondit , commendat ipse necessitatis vsus . Id re & euentu , docuit aliquando Artaxerxes Regis Cyri frater . Nam cùm ei nihil esset in fame , quod præter panem hordeum voraret , iurauit nihil vnquam se commedisse suauius .

*QVOD IN FAME NON ADEO CIBVS,
quàm in cibo, abstinentia sit requirenda. XVIII.*

NIL est tanti Antistitis, aut pietate in Deum : aut humanitate in homines : aut iudicio in Reip. administratione sapientius . Ab eo igitur ne recedā, cùm cerneret multos largius , quàm par est , se cibus ingurgitare , dixit nihil cibo , neq; vrile , neq; exitiale magis esse homini . Nam venter , nisi modus adsit , plures occidit , quàm nutrit . Nec alia ratione Lacedæmonij , ex Lycurgi legibus , conuiuio interdicebantur , nisi , quoniam nimio cibo sanitas : nimio potu mens : ac deniq; nimia verbositate morum decus amittitur .

*QVOD ABSTINENTIA ANIMI
simul, & corporis sit medicina. XIX.*

DIOGENIS abstinentiam vincere non potuit Alexander , etsi cognomen inuicti est assecutus : potuit Diogenes Alexandri , & aurum , & vires superare abstinentia . Hanc qui habet , vix quicquā est , quod metuar mali . Sciscitanti igitur cuidam , quæ aduersus summa mala , daretur medicina , & animi simul , & corporis , abstinentia dixit . responsum verò graue , & omni obseruantia

uantia dignum. Nam & Plato abſtinentiæ præſidio, ſapien-
tiſſimus euasi:&C. Cæſar comitali morbo, quo primum cor-
reptus eſt Cordubæ, per cibi parcimoniam eſt liberatus.

QVOD CVM ABSTINENTIA UIRES
corporis, creſcant, & decreſcant, eaq; virtute res
maximè gaudeat militaris. XX.



ONSVEVIT dicere nulla eſſe potiora, aduer-
ſus ætatem ingraueſcentē, animiq; languorem:
quàm quæ ex abſtinentia, reportantur victoriæ
trophæa. Nec quiſquam, ſine huius virtutis præ-
ſidio, poteſt in bello ad rem militarem eſſe idoneus. Id Milites
ſuo vt doceret exemplo Maſiniſſa, ſolet præter cæteros Reges,
tenuitate gaudere. Stans quippè ſemper antè tabernaculum ci-
bum, ſine pulmento ſumebat, cibario pane, & bellarijs mili-
taribus contentus. proinde in ſenectâ adeò vigit, vt poſt ſe-
xtum, & octogefimum annum, filium genuerit: poſtq; no-
nagesimum annum ſecundum, Carthaginenſes, qui contra
fædus ei bellum intulerant, ſuperarit.

QVOD VICTVS LAUS COMMENDE-
tur abſtinentia, non epularum elegantia,
& copia. XXI.



VOD ventri ſuaue eſt ſimul, & honeſtum: id ſe-
qui, res eſt planè operoſa & difficilis. Cùm igitur
in populo multos animaduerneret, ex epularum
varietate, & redundantia, magnificentiæ glo-
riam quærere: dixit illos eruditum magis habere palatum,
quàm ingenium, eò quòd in apparatu, maior ſit laus parci-
monia,

monia, quàm elegantia, & copia. In hanc item sententiam venit aliquando Socrates. Nam admonitus ab amico, vt apparatus, qui erat tenuis, augeret propter hospitum aduentum: si boni viri sunt, inquit, satis erit: sin minus, plus satis.

*QVOD IN CIBIS NIHIL SIT IPSO
appetitu conditius. XXII.*



CVM turpitudinum omnium officina sit venter: cuiusq; voluptate non tam homo, quàm hominis nutriantur flagitia: multa in eo damnauit, quæ probantur ab alijs. Sciscitanti autem cuidam, quod in cibis optimum esset obsonium, quod, inquit, sapit. Hoc ipsum sentiens Socrates, solitus est dicere, optimum cibi condimentum esse famem: potionis sitim. satius enim sordenti omnia: placent etiam abiecta esurientibus. Testis est Persarum Rex Darius, qui in fuga cum aqua cruore mista, & cadaueribus contaminata auidè hausisset, negauit, vbi sitim retinuit, se vnquam bibisse iucundius.

*QVOD ABSTINENTIA FLAGITIORUM
sit remedium, & medicina. XXIII.*



DIFFICILE est, inquebat, ventri simul, & pudicitia parere. Nequissimus enim libi dinis minister est venter, quem qui frenat, libidinem tollit. Itaq; Egyptij olim, vt viuentes ad abstinentiã hortarentur: nunquã mortuos ante sepelire solent, quã exectis intestinis. idq; vt quod contra ius, fasq; ab ijs admissũ, in vita fuerat, causa sublata, quodammodo videretur expiari.

QVOD

QVOD ABSTINENTIAM SEQVANTUR
ducem summa quæq; bona, XXIV.



VIDAM interroganti, qui iucunde viueret, non qui molliter dixit, & delicatè: sed qui temperanter viuit. Temperantiæ enim attributa numerantur hæc. corporis robur: animi tranquillitas: rationis obsequium: vitæ integritas: lumen ingenij: formæ dignitas: ac deniq; fortunæ vtilitas. Qui igitur abstinentiam habet, nihil est, quod vltra magnopere appetat. Accedit huc M. Curij qui Romanæ virtutis fuit exemplar, graue testimonium. Hic enim ad focum sedens, cum vasis fictilibus, rapas edens, Samnitum auri pondus his verbis reiecit. malo, inquit, habentibus aurum imperare, quàm auro abundare. Fortis enim est, vt ait Eusebius, qui non tantum hostium, sed etiam cupiditatum est victor.

QVOD VBI SOBRIETAS NON SIT:
ibi nec rationis, nec imperij vllus sit vsus. XXV.



NON alio condimento commendabant suos cibos Spartani, quàm fame. Victus enim iucunditas, in appetitu est, non in ciborum genere, & satietate. Tenuitas quippè in cibis, quæ iucunda sunt, auget, & voluptatem maiorem facit. Atq; quoniam tantum detrahitur rationi: quantum additur ventri, sobrietas maximè decet Principem, penes quem bona sunt omnia. Interroganti cuidam quod periculum in Gubernatore nauigantibus in alto maximè esset timendum, ebrietas dixit. Periculum id Solon ad Remp. referens, cum esset Atheniensium legislator, legem statuit, qua Princeps, si ebrius deprehenderetur, impune occidi

cidi posset. Nam quid de abstinentiæ utilitate, ut honestatem præteream, dicerem? expeditissima est ratio augendi census: detrahare sumptibus.

*QVOD PRINCIPIS CONTINENTIA
popularem gratiam maximè conciliet. XXVI.*



TEMPERANTIA, alio nomine Continentia à continendo est dicta, eò quòd temperantem ab omni turpitudine gulæ, luxuriæ, cupiditatis, avaritiæ, ambitionis, & superbiæ pellat, cumq; plurimis virtutibus circumuallatum, in rationis gyro contineat. Quare solitus est dicere, nullam semitam Principi magis ad gratiam popularem esse compendariam, & expeditam, quàm continentiam. qui enim Princeps non solum avaritiæ crimine, sed etiam caret suspicione, solet populo grauissimus esse. Sic Paulus Æmylius populo fuit peroptatus. Hic enim ex maximo auri, & argenti pondere, atq; regia Gaza, quam in potestatem suam, ex victoria redegerat, nihil contrahere voluit, aut in rem suâ conuertere: sed quæstoribus negotium dedit, ut omnia in publicû ærariû referrentur. Atq; quamquam Persen vicit, & eum in triumphum duxit, & ex Hispania, ac Macedonia maximas opes, in publicum, retulit: ad tantam tamen tenuitatem, res eius familiaris redacta est, ut vix post eius mortem, superfuerit, unde vxori dos redderetur.



*QVOD DITISSIMVS SIT, QVI
inops sit cupiditatis. XXVII.*

Sedum diues est, & beatus, non cuius ad opes, & copias magnus, in dies accedit cumulus: sed cui ex earum vsu, demitur necessitas. longè enim quiddam est beatius externis bonis non egere, quam abundare. Qui autem opes non cupit, neq; ijs remotis mæret: neq; adiectis gaudet. Quocirca consuevit dicere, nullam, neq; apud continentem, pecuniæ: neq; apud fortem, periculi esse auctoritatem. itaq; vt iter ad continentiam, & fortitudinem pariter olim suis ciuibus aperirent Lacedæmonij, lege apud eos cautum erat, vt si aurum, argentumue penes aliquem deprehenderetur, res esset capitalis: felicioresq; illi iudicarentur, qui fortiter morirentur in bello: quàm qui in pace prosperè viuerent,



DE MODESTIA

TITVLVS XXIII.



ODESTIA vt inquit ingenij, & eloquentiæ Princeps M Cicero, est scientia eorum, quæ aguntur, aut dicuntur, collocandorum. Siue enim à verbo medeorest dicta, quod certa sit perturbationum omnium medicina: siue à verbo moderor, quod moderetur rebus omnibus, censetur eorum, quæ in dictis, factisq; res postulat, magistra & domina. Moderantur autem voluptati, non qui penitus abstinent, sed qui hoc modo vtuntur, vt non abripiantur cum ipsa. Siquidem non naui, & equo moderatur, qui haud vitur: sed qui quo libuerit ducit. Nihil est in benè instituta ciuitate, hac vna virtute potius. Agesilaus igitur à quodam interrogatus, quid vtilitatis Spartæ attulissent Lycurgi leges: quod norit, respondit, voluptates continere: iudicans non alia ex re magis Reip. corruptelam nasci, quàm ex delicijs. Testes sunt in Senatu Mediolani duo Sapientiæ lumina. HIERONYMVS Sanfonius, & PAPIRIVS Cataneus. Nam summa quæq; in trauctando Imperij clauo, illius temperantur consilio. Tanta quippè est acritate ingenij, tanta virtute, & doctrina, vt sicuti equus freno circumagitur, ita eius auctoritate populus omnis, quod ius, quod ratio vocat, duci videatur. PAPIRII autem Catanei tanta est auctoritas, vt eius consilium non ex virtute, sed virtutem ex eius consilio non vereantur omnes, qui illum benè norunt, probare. Res enim ab eo gestæ plenè videntur diuinitatis: ipse verò virtutis nomen, animi magnitudo

rudine superare. Ambos illos sapientissimos Patres conscriptos libenter hoc loco nomino, quia Cardinalis P. ALDOBRANDINI virtus admirabilis, & Modestiae gloria, maximè recreatur grauiissimo vtriusq; testimonio.

- 1 Quòd nec salutare: nec gratum quicquam sit magis quàm modus.
- 2 Quòd turpe sit, in rebus prosperis, animo efferri:
- 3 Quòd sine modo, & Modestia, ars omnis iaceat, & doctrina.
- 4 Quòd non adeò quid fiat, quàm quo quid modo fiat, sit spectandum.
- 5 Quòd confors modestiae sit verecundia.
- 6 Quòd Modestia, quasi cos quedam, sit verecundia.
- 7 Quòd Pudor non solum vim virtutis, sed etiam numinis habeat in mulieribus.
- 8 Quòd Pudor naturam maximè attingat humanam.
- 9 Quòd Pudor virium plus habeat, quàm metus.
- 10 Quòd Pudoris color censebatur, apud veteres, habere non solum ornamentum virtutis, sed etiam numinis.
- 11 Quòd olim nihil in Rege statuebatur esse potius Modestia.
- 12 Quòd ubi non adsit modestia, ibi minimè seruari possit concordia.
- 13 Quòd minimè verbosa sit Modestia.
- 14 Quòd, & Prudentia, & verecundia, & silentij comes sit Modestia.
- 15 Quòd, ut Modestia virtuti: ita Modestia ornamento sit silentium.
- 16 Quòd Ars statuatur dicendi: virtus vero silendi.
- 17 Quòd Principis sit plurimum coetare, minimum loqui: summa verò quaq; operari.
- 18 Quòd alijs dicere: alijs magis expediat tacere.
- 19 Quòd, & decorum, & tutum sit cum Principibus minimū loqui.
- 20 Quòd sapienti probanda est magis, quam appetenda Regum familiaritas.

QVOD NEC SALVTARE, NEC
gratum quicquam sit magis, quàm
modus. I.



DIOGENES Cynicus eos solet irridere, qui propter bonā valetudinem sacrificium facerent: deinde iura sanitatis cibo, potu, atq; omni luxuria violarent. Nec quicquam est homini insulsius, quàm à medico id præcari: quod ipse sibi potest largiri. Dicebatur autem nihil neq; tenuitate, ad valetudinis firmitatem: neq; morum facilitate, ad benevolentiam esse accommodatius. vtrumq; docuit etiam Imperatorum fortissimus Annibal. Nam, vt Græci referunt scriptores, neq; cùm, in Italia bellum gessit, neq; postquàm in Africam redijt, cubans cœnauit, ampliusq; vini sextario indulgit: summa quoq; comitare, & gratia, secum agere volentes, semper exceptit.

QVOD TURPE SIT, IN REBUS
prosperis, animo efferri. II.



SATIS vindictæ est, nolle nocere, cùm licet vl-
 cisci. Itaq; Persæ cùm supplicium de illustri viro
 sumpturi essent, vestem ei, & Tiaram detrahe-
 bant, atq; vtramq; suspensam, pro homine
 verberabant. Nec est inconsiderata suspicio: sed virtutis
 laus, principem paululum de suo iure, in vliscendo recede-
 re. itaq; cuidam interroganti, quid in rebus secundis, turpe
 esset, insolescere respondit. Non obscurum est in Archida-
 mo Agesilai filio testimonium. Nam cùm à Philippo Ma-
 cedonum Rege post cladem ab eo acceptam, literas aculea-
 ras, &

ras, & plenas terroris accepisset : Si tu respondit, ò Rex metieris umbram tuam, illa nihilo maior erit, quam erat ante victoriam. grauiter admonens non esse sapientis animo turgere, in rebus secundis.

*QVOD SINE MODO, ET MODESTIA
ars omnis iaceat, & doctrina. III.*

EST modestia sciētia oportunitatis, atq; idoneorum ad agendum, temporum magistra, & domina. Interrogatus igitur, quis esset sapientissimus, qui alijs dixit, præcellit modestia. Nec deest antiquitatis auctoritas. Etenim Menedemus Erriensis cū videret multos, in doctrina, nec modum, nec modestiam tenere, solitus est dicere plurimos nauigare Athenas, studiorū gratia : qui primum essent sapientes : deinde fierent Philosophi : tam progressu temporis, euaderent idiotæ : omnium autem maximè censetur profecisse Socrates, qui dixit hoc vnum se scire, quod nihil sciret.

*QVOD NON ADEO QVID FIAT,
quàm quo quid fiat modo, sit spectandum. IV.*

NON est in iudicio præpropere habenda fides. Nam credulitas iudicis sæpe calamitas est innocentis. Solitus igitur est dicere, virtutem sine modo, fieri vitium. vetus huic eius sententiæ consonat prouerbum. *πλεον ἡμισο πάντες* : didium plus toto. Sicuti in hoc prouerbio sita est aurea mediocritas : ita in ipsa mediocritate, vis omnis consistit modestiæ. Nam vt studium quidam modus est, inter negligentiam, & curiositatē : ita virtus omnis refugit quod aut parum,

aut nimium est. Laudatur itaq; Archidamus; cuius filia cum essent donata à Dionysio vestibus præciosis, recusavit pater, ne, ijs induta turpiores fierent. Etsi enim pulchræ erant vestes: quicquid tamen sit præter modum, est turpe.

*QVOD CONSORS MODESTIÆ SIT
verecundia. V.*



SCISCITANTIBVS amicis, quo colore maximè commendaretur mulier, pudoris respondit. est enim verecundia cupiditatum modatrix. verum virtus hæc magis est feminae, quàm boni viri. Minimè enim virum bonum decet verecundari, cum ex erratis nascatur verecundia. Quare hæc laudatur in iuvene, vituperatur in sene. in illo enim rubor virtutis est color: in hoc dementia, & improbitatis. Demades igitur confuevit dicere pudorem in muliere, arcem esse pulchritudinis, & custodem officij. Nam plures pudore peccandi, à peccato sæpè abstinere: quàm honesti studio, & virtutis amore.

*QVOD MODESTIÆ QVASI COS
quadam sit verecundia. VI.*



SOLITVS est dicere, vbi adsunt verecundia aculei tibi cupiditatem rationi parere. Nam frenum turpitudinis est verecundia. Hæc autem duplex est: vna, qua quis peccare, altera qua peccasse erubescit. Illam laudare soleo: hanc nunquam non vituperare. illa enim virtutis habet adumbrationem: hæc peccati ignominiam atq; sicuti apud Medicos magis præclarum est præcauere à morbo, quàm morbum curare: ita pudor is magis est probandus, qui culpam impedit, quàm qui corrigit admissam.

QVOD

QVOD PVdor NON SOLVM VIM
virtutis, sed etiam numinis, habeat in
mulieribus. VII.



SCISCITANTI cuidam, cūm forrè ageretur, de admirabili animi præstantia, quæ, cum formæ dignitate, **MARGARITA** Aldobrandina cōmendatur, quænam virtus esset mulierum, non consilium dixit, nō armata fortitudo: sed verecundia. Hæc enim non solum oris figuram, sed etiam animi pulchritudinē honestat. Est autem verecundia, à verbo vereor dicta, quod verbum, ut spero, est rerum futurarum. Sed hoc inter metum, & verecundiam interest, quod ille sit periculi: hæc nominis, & famæ: ille in corde, hæc sita sit in ore, & oculis. pudor dicitur alio nomine, quasi pudendorum timor, qui situs est in incontinentiæ dedecore. Eorum decus quoniam vix reperitur, iccirco Pudorem cum Nemese in cœlum euolasse canit Hesiodus, æneo seculo. Quia autem magister, & dominus continentiæ est pudor, Xenophon in Symposio pudorem Deū fecit, pudorisq; Ara Athenis fuit, in Acropoli, ut ait Hesychius.

QVOD PVdor NATVRAM MAXI-
mè attingat humanam. VIII.



CVM nonnullos aliquando cerneret perfricta fronte, in flagitiorum sordibus inuolutari, dixit hominem, sine pudore, & pudicitia, amittere, & nomen, & naturā hominis. Nec id falso quidem. Nulla enim animans, præter hominem, sensum vllum habet pudoris. Itaq; veteres, quia natura solis vultum dedit hominibus,

minibus, consueuerunt dicere impudentes, os non habere. hinc laudatur Catonis Maioris in Lentulū dicacitas: ille enim cum Lentulus in eius faciem expuisset, affirmabo omnibus dixit, Lentule, falli eos, qui te negant os habere. argutè hominis impudentiam notauit, etsi de spūti natura dicere videbatur.

*QVOD PV DOR VIRIVM PLVS
habeat, quàm metus. IX.*



INTERROGANTI cuidam quid in humano genere, dominaretur naturæ, & affectibus, pudor, respondit. cōprobarunt id, multis antè seculis, sui exemplo Milesiæ virgines. Nam cum in dies propter vitæ cōtemptrum, laqueo vitam finirent: decreuerunt Milesij, vt virgines nudæ, cum eodem laqueo, quo essent suffocatae, efferrerentur. itaq; quas non potuit mortis metus: turpitudinis pudor in officio retinuit.

QVOD PV DORIS COLOR CENSEBATUR, apud veteres habere non solum ornatum virtutis, sed etiam numinis. X.




INTERROGATIVS quis inter colores omnium esset pulcherimus, verecundiæ respondit: est enim pudor virtutis apparitor, & erroris simul censor. Itaq; Pudoris simulacrum in Laconia spectabatur. Fuit item olim Numus, cuius inscriptio erat, Sabina Augusta Hadriani Aug. ab altera parte, dea sedēs velo faciem cooperta, & digito dextræ, indice ad iugulum admoto conspiciebatur, cuius inscriptio erat Pudicitia. Hæc. n. vis est pudoris. & pudicitia, vt qui pudens sit, multò magis dedecus quàm

quàm mortem timeat. præclarū est Iulij Cæsaris exemplum, qui tribus & viginti vulneribus confossus, vt verecundiam, si minus vitam poterat, retineret: in ipso mortis puncto, togam vtraq; manu dimisit, vt inferior pars corporis recta collaberetur, nec quicquàm cadendo, non modestum admitteret.

QVOD OLIM NIHIL IN REGE

statuebatur esse potius Modestia. XI.



SOCRATES Cygni nomen cū sibi vsurpasset: Pyrrhus Aquilæ: Accipitris Antiochus, Dixit quia Cygnus est sapientiæ Typus, solusq; Deus est sapiens, arrogantius à Socrate id esse factum: à Pyrro contra abiectius, eò quòd hæc ales Symbolum sit fortitudinis in bello, qua, iure vti volentibus, nihil accidit opus esse: omnium sapientissime fecisse Regem Antiochum, eò quod Accipiter interpretationem habeat modestiæ, quæ nihil est, nisi veluti quædam virtutum omnium mensura. Itaq; sicuti aues cæteræ sursum volaturæ, per circuitus ascendunt, atq; id cum faciunt transuerso, & tortuoso volatu vti coguntur: ita solus accipiter sursum versus tendens, recta effertur, eiusq; delapsus ad terram, recto tendit tramite. non solum enim modestia est ars rerum agendarum, sed etiam, & loci, & temporis, quo quid agendum sit.

QVOD UBI NON ADSIT MODESTIA,


ibi minimè seruari possint concordia. XII.



EIVS in primis dicebat laudandam esse modestiam, cui cum plurimum liceret, minimum tamen estimaret decere. est in hac leui admonitione, gra-

uis aduersus insolentes obiurgatio. Nam Pierus, ut est in fabulis, ex Euipe vxore nouem suscepit filias, quæ propter cantus suauitatem animo elatæ, nihil sunt veritæ Musas ipsas, ad certamen cantus prouocare. quocirca à Musis superatæ in totidem picas sunt mutatæ: factumq; est, ut deinceps Musæ earum nomen, veluti trophæum vsurpantes, Pierides sint cognominatæ. At cur illæ in picas? quia ubi deest modestia, ibi semper indignatio prælens est, & discordia, ut patet in fabula. Nam pica Marti, qui gaudet dissidio, est sacra.

*QVOD MINIME SIT VERBOSA
modestia. XIII.*



SCISCITANTI cuidam cuius maximè, inter quosdam disertos viros, probaret eloquentiam: eius respondit, qui nouit in loco tacere. plura enim decet sapientem tacere, quàm loqui. atq; silentium in primis, mulieri, & fatuo maximum est ornamentum. vim enim habet responsionis, quæ caret reprehensione. Nam vituperari potest oratio: non potest silentium, quod apud sapientes, est responsi loco. Itaq; Simonides modestiam cum seruaret silendo potius, quàm dicendo;

interrogatus, cur id faceret, quia respondit

nunquam tacuisse me pœnituit:

pœnituit sapè esse

locutum.



QVOD ET PRVDENTIAE, ET VERECUNDIAE, & silentij comes sit modestia. XIV.



VM nihil sit honestum, quod modestia vacat: interrogatus ab amicis, qui in rebus agendis, decoraretur ornamentis modestiæ: qui tria respondit præcepta tenet Socratis: hoc est, cuius mentem prudentia: faciem verecundia: linguam verò honestas silentium. Nec enim ab eo res magnæ sustineri possunt, cui tacere est graue: nec loqui nouit, qui tacere nescit: in iurgiis verò aciores sæpè sunt aduersus perulantes, & maledicos silentij, quàm orationis aculei. præclarum igitur in eo est modestiæ genus, qui & tacere, & loqui in loco didicit.

QVOD VT MODESTIA VIRTVTVM: ita modestia ornamentum sit silentium. XV.



ES est, inquit, sapientiæ plena silentium: Ideoq; fatuus, à fando dictus est, quia qui à sapientia nudus est, silentium nescit tenere. Deus igitur qui sapientissimus est: parcissimus est orationis. Quare homines dicendi: superos tacendi habemus magistros, quorum in sacrificijs vnice laudatur silentium. Romani igitur olim Angeronam Deam fecerunt silentij: cuius os, vt scribit Macrobius obducebatur indice, vt silentium denunciaret. Est enim index sacer prudentiæ, quæ docet, & loqui, & tacere. Angenora autem ab angendo est dicta, eò quod, vt refert Verrius Flaccus, eos ab angore, & animi sollicitudine, ad maximam voluptatē traducat, qui suos angores, & molestias, vbi res, tempusq; postulat, ferunt dissimulando.

QVOD ARS STATVATUR DICENDI:
virtus vero silendi. XVI.



INTER totius Græciæ sapientes, Pittacum in modestiæ doctrina, dixit maximè esse laudandum. Hic enim nihil, in hac vna virtute, potius ducebat esse silentio. Quare ab Ægyptiorum rege rogatus, vt quod optimum esset, ex animante ad se mitteretur: ille linguâ misit: deintegrò item rogatus, vt pessimū quod esset mitteret, linguâ pariter mandauit, innuens nihil esse, neq; melius si modus adsit, neq; deterius si absit, oratione. omni enim gladio acutior est oratio: quæ non solum armatos, sed et procul absentes lædit. Anacharsis igitur linguæ procacitatē, omni flagitio libidinis fecit capitaliorem: nec id verbis solum: sed etiā signis omni sole clarioribus. Nā in conuiuio apud Solonē, vt hoc ipsum testatū relinqueret, ita decubuit, vt læua compri mi pudenda viderentur: os autē eò dextra arceret, q̄ freno valentiore putaret linguā indigere. Nec enim facile tot recensueris hoīes, qui venereorū intēperantia, calamitatē sibi cōtraxerint: quot ciuitates, Principatusq; arcanorum dissoluerit enudatio.

QVOD PRINCIPIS SIT PLVRIMVM
cogitare, minimum loqui: summa verò quaq;
operari. XVII.



NIHIL, inquiebat, est princeps, nisi reip. villicus, à quo imperij voragines, & scopuli non verbis, sed factis sunt infringendi. Quare cum nihil sit neq; gloriosius, neq; difficilius, quàm audire, & silere, haud quicquam est principis dignitati consentaneum magis, quam silentium.

Nam

Nam cur aut. Aquila apud Romanos, aut Crocodilus apud Ægyptios Principis Hieroglyphicum constituebatur? ut rem docerent esse regiam silentium, atq; agendo, non dicendo administrari imperium. Illa enim sola inter alites volat sine clangore: hic autem, ut inter aves Ciconia, lingua, & voce destituitur. Nam quasi quædam regula benè agendi, & intelligendi, quorum causa homo in lucem est editus, in silentio vno est posita. Siquidem quæ mala nunquam audimus: illa nec cognoscimus, nec incognita appetimus.

*QVOD ALIIS DICERE, ALIIS
magis expediat tacere. XVIII.*



INTERROGANTI cuidam qualis esset ars, & dicendi, & tacendi: qualis est, respondit, natura magistra, in Cicadarum genere. Responsio certe plena ingenij, & doctrinæ. Nam inter Cicadas mares, quæ apud Hesiodum dicuntur Acharæ, perpetuo canunt: foeminae contra, quæ Tettigonæ nuncupantur, voce destitutæ, perenni silentio utuntur. Hoc ipsa loqui videtur similitudo, nunquam neq; sapienti esse tacendum: neq; stulto loquendum. Res enim est non solum honesta: sed etiam turissima imprudentibus silentium. Etenim in rebus bonis, habetur pro asseueratione: in peruersis pro inficiatione: ac demum, ut vulgatum est, apud iurisperitos: expressa sapienter nocent: non expressa nunquam nocent.

QVOD ET DECORVM, ET TVTVM
sit cum Principibus minimum loqui. XIX.



ITSI non tam exornationis in dicendo, quàm veritatis momenta quærenda sunt: vera tamen omnia ingeruntur vberius, quæ funduntur cum orationis suauitate. Ita sapientissimus ille Antistes res sapè graues, & acerbæ, lenitate dicendi compensat. Itaq; à quodam equite, qui principum consuetudinem affectaret, interrogatus quid in eorum familiaritate, potissimum esset cauendum: plurimum, respondit, loqui. aurea certè, & magno philosopho digna sententia. Nec enim Callisthenes, si non cum Alexandro, sed cum æqualibus libertate loquendi vsus esset, miserandas in cauea pœnas dedisset suæ licentiæ.

QVOD SAPIENTI PROBANDA EST
magis, quàm appetenda Regum familiaritas. XX.



VM fortè de cæde in regia, patrata ageretur Car. Lotharingiæ, dixit Regum probandam magis, quàm appetendam esse familiaritatem. vitam enim perdit is, qui eorū gratiā amittit. Idipsum sentiens Lacydes Cyrenæus plurimis promissis accersitus ab Attalo Rege vt in suam amicitiam, & regni societatem veniret: respondit Regi se ingentem gratiam habere: negauit tamen se venturum, eò quòd Philosophi, à Regibus, vt picturæ, & imagines, emicinus, non cominus sint videndi,

DE FELICITATE

TITVLVS XXIV.



I quæ datur, in hoc vitæ curriculo felicitas : non ea est, quæ vulgo videtur, vt pauperi, pecunia : ægroto sanitas, ignaro doctrina : sed hominis perfectio, quæ est iustè operari, & doctè sentire. Etenim non possidere, sed non egere felicitas est. Quare locuples potest esse miser : non potest temperas, rebus etiam destitutus, non esse beatus. Perfectio enim cupiditatis est temperantia : voluntatis iustitia : prudentia mentis, fortitudo partis irascibilis : atq; vt vno verbo dicam, perfectio hominis est sapientia, vt ignorantia, summa eius calamitas, & miseria. Sed duplex est felicitatis ratio, vna perfecta, quam qui habet, nihil est, quod amplius desideret : altera imperfecta, cuius Suppellex, in externis bonis est posita. Multum amo Cardinalis ALDOBRANDINI felicitatem : non parum summo duoseius Buccinutores IOANNEM BAPTISTAM Sormanum, & PETRVM ANTONIVM Magno-caballum, acres iuris, & iustitiæ propugnatores, qui tamen in eodem virtutis, & doctrinæ genere, sic inter se differunt, vt alter Romæ ius Pontificum : alter Medulani, in summo doctorum collegio, ius Cæsareum magis tucatur. Nam Sormanus vir æquissimus, sui ordinis dignitatem plurimo decorat virtutis splendore. Est enim tam acris ingenij, & sinceræ integritatis, vt cum lucro habeat ipsa corporis, & fortunæ detrimenta, tum vix vlla sit ciuitatis gloria, ad quam, per eius virtutem, non plurima fiat accessio. Siquidem

V 6

quena-

quemadmodum olim de Catone Censorio prædicabant Romani, optima est IO. BAPTISTÆ Sormani virtus, suadendi magistra: summus consulendi opifex, eius doctrinæ sensus: atq; maximus augendi imperij magister, iustitiæ fundus, & pietatis. Quare libenter ad recunditas Cardinalis P. ALDOBRANDINI virtutes illuminandas vtor tanti viri splendore. Cæterum PETRVS ANTONIVS Sapientissimi Senatoris HIERONYMI Magnocaballi filius, non solum nominis, sed etiam paternæ virtutis hæres, tanta pietate, & iustitia: ad laudes eas summi Antistitis vehitur, vt veluti cœlesti quodam Pegaso elatus, multa fundere videatur, quæ potius de cœlo, quàm ab homine videar capere, vt idipsum nunc loquuntur hæc Apophthegmata.

- 1 Quòd ex Virtute generis, semina quadam trahantur felicitatis.
- 2 Quòd non parua sint felicitatis adminicula in educatione,
- 3 Quòd non Minima pars felicitatis hauriatur è natione, & patria.
- 4 Quòd non Regni, sed Virtutis premium sit felicitas.
- 5 Quòd solus sapiens nouit bonis feliciter vti.
- 6 Quòd ex animo felicitas: ex corpore animus cognoscatur.
- 7 Quòd Virtus cum atate: felicitas trespasat cum Virtute.
- 8 Quòd felicitatem maximè attingat vir sapiens.
- 9 Quòd veluti quadam felicitatis fabrica sit, in temperandis affectibus.
- 10 Quòd felix sit, non qui bona possideat, sed qui bonus sit.
- 11 Quòd extra fines virtutis exulent omnia mala.
- 12 Quòd publica societatis felicitas, concordia est depascenda.
- 13 Quòd iuris aquabilitas, Urbis sit felicitas.
- 14 Quòd veluti quidam publica felicitatis cibus sit ciuium concordia.

Quòd

- 15 *Quòd Principis eloquentia non vacet felicitate.*
- 16 *Quòd in Principe non solum ingenij, sed etiam Imperij, facultas dicendi, oluat felicitatem.*
- 17 *Quòd iuris felicitas, in Principis eloquentia, maximè sit fundata.*
- 18 *Quòd ne Dictæria quidem principum, ab instructione publica felicitatis videantur nuda.*
- 19 *Quòd publica felicitatis opifices, sint Viri eloquentes.*
- 20 *Quòd dicendi facultas, veluti quoddam, ad felicitatem imperij, sit vehiculum.*
- 21 *Quòd feliciter imperet, qui manibus potius: quàm lingua loquatur.*
- 22 *Quòd in Imperio, felicitatis propugnaculum sit eloquentia.*

*QVOD EX VIRTUTE GENERIS,
semina quadam trahantur felicitatis. I.*



SOLITVS est dicere, magnam partem felicitatis esse benè nasci. Nec huic eius sententiæ, deest antiquitatis auctoritas. Nam cur à Poetis Theseus Neptuni: Hercules Iouis: Achilles Thetidis: Æneas Veneris: Romulus Martis dictus est filius? vt certe docerent virtutem generis, posteris esse veluti quandam suppellectilè felicitatis. Itaq; apud Spartanos legibus cautum erat, vt nemo matrimoniū contrahere posset, nisi præclaro aliquo facinore perpetrato. volebant enim nō prohibere matrimonium: Sed vetare ex timidorū matrimonio, ignauos nasci liberos. Atq; si propter appetitū matris, infantibus in vtero inuruntur nāui: quibus vitiorum maculis, ab improbis parētibus aspergentur infan-

infantium animi? Maior certè quidem ars est generandi hominem: quàm pingendi. Nam in pictura forma: in procreatione affectus etiam fingi debent.

QVOD NON PARVA SINT FELICITatis adminicula, in educatione. II.



VM aliquando de educatione puerorum incidisset oratio: dixit pluris esse benè institui: quàm benè nasci. Graue est non solum Ptolemæi Ægypti Regis testimonium, qui ex Lago patre gregario Alexandri milite natus, per virtutem, Regnum est assecutus: sed etiam naturæ singulare exemplum. Etenim si spinæ truncus surculo Perfici inseratur, melpila inde oriuntur maxima. Nam quod in reliquis plantis arbor non sua, sed surculi fert poma: ex eò fas est intelligere, naturam arte superari. hac autem opinione Philippus Macedoniæ Rex permotus, nato Alexandro, scripsit ad Aristotelem, non tam gaudere se, quod sibi natus filius esset, quàm quòd natus esset Aristotelis tempore, à quo erudiri posset.

QVOD NON MINIMA PARS FELICITatis, hauriatur è natione, & Patria. III.



VM interdum de patria, eiusq; nomine ageretur, quod denominationem habeat à patre: articulum à matre, quia vim & naturam retinet vtriusq; parentis: Dixit iccirco nihil in amore esse charius patria, quòd non minimam ansam mortalibus porrigat felicitatis. Nam quemadmodum alia regio, aliam plantam parit:

ita diuerſas nationes, diuerſi mores, & diſparia ingenia ſequuntur. Quare Plato tribus de rebus, ſuperis gratias agere ſolitus eſſe dicitur: primùm quia natus eſſet homo, quod generi tribuitur: deinde quoniam Socratis tempore, quo uſus eſt præceptore, quòd ad educationem refertur: tum deniq; quod Græcus, quod patriæ eſt, & nationis.

*QVOD NON REGNI, SED VIRTVTIS
præmium, ſit felicitas. IV.*



VIA vulgò homines, ubi pluſculum acceſſit pecuniæ, efferuntur animo: eumq; in primis tantum beatum ſuſpiciunt, cui ſunt amicitia, liberi, propinqui, affines, opes, honores, potetas, ac demum diuitiæ, interrogatus aliquando, quis eſſet felix, non qui Regna poſſidet: ſed qui Deo reſpondit, eſt ſimilimus, hoc eſt qui nec lædere, nec lædi nouit iniuria. alterum eſt facile: alterum tam difficile, ut qui hoc præſtat, nullos ſenſus in uiuo corpore, niſi virtutis videatur retinere. Nam, ut refert Sophocles, in Iouis tantum hortis aurea felicitas colitur.

*QVOD SOLVS SAPIENS NOUIT
bonis feliciter uti. V.*



VM in hoc vitæ curriculo, acres ſæpè ſunt dolorum aculei, nec hebetes iniuriæ morſus, quibus obiecta eſt hominis vita: ſolitus eſt dicere felicitatem eſſe voluptatem, quam nec mæror ſequeretur, nec turpitudine. Nam cui res eſt, & ingenium ſimul, is demum ad extremum uſq; vitæ nouit, frui bonis, In hanc tanti Antiftitis ſententiã venit

Pariter

pariter Antisthenes cū inquit nihil esse felicius, quā beatum mori. qui enim feliciter vitam obsoluit, nihil ei, quod melius agat, sit reliqui.

QVOD EX ANIMO FELICITAS:
ex corpore animus recognoscatur. VI.

SCISCITANTI cuidam vndē petenda essent felicitatis monimenta: incerta dixit, non tamen contemnenda ē corpore. Nam sicuti animus obses est felicitatis: ita corpus animi est simulacrum. itaq; Socrates cū Xenophontem rara indole vidisset, statim recognouit, quæ in eius animo semina essent felicitatis. ab eo igitur sciscitatus est, vbi fierent nundinæ, is cū appositē respondisset: interrogauit, vbi fierent boni viri, negauit se scire. tum Socrates me igitur, ait sequere: Nec enim frons tacita solum est animi oratio: sed etiam morum interpretes, & nuncia.

QVOD VIRTVS CVM ÆTATE:
felicitas crescat cum virtute. VII.

QVONIAM nescit virtus otari, crescitq; virtutis gloria cum ætate, dicebat eum esse felicem, cui vita fruendo contigisset, ad senectæ limen peruenire. Acta enim ætas, vt ait Cic. honestè, ac splendidè tantam affert consolationem: vt eos, qui ita vixerint, nec tangat ægritudo, & oblectet summa præmij expectatio.

QVOD FOELICITATEM MAXIME
atingat vir sapiens. VIII.



QUONIAM pauperem misericordia: diuitem sequatur inuidia: sapientem tranquillitas ab omni ægritudine remota, consuevit dicere eos esse felices, qui virtutum non solum habent cognitionem, sed etiam possessionem. Hoc vox ipsa etiam aperire videtur. Felix enim dicitur quasi fœtus legis: Beatus tanquàm bonis omnibus auctus: diues veluti diuinus, quod rebus nullis indigeat. Huc pertinet Paridis fabula. Nam quorsum illæ inter Palladem, Iunonem, & Venerem de elegantia formæ controuersia? tria si bene attendimus constituuntur vitæ genera: vnum intelligendi: agendi alterum: vltimum voluptati deditum, quod Ilij fuit exitium. qui vera intelligit doctus dicitur: qui iusta operatur, vir bonus nuncupatur: qui autem vtrumq; facit, sapiens nominatur, qui felix est, & beatus: Bisq; censetur viuere, quia vitam agit docti simul, & boni viri.

QVOD VELVTI QVÆDAM FELICITATIS
fabrica sit in temperandis affectibus posita. IX.



QUONIAM & virtus, & vitium ex affectu, non euentu, apud iurisperitos, penditur, dicebat felicitatis fabricam in temperandis affectibus esse sitam. Hos igitur maximè spectant, & iurisperiti, & medici. illi, quia ansam in maleficijs, habet affectus culpæ, & innocentia: hi verò quoniam in ipso affectu, sæpe residet salutis vis, & medicina. Itaq; Galenus scribit ægros quotan-

quotannis non paucos saluti, ex animi perturbationibus esse restitutos: & Æsculapius Mimos etiam risus conciliatores adhibuit sæpè medicinæ loco.

QVOD FELIX SIT NON QVI BONA possideat, sed qui bonus sit. X.



VIA felicitatis commendatio in virtutis alicuius inuolucris, oportet sit demersa: interrogatus, cur qui boni viri sunt, contemnant diuitias: quia dixit, virtus non eget externis bonis: quibus nec augeri, nec comminui potest. Itaq; laudatur Diogenes, qui præclarius duxit pecunijs non egere, quàm abundare.

QVOD EXTRA FINES VIRTUTIS exulent omnia mala. XI.



VM ex probitatis coloribus, & doctrinæ pigmentis, benè institutæ ciuitatis forma est deducenda: quærenti quænam ciuitas præ cæteris esset felix, & beata: ea respondit, quæ non eget virtute. Virtus enim vrasserat Zeno Criticus, Stoicorum princeps sola sufficit, ad bene beateq; viuendum. Etenim si in Phalaridis tauro vratur, qui bonus est, quia virtus est summum bonum, nec vri potest: in ipso incendio felicitatem minimè deponat.

QVOD

*QVOD PVBLICÆ SOCIETATIS
felicitas, concordia est depascenda. XII.*



SOLITVS est dicere, ciuibus iter ad felicitatem, vna benevolentia semita patere: duo esse concordia vincula beneficium, & gratiam, quorum alterum benevolentiam connectit accipientium: altera largientium amorem, & studium stabili charitate confirmat. Communis enim spes, communisq; metus maximam concordiam parit. illa vt quæ animo concepimus bona consequamur: hoc, vt quæ imminet mala, subterfugiamus.

*QVOD IVRIS ÆQVABILITAS,
urbis sit felicitas. XIII.*



SCISCITANTI cuidam, qua arte communis societatis felicitas, & concordia seruari potissimum à Principe: iuris respondit æquabilitate. Hoc vno responso docuit, Principi cauendum esse, ne maior poena sit, quàm culpa: neue iisdem ex causis, alij plectantur, alij impune dimittantur. Nihil enim iniquius tulit P. R. quàm ab Imperatore Domitiano in eodem crimine depræhensos pauperes capitali supplicio damnari: opulentiores, ac diuites pecunia mulctari, & patrimonijs exutos absolui.

*QVOD VELVTI QVIDAM PVBLICÆ
felicitatis cibus sit, ciuium Concordia. XIV.*



CONSVEVIT dicere urbis felicitatem non solum nasci ex ciuium concordia, sed etiam eius veluti quodam pabulo nutriri. Hinc verus illa Salustij sententia.

sententia. Concordia parua res crescunt: discordia maximè dilabuntur. Ex huius eluione pestem omnem imperij parari scribit Xenophon; Platoq; in lib. de Rep. eam pluribus detestatur rationibus. Hæc quippè illa est furia infernalis, quæ à Poetis Alecto dicitur à Græcis ἀλκυτο dissoluo, quod regna vniuersa, per discordiam dissoluantur, & intendant. Itaq; Antisthenes concordiam inquebat, quouis muro esse firmitus munimentum.

QVOD PRINCIPIS ELOQVENTIA
non vacet felicitate. XV.

PRINCIPI suam etiam tribuebat eloquentiæ felicitatem. interrogatus enim quis feliciter regeret, non qui opulentia dixit, aut robore plurimum pollet, sed eloquentia. Hæc enim sola potest omnia rationis imperio subijcere. Homerus itaq; Vlyssi cùm artem tribuit imperandi, illum maximè eloquentem facit. Hesiodus verò Reges eos, qui Deo sunt chari, omnes ait, diuinitus eloquentia donari: qua detracta nulla diuturna potest remanere Principis gloria. Quocirca reprehenditur Pericles, qui cùm in re bellica, & consilio rerum gestarum floreret gloria, voluit stylo neglecto, Athenis à Phidias pingi, in scuto Mineræ, cum Amazone pugnans. Multo enim maior est styli, quàm picturæ gloria. illa igitur iure C. Cæsarem compulit vt rerum à se gestarum scriberet commentarios. Nam imaginis pulchritudo pictoris est opus: quæ autem virtus scriptis celebratur, non scriptoris est, sed eius, qui ea virtute fuit honestatus. Quare præ stylo iacet omnis imaginum gloria.

QVOD IN PRINCIPE, NON SOLVM
ingenij, sed etiam imperij, facultas dicendi alar
Felicitatem. XVI.



INTERROGATVS quæ facultas dicen-
di, in Principe vim oleret felicitatis, ea, re-
spondit, qua floruit C. Cæsar. Is enim om-
nium oratorum facultatem exæquauit, ora-
tionis lepore. Homerus Menelaum dul-
cem in dicēdo fuisse tradit: breuem tamen.
Nam breuitas in Principibus laudatur. Lacones ex omnibus
Græcis, breui genere dicendi laudantur, ac in primis eorum
Rex Agesilaus.

QVOD IURIS FELICITAS IN PRIN-
cipis eloquentia, maximè sit fundata. XVII.



AUSTVM felixq; iuris propugnaculum, in
Principis eloquentia, dicebat esse fundatum.
Testis est Iulianus Cæsar. Nam Delphidius ora-
tor cū aliquando Numerium Narbonensis
prouinciæ paulò antè Præsidem repetundarum accusaret: isq;
documentorum inopia, in ipso cursu orationis deficeret, ex-
clamauit optime Cæsar, Ecquis nocens esse poterit vsipiam,
si negare satis fuerit? tum scite Iulianus inquit, Ecquis inno-
cens fuerit, si accusasse tantum satis erit? Hoc vno di-
cto, & innocentem virum seruauit, & pe-
tulantem simul tabulam
repressit.

QVOD

QVOD NE DICTERIA QVIDEM

*Principum, ab instructione publicæ felicitatis
videantur nuda. XVIII.*



INQVIEBAT Principum dicteria nunquam ad imperij felicitatem, non esse plenam instructionis, & disciplinæ. vulgare est, & peruagatum Annibalis exemplum. Nam Antiochus Populo Romano bellum illaturus, cum copias in ordinem duxisset, non tam armis instructas, quam auro, & argento ornatas: Annibalem rogauit, num satis eas Romanis esse putaret, tum Pœnus, satis, inquit, esse puto, etsi sunt auarissimi. Rex de victoria rogabat: ille de præda respondebat.

QVOD PVBLICÆ FELICITATIS

opifices sint viri eloquentes. XIX.



SOLITVS est dicere publicæ felicitatis opifices, & Architectos, in Imperio esse viros eloquentes. Itaq; Agamemnon apud Homerum, principes aliquot exoptans, ad Troiam expugnandam, non Achilli, non Diomedis: Sed Vlyssi, & Nestori, qui facultate dicendi plurimum valebant, optabat similes. Sic Pyrrhus Cineam dilexit: Sic Alexander Oratorem Phocionem amauit, ut victo Dario, cum Magnus ex virtute cognominaretur, nulliq; mortalium per literas salutem diceret, Phocioni tamen, & Antipatro, in ipso literarum ingressu, & vestibulo, plurimum impertiret salutis.

QVOD

QVOD IN DICENDI FACVLTA TE

*veluti quoddam, ad felicitatem Imperij
sit vehiculum.* XX.



VIDAM interroganti quod imperij esset, ad felicitatem vehiculum: non armati exercitus robur, dixit, sed vis, & facultas dicendi. Itaq; tanti apud Alexandrum Magnum fuit Ilias Homeri, vt eam, rei militaris viaticum, atq; virtutis, & gloriæ officinam nominaret. Nec eloquentiæ præsidio modo, sed etiam eloquentium virorum familiaritate adiurus Magnus euasit. Probauit id etiam per Onesicrum oratorem, quem in bello nunquam à se dimisit, resq; à se gestas literis ab eo mandati voluit.

QVOD FELICITER IMPERET, QVI

manibus potius, quàm lingua loquatur. XXI.



VONIAM par est in Rep. vt imperet qui plus sapiat, obediat, qui minus: atq; vt sapientia ingenij: ita sapientiæ decus est eloquentia, interrogatus aliquando quos potissimum inter viros eloquentes probaret, eos dixit, qui moribus potius, quàm verbis fidem faciunt. Nam qui benè loquitur, nec rectè viuit, similis est, vt Diogenes solitus est dicere, Citharæ, quæ prodest audientibus, ipsa verò nec sentiat quicquam, nec audiat.

QVOD IN IMPERIO FELICITATIS
propugnaculum sit eloquentia. XXII.



V M eloquentia non sit alicuius doctrinæ
consors, & socia, sed omnis doctrina, con-
suevit dicere, nullum esse imperij vallum fir-
mius: quàm quod in eloquentiæ campo est
fundatum. Nam cur Argus, vt est in fabu-
lis, à Mercurio capite est truncatus? cedit
prudencia, in qua & consilij, & armorum vis omnis est posi-
ta, eloquentiæ: non eloquentia, in rerum deliberatione pru-
dentiæ. Iccirco enim Mercurius gestat caduceum, qui à ca-
dendo est dictus, quod eloquentiæ interuentu, statim cadant
controuersiarum tempestates omnes, & procellæ. Non te-
merè igitur olim Athenis Statua Mercurij spectabatur
quadrata. Nam quadrat eloquentia perso-
nis, rebus, atq; locis vniuersis, nec
vis, nec dolus vllus ei po-
test reniti.

Laus Deo.





